

V I T A  
B E A T I  
J O A N N I S  
F R A N C I S C I  
R E G I S

è  
SOCIETATE JESU.

*Scripta Gallicè*


A  
R. P. DAUBENTON  
ex eadem Societate ;

Et in latinum sermonem con-  
versa ab ejusdem Societatis  
Sacerdote.



Bayerische  
Staatsbibliothek  
München

CLEMENTI XI.  
PONTIFICI MAXIMO.  
SANCTISSIME PATER.

 *T* opusculum hoc offerre  
SANCTITATI VESTRÆ, ad ejus  
pedes humillimè prostratus, au-  
sim, multa me hortantur. Pri-  
mum quòd hic libellus vitam & res gestas præ-  
stantis Missionarii complectitur, cui, perinde ac

SANCTITATI VESTRÆ, contigit Joannis Francisci nomen in sacro fonte sortiri: deinde, quod solitos tribui cælitibus in Ecclesia Catholica honores eidem ipsa novissime decrevit. Quarum virtutum contractam imaginem in Beato viro cernet, illæ splendorem suum mutuantur à SANCTITATIS VESTRÆ approbatione, quæ destitutæ forsitan in tenebris & oblivione jacuissent. Quæ verò leget miracula, quamvis omnibus veritatis notis insignita sint, fidem tamen integram apud Fidelem populum, nisi per Apostolicam auctoritatem confirmata, non invenirent. Itaque si jam ejus imagines aris impositæ coluntur, si ejus laudibus templa personant, si ejusdem memoria in benedictione posthac semper erit, totum hoc debet Decreto SANCTITATIS VESTRÆ, à qua relatus est in eorum numerum, quos gloriosâ Beatorum appellatione ornamus. Ceterum hoc beneficium eò pluris à Gallia fieri par est, quod egregius iste Missionarius solus ex ea gente sit, quem à tribus amplius seculis Romana Sedes altaribus imposuerit.

Sed licebitne mihi SANCTISSIME PATER, dicere quod sentio? Dum servi DEI gloriæ consulit SANCTITAS VESTRA, suæ quoque quodammodo



*do consuluit. Nemo quippe vitam Beati viri  
leget, quin expressas in ejus virtutibus, CLE-  
MENTIS XI. virtutes agnoscat: in illius ex-  
imia probitate hujus mores integerrimos; in eo  
bello quod ille perpetuum & acerrimum gessit  
cum improbis, imaginem ejus belli, quod DEI  
& Ecclesiae hostibus inferre SANCTITAS VE-  
STRA non cessat: in illius assidua contentione ac  
studio indefesso revocandi hæreticos ab errore,  
constantiam & fortitudinem qua nostrorum tem-  
porum hæresim opprimere studuit: in illius er-  
ga pauperes tenerrima caritate, qua dum vixit  
eos ubique complexus est, paternam VESTRÆ  
SANCTITATIS pietatem, quā non solum ipsorum  
calamitatibus commovetur, verum etiam easdem  
insigni, ac pæne prodiga, liberalitate sustentat,  
nec dubitat æs alienum, ad ferendam miseris  
opem, contrahere.*

*Beatus Missionarius in deliciis semper ha-  
buit obire ministeria vel infima, ut pauperibus  
inserviret; quis verò, dignum quod Angeli pa-  
riter & homines admirentur, spectaculum esse  
neget, videre accumbentes ad mensam summi  
Pontificis pauperes vel maxime nauseosos, qui-  
bus*

*bus ministret ipse, & abjectissima obsequia lætus exhibeat? Ad quem facilius unquam aditus extitit? cujus unquam aures fuerunt apertiores ad audiendos mortales omnium miserrimos? cujus manus promptiores, ad eosdem sublevandos? Ea P. Joannis Francisci Regis comitas erat in congressu familiari, nemo ut ejus illecebris resisteret; quis privatim auditus à SANCTITATE VESTRA, non suavissime victus ejusdem blandissima benignitate discessit? Quis de CLEMENTE XI. dictum verius non fateatur, quod olim Petrarcha de CLEMENTE VI. prædicabat? Nulli major inest clementia, nomen ab ipsis Dignum rebus habet.*

*Beatum Regis in victo quodam animi robore, ac plena cælestis unctionis lenitate superi ornaverant, qua gemina dote instructus sic Evangelica exercebat ministeria, ut regeret animos arbitratu suo, & imperium quoddam in eos obtineret. Quis hætenus SANCTITATEM VESTRAM audivit verba de superiore loco facientem, quin victtricem animorum facundiam miraretur, nec non plenam ardoris, gratiæ, & dignitatis actionem, quâ insignes illas Homilias pronun-*

*nuntiat , in quibus eruditio , pietas , eloquentia  
sic inter se certant , ut meritò dubites cuinam  
primas deferri oporteat.*

*Apostolicus viri sancti labor sæpius iucun-  
diusque versatus est in explicanda pueris & po-  
pulo Christiana doctrina ; quis verò non suavif-  
simè afficitur , aut cui præ gaudio collacrymari  
non lubet , cùm TE , SANCTISSIME PATER ,  
intuetur à solio tuo descendere ad exponenda ru-  
dibus agrestium liberis prima religionis elemen-  
ta , illos interrogare , ut quilibet è vulgo Missio-  
narius solet , illis manu propria distribuere , quæ  
valere possint ad teneras mentes amore doctrinæ  
Euangelicæ , ejusque cognoscendæ studio , inflam-  
mandas ? Hæc procul dubio sua sponte venient  
in mentem iis , qui opusculum hoc evolvant.  
Cùm verò cogitabunt quàm sibi durus asperque  
fuerit vir sanctus , occurret statim ipsis constans  
illa severitas SANCTITATIS VESTRÆ , quâ sibi  
denegat , quæ moderatissimus quisque licere sibi  
putat : illa victoria , qua se ipsam adeò fortiter  
vincit , dum caritatem erga eos , quos habet in  
vita conjunctissimos & amantissimos , tam sanctis  
arctisque limitibus circumscribit : asperitas il-*

la, & in cultu victuque duritas, qua sibi non tantum supervacanea sed etiam necessaria subducit. Cum insatigabilem Missionarium legent vires immensis attrivisse laboribus, quorum tandem oppressus pondere succubuit; illico animum indefessa SANCTITATIS VESTRÆ contentio, quā gravissimis negotiis ita se totam impendit, ut variis incommodis tentata non semel fuerit ejus valetudo, nec levem Orbi Christiano solitudinem ac metum injecerit. Nec dubium quin tam assiduo labore fracta penitus concidisset, nisi DEUS Ecclesiæ suæ invigilans valetudinem tam pretiosam, tam necessariam continuo propè miraculo sartam tectamque conservasset.

Quàm justa, quàm ampla surgeret mihi laudum seges, si persequi fusiùs aggrederer illam oris majestatem tam suavi humanitate temperatam, ut amorem pariter & venerationem conciliet? illam amplitudinem mentis, & sublimitatem, quæ in minimis juxta & maximis rebus elucet? illam perspicacitatem, quæ omnia sic pervadit ac penetrat, nihil ut ipsam effugiat? artem illam scribendi egregiè ac dicendi, in qua  
supe-

*superiorem habet neminem? illam eruditionis  
copiam, Latinas litteras & Græcas, sacras &  
profanas; antiquas recentēque, complexam?  
Ne singillatim hæc omnia persequar excludor E-  
pistolæ angustiis: tum autem istas naturæ præ-  
claras dotes omittendas hæc duxi, quæ, si hu-  
mana spectentur ornamenta, magnum effice-  
rent Principem; & eas duntaxat commemo-  
randas, quæ cælestis gratiæ partus cum sint,  
hominem Numini acceptum, ac MAGNUM CO-  
RAM DOMINO reddunt; & quibus SANCTI-  
TAS VESTRA similem se illi præstat, quem aris  
colendum imposuit.*

*Ea sunt SANCTISSIME PATER, quibus ad-  
ductus, magnopere optavi, ut augustum SAN-  
CTITATIS VESTRÆ nomen extaret in hujus lu-  
cubrationis limine. Non solum ut heroicis fa-  
cinoribus, quæ referuntur in hac Vita, ponde-  
ris plus accederet; verum etiam ut palam ap-  
pareret morum ac virtutum similitudo, quæ in-  
ter SANCTITATEM VESTRAM, & BEATUM  
JOANNEM FRANCISCUM REGIS intercedit. De-  
nique lætatus sum oblatam esse mihi occasionem  
omnibus testificandi singularem SANCTITATIS  
VE-*

*VESTRÆ erga me benevolentiam ; Simulque  
memorem & gratum pro summis ejus in me  
beneficiis animum , hoc qualicumque obsequii  
& venerationis meæ pignore profitendi.*

**SANCTISSIME PATER ,  
SANCTITATIS VESTRÆ**

**Humillimus & obsequentissimus  
servus , ac filius ,**

**GUILLELMUS DAUBENTON ,  
è Societate JESU.**

# PRÆFATIO

**Q**Uæ me impulerint causæ ad novam hanc Beati Joannis Francisci Regis Vitam conscribendam, in quo elaboraverim ut quàm accuratissimè scripta prodiret, non alienum fore putavi, imò necessarium, explicare.

Ut servi DEI res gestas memoriæ proderem primùm suasse mea peculiaris quædam erga illum pietas, cui cùm planè intelligerem, plurimis obstrictum esse me beneficiis, ejus ope ac patrocinio impetratis, faciendum duxi, ut hoc publicum grati & memoris animi mei monumentum extaret. Speravi etiam, cùm cresceret in dies catholicorum erga eundem religiosa veneratione, meam ipsis probatum iri diligentiam in vindicandis ab oblivione variis facinoribus heroicis, quæ priscis ejus Vitæ scriptoribus exciderant.

Hæc tertia ejus editio numeratur. Omnium prima vulgari cœpta est anno 1650. decem annis post obitum servi DEI. P. Claudius *la Brouë* ejus auctor, P. Joanne Francisco Regis magistro usus, cum eodem postea familiariter in Societate vixerat. Non contentus iis, quæ per se ipse cognoverat, consuluit illos, qui testes extiterant laborum viri sancti Apostolicorum in Missionibus, & qui cum eodem in collegiis versati fuerant. Rescire singula nominatim studuit ex iis, quos ille superiores, confessarios, & amicos interiores, habuerat. Scribendi ratio sincera, & candida, sinè pigmentis & fucis, non levi argumento videtur esse ad probandam rerum veritatem, quas & diligenter collegit, & suis quasque circumstantiis accuratè vestit.

Alteram Beati Regis Vitam edidit P. Antonius *Bonnet*, & Societate nostra, eruditus scriptor, & aliis ingenii, doctrinæque laudatis monumentis clarus. Hic, ut certiùs omnia propiusque cognosceret, testatur sibi satis visum non fuisse, si audiret quæ à plurimis hominibus Societatis Beato viro intimis, narrabantur; sed præterea operam dedisse ut ea lustraret ipse loca, quæ sanctus Missionarius laboribus Evangelicis excoluerat. Styli, quo scripta est hæc Vita, nitorem purissimum & elegantiam jure laudaveris: at brevitatem meritò reprehendas, quæ legentium

tium spem ac desiderium non explet. Pleræque res gestæ servi DEI geminum hunc scriptorem latuere. Siluerunt, exempli causâ, Missiones ab eo peractas in diœcesibus Nemaufensi, & Montis-peffulani; eundem socium adscitum ab Episcopo Vivariensi, diœcesim suam lustrante: ereptam Calvino, & redditam Ecclesiæ catholicæ ejusdem operâ, illustrem feminam Ludovicam *de Romezin*: collectos fructus admirabiles è prædiis Comitum *de La Motte Brion*; nec non è pluribus oppidis, pagis, & vicis agri Vivariensis: demum nihil eorum singillatim sunt persecuti, quæ viri sancti obitum commendârunt. Satis habuere quæ ad ejus Missiones pertinebant in universum narrare, nulla facta mentione annorum, aut locorum, in quibus fuerunt celebratæ. Quid quod pulcherrima, quæ vitam ejus præcipuè illustrent, facta, sinè ordine referuntur, nec membra singula, inter se apta & coagmentata in unum quasi corpus Historiæ coalescunt; aded ut ab eo tempore quo theologiæ operam dedit, usque ad obitum, nihil temporibus locisque distinctum; omnia inter se permixta, & generalibus titulis comprehensa, in eundem quasi acervum conjiciantur.

Id potissimum causæ fuit cur tertiam viri Beati Vitam, ceteris ampliorem, & magis distinctam, componendam sumerem. Cum agebatur de illo in Beatorum numerum referendo, data mihi à superioribus meis fuit provincia ut negotium hoc, jam inchoatum, promoverem. Magna mihi per eam occasionem oblata sunt scribendi adjumenta, quæ historicis aliis non adfuerunt. Acta Canonizationis, summa fide & auctoritate confecta, quæ diu penès me habui, magnam mihi lucem attulerunt; nec paucas vitæ partes à duobus primis scriptoribus prætermittas, docuerunt; quippe testes, quorum testimonia in iisdem Actis referuntur, in omnibus minutatim recensendis diligenter & fusè versati sunt.

Iidem duo historici nè obiter quidem attigerant à secta Calviniana traductam ad Catholicorum partes lectissimam feminam Ludovicam *de Romezin*: id quemadmodum singulatim gestum fuerit, ex ipsius oratione, quam pro testimonio dixit accuratè, cognovi. Missiones Vivarienses vix nominaverant;  
earum



**earum** circumstantias, modum, ordinem, fructum, didici è testimonio rite perscripto Comit<sup>is</sup> *du Fay de la Tour Maubourg*. Auditus quoque inter testes Marlen<sup>sis</sup> parochus omnia, etiam levissima, exposuit, quæ contigerunt in tribus Missionibus, quibus vigilantissimi hujus pastoris parœciam Beatus Regis erudit. De illis altum apud primos scriptores silentium; itémque de uberrima messe, quam collegit ex oppidis Fay, Montefalconis, Montere<sup>gardo</sup>, sancti Agri<sup>p</sup>ani Fano, aliisque locis. Ex Anici<sup>i</sup> civibus permultis genere ac probitate spectandis, distinctissimè cognovi, quæcumque ad Evangelicam ejus in hac urbe vitam, & obitum in pago Lalovesco pertinent. Unum sanè in ejusmodi testium narrationibus desideratur, quoddum longam texunt Missionum imaginem, annum serè omittunt, in quem singulæ Missiones incidunt. Huic malo remedium peti-  
tum est è tabulario Romanæ Professorum Domûs. Cùm enim in eo diligenter asserventur catalogi, quos Provinciæ præsi-  
des ad Præpositum Generalem quotannis mittunt, & in quibus ministeria & officia Patrum cujusque domicilii accuratissimè perscribuntur; non difficile mihi fuit reperire quo in munere, unoquoque anno, P. Regis fuerit occupatus, ac proinde suum cuique Missioni, & actioni, tempus assignare. Id exemplo uno planum fiet. Aliqui testes retulerunt à strenuo Missionario multa & tolerata fuisse fortiter, & gesta præclare, in oppidis Comit<sup>is</sup> *de la Mothe*. Rem nullâ temporis notâ consignârunt. Ex istis catalogis intellexi hoc in annum 1636. cadere, quo vir sanctus instituit Missionem Cheylardi, & Lachai, quæ oppida erant in Comit<sup>is</sup> ditione.

Non hunc duntaxat fructum è tabulario Romano cepi. Multas in eo præterea reperi litteras Provincialium, & aliorum P. Regis præsidum, in quibus exactam Præposito Generali Societatis rationem ejus laborum reddunt. Ingentis thesauri locò duxi aliquot P. Petri *Verthamon*, Rectoris collegii Aniciensis, epistolas, in quibus copiosè denarrat successum admirabilem, quo DEI benignitas sanctos indefessi operarii conatus fortunavit, cùm Vivariensem Episcopum, in ejus dioceseos lustratione generali, comitaretur. Ex ipsis denique Regis litteris re-

scivi quo studio , quàm sæpe iteratis precibus , Missionem Canadensem à Præposito Societatis flagitârît.

Sed nihil usui magis & voluptati mihi fuit quàm P. Antonii *de Mangeon* , Jesuitæ Lotharingi , scriptum , ipsius manu exaratum : qui , post aliquot annos cum P. Regis Anicii trans-actos , ut suam pietatem ejus virtutum recordatione accenderet , retulerat in libellum illustriores , & heroicas actiones , quas in eodem observaverat.

His omnibus scriptis , testimoniis , & litteris , instructus multa quæ sparsum & indigesta , sinè locorum ac temporum ordine in duplici , cujus mentionem feci , vita legebantur ; partim suum in locum redegi , partim alia aliis admovi , aut ab aliis sejunxi ; quædam angustioribus inclusa spatiis , latius fudi : indicatas duntaxat à prioribus historicis Missiones plurimas , distinctius evolvi , & suum cuique annum ac locum assignavi. Si quibusdam videbitur scribendi ratio minùs elaborata & perpolitata ; illud affirmare certè possum , ut esset ad omnem veritatis normam exacta , nihil à me prætermissum fuisse.

Porro , cùm sit ea seculi nostri labes , ut plerique laudi sibi ducant à sancta majorum nostrorum simplicitate , & pia credulitate recedere , erunt fortasse quibus non placebit congesta esse in hanc historiam tot miracula , deprecatione servi DEI , & apud DEUM meritis , edita. Ego verò nè dimidiam quidem partem eorum retuli , quæ certissimis argumentis & locupletissimis auctoribus habeo comprobata ; sed iis recensendis consultò abstinui ob eam duntaxat causam , nè cresceret in immensum opus , & rerum similium parùm grata narratione laboraret. Neque enim arbitror habendam esse rationem ullam istorum , qui dum fortis & excelsi laudem ingenii captant , prodigiis omnibus fidem abrogare se profitentur , quasi esset *abbreviata manus Domini* , *Isai. 59.* aut honorandi sanctos suos in terris curam DEUS abjecisset. Sanctorum vitæ viris probis ac piis scribuntur , ac proinde ipsorum judiciis & palato  
serviendum.


MI-

# MICHAEL ANGELUS TAMBURINUS.

*Præpositus Generalis Societatis JESU.*

**C**um Vitam Beati Joannis Francisci Regis è Societate Jesu à P. Guillelmo Daubenton ex eadem Societate, Gallicè scriptam, & in Latinum sermonem conversam ab ejusdem Societatis Sacerdote, aliquot ejusdem Societatis Theologi recognoverint, & in lucem edi posse probaverint; potestatem facimus, ut typis mandetur; si iis, ad quos spectat, ita videbitur. Cujus rei gratiâ has litteras manu nostra subscriptas, & sigillo nostro munitas dedimus. Romæ 4. Julii 1717.

MICHAEL ANGELUS TAMBURINUS.



*Facultas imprimendi Vitam Latinam B. J. F. Regis data à Magistro Palatii Apostolici.*

Die 24. Junii 1717.

Imprimatur extra Urbem servatis servandis. Datum Romæ ex  
ædibus nostris in Palatio Apostolico Quirinali die & anno  
supradicto.

GREGORIUS SELLERI, Ordin.  
Prædicatorum S. P. A. Magister.

# THE UNIVERSITY OF CHICAGO

THE UNIVERSITY OF CHICAGO  
DIVISION OF THE PHYSICAL SCIENCES  
DEPARTMENT OF CHEMISTRY  
5408 S. DICKINSON DRIVE  
CHICAGO, ILL. 60637  
TEL. 773-835-3100  
FAX 773-835-3101  
WWW.CHEM.UCHICAGO.EDU

CHICAGO, ILL. 60637



CHICAGO, ILL. 60637

CHICAGO, ILL. 60637

CHICAGO, ILL. 60637



# V I T A BEATI JOANNIS FRANCISCI REGIS. Liber I.



**V**iri Apostolici vita, quam litteris mandare aggredior, ea continet, quæ valere potius ad excitandam legentium pietatem possint, quàm ad oculos novitate rerum gestarum & magnitudine perstringendos. Non illustre dabunt spectaculum subdita Christi jugo regna barbara, non hæretici Reges cum rotis nationibus ad Ecclesiam revocati. Defuit sancto Missionario ille operum Apostolicorum & laborum splendor; at nulla virtus earum, quas in ipsis miramur Apostolis, defuit; immensum gloriæ divinæ procurandæ desiderium, animi robur quibuslibet obicibus & periculis insuperabile, cura omnis & cogitatio in reducendis ad bonam frugem improbis defixa, & indefessa; invicta mansuetudo, qua suaviter in animos influens, dulce in eos, quantumvis repugnantes, imperium exercebat; caritas erga pauperes inexhausta; patientia omnibus adversariorum acerbitatibus, & injuriis tolerandis par; pectus minis, ferro, & ipsa morte proposita, interritum. His virtutibus Apostolicis virtutes religio-

A

fas

**Lib. I.** fas DEI famulus adjunxit, easque numeris omnibus absolutas; humilitatem demississimam, integerrimam abnegationem, mentem caducarum rerum amore penitus spoliata, exactissimam obedientiam, Angelicam castimoniam, summum profani seculi contemptum, patiendi sitim inexplebilem. Tot heroicas virtutes simul in unum B. Joannem-Franciscum Regis fuisse congestas, & sanctissimo inter se nexas vinculo, ejus vitæ historia, quam subjicio, demonstrabit.

*P. Joannis-Fran-  
Regis ortus, patria, parentes.*

Ducenti amplius anni sunt, cum nobilis Domus, vulgi sermone *de Deplas* dicta, in duos divisa ramos fuit. Primogeniti remanserunt in provincia Rutenensi, ex qua oriundi erant, & ubi præcipua familiæ bona: minores natu in Occitaniam inferiorem progressi, domum fundârunt, Regis dictam, non solum avita nobilitate florentem, sed etiam singulari studio Catholicæ Fidei; quippe quam constanti pietate retinuit, dum hunc Galliæ tractum Calvinianus error propè totum inficiebat. Ab his majoribus Joannes-Franciscus Regis ortus, lucem aspexit anno 1597. pridie Kal. Februarii, qui dies in feriam sextam incidebat. Natalis locus, in diocesi Narbonensi, Fons-coopertus, veteribus Ecclesiæ monumentis non ignotus fuit, Concilio Narbonensi quinto ibi celebrato: nunc ob recentem Servi DEI gloriam est notior: pater Joannes Regis; mater Magdalena Darcis, filia dynastæ *de Segur*, quamvis ambo in primaria provinciæ suæ nobilitate censerentur, illustrius adhuc fuerunt virtute, quam genere commendati.

*Fons-coopertus.  
Anno 911.*

Fratres Joannis-Francisci Regis, quos plures habuit, militarem gloriam non vulgarem sunt consecuti bellis civilibus, quorum incendium hæreticus furor per Galliam, in religionis & regni perniciem, latè sparserat. Omnium natu maximus cecidit in obsidione Vilmurii, quod oppidum inter Castrum, Albigamque situm, Calviniani occupaverant. Eos inde ut excuteret Scipio Joyosa, magnus Melitæ Prior, regias copias, quibus præerat, muris admovit. Catholica nobilitas ex omni Aquitania, & Occitania certatim in Joyosæ castra concurret. Idem ardor bellicus Joannis-Francisci fratres ad præclaram expeditionem obeundam stimulavit; eorumque natu maximus, quem retinere domi nequiverant jussa patris & minæ, filio metuentis, quem ut familiæ suæ columnen intuebatur, ab hæreticis militibus præsidiariis, oppido erumpentibus, circumventus periit.

Joannes-Franciscus Regis incensus illo, quod hauserat à majori-

poribus, religionis tuendæ studio, eandem hæresi vitisque pro- Lib. I:  
figandis, non segniùs, quàm ipsius fratres evertendis hæreticorum  
arcibus, propugnavit.

Quàm carus esset superis jam inde ab ejus infantia perspe- *Ejus in-*  
ctum est. Idonei testes permulti, quorum testimonia recitantur *columitas*  
in Actis publicis, ad illum inter Beatos referendum confectis, ita *superis*  
narrant. Paucis post diebus, quàm sacro Baptismi fonte lustratus *est cura.*  
fuiſſet, cùm nutrix infanti præbere noctu vellet ubera, hunc à  
cunis abesse sensit. Attonita clamorem tollit, quo excitata fami-  
lia, & totam domum trepidè concursans, diu conquisitum, sub le-  
cto denique, spoliatum fasciis deprehendit. Visi sunt tenebrarum  
Principes, quorum operâ & malignitate id contigiſſe vulgò credi-  
tum est, hostem prospexiſſe in puero, deque illo in cunis perden-  
do cogitaſſe.

Simul atque uſuram vocis ætas indulſit, illum ſanctiſſima di- *Mater*  
vinæ legis effata perdocere mater ſedulò ſtudit. Non ceſſabat *ſanctè pu-*  
auribus teneris inſtillare inſimarum rerum contemptum, amorém- *erũ edu-*  
que cæleſtium; odium capitale peccati, Numinis timorem & ob- *cat. Pri-*  
ſequium. Annos quinque natus nescio quo pacto accidit ut ma- *ma liſte-*  
tri diceret ſe pœnis æternis damnandum fore. Cui cohorreſcens *rarũ ſu-*  
mater, *Ab! fili, omen DEUS avertat*, inquit; mox, quid iſta ſi- *dia.*  
bi verba vellent, quæ nescienti exciderant, quanta ſempiterni exi-  
tii eſſet gravitas, explicuit. *O Superi!* exclamat puer; & velut  
animâ deſectus, aliquandiu jacuit. Recepto paulatim ſpiritu, pro-  
fudit vim lacrymarum, vixque ab illo æſtu, & perturbatione con-  
firmari potuit: uſque adeò intimos ſenſus jam tum divini judici-  
terror pervaſerat!

Tam citò, tam ſuavibus illecebris deſtinatum cælo pectus gra-  
tia cæleſtis occupavit, ut plerique viri graves & probi, quibus ab  
infantia cognitus fuit, nihil in eo notatum unquam affirmaverint,  
unde judicaretur iis affici ludis & oblectamentis, quibus ætas illa  
capi ſolet: nihil deprehenſum niſi maturum; ipſam pietatem in  
puero minimè fuiſſe puerilem: in obeundis autem religionis om-  
nibus officiis eam præ ſe tuliſſe tum corporis decentiſſimè compo-  
ſiti modeſtiam, tum præſentis animi attentionem, quam in viris  
ætate provectis admirari licuiſſet. Hinc facile poterat intelligi  
Joannem-Franciscum interiore ſanctioris & altioris magiſtri diſci-  
plinâ formari ad egregiam virtutis perfectæ laudem. Iſta rationis  
maturitas, conjuncta cum acri teneroque rerum divinarum gultu,

Lib. I. abunde monstrabat, quantos progressus in via Domini esset habiturus.

Litterarum rudimentum posuit sub doctore truci ac tetrico. Ut erat ipse indole miti & subtimida, non parum illi molestiæ facessivit hominis atrox animus, & amarus: nulla tamen ex eo querela est audita. Interim cum Jesuitæ scholas in urbe Bliterensi aperuissent, nobilis juvenus ad novos professores audiendos, de quorum eruditione fama percrebuerat, è tota confluit provincia, in eumque numerum Regis venit.

*Morum  
ejus integritas.*

Vix litterariam hanc palæstram erat ingressus, cum enituit eximia virtus adolescentis, quæ ad præstantis ingenii laudem accedens præcipuam semper illi magistrorum suorum benevolentiam conciliavit. Non contentus segregare se ab adolescentibus, quorum depravati mores, ultro carebat jucunditatibus à culpa remotis, quamvis ea ætate esset, cui nihil ferè, nisi quod est jucundum, sapit. Ludum & nugacissimas oblectationes, quas juvenus avidè semper confectatur, sibi penitus interdixerat. Est prope Bliterense Collegium terrenus agger, ex quo prospectus in eminentissimam planitiem, ipsumque procul mare, patet. Hoc in aggere studiosorum juvenum turma, signum scholarum opperiens, inambulare quotidie consueverat. Nunquam ibi conspectus est; sive id fugiens, quo intentæ DEO mens avocari & aberrare posset; sive legem hanc ipse sibi jam tum inviolabili proposito dixisset, ut voluptates vel maximè licitas respueret.

Studium litterarum & precatio in amore unice ac deliciis erant. Diebus festis ac Dominicis curæ plus & operæ divinis rebus tribuebat. Istos dies in sacrosanctis pretiosisque numerabat, sedulo cavens nè quam illorum particulam perderet. Toti consumeantur in exercitationibus pietatis, ita dispertitis horis, ut alias piis libris domi lectitandis; alias sacris ædibus frequentandis daret. Tunc illum sæpe cerneres in intimo quopiam sacello perfusum lacrymis *effundere cor suum in conspectu DEI sui*, & amoris Christi JESU liberiùs indulgere. Ex hac arctissima cum DEO familiaritate vires hauriebat ac præsidia, quibus contra licentiam seculi, ac deteriore contagionem exemplorum, virtutem suam permuniret.

Nonnulli adolescentes, ejus æquales, quorum vita solutior, cum sancti juvenis mores integerrimos tacitam suorum censuram interpretarentur, temperare sibi non poterant, quin eum identidem



dem cavillarentur. Ille verò jocos inanes negligens, neque studio Lib. I. ipsis placendi, neque displicendi metu, ab ea quam primùm institerat, via dimoveri potuit, idque constantiâ virtutis perfecit, ut qui fuerat contemptui, venerationi demum esset.

Singulari erga B. Virginem pietate, quam cum lacte hauserat, impulsus, enixè petiit ut adscriberetur in unum è sodalitatibus, *Ejus præcipua pietas erga B. Virginem.* quæ in Societatis domibus instituta, & præcipuo DEI paræ cultui sunt addicta. Cùm tamen intelligeret eam non alia ratione meliùs coli, quàm morum sanctimoniâ, novo conatu incubuit ad pietatem; & frequentius ad sacram mensam accessit.

Multum quoque præsidii reponebat in Angeli custodis sui *Gravipetutela*, cui se multis nominibus obligatum fatebatur. Huic referebat acceptum, quòd, ut suprà memoravimus, in cunis oppressus *riculo liberatur.* non fuisset. Auxit hanc fiduciam periculum aliud feliciter, ut modò dicam, evitatum. Somno per ætatem victus ruri sub arbore procubuerat. Objecta dormienti (quæ vis imaginationis est) specie quadam turbida, surgit; procedit aliquamdiu, atque in ripa fluvii Orobis prærupta, & in altam voraginem præcipiti, jam stabat, cùm se arcana manu subitò retineri sensit. Evigilans, & barathrum, quò ruebat, spectans, laudavit Numinis bonitatem, & gratias egit Angelo custodi suo, cujus operâ liberatum se divinitus certissimo exitio minimè dubitabat. Cùm autem ex omnibus fructum pietatis colligere consuevisset, deberi totam colendo impensius Numini vitam credidit, quam ejus benignitate, non sinè miraculo, conservatam agnosceret.

DEUS famulum suum functionibus destinatum Euangelicis *Ejus solici- jam tum ad illas præparans, ejus mentem ardentissimo servanda- tum animarum desiderio succendit. Primam navavit operam instillan- condiscipulis, & juvenili licentiæ frena prudenter injecit. Alios dam con- innata retinebat comitate, alios amica objurgatione deterrebat. Sic discipulis plurimos à vitii consuetudine abductos in pudoris & modestiæ gy- pietatem rum reduxit. Nullus cum ipsis, nisi de rebus ad pietatem spe- ctantibus sermo, ineratque sermoni tanta vis & efficacia, ut om- nium animos amore virtutis perfunderet.*

Hunc in modum conciliatis sibi juvenum voluntatibus, & auctoritatem, quam spectata dabat probitas, adeptus, sex elegit ex eorum numero, qui pietatis ardore ceteris anteibant, cùmque illis exiguam conflavit sodalitatem, totam divino deditam obsequio. Studiorum, indolis, & morum similitudo tam arctis & suavis

Lib. I. vinctis illos inter se devinxit, ut videretur omnium esse *cor unum*, & *anima una*. Formam vitæ, quam sequerentur, descripsit. Utebantur eodem tecto: erant assignatæ studio litterarum & precationi horæ, ut ferè fit in Seminariis: colloquia ejusmodi, quæ utilitatem aliquam haberent, apta excitandæ fovendæque pietati: aliquo ejus generis libro, super mensam legendo, dapes condiebantur. Diurnæ actiones vesperi ad calculos vocabantur. Singulis diebus Dominicis fumebant ex altari panem Eucharisticum, & aures concionanti sacerdoti dabant: ceterà carebant publico, nisi frequentandi collegii, vel templi causâ prodeundum domo esset, aut animus à studendi contentione relaxandus honestâ quapiam & innocenti oblectatione, quæ sic fessas reficeret vires, ut pietatem non debilitaret. Dux omnium, & viva veluti regula, Regis erat; id unum studens, ut adolescentes, è quibus contubernium illud exiguum constabat, formaret ad veram virtutem, & promoveret. Isti vicissim eum ut sanctum venerabantur, & ut vitæ perfectioris magistrum auscultabant.

*In morbum incidit.*

Hanc vivendi rationem tenuit usque ad annum ætatis duodevigesimalis, quo in morbum incidit. Hic vero virtutem ejus non minùs probavit, quàm illustravit. Quicumque ad ægrum ventitabant, æquè piis ejusdem sermonibus, ac patientiâ movebantur. Cùm sæviret febris, & violentior in dies accederet, extremum in periculum brevè est adductus. Cùm tamen Dominus servatum illum idcirco vellet, ut innumeros mortales è cœno vitiorum eductos servaret; paucis post diebus præter omnium spem convaluit. Hoc DEI beneficio provocatus statuit arctioribus vinctis illi se conjungere, ejusque obsequio totum se mancipare.

*Vocatur ad Societatem JESU.*

Id secum agitans deliberare per otium, semotis partimper aliis curis, cœpit de vitæ statu quem esset amplexurus: omnino sequi paratus, quocumque DEUS vocaret. Statim vidit mundum non alia certius ratione vinci posse, quàm discessione ac fugâ: & accidit aliquando, cùm Eucharisticum sumpsisset cibum, ut subitò fuerit inflammatus incredibili desiderio, se penitus divinæ gloriæ devovendi. Multis ultro citròque attentè consideratis, persuasum habuit vocari se à DEO ad salutem animarum procurandam in Societate JESU. Nihilominus nè quid perperam decerneret in eo negotio, in quo error æquè facilis ac periculosus est, Sacerdoti quo rectore conscientiæ utebatur, mentem suam aperuit. Ille, omnibus diu multumque perpensis, eum in sententia confirmavit.

Ve-

Venerat Biteras per eos dies P. Joannes Franciscus Suarez, Lib. I  
 Provincialis Societatis, ut collegium inspiceret. Ab eo Regis eni-  
 xè contendit, ut in Societatem admitteretur. Cùm ad preces &  
 lacrymas adolescentis accederet Collegii Patrum consensus, ipsum  
 certatim commendantium, Provincialis eundem admittere cuncta-  
 tus non est.

Laborandum illi valde non fuit ut vincula carnis & *Tirocini-*  
 sanguinis abrumperet: jam dudum valere spes caducas jusserat, *um vitæ-*  
 nihilque ipsi longius videbatur, quàm ut innocentiam suam in tuto *religiosa*  
 collocatam, & seculi nequissimi periculis ereptam, videret: itaque *ponit To-*  
 confestim Tolosam profectus, ibi religiosæ vitæ tirocinium cœpit *losæ. an-*  
 ponere, anno 1616. sexto Idus Decembris, annum agens undevi- *no. 1616.*  
 gesimum. Magistros tironum nactus est P. Petrum *La Casé*, Re-  
 ctorem Domûs Probationis, & qui successit illi, P. Petrum *Ver-*  
*thamon*, utrumque perfectæ vitæ ducem scientissimum.

Mutato statu, nihil admodum, in animo vel moribus quod  
 mutaret, habuit; nullius vitii consuetudo corrigenda, nullæ cupi-  
 ditates expugnandæ; ultima duntaxat manus inchoatæ sanctimo-  
 niæ imponenda. Jam inde à principio tirocinii tantam indolem  
 virtutis, adeò factam ad omnia religiosæ vitæ munia ostendit, ut  
 illum diligentissimi quique tirones, tanquam exemplar pietatis ad  
 omnes regulas exactæ, intuerentur. Admirationi erat sedula in  
 obeundis non modò gravioribus, verùm etiam in levissimis tiro-  
 num exercitationibus accuratio, quibus non leve addebat pretium  
 plena DEO mens, & nobilissimis ad rectè agendum stimulis exci-  
 tata. Itaque Novitii, quos studium vitæ perfectioris, ad quam in-  
 stituuntur, sæpe attentiores justo in observandis fratrum suorum  
 nævis, & in carpendis severiores efficit, fatebantur in eo nihil de-  
 prehendi, cui austerioris censuræ acumen adhæresceret.

Quod aliis arduum & multi sudoris est, id illi perfacile ac  
 primum extitit. Assuetus silentio, piæ solitudini & precationi,  
 cùm adhuc in seculo, per se se inquieto ac tumultuoso degeret, in  
 iisdem rebus nihil tunc habuit negotii, cùm totus suus, totus DEI  
 fuit. Hoc unum discrimen interesse visum, quòd animo vacuo à  
 studiis litterarum perfruens, & à rebus ceteris, quæ sensibus obje-  
 ctæ mentem avocant, libero, ità se DEO conjunxit, ut in ejus  
 conspectu semper versaretur.

Plerique homines de Societate, ejus olim in tirocinio sodales,  
 affirmârunt eluxisse jam tum in illo virtutes omnes, quibus in om-

Lib. I. ni vita præcipuè deditus fuit, humilitatem, contemptum mundi, odium sui, pauperum amorem, Divinæ gloriæ studium.

Avidè conſectabatur infima quæque ministeria: nihil faciebat cupidius, quàm inserviebat coquo, everrebat domum, ægrotis aderat, fratrum suorum pedes exosculabatur: honori scilicet ac lucro apponens quidquid est in religiosa familia maximè abjectum & humile.

Præ ceteris tamen virtutibus enituit illa singularis ac tenera caritas, qua egenos semper est proſecutus; & cujus illustria ubique documenta, interdum etiam heroica, ut videbimus, dedit. Inter varias periclitationes, quibus Novitiorum constantia probatur in Societate JESU, numeratur ista, ut dies aliquot consumant in publico valetudinario; nempe ut maturè assueſcant delicata naturæ vitiosæ fastidia vincere, caritatîſque Christianæ officia vilissima, & nausæ plenissima, exercere. Ubi suam adesse vicem Regis vidit, ingenti beneficio affectum se existimavit. Ut ægrotorum quisque foedissimus, & maximè nauseosus occurrebat, ita illum libentissimè complecti, solari; curandis vulneribus opem, quamcumque poterat, præstare; sternere cubile, idque tam prompto, tam gestiente vultu animoque, ut scires unum in pauperibus Christum ab eo conspici.

Quàm aliis benevolus & suavis, tam sibi asper ac durus erat, de maceranda carne videbatur unicè sollicitus, quam sancto proſequi jam tunc cœpit odio, ita ut postea vulgò diceretur *nullum Regis capitaliorem esse hostem, quàm ejus corpus; ipsum suimet ipſius vexatorem esse immaniſſimum*. Sanè nullum genus oblectationis sensibus indulgebat, nullam afflicti sui prætermittebat occasionem, ac nisi moderatores huic aviditati frenos injecissent, valetudinem voluntariis cruciatibus attrivisset.

Hanc vitæ asperitatem suavitate orationis mitigabat, nunquam lætior, quàm cum in DEI complexu & colloquio conquiesceret. Eminerat in ipſo vultu ardor animi: sæpe conſpiciebatur ante aras provolutus, immobilis, & velut à sensibus alienatus. Hinc, quoties verba de DEO faciebat, nescio quid sublime, splendidum, ac suave redolebat sermo, quod divinum amorem audientibus afflaret. Ejus certè colloquiis accendi vel frigidissimos novitii prædicabant.

Arnaldus Boretus, clarissimus in curia Tolosana Senator, caducorum bonorum levitate ac vanitate perspecta, receperat se domum

num Probationis , in eaque dulces pœnitenti , & ad mortem se Lib. I.  
comparanti , latebras quæsierat. Ibi optimus senex , sola veste à  
novitiis discrepans , ea usurpabat omnia , in quibus illi exercentur.  
Quamvis cunctos haberet carissimos , nostrum tamen Regis pecu-  
liari complectebatur benevolentia : cum eo de rebus divinis sum-  
ma cum voluptate differebat ; nec cessabat tantum maturitatis , in  
tanta velut ætatis viriditate , in religioso tirone veteranorum vir-  
tutes , admirari.

Qui vitam B. Regis litteris consignârunt , affirmant eum exi-  
miis à DEO beneficiis affectum fuisse in Ecclesia collegiali Sancti  
Saturnini , qui catholicam religionem primus Tolosæ fundavit.  
Hæc sancti hujus apostoli cineres , cum aliorum martyrum pluri-  
morum corporibus , servat ; summique Pontifices nonnulli , Caro-  
lus Magnus , multique Reges ejus successores , locum , tot illustri-  
um custodem monumentorum , atque haud scio an cunctis , qui  
celebrantur in Gallia , venerabiliorem , visendum sibi Tolosæ pu-  
taverunt.

Huc tirones suos mittere Tolosani Patres consueverunt , ut  
ipso tot heroum Christianorum aspectu , ad imitandos eorum la-  
bores Evangelicos excitentur. Regis ad hanc ædem præcipua  
sanctitate inclytam , accedens , sacro perfundebatur horrore : pro-  
no in humum corpore sternebatur ante felices divorum exuvias ,  
eorum opem suppliciter implorabat , & altaria singula pietate mi-  
rabili perlustrans , solum lacrymis irrigabat. Hic succensus est  
acerrimo fundendi pro Christo sanguinis desiderio , cujus ardo-  
rem nulla temporis diuturnitas extinxit , & quo se , dum vixit , in-  
ter assiduos asperrimæ vitæ labores , sustentavit. Ex eodem Sa-  
crario apostolicum hauriebat spiritum , quo elementa doctrinæ  
Christianæ in rusticis Missionibus , adhuc tirunculus rudi populo &  
pueris , divino quodam æstu inflammatus , explicabat : quod illi  
testimonium Rector suus & tironum Magister , in quibusdam suis  
litteris exaratum , non item cuiquam aliorum , impertit.

Peraçto tirocinii biennio , & religiosis votis rite nuncupatis , *Vota reli-*  
eloquentiæ , quam antea duntaxat à limine salutaverat , plenior *giofa nun-*  
operam dedit anno 1618. Cadurci. Sequenti anno Turnonium *cupat: stu-*  
venit , Philosophiæ spatia decursurus. Qualem se in Tirocinii pa- *det philo-*  
læstra , talem in academia litterarum præbuit : ut nuper tironum ,  
sic modò studiosæ juventutis exemplar.

C

Satis

## Lib. I.

*Studii  
asperita-  
tem pre-  
cationis  
suavitate  
temperat.*

Satis gnarus eos qui provinciam alios docendi suscipiunt, oportere à doctrina esse quàm instructissimos, nulli assiduitati, labori nulli pepercit, ut arcana philosophiæ omnia pernosceret. At vicissim probè intelligens ejusmodi studiis, quæ sicca per se se & arida, obtundi sæpe suavem pietatis gustum, & multos opinione quadam ingenii elatos, plus æquo sibi placere; invenit quo pacto scopulum hunc effugeret, ac litterarum studia virtutis exercitationibus amicè sociaret. Frequens in templo Christum visere, eodem crebrius pasci, in orando multus esse, libros utiles terere, His adminiculis cavit nè mens contemplandis rebus humanis dedita, longiùs aberraret à divinis, nève succus ille tener pietatis exaresceret. Præterea singulis mensibus atque hebdomadis sepositam temporis partem habebat, quo vacaret sibi, & in se se descenderet. Quibus artibus id affecutus est, ut non modò nihil remitteret de pristino ad perfectionem religiosæ vitæ cursu, verùm etiam ut in ea longissimè procederet.

Ante omnia ratum ac fixum habuit nulla unquam privatæ pietatis munia omittere, quidquid tandem occurreret negotii, & quamvis, ut interdum fit, incideret quidpiam gravioris operæ, quod majorem studendi contentionem, ac temporis plusculum postularet. Eam ob rem ità distributos habebat dies, horas, momenta omnia, ut piarum exercitationum ordinem nequaquam studia inturbarent, imò adjuvarent, ac pæne continuarent. Divinam opem submisso poplite priùs invocabat, quàm Professoris dictata sumeret in manus: eadem legens, mentem erigebat identidem ad Deum brevibus, at plenis ardoris & animi precatiunculis; ac si quid objiceretur caliginis, implorata cælesti luce discutiebatur.

*Sedula le-  
gum reli-  
giosarum  
servanda-  
rum cura.*

Hac precandi consuetudine, hac indefessa, quâ nunquam oculos à se ipso dejiciebat, vigilantia, perfecit Sanctus juvenis ut esset regularum vel minimarum custos rigidissimus. Nunquam observatus est à suis superioribus in earum ullam peccare, ut ipsimet testati sunt. Itaque non dubitabant illum condiscipulis, tanquam exemplum excellens proponere, quod intuentes, consentaneam ætati suæ & instituto perfectionem assequerentur.

Multos in errorem & culpam induci existimabat, dum anxie scrutantur quid leges religiosæ præcipiant constitutâ peccati poenâ, quid secus. Inde quippe aiebat fieri, ut isti tantò confidentiùs tantòque periculosius adversus leges peccent, quantò longiùs opinantur se à culpa & periculo abesse. Inde ordinem disciplinæ ac velut œconomiam

pes-

peffumdari, & viam ad graviora sterni flagitia. Quidquid lex Lib. I.  
præciperet, five levi propofita pœna, five nulla, non levis illi pon-  
deris ac momenti videbatur, id unicè videlicet laboranti ut ei pla-  
ceret hero, cui fe mancipaverat. Porro hæc in obfervandis vel  
minimis legum nostrarum apicibus diligentia, ut animi, fic etiam  
corporis motus omnes tam decenter composuerat, ut cum pro-  
dibat foras, monftraretur digito, & *Collegii angelus* præclaro no-  
mine appellaretur.

Ut quoddam Euangelici ministerii tirocinium poneret, ro-  
gavit imponi sibi à moderatoribus fuis provinciam erudiendi famu-  
los domûs, nec non urbana mendicabula, quibus Collegii elee-  
mosynam dividebat ftatis hebdomadæ diebus. Feltis verò ac Do-  
minicis in vicinos Turnonio pagos ad concionandum excurrerat.

Vix curriculum philosophicum ingreffus obtulit fe focium *In pagis*  
facerdoti eodem, atque ille, animarum ftudio flagranti. Dum *conciona-*  
Pater confitentibus præbebat aures, aut concionem parabat, Re- *tur in fi-*  
gis collectæ tintinnabulo turbæ puerorum enucleabat elementa do- *gni cum*  
ctrinæ Chriftianæ. Ità fe fe quodammodo periclitatus, emendan- *fructu.*  
dos oppiduli (Andaiam vocant) mores fufcepit. Exceperunt in-  
colæ tanquam à fuperis miffum, fauftisque conatibus tam dexter  
DEUS adfuit, ut fugatis, quæ plurimùm eo loci regnabant, vitiis,  
ebrietate, impudiciâ, temere atque impiè jurandi confuetudine,  
ufus frequens sacramentorum fuerit revocatus. Odor fânctimo-  
niæ illic ab eo relictus, etiamnum perfeverat.

Ibi tunc primùm inftituit fodalitatem fânctiffimi Sacramenti,  
ad reftituendum priftino fplendori divinæ Euchariftiæ cultum: quæ  
deinde latè propagata, auctore illo, & conditore gloriatur. Ipfe  
fodalibus fapientiffimas confcripsit leges, annos duntaxat viginti  
duos, trêfve natus. Gratia maturitatem ætatis ad patranda pro-  
digia non expectat; & auctoritatem juventuti fpectata fânctitas  
conciliat, quam fenectuti prudens canities afferre fola nequit. Re-  
gis falutaribus confiliis in oppido Andaiâ omnia regebantur. Le-  
ges præfcribebat familiis, componebat lites; ubi quid ftatuerat,  
ejus arbitrio & fententiæ cuncti acquiefcebant. Ultro parebant  
ediâis novi cujufdam tribunalis, quod fapiens juvenis crexerat, &  
ad quod eorum nomina deferebantur, qui exempli contâgione,  
vel publica flagitii cujufpiam pravitate, in vulgus nocebant; aut  
familiarum pacem moribus incompoftis perturbabant. Illos ad-  
monebat, illos verbis afperioribus caftigabat. Pauci monentem

**Lib. I.** respuebant, ac si quis morem gerere detrectaret, ejus nomen è sodalicio expungebatur. Ea nempe vis, hoc ingenium sanctitatis est, ut artes varias comprimendis vitiis feliciter excogitet, ac sui venerationem, in quocumque demum reperiat, eliciat.

*Litteras humaniores docet Anicii, anno 1625.* Philosophicum curriculum emensus (annus agebatur 1621.) missus fuit principio Billomum, deinde Augustam Auscorum, ac denique Anicium, ut litteras humaniores doceret. Anicium subiit anno 1625. ibique docendi munus obiit cum ea omni perfectione, quam Societatis Institutum postulat.

Scholam suam intuebatur ut oblatum sibi à DEO stadium in quo nervos omnes industriae contenderet; cumque pro certo haberet, nihil à se fieri posse Numini acceptius & publicæ rei utilius, quam si commissam sibi divinitus juventutem pietate ac litteris imbueret, hoc officio curaque omnia posteriora ducebat. Monuit illum aliquando amicus, ut majorem temporis haberet rationem, neque tantum illius sumptum in discipulos faceret, cujus partem rectius reservaret sibi, ad comparandam eruditionem, ex qua gloriæ plus esset percepturus. Consilium hoc, utpote amoris proprii fermento inquinatum, Regis non gustavit, cui nihil sapiebat nisi quod obedientia condiret. Quare amico candidè respondit satis sibi superque esse, si onus à Domino impositum sustineret. Id si rectè præstaret, se nomen & famam imperiti pro nihilo putare.

*Singulari cura discipulos ad litteras & pietatem instruit.* Huc præcipuè spectabat ejus labor ut sanctos, non tantum ut doctos effingeret; nullamque prætermittebat occasionem excitandi in discipulis desiderium sanctitatis aliquando consequendæ. Scholæ solitas exercitationes non raro interrompebat, ut eos ad amorem divinum cohortaretur. Ex ardore dicentis intelligere pronum erat, nihil ipsum libentiùs, quam verba de DEO facere. Quoties tractabat hoc argumentum, sermo sacrum spirabat ignem, & mirificam quandam suavitatem audientibus aspergebat, qua delibuti sæpe cum magistro discipuli collacrymabantur. Ex iis plerique postea ætate proveci, pro testimonio dixerunt, ejusmodi cohortationes, fusas ex tempore, illaboratas, ac Divino quodam impetu concitatas, ipsis altissimè in animo defixas hæsisse, earumque vel sola recordatione, quasi freno, à peccato fuisse revocatos. Jam, quæ cum discipulis è superiore loco differebat, eadem privatis inculcabat colloquiis: tunc orationem singulis, ut cuique opus erat, accommodans, illos vehementiùs certiusque commovebat.

Ma-



Mater nulla filios æquè fovet, atque Regis suos complecte-  
batur discipulos: eosque præsertim, quos egere cernebat, & quo-  
rum paupertati necessaria procurabat subsidia. Ægrotantes om-  
ni sublevabat ope, servique sui gratam sibi esse caritatem miris sæ-  
pe modis DEUS ostendit.

Jacobus *Gigon*, tunc ejus discipulus, postea Præsidialis curiæ  
Aniciensis Senator, gravi dysenteria laborabat. Adiit ægrotum  
Regis, cumque vis mali omnia vinceret remedia, huc intendit cu-  
ram ut novissimis Sacramentis ad certamen ultimum muniretur.  
Ingravescente morbo, languentem ac pæne conclamatum visens,  
& familiæ plangentis luctu permotus; accedit propius ad ægroti  
lectum, ductoque super jacentem signo crucis, piam precem, ve-  
lut numine afflatus, ac plenam fiduciæ, concipit: tum: *Macte*,  
inquit, *fili*, *sanaberis*. *Valetudinem tibi restituet DEUS, ut il-  
lam in ejus obsequium, majore quàm antea studio impendas*. Vix  
hæc edixerat, cum adolescenti melius est factum: & paucis post  
diebus omnino convaluit. Sed animorum morbis multò gravius  
tangebatur; & quamvis nulli parceret operæ, ut discipulos à le-  
vissimis etiam noxis defenderet, si quid ab iis tamen peccaretur,  
id adscribebat sibi, seque reum clamabat. Cum ab uno ex illis  
admissum grave flagitium accepisset, sic arsit dolore, ut lacrymis  
totus diffunderet: cumque nondum se collegisset ab hac sancta per-  
turbatione, sermonem cum aliis habuit de judiciorum DEI seve-  
ritate adeò vehementem, ut omnes cohorrescerent; seque adhuc  
intimis percelli sensibus aliqui faterentur, quoties eorum subiret  
memoria, quæ ab eo tunc audierant.

Cum autem probè intelligeret plus apud pueros ponderis  
habere facta magistrorum, quàm dicta, illud summum semper &  
antiquissimum habuit, ut quam virtutis viam monstrabat illis ver-  
bo, signaret ac tereret exemplo. Ipsa species oris ad modesti-  
am & humilitatem compositi, præclaram imaginem exhibens ani-  
mi velut in se collecti, & secum habitantis; sancta sinè fuco sim-  
plicitas; vultus austeritatem præ se ferens ac pœnitentiam; hæc  
omnia, inquam, meliùs omni oratione movebant discipulos, &  
ad virtutem accendebant. Suis ipsi moribus, ad omnem hone-  
statis normam exactis, secernebantur à ceteris adolescentibus; &  
indicio erant à qua essent manu formati.

Tot egregiæ dotes profluebant ab intima Regis cum DEO  
conjunctione. Ut superos labori suo propitios ac faventes habe-

D

ret,

Lib. I. ret, ab iis lumen semper in templo & opem exposcebat, antequam iniret scholam. Custodes etiam puerorum suorum angelos invocare consueverat, ut teneras mentes præpararent ad excipienda semina, quæ illis mandaturus esset. Tantum aberat ut aliquid de usitatis in Societate, pietatis exercitationibus detraheret, ut ad matutinæ meditationis horam, à regula præscriptam, varias preces adjungeret, quas sua illi piers suggererat. Ad tolerandas & vincendas, quæ cum labore docendi sunt conjunctæ, difficultates & molestias, promptum illi ac paratum in sacrosancta Eucharistia præsidium & asylum erat. A Superiore suo sæpe postulabat facultatem ejus præter solitum sumendæ; cùmque illi facta hæc potestas fuerat, exilire gaudio videbatur; tanta erat divini panis fames! At, eo priusquam vesceretur, animum præparabat privatim corporis afflictationibus, & obeundo publicè aliquo vili & abjecto ministerio: pridie magnam noctis partem in æde sacra transigebat, Christo supplicans, nec precandi prius faciebat finem, quàm somnum necessitas extorqueret.

*Illum discipuli ut sanctum venerantur.*

Eam virtutis perfectionem adeptus erat, ut discipuli, ceteroquin attenti ad observandum, & perspicaces ad pervidendum quidquid in magistris vel levissimè vitiosum est, nunquam quidquam deprehendere potuerint in ejus dictis factisve quod affine vel minimæ culpæ videretur, nullum iracundiæ motum; nullum impatientiæ, aut inanis gloriæ signum. Hinc summa illorum in eum observantia & veneratio; hinc docilitas, qua se totos ad omnem imperantis nutum fingeant, flectebantque. Quidquid moneret, docerétve, tanquam divinitus traditum excipiebant; & inter officia religionis numerabant homini, tam caro superis, auscultare.

Quanti virtutem illius facerent, ex eo quod sum dicturus cognosci poterit. Vir spectatæ probitatis è nostra Societate, & in ea Provincialis munere bis functus, narravit mihi se in superiorem Ordinis D. Benedicti aliquando incidisse, provectæ jam ætatis, & Patre Regis magistro pridem usum. Affirmabat venerabilis senex non posse se sinè lacrymis dulcissimam sancti Professoris sui memoriam usurpare. Adjecit obversari adhuc animo cohortationes, quas ab hoc præstantissimo DEI famulo quondam audierat, exempla pulcherrima quæ perspexerat; quorum recordatione ad virtutem stimulari se fatebatur. Mox educens perâ vitam ejusdem in lucem recens editam.

*Nescio inquit, quando Romana Sedes*

*des virum hunc Apostolicum, tot rebus sanctissime gestis insignem, Lib. I. inter Beatos relatura sit; illud certè scio, hunc tutò proponi posse venerationi Fidelium à summo Pontifice, & causas cur id faceret satis multas reperturum in hoc libello, cui possem addere illustra facinora non pauca, quorum testis ipsemet fui, cum eundem magistrum audiebam.*

Neque verò sacrum caritatis ardorem, & proximos juvandi *Diebus* studium, scholæ finibus ac salute discipulorum Regis circumscribe- *Domini-* bat; in vicinos procurrebat pagos diebus Dominicis & festis, & *cus ac fe-* agrestem turbam oratione tam apposita erudiebat, ut negarent om- *stis rari* nes auditum à se quemquam concionatorem, qui tam perspicue *conciona-* ipsos doceret, tam vehementer commoveret. Mulierem aliquan- *tur ac do-* do ità percussit ejus concio, ut præ gaudio vix sui compos exclamârit; *cet.* *quam bene, quàm suaviter de DEO verba facit! Utinam eum audire sæpe nobis contingeret!*

Non minore fructu ac suavitate differebat privatim, quàm publicè concionabatur. Invitatus ad prandium à quodam cive, ipsius perstudioso, qui summa cum voluptate operam concionanti frequens dabat, paulùm cunctatus est, ac benignè demum negavit. Verùm ubi vidit hominem repullam ferre molestissimè, assentiendum putavit, non sinè mœrore tamen ac tœdio, quippe qui legem hanc sibi dixisset, ut ad populi convivium nunquam accederet. Sed mœrorem suum abunde consolatus est, cœlestium, quas convivis apposuit dapum utilitate. Scripsit unus è suis discipulis, quem ferè comitem in istis pusillis Missionibus addisciebat, illum unicè de DEO tunc locutum fuisse; ac matrona prudens, quæ aderat, ejus sermonibus tam jucundè pasta discessit, ut empturam se magno diceret voluptatem eum iterum audiendi de rebus divinis differentem. Sic viri Apostolici quæstum ubique faciunt, & arte mirabili fructum virtutis è promiscuis actionibus, iisque vel maximè indifferentibus, colligere nôrunt.

Postquam septem annos tradendis litteris humanioribus con- *Theologia* sumpsisset, duos Billomi, unum Augustæ Aufcorum, & quatuor *cursu an-* Anicii; Theologiæ curriculum auspicatus est Tolosæ anno 1628. *spicatur* *Tolosæ an.* Cum ad ingenium excellens laborem assiduum adjungeret, magnos *1628.* in hac sanctiore scientia progressus brevè fecit, nec vulgarem eruditionis egregiæ laudem est consecutus. Eâ verò non modò non delectabatur, ut imperiti famam ac sui contemptum rudi quadam simplicitate, & inscitæ simulatione, haud rarò captaverit.

Lib. I. Solent nostri qui student in Seminariis, dies aliquot ad animos relaxandos quotannis in villa traducere. Dum innocentibus oblectationibus indulgebant alii, Regis in solum aliquem recipiebat se locum, ut cum DEO versaretur. Neque contentus bonam diei partem in hoc cælesti commercio transigere, singulis noctibus, postquam paululum obdormiverat, clàm è cubiculo prorepebat in sacellum. Quamvis provideret omni ope ut esset clàm, sensit vicinus quispiam, & Rectorem admonuit. Rector, cui nota virtus Regis, communem longè modum egressa, *Sine inquit, Angelum hunc DEO suo frui. Multum in sanctitate processit iste juvenis: ac, nisi me fallit animus* (addidit non sinè cælesti aliquo mentis instinctu) *erit illud aliquando tempus cùm ejus diem festum Ecclesia celebrabit.* Hæc verba prophetici oraculi vim habuisse credita sunt. Et erat ea virtus P. Francisci Tarbes, tunc Rectoris, ac postea provinciæ Tolosanæ Præpositi, quæ facilè persuaderet sic locutum divino afflante spiritu, cælitum honores olim huic juveni theologo à Romana Sede tribuendos præmonstrante.

Monitus à Superioribus ineunte anno 1630. ut se ad sacerdotium compararet; non leviter est agitatus difficili pugnâ inter ejus non cupiditates, sed virtutes, orta. Hinc humilis animus sacro quodam horrore percellebatur, secum reputans tremenda mysteria, quorum dispensator beneficio sacerdotii futurus esset: inde verò incredibili servandarum animarum desiderio incensus, nihil ardebat vehementius, quàm dari sibi facultatem vincula scelerum perfringendi, & peccantium letales morbos, oblatâ divini corporis sanguinisque medicinâ, persanandi. Audiebatur interdum repetitis votis fortunatum vocare diem, quo sanctissimam victimam DEO immolaturus esset: aliàs in sui nihili cogitationem demersus, ab honore tanto, ut indignus, longissimè refugiebat. Ità distractus in varias partes & anxius aliquandiu hæsit. Verùm redintegrata Superiorum jussa hunc animi fluctuantis æstum sedaverunt. Cum eos intueretur tanquam interpretes divinæ voluntatis, in eorum imperio penitus conquievit. Ad sacros Ordines suscipiendos comparavit se arctiore solitudine, severiore jejunio, sumendo sæpius Eucharistico pane, instaurandis inflammandisque desideriis unicè DEO ac penitus inserviendi; frequentandis affectibus piis adorationis, humilitatis & amoris, in quibus totus erat. Postquam obedientia metum discussit, quem sua ipsi humilitas injecebat, exarsit vehementiore studio divinâ quàm primùm litandi hostiâ,

*Sacris Ordinibus initiatur anno 1630.*

stia, seque ingens beneficium à Superiore suo accepisse ratus, per quem effectum fuerat ut paulò maturius sacris ordinibus initiaretur, gratiam illi à se reddendam sacrificiis triginta promisit. Lib. I.

Sacerdos creatus, non statim ad sacrum altare processit, sed diligenti per otium adhibita præparatione, ac præsertim intentione cura precationis & poenitentiae. Cum primam divinæ Majestati hostiam immolavit, tam suavi pietatis sensu delibutus est, ut quandiu ad aram stetit, lacrymas tenere nequiverit: nec eas qui aderant inhibere potuerunt; tam suaviter afficiebat universos angelica sacrificantis modestia sacer qui lucebat in vultu ardor, ac totius corporis habitus, summam Christi præsentis venerationem, religioso mixtam horrore, atque intima sui demissione commonstrans.

Vix sacro sacerdotii charactere fuerat insignitus, cum ejus caritati occasio se obtulit, quam idoneam recenti ministerio exercendo, ac sacerdoti nullo pacto prætermittendam judicavit. Eodem anno 1630. Tolosam adorta pestis, magnam in urbe stragem edidit. Putavit Regis, quicumque cælestem quotidie in templo victimam immolaret, hunc oportere ita comparatum esse, ut victima quoque, saluti proximorum devota, semper esset. Hac mente apud superiores summis precibus institit, ut sibi liceret peste laborantium obsequio se devovere. Denegantibus, & florem ætatis causantibus, Merito sanè, inquit, illis parcatur, quorum è vita & valetudine populus capere fructum potest; at homuncionem nauci & nullius frugis, cujusmodi ego sum, conjicere in discrimen sinè detrimento publicæ rei potestis, imò cum emolumento non levi Societatis, quæ sic inutili pondere levabitur. Escheda P. Joannis Maliceni Jesuitæ, qui Tolosæ tunc versabatur, ejus manu scripta; nec non è multorum testimoniis, quæ extant in Actis pro P. Regis in Sanctorum numerum referendo confectis, compertum est, ipsi concessum quidem à moderatoribus fuisse ut operam peste contactis navaret: sed à superis negatum, quod maxime cupiebat, ut vitam in hoc præstanti caritatis officio poneret, in quo plurimos è suis fratribus pretiosa morte functos vidit, & invidit.

Quia periculum est nè studendi contentione sacer pietatis ardor, quo religiosæ mentes accenduntur & vigent, extinguatur, aut paulum certè, præsertim in junioribus, intepestcat, sapienter institutus à S. Ignatio fuit annus tirocinii tertius, quem perfuncti studiis nostri sic transigerent, ut à litteris aliisque curis profanis omni-

Lib. I. no feriat, & spiritualis vitæ officiis penitus addicti, primum illum exsuscitarent ignem, virésque longo studiorum cursu quasi debilitatas reficerent.

Anno 1631. Regis, Theologico spatio confecto, ultimam hanc periclitationem obiit. Quos cælestis gratiæ thesauros in famuli sui sinu benigna DEI manus tunc effuderit, cognitum singillatim non est: illud universè constat, ipsum acriori desiderio divitiarum gloriæ amplificandæ accensum, informasse animo & primis veluti lineis designasse cursum ac tenorem vitæ, quem in Evangelico deinceps ministerio secururus esset. Ad hoc porro novum vitæ genus ingens in rerum cælestium meditatione, silencio, jejuniis, durissima corporis vexatione, præsidium sibi comparavit.

*Tertium*  
*Tirocinii*  
*annum o-*  
*bit 1631.*  
*Missionē*  
*in patria*  
*instituit*  
*magna*  
*cum fru-*  
*ctu.* Sic augebat in pio secessu partas virtutum opes, cum præter expectationem jussus est à P. Mutio Vitellesco, Præposito Generali Societatis, conferre se Fontemcoopertum, ad domestica quædam negotia componenda. Non sine gravi mœrore intellexit revivendos sibi propinquos & affines, quos in perpetuum oblivisci decreverat. Mœrorem suum solatus est suscepto consilio Missionis in patria instituendæ, ut illarum ibi à se adolescente, inquietabat, deterioribus exemplis damnum melioribus sarciret.

Quod iter aliquem alium valde delectasset, laboriosam ipsi patientiæ & humilitatis materiam præbuit. Sic solent Sancti, omnia in lucro ponunt. Confecit illud pedibus, & emendicato victu. Fontemcoopertum ingressus, ægrotos & pauperes visere primum curæ fuit. Diurnas occupationes, quandiu illic versatus est, sic ferè sibi ipse præscripsit. Matutinis horis orationem sacram ad populum habebat, pueris tradebat elementa doctrinæ Christianæ, peccata confitentibus aures dabat. Pomeridianis horis paulò antè noctem iterum concionabatur. Reliquum tempus consumebatur visendis pauperibus, colligendis locupletum elemosynis, & in egentes familias, ut cuique opus erat, distribuendis. Amabat se, ac placebat quodammodo sibi, in consolandis ægris, in obeundis eorum causâ ministeriis, etiam infirmis: nec rarò ad eorum cubilia pernoctabat. Quoties prodibat in publicum, euntem stipabat vicatim caterva puerorum & pauperum. Utrisque totum se dabat, istis sublevandis, illis erudiendis.

*Ejus in*  
*pauperes*  
*caritas.* Ejus fratres, qui primarios inter cives numerabantur, fraternam vivendi rationem suam dedecus interpretati (ut ferè sunt hominum judicia, res optimas & sanctissimas oculis carnis intuentium)

um) dolorem suum dissimulare non potuerunt, & in eum verbis Lib. I.  
asperioribus sunt inveci. Aiebant modum aliquem statuendum  
tam effusæ pietati: non carere civitatem hospitali domo, itémque  
carcere; ibi posse illum exercere solita caritatis officia: quod si  
tanta esset cupido pauperibus opitulandi patere illi suam ipsorum  
arcam; nummos, quantum vellet, in promptu fore: at neque  
illi, neque ipsis satis decorum esse, si ostiatim, instar mendicabuli,  
corrogaret cibum, miserorum vili turmâ, & puerorum agmine  
semper cinctus. Respondit benignè Regis se, qui Christianus es-  
set, gloriari quòd inserviret pauperibus, cùmque in iis Christum  
aspiceret, nequaquam turpe atque indecorum arbitrari, si cum iis  
degeret, si familiariter iisdem uteretur; si denique mendicando  
ageret partes & personam nonnullorum ex ipsis, qui pudore, aut  
morbo impediabantur, nè subsidia sibi necessaria compararent.  
Mirati fratres tam religiosæ, tam Christianæ responsionis verita-  
tem, aliquandiu quieverunt; illumque liberius passi sunt eò ferri,  
quò cælesti spiritu impulsus rapiebatur.

At oblata paulò post occasio querelas ipsorum & dolorem  
gravius accendit. Peditum legio Marchionis D' Ambres venerat.  
Fontemcoopertum, ibi hiematura. Dum milites ludo, ut fit, in-  
dulgent in foro, accidit ut Regis præteriret onustus culcitâ strami-  
nea, quam pauperis in tugurium portabat, coacti ob egestatem hu-  
mi jacere. Transeuntem conspicati milites ridere, cavillari; qui-  
dam etiam clamore incondito sibilisque prosequi.

Re cognita, ejus fratres hunc immodicæ pietatis impetum fre-  
nandum denique censuerunt, nè ludibrio & despectui hominibus  
esse pergeret. Obtestantur ut meminerit se nobili loco natum es-  
se, non decere ut in cognatorum oculis, nullam vel sui, vel ipso-  
rum rationem habeat. Ad hæc modestissimè vir sanctus; *Ma-*  
*gnam, inquit vobis gratiam habeo pro singulari, quam de me ge-*  
*ritis, cura; ceterum temperare mihi non possum, quin miseris, qua-*  
*cunque possum ratione, succurram, neque ulla tanti apud me igno-*  
*minia unquam erit, ut officium caritatis propterea vel puncto tem-*  
*poris omittam. Amplum & præclarum mihi duco pauperibus ali-*  
*quam opem ferre; præclarum quoque nonnihil ignominia idcirco*  
*perferre.*

*Laudamus enimvero, inquit illi, & gratulamur; neque*  
*per nos stabit, quin totum te operibus misericordie impendas; sed*  
*ita tamen ut consideres quid prudentiæ lex, quid conditio tua po-*

**Lib. I.** *stulet : Valetudinarii publici limen assiduus tere, si superis placet : sed noli vectandis per forum stramentis populo fabulam & ludos dare : hac prepostera & absurda pietas fama tua nocet, nobisque non leve dedecus inurit.* Aderant aliquot amici familiae, cum hæc dicerentur, eumque benignè monuerunt, videri sibi iustas fratrum querelas. Addiderunt committendum ipsi non esse ut nobilem, unde ortus erat, domum dedecoraret hac vivendi ratione, tam à suis natalibus, professione, institutoque aliena.

Audivit hæc, aliæque id genus, Regis summa vultus & animi æquitate : & quamvis non parum gauderet acceptam modò publice ignominiam, hac privata objurgatione cumulari ; nihilominus paulò vehementius commoveri visus, hæc breviter subjecit : *Ministros Evangelii obcundis, quæ Christiana suadet humilitas, operibus nequaquam dedecorare professionem ac dignitatem suam : hæc humilitatis fundamenta pridem ab Apostolis, eorumque successoribus jacta esse, iisque inædificatam Ecclesiam : se quidem, dum nihil in DEUM peccaret, hominum judicia & sermones susque deque habere : Placita Evangelica normam & sentiendi & vivendi semper sibi fore, non vesanas profani seculi leges.*

Tam liquidæ, tam generosæ orationi quod opponerent nihil habuerunt : & abjecta spe frangendi hominis, qui leges ejusmodi sibi præscripsisset, postea non sunt ausi obsistere quo minùs pristinum vitæ cursum teneret. Apostolicis laboribus fructus respondit, ac similis portenti visa est mutatio, quâ brevi tempore civitas tota novos mores induit.

**Litteræ P.** Rem gestam ad Præpositum Generalem Societatis perscribens  
**Provinci-** P. Petrus *La Casé*, Provinciæ tunc præses, narrat compositas feli-  
**aliæ ad** citer ab eo domesticas lites, relictum in patria sanctitatis odorem  
**Præpositū** suavissimum : plurimos ad virtutem excitatos ejus non minùs ex-  
**Genera-** emplis illustribus, & piis colloquiis ; quàm concionibus, spiritu  
**lem Patri** Christi animatis. Ipsius demum cives prædicare satis non posse  
**Regis per-** admirabile studium & ardorem, quo in sempiternam illorum salu-  
**bonorifi-** tem incumbibat. Hæc tam sancta, tam fructuosa vitæ ratio,  
**ca.** quam P. Joannes-Franciscus Regis inter suos duxit, documento esse potest religiosi viri, qui vocationis suæ parum memores, concurrant affinium domos, non ut illis fructum aliquem virtutis impertiant, verum ut aliquid ab iis capiant solatii commodique, instituto suo minimè congruentis.

Composita inter propinquos pace, recepit se ad collegium

Apa-



Apamiense, illuc missus ut locum impletet magistri scholæ puerilis, qui morbo implicatus tenebatur. At simul scripsit Provincialis ad Præpositum Generalem flagrare P. Joannem-Franciscum incredibili desiderio laborum Apostolicorum; videri, omnium iudicio, destinatum divinitus ad expeditiones Euangelicas: neminem resistere posse Spiritui, qui loquebatur ejus ore, sive verba faceret è superiore loco, sive privatim viritumque differeret: in eodem elucere summam sui despicientiam, cum summa populi approbatione ac laude conjunctam; nec minorem crucis & ærumnarum sitim: in hanc denique omnes sententiam & mentem convenire, illum ad sacras Missiones deinceps unice applicandum esse.

Scripsit ad eum pariter Provincialis quid consilii de ipso cepisset: sperare se futurum, ut Missiones in posterum ab illo suscipiendas æquè fortunaret DEUS, atque illam in patria nuperrimè ac felicissimè confectam. Nihil poterat Regis audire jucundius, nihil ad sua vota magis accommodatum. Destinatus obeundis Apostolorum muniis, de Apostolis imitandis unice cogitavit. Annos vitæ decem ultimos, ut S. Franciscus Xaverius, consecravit Missionibus. Hoc illi curriculum, hæc sola fuit palæstra, dum vixit. Eas inchoavit in Monte pessulano, & vicinis oppidis: eandem profecutus est in Vivariensi tractu; denique cum vita terminavit in urbibus & pagis Ve-launorum, quorum caput Anicium est.

*Ad Sacras  
Missiones  
totus in  
perpetuū  
applicatur.*



# V I T A

## B. JOANNIS

### FRANCISCI REGIS.

### Liber II.

**P**ater Joannes-Franciscus Regis ingentem sacrarum Missionum campum, sibi à superioribus feliciter apertum intuens, sic illum decurrere statuit, ut æstatem in urbibus, hiemem ruri transfigeret. Soluti opere rustico per hiemem agrestes otii plus ut erudiantur habent: tum, ipsa tempestatis asperitas uberio-rem Euangelii præconi materiam patiendi subministrabat.

Principium illi Apostolici laboris Mons pessulanus, Episco-  
palis civitas Occitaniæ, quam insigniter commendant amœnitas cæ-  
li, ædificiorum elegancia, soli fertilitas, opulentia commercii, ur-  
banitas civium ingenio par, celeberrima medicorum academia, de-  
*Missiones* mum splendor dignitasque comitiorum provinciæ, quæ ibi vulgò  
*incubat à* celebrantur. Urbem ingressus ineunte æstate anni 1631. statim ad  
*Montepes-* pueros instituendos animum & curam appulit. Diebus festis &  
*sulano.* Dominicis ad populum verba faciebat in templo collegii. Con-  
*1631.* cionis hic modus & ordo erat. Primò caput aliquod Euangelicæ  
doctrinæ exponebat oratione familiari, & ad omnium intelligen-  
tiam accommodata. Deinde, cùm veritatem in bono lumine col-  
locaverat, ex hoc veluti fonte multa derivabat ad aliquam vitæ  
actionem & morum emendationem pertinentia, iisque plusculum  
immorabatur. Postremò in varios affectus prorumpibat, nunc  
vehementiores, nunc leniores, ut captus auditorum, & ipsius ar-  
gumenti ratio postulabat.

Porro tantus erat dicentis ardor, ut vox illum sæpe virisque  
deficerent. Interdum abrupta orationem, & meditati similis,  
derepente consistebat. Tunc inardescibat vultus, tunc ita com-  
movebatur intimis sensibus, tantæque vi, tanta suavitate, quasi ru-  
ptis aggeribus exundabat oratio, ut ex oculis auditorum, & con-  
cionatoris lacrymarum rivi defluerent. Quamvis uteretur simplici

ac

at populari sermone, sinè pigmentis & fuco; tamen ad eum audiendum splendidissimi quique cives catervatim accedebant; eoque audito improbissimus quisque salutari concussus pœnitentia discedebat. Lib. II.

Accidit ut concionator eximius, qui celeberrimas regni urbes eloquentiæ suæ famâ impleverat, Montem pessulanum præteriens videret. Attonitum successu tam incredibili cupido incescit audiendi hominis, cujus cœlestis facundia tot haberet præcones, quot auditores. Audivit: erumpentemque templo cernens multitudinem propè infinitam cujuscumque conditionis, largo fletu perfusam, ardentem dolore, quem gemitus, suspiria, ejulatus, testabantur. *Nos verò, exclamavit, infelices & inconsultos, qui tantum laboris in eliminandis nostris concionibus impendamus! Hujus sancti Missionarii orationes incomptas, & catechismo proximas, excipit omnium admiratio, & insignis morum emendatio consequitur: nos, postquam sudavimus in concionibus nostris perpoliendis, dolemus raros inveniri qui laborent eas audire; rariores qui auditis moveantur & proficiant.* *Ejus ratio concionandi.*

Neque tamen valde mirandum est fuisse in ore P. Joannis Francisci Regis sermonem DEI penetrabiliorem, ut loquitur Apostolus, *omni gladio ancipiti.* \* Ad dicendum se comparabat longis ac sollicitis precibus, & quem in oratione sacrum ignem toto hauserat pectore, eodem alios incendebat. Hinc actio illa vehemens, plena spiritûs & animi; illa vox tam suaviter, tam efficaciter in aures mentesque influens; prorsus ut intelligeres ipsum iisdem rebus commoveri, quas in auditorum animis defigere contendebat. *Ad Heb. 4.*

Quamvis mortales omnes cujuscumque generis & conditionis caritas ejus complecteretur, neque suam viris honestioribus operam denegaret, peculiari tamen inclinatione voluntatis propendebat in salutem pauperum, erga quos optimi parentis amorem & viscera induerat. Inter illos ferè habitabat; obvios suavissimè amplexabatur: *Adeste, inquit, filioli mei, thesaurus meus, delicia mea.* Sacræ pœnitentiæ tribunal in quo sedebat, ambiebant conferti: *Non deerunt ajebat confessoriis lautis opulentisque civibus; pauperes, hac portio gregis Christi magis derelicta, meam sibi curam, amores meos sibi vindicant.* *Pauperum & agrotorum cura.*

Ità loquebatur; ità sentiebat; seque pauperibus juvandis natum; illis, dum viveret addictum, ac devotum esse oportere, censebat.

**Lib. II.** Tempus omne matutinum consumebat audiendis confessionibus, neque sanctum hoc ministerium intermittebat, nisi cum datur signum explicandæ rudibus & pueris doctrinæ Christianæ. Tunc assurgens, & frusto panis, aut pomo, pastus obiter, interdum jejunos suggestum conscendebat. Indè ad vinctos in custodiis; ad ægrotos in nosocomiis, properans, ibi reliquum ponebat diem, neque ad collegium ante noctem se referebat, corporis ac valetudinis immemor. Quod aliquando cum observâset nobilis matrona, quæsit ex eo vespere, cur totum diem sic impastus exegisset; cui Joannes-Franciscus, *Fatebor*, inquit candidè, *id quod res est: dum hac misera & inops turba me occupatum tenet, aliud cogitare nihil possum.* Nullus ægrotabat in civitate pauper, quem non inviseret, cui levamenti quidpiam non afferret. Singulis Sabbathis, & pridie solemnium festorum obibat urbem, & ostiatim divites compellans, eorum provocabat liberalitatem, ac beneficia colligebat. Nemo consequi verbis potest quemadmodum afficeretur aspectu miserorum, & quanta sollicitudine ad eos sublevandos incumberet. Attentus, vigil, experrectus, excubabat in omnem partem, ut eorum latebras & tuguria deprehenderet. Ægroti quorum ulcera purulenta oculos intuentium vulnerabant, & foetentes plagæ graviores etiam mephitim inhalabant naribus, tantum abest ut illum absterrent, ut potius allicerent suavius, quam ceteri, ejusque diligentiam acuerent. Purgabat & curabat illorum vulnera, neque ullum est ministerii genus tam sordidum atque despectum, quò se illorum causâ non abjiceret.

Si honestior paulò civis jaceret æger, & propter angustias rei familiaris, destitutus; non conquiescebat donec illum omnibus præsidiiis & copiis largè effusèque instruxisset. Agebat cum medico, ut eum adiret gratis; cum piis matronis, ut laboranti adessent. Cumque hæc omnia præstitisset, displicebat ipse sibi; & aliquid abesse caritati suæ, votisque judicabat. Vidit illum Mons pessulanus, ut paulò antè Fonscoopertus viderat, per mediam urbem ire onustum stramentorum fascibus, quos emendicando corrogaverat, ut ægrotanti pauperi lectum sterneret. Risit puerorum turma procax, & nonnemo sapientem Crucis stultitiam ignorans, *Ne tu*, inquit, *ridiculus cum istoc fasce tuo fuisti.* *Bene habet*, subjecit Regis, *lucrum duplicatur, cum ad officium caritatis, fructus humilitatis & opprobrii pie tolerasti, accedit.* Ut autem hæc officia caritatis efficaciora essent, & magis diuturna, fe-

mi-

minas triginta, è primariis civitatis, unam in sodalitatem collegit; Lib. II. illisque curam custodiarum attribuit.

His præsertim ægris invigilabat quorum valetudo & vita veniebat in dubium, omnemque adhibebat industriam ut eorum salutem sempiternam in tuto collocaret. Hac impulsus caritate, quæ *Mulierem hereticâ Ecclesiæ restituit.* facilem ipsi aditum ad ægros dabat, domum subierat hæreticæ mulieris, quam morbo graviter periclitari audierat. Invisabat illam frequens, & obsequiis omnibus atque officiis prosequabatur, id agens ut mentem cæcam facilius illustraret. Ac veritatem illa quidem propositam agnovit: sed, errore ac vitio multis familiari, moras necere parabat, nè cognitam statim profiteretur. Indoluit graviter DEI famulus, & novo succensus ardore, cunctantem urgere non destitit, donec restitutam Ecclesiæ gremio, & omnibus virtutum auxiliis, quibus vera fides & tenera pietas morientes armare solent, munitam excedere lætus vidit.

Hanc de mulieris pertinacia & cunctatione victoriam, aliæ *Feminas complures profligatâ vitæ ac famæ re-vocat ad bonam frugem.* multò difficiliore, & majoris momenti, sunt consecutæ. Abundabat Monspeffulanus mulierculis profligatæ famæ ac pudicitiae, quarum illecebris juvenus capta in exitium ruebat. Cæli blandissima temperies; adolescentum ex omni gente concursus, quos vetus & justa medicæ scholæ fama invitabat; demum hæresis ibi tunc regnans, magnam dabant sceleri licentiam, & sceleratorum numerum augebant. Tot animarum perniciem deplorans Regis, divinam opem gemitibus tacitis invocare non cessabat. Sed præcidendum mali fontem existimans, impurum illum gregem muliercularum exterminare constituit. Rem sanè arduam, nec minùs periculofam. Difficultatē ac periculo major animus Apostolici viri fuit.

Degebat non procul ab urbe famosum scortum. Rescivit; & accurrens, mulierem oratione tam efficaci, tam luculenta, commovit, ut è vestigio locum suæ libidinis deseruerit. Parum erat peccandi voluntatem eripuisse, nisi pariter causa peccati tolleretur, nimirum inopia, quæ miseram specioso necessitatis vinculo constrictam in flagitio retinebat. Huic malo ut mederetur, illi receptum in ædibus piæ matronæ comparavit. Hoc ubi manavit in vulgus, magnam apud omnes commendationem habuit. Non leviolem merebatur laudem puellæ nobilis ad bonam frugem ductio: sed quia minùs erat nota ejus nequitia, sermonis minus & admirationis populo præbuit. Apertum Divini verbi scalpello

Lib. II. ulcus effudit venenum latens, & puella obsequens medico sapienti, cedensque urbe, in nosocomium se contulit, ubi caritatis & poenitentiae operibus dedita, superioris vitae deterfit labes, nec ita multò post eandem felici morte clausit.

Qui ad humanæ prudentiæ normam omnia exigunt, obstupescunt, opinor, cum audient Euangelicum hunc animarum ventorem ausum esse ipsa obscenitatis latibula subire, atque in ejusmodi luparum, ut inde prædam raperet, lustra foveasque penetrasse. Verum infinita propè illarum multitudo, quas à vaga & libidinosa peccandi consuetudine retraxit, perspicue docet, illum, DEO ducente atque approbante, usque eò progressum fuisse, quamvis immensa illa servandarum animarum cupiditas extra modum prodire aliquibus videri posset.

Nullum faciebant amici finem admonendi operam ipsum perdere; hæc publica libidinis mancipia nunquam ferme serio respiscere, aut certè (quæ vis est inveteratæ consuetudinis) vulgò in pristina revolvi scelera. *Tametsi respondebat ille, nullum alium laboris mei caperem fructum, quàm ut nè Divina Majestas vel semel gravi peccato laderetur, satis magnum opera pretium fecisse me arbitrarer.* Nihilominus constat peculiarem quandam constantiæ dorem in iis eluxisse, quas ad pudicitiae leges ac decus, à licentia & sordibus impudicitiae revocabat; neque illas in amplectenda virtute minùs sinceras extitisse, quàm firmas & stabiles in conservanda; ipsarum magistro ac ductore idonea inconstantiae muliebri frenandæ remedia providente.

Igitur, nè metu egestatis, aut consuetudinis tyrannide abreptæ rursus in barathrum demergerentur, unde feliciter emerferant, eas ab hoc gemino scopulo removebat, tradebátque certis, & expertæ probitatis matronis, quæ plures paucioresue, interdum quinque simul, sexve, domi suæ tutabantur & alebant. Erant nonnullæ minùs depravatæ, quas inopia sola impulerat in scelus: pudebat illas infamis vitæ, hanc tamen ut abjicerent adduci non poterant, quia nihil, unde victum peterent, suppetebat. Istis præcipuam impendebat curam: aliis honestum, ubi degerent, locum procurando; alias in religiosos inducendo cætus: omnibus necessaria subministrans adminicula, ut stare in via justitiæ sinè prolapione possent.

*Domū feminis respicientibus parat.*

Cum augeretur in dies feminarum numerus, quæ illo duce ad virtutis & pudoris castra transfugiebant, domus quærenda fuit, quæ

quæ caperet universas. Idoneam coëmit, quæ postea *Refugium* Lib. II. est appellata, & cujus administratio religiosis commissâ est virginibus, quæ illas sanctissimâ educant & continent disciplinâ. Ul-  
timam huic operi pio manum adhibere tunc non potuit. Hiems illum ad rusticanas missiones discedere coëgit.

Ad ejusmodi Missiones jam pridem DEI famulus votis omnibus ferebatur, per quas fieret similior Christo, qui se *ad evangelizandum pauperibus* missum esse profitetur, quique Judææ oppida & pagos Hierosolymitanæ civitati semper prætulit. Laboriosum hoc stadium Sumeriis est ingressus, exeunte anno 1631.

Sumeriæ, oppidum est Occitanæ, quatuor leucis distans *Missio Sumeriis; ac* Montepessulano, caput cultissimæ regionis, cui Lavonagiæ nomen *per totam* indigenæ fecerunt. Hæretici catholicis & numero & opibus longè *Lavonagiâ, exe-* præstabant. Agri fertilitas, amœnitas sitûs, opulentia mercato-  
rum, concursus nobilium, qui locum frequentare, in eoque gau-  
debant confidere, magnam oppido celebritatem conciliabant. At *unte anno* 1631.  
hæresis ita mores contaminaverat, ut à Calvinistis Catholici, nisi penès quasdam cærimonias, non discreparent. Qui cælestis doctrinæ panem parvulis frangeret nemo erat, cum parentes eadem ac liberos vexaret inscitia: plerique omnes turpi laborabant rerum divinarum ignorance, aut sceleratâ licentiâ fruebantur. Movit apostolicum pectus oppidi facies miserabilis. Fiduciâ tamen divinæ misericordiæ erectus, remedium aliquod afferri tot malis posse speravit. Juvat ordinem exponere, quem in functionibus Evangelicis constanti tenore semper adhibuit.

Postquam duas trêsvæ ad summum horas somno indulserat, *Quem in* reliquam noctem meditationi rerum cælestium, & parandis concionibus tribuebat, donec subiret in templum. Eò se conferebat *Missioni-* ante lucem, ac protinus explicabat aliquod divinæ legis caput fa-  
miliari & obvio sermone. Deinde operam dabat peccata confi-  
tentibus; mox ad populum dicebat. Post concionem ad sacrum *bus obeun-* poenitentiae tribunal se referens, in eo tandiu perstabat, dum faciendâ re divinâ maturinum tempus clauderet. Pomeridianum *dis ordi-* trans mittebat erudiendis pueris, visendis ægris, pauperibus suble-  
vandis, sedandis litibus, & dissidentibus in gratiam reducendis. Sub vesperum rursus concionabatur; mox confessiones excipiebat ad multam noctem, adeò ut illum à sacro tribunali veluti per vim avellere parochi sæpe cogerentur.

Ut se ad populi captum accommodaret, agendi modum se-

Lib. II. Stabatur nativum & simplicem : oratio nervorum & roboris sanè plena, sed quæ in rudium & imperitorum intelligentiam caderet : sermo è medio sumptus ille quidem, nihil tamen humile abjectum-que sonans : vultus nescio quid divinum spirabat : actio vehemens & incitata verbum salutis penitus animis inculpebat. *Mors peccatorum pessima*, novissimi iudicii severitas, inferorum æterni cruciatus, dilatae poenitentiae labes & ruina, quotidianam illi ferè materiam dicendi subministrabant. Hæc terribilia & illustria Euangelicæ scholæ placita, tam acri, tam aptâ concutiendis animis oratione tractabat, ut auditores attoniti, stupentes, & aculeo salutaris transfixi, discederent.

Primis diebus statim urbem totam commovit. Ad eum audiendum non modò populus, sed cum nobilitate, clerus catervatim concurrat. Jam tum visus est homine major, & ad restituendos in pristinae disciplinae integritatem mores, è cælo missus. Cum verba faceret, suspiriis templum omne circumsonabat, rigabantur lacrymis ora, ipse orator, præ animi impetu, vix sui compos à fletibus non temperabat.

*Ejus concionum Evangelica simplicitas representatur.*

Hæc audiendi aviditas, juncta cum successu tam admirabili, satis ostendebat illum non sinè certo Numinis instinctu impulsu-que incomptam hanc & pæne rudem dicendi rationem secutum esse. Floridior alia placebat socio, qui sententiae suæ tenax, læpe illum negligentiae in dicendo, & sermonis parum emendati, arguebat. Ausus quin etiam eundem propterea parum liberali joco insectari. Arguentem placidè audivit DEI famulus; gratias egit, utque pergeret se admonere, obsecravat. Citò subiit socium poenitentia inconsultæ reprehensionis, ac veniam supplex rogavit. Cui Regis; *Nimiùm citò beneficii te poenitet, quod in me contulisti.* Nec rarò postea idem socius confessus est, nunquam sibi venisse in mentem suæ imprudentis censuræ, quin erubesceret; nunquam religiosæ humilitatis servi DEI, quin eâ suavissimè tangeretur. Quod mendosè faciunt non pauci præcones Euangelii ut plausum captent oratione culta & limata, id sedulò fugiens P. Regis suum illud solemne dicendi genus simplex & inornatum semper tenuit; neque idcirco minùs frequenti, aut minùs benevolo utebatur auditore, etiam cum pueros & rudes Christianæ religionis mysteriis erudiret, id quod duabus continenter horis quotidie factitabat, nimirum expertus nihil esse ad extirpanda vitia, & restituendam pietatem efficacius institutione puerili.

Ma-



Magnum ejus orationi pondus addebat vitæ sanctimonia. Lib. II.  
 Omnibus amicam & ineluctabilem vim faciebat orator crucem *Perpecta*  
 unice anhelans, mendicato victitans cibo, signa omnia veri Apo- *sanctitas*  
 stoli præ se ferens. Illa singularis erga pauperes caritas, illa oris *animos o-*  
 & corporis totius conformatio, modestiam, humilitatem, & men- *mniū illū*  
 tem intus occupatam DEO, spirans; illa comitas admirabilis, in *conciliat.*  
 congressu, in actione omni, relucens, animos dulcissimis & invi-  
 ctissimis illecebris rapiebant.

Operarium infatigabilem nullus explebat labor: locus erat *Mira pa-*  
 nullus tam desertus, tam agrestis in vicinia, quò sua illum caritas *tiendi fi-*  
 non propelleret. Sæpe concionatus summo mane Sumeriis, inde *tiis.*  
 procurrebat jejunos, & in summa hiberni frigoris asperitate; pa-  
 gos complures pedibus perlustrabat, ubique doctrinæ Christianæ  
 semen spargens, ubique contentibus operam dans. In oppidum  
 reversus vesperi, statim suggestum conscendebat, & peracta con-  
 cione, conferebat se ad audiendas confessiones, nunquam defessus  
 labore, nunquam victus; idem semper ingentis animi vigor, li-  
 cèt sæpe vires exhaustæ deficerent.

Succubisset millies, nisi DEUS languentem & pæne confe-  
 ctum sustentans, opera ad majora reservasset. Quippe tot labo-  
 ribus, quibus omnino frangendus videbatur, voluntarias corporis  
 afflictationes addebat, in illque vix habebat modum. Ad panem  
 & aquam obsonii adhibebat nihil, præter lactis pauxillum aliquan-  
 do, & fructuum: nullus carnis, piscium, ovorum & vini usus.  
 Post diem solidum, & bonam noctis partem, in labore consum-  
 ptam, quies modica humi, aut in tabula. Juge cilicium; nullus  
 demum finis macerandæ carnis, ceteroquin laboribus attritæ. Ita-  
 que non rarò medio in opere collapsum & exhaustum anima defi-  
 ciebat, adeò ut vicinas in ædes deportandus esset, ut ibi spiritum  
 reciperet.

Orabant plurimi, at frustra, nè se temere sic perderet: pos-  
 se immensam illam, qua flagrabat, patiendi pro Christo famem sa-  
 tiari quotidianis ærumnis, quæ cum Evangelico ministerio erant  
 conjunctæ: hac immodicâ vitæ austeritate nihil effici aliud, quàm  
 ut ad salutem proximis afferendam inutilis, & omnino mancus eva-  
 deret. Surdis hæc auribus canebantur. Id unum audiebat quod  
 DEI gloria, quod salus animarum suaderet; propositasque vale-  
 tudinis tuendæ cautiones, tanquam indignas homine apostolico

H

deli-

Lib. II. delicias intuens, id unum in voluptatis & solatii ducebat loco, si quotidianam de se hostiam DEO immolaret.

*Fructus uberrimos à Missione colligit Sumeriis.* Fructus uberrimi, quos è concionibus colligebat, omnem laborum memoriam obliterabant. Ut artem persuadendi & morum vendi mirificè callebat, cedebant dicenti manúsque ultro dabant improbissimi quique, & in flagitiis obstinatissimi, mulieres perditissimæ, hæretici pertinacissimi. Attonitus ipse prodigiis, quæ cælestis gratia, in reducendis ad frugem bonam mortalibus, adiutore se, atque administro, ediderat, ad Præpositum Generalem scripsit fructum expectatione multò majorem fuisse; tantumque, ut eum oratione consequi nullo pacto posset. Alii videbantur esse cives, ac prioribus dissimiles: adeò mutata civitas, & culti emendatique mores pristinam turpitudinis ac nequitiae faciem exuerant.

Hæc Sumeriis feliciter gesta. Qua Missione perfunctus DEI famulus alias in variis Lavonagiae locis instituit. Eadem ubique exercitationes, iidem labores, idem Evangelici operarii conatus, ardor, & successus: concursus idem populi, morum emendatio par. Pagos & tuguria concursabat, docendo, concionando, pauperes, ægros invisendo. Nihil ejus curam attentionemque fugiebat, videbatúrque incredibile hominem unum tot, tamque diversis ministeriis parem esse posse. Rerum Sumeriis gestarum fama, & mutatae in melius tam insigniter civitatis miraculum, ita mentes præparaverat, ut simul atque percubuerat eum alicubi degere, huc è vicinia undique ad eum audiendum multitudo convolaret, eaque propè innumerabilis, etiam in locis minimè frequentibus; domumque repeterent omnes dolore peccatorum intimo luctuque perciti, & virum Apostolicum laudibus in cælum ferrent.

*Ædem sacram à vastitate defendit insigni fortitudine.* Ejus sanctimoniae opinionem memorabilis casus auxit. Missionem obibat in pago, prope Sumerias, cum rustici, rumore adventantis militum turmæ perterriti, sacram in ædem trepidè refugerunt, eò rem domesticam & quidquid pretii majoris erat, comportantes: ita quippe sperabant fore, ut si templi sanctitas militem non cohiberet, saltè ipso loci situ se suaque tuerentur. Milites, domos vacuas nacti, & prædam sibi ereptam dolentes, ædis sacrae valvas moliri, aditumque perrumpere constituunt. Incolæ ad vim injustam fortiter repellendam se accingebant, à numero, ab animis, & armis non imparati. Res in ultimum adducta discrimen erat, his aviditate prædæ accensis, illis se suaque defendere parantibus, ipsa desperatione spem atque audaciam stimulante.

Mis-

Missionarius interim excipienda ægroti confessione occupa- Lib. II.  
tus, quid ageretur audivit. Advolat, & armatus cruce in me-  
dios milites irrumpit, obsecrans per Christi sanguinem, ut loci  
sanctitate moveantur, ut parcant inopiæ miserorum, qui vix modi-  
cis opibus & fortunis, quas illis ereptum ibant, familiarum sua-  
rum angustias & tenuitatem poterant sustentare. Addidit certum  
sibi ac deliberatum esse debitam sacris altaribus venerationem,  
etiam profuso sanguine tueri, nec sibi quidquam accidere optatius  
posse, quàm ea de causa mortem oppetere.

Ubi surdis irrita jactati verba vidit, & sceleratos ad viam vi  
faciendam proflire, stetit in porta, & militem, qui primus ruebat,  
manu corripuens, *Siste*, inquit elata & minaci voce, *siste sacrilegum*  
*caput. Tunc, presente me, majestatem Numinis violare audeas*  
*domi sue? sic habeto, aditum buc, nisi per calcatum DEI viven-*  
*tis Ministrum, nunquam bodie tibi fore. Feri, macta: præsto*  
*sum; at ultorem violati templi DEUM, celeremque pœnam, ti-*  
*me.* Conturbati hac oratione, plenâ spiritûs atque imperii, &  
heroicam pectoris Apostolici fortitudinem admirati, omnes taciti  
atque innoxii discessere.

Pares animos, in dispari occasione, sed successu quoque di- *Gravem*  
spari, præ se tulit. Calviniani milites in ejusdem regionis pago *contume-*  
minabantur se direpturos hospitis sui domum, nisi hospes infelix *liam lætus*  
direptionem redimeret præsentî pecunia, quam numerare non po- *accipit.*  
terat. Hic nuntius ad DEI famulum perlatus est, cùm doctrinam  
Christianam in templo explicaret. Prodit ex templo & ad rustici  
periclitantis ædes rectâ tendit. Properantem retinere conati sunt  
qui aderant, cùm dicerent milites Calvinianos esse, quos non ne-  
sciebat internecino in Jesuitas odio flagrare; irritandos ejus præ-  
sentiâ feroçes animos, ac timendum nè quid ab iis oriretur injuriæ;  
cavendumque prudenter nè qua daretur improbis ad sæviendum  
anlâ.

Respondit vir sanctus se non ignorare milites esse Calvinia-  
nos, atque idcirco vel maximè se properare ut eorum furori homi-  
nem catholicum eximeret: præclare secum actum iri, si periret  
hæreticorum manu. *Quin possum, addidit, sanguinem fundere*  
*Christiani causâ, quem Christus redemit suo! Quàm libenter ca-*  
*derem martyr & victima caritatis! Sed tam, beata sorte dignus*  
*non sum.*

Festinabat interim summa celeritate, quò illum propulsandi

Lib. II. periculi gravitas & spes urgebat. Ut venit, milites aggreditur comitare solita, & profusis lacrymis orat ut incepto desistant, ut æquitatis & clementiæ meminerint. Illi aspectu Jesuitæ magis efferrati, non modò sanctitatem hominis reveriti non sunt, verum ejus precibus & lacrymis nihil præter convicia & ludibria reposuerunt. Postquam intellexit humilis DEI famulus nihil preces ac minas ad impiorum vim comprimendam valere, tacitus abcessit, dum isti abeuntem conjectis, quorum fortè illic acervus jacebat, cæpis, & jocis militaribus conviciisque, prosequerentur.

*Hereticum  
centurio  
ejus hu-  
militatē  
laudat.*

Regis omnibus lætitiis incedebat, quòd partem aliquam opprobriorum Christi degustaret. Nihilominus, ut erat tam diligens alieni commodi, quàm negligens sui, ductorem militaris turmæ adiit, oravitque ut juberet rustico restitui, quod ipsi per vim ablatum fuerat. Audivit orantem perhumaniter ductor, quamvis hæreticus, & quod petebatur annuit. Cùm verò nullam ab eo mentionem fieri vidit injuriæ & contumeliæ, quam illatam ipsi à militibus audierat, vehementer obstupuit, & hujus silentii causam quæsit. Cui Regis, *Pracones Evangelii*, ait, *ita comparatos esse oportere scito, ut hominum contumelias & maleficia in beneficiis numerent. Hoc suis ministris Ecclesia vera precipit, ut opprobria & ferant patienter, & benigne condonent. Cur enim verò querar, aut doleam, oblatam esse mihi occasionem mores meos ad religionis meæ placita conformandi?* Adjecit se beneficii locò unum postulare, ut milites suos compesceret, & eorum vim ab incolis prohiberet. Promisit ille, responsi probitatem admirans, promissisque stetit. Antequam Regis finem primis istis Missionibus imponeret, instituit sodalitatem Sanctissimi Sacramenti Sumeriis, & in omnibus oppidis pagisque Lavanagiæ. Familias mutua pace devinxit, compositis litibus; curavit ut cives, lux quisque domi, certas manè ac vespere preces funderent; modum sublevandi pauperes in singulis parœciis præscripsit: nihil denique prætermisit, ut opera pietatis bene inchoata, essent quàm maximè diuturna.

P. Balthasar *Carreil*, Rector Collegii Montis pessulani putavit Præpositum Generalem Societatis de faustis P. Joannis-Francisci laboribus certiorum esse faciendum. Ad eum scripsit peragratas ab hoc impigro Missionario fuisse varias partes diœceseon Montis pessulani, & Nemausi: Apostolicæ caritati ærumnas incredibiles, ærumnis parem fructum respondisse: multos peccatorum, multos errorum & hæreseon vinculis exsolutos; incertum plùsne roboris

an

an suavitatis ejus concionibus inesset : illis verò singularem vitæ Lib. II.  
sanctimoniam suffragari, ejusque virtutum odorem tota regione  
diffusum, longè latèque permanâsse. Ab his initiis nihil non expe-  
ctari oportere. Atqui præludebat duntaxat istis primarum Missio-  
num quasi velitationibus, ad graviora certamina, & majoris molis  
Missiones, quas in Vivariensi tractu suscepturus erat.

Cùm diocesim Vivariensem nunquam intermisso labore per *Deplorā-*  
trietinium excoluerit, operæ pretium est cognoscere quo in statu *du Vivari-*  
religionem ibi offenderit : indè quippe magnitudo laboris, & suc- *ensis Di-*  
cessus, clariùs apparebit. Diocesis Vivariensis pars est superioris *acsis sta-*  
Occitaniæ, urbibus, oppidis, & pagis quàm plurimis confita- *tu, cum*  
Abundat regio silvis densissimis, & montibus in immensam alti- *eam exco-*  
tudinem editis. Videre est loca tam deserta & inculta, ut meritò *lere P. Re-*  
dubites hominibùsne, an feris, habitentur. Decimisexti seculi *gus est ag-*  
*gressus.*

pars ferè dimidia fluxerat, cùm hæresis Calviniana, torrentis ritu,  
ruptis aggeribus exundantis, per universam bacchata Galliam, in  
Helvios (id priscum Vivariensibus nomen) se se violentiùs effudit,  
ac miserandam latè stragem edidit. Regio infelix brevè theatrum  
evasisit, in quo crudelitas, ambitio, impietas, personam quæque  
suam & luctuosas vices egerunt. Cœnobîa incensâ, vel diruta :  
templa destructa, vel profanata ; deturbatæ aræ, quique in iis ado-  
randam hostiam immolabant sacerdotes ipsimet Calviniano furori  
immolatæ victimæ, & diris modis excruciatæ ceciderunt. Non  
fuit satis teterrimam in oves carnificinam exercere ; sævitum in  
pastorem, & Euchérius à Sancto Vitale, Vivarii Episcopus, extur-  
batus urbe, & Avenionem profugere coactus est.

Ab eo tempore montes Helviorum, tanquam arces tutissimas,  
& munitiones impenetrabiles, Hæresis occupavit. Perdomitæ fue-  
rant urbes pertinacissimæ, Nemausus, Monspeffulanus, Angeria-  
cum, Monsalbanus. Vivariensium perfidiam frangere nulla vis,  
auctoritas nulla potuerat. Addebat illis animos Gebennicorum  
vicinia montium, in quibus excitati nostra tempestate rebellium  
tumultus, & periculosæ factiones, satis docent quid fanatica plebs  
tunc auderet, cùm Calviniana secta, excusso Ecclesiæ Principisque  
jugo, liberrimè regnaret. Altum illa quidem & immane vulnus  
anno 1628. acceperat, excisâ Rupellâ, sed eo tamen extincta &  
exterminata non fuerat : collegit se ac paulatim veluti revixit in  
Helviorum urbibus. Privatum oppidum cùm oppugnaret Ludo-  
vicus XIII. non indignum majestate sua duxit, si obsidionem præ-

Lib. II. sens ipse regeret. Privatio expugnato, & manibus exuto, Calvini gregales in istis Vivariensium latibulis, numero, armis, & audaciâ freti, metum incutere pergebant, impiósque ritus eo celebrabant confidentiùs, quòd illos prohibere neque tutum, neque satis consultum videbatur. Datum est aliquid turbulentis temporibus, satiusque creditum indulgere nonnihil ferocibus animis ad vim & rebellionem semper accinctis.

Nemo non intelligit quàm deplorandus esset status religionis in ea regione, in qua hæresis, dominandi avida, confirmare suas opes, & sedem quandam regni statuere ab annis quinquaginta incredibili furore laborabat, & ubi reipsa tristem adepta dominatum, durissimam tyrannidem exercebat. Ut ruina morum labem religionis secum trahit, vitia turpissima in Vivariensium agros error introduxit, quæ funesta contagione catholicos brevè depravârunt. Usura & mala fides ubique regnabant; ubique cædes & latrocinia: nihil securum publicè: montes receptacula prædonibus dabant, qui obvios quosque, sinè discrimine, pecuniâ spoliabant, aut vitia. Catholici juxtâ atque Hæretici in crapulam & fœdissimas libidines effusi. Hanc morum corruptelam secuta est rerum sanctissimarum profana violatio. Catholici, quibus instillata cum lacte impietas, potentiorum hæreticorum gratiam captabant, illis imitandis, & augustissimas religionis cærimonias per jocum & ludibrium in sermonem adducendis. Catholici nimirum verbo tenus, & nomine.

Ministri Domini, per quos afferri malo remedium oportebat, illud fovebant moribus flagitiosis; interdum populo ipso nequiores. Ovile Christi passim aut pastoribus destitutum, aut parochorum curæ demandatum, quorum turpis vita, & inscitia miserabilis. Ignoratio divinæ legis ferales ubique tenebras offudebat. Rustici obliti erant, aut potius nunquam cognoverant, mysteria religionis, atque officia præcipua, & maxime necessaria. Sic in teterrima miserrimi temporis perturbatione, cum hinc cæcus hæreseos furor, indè civilis belli rabies vesana baccharetur, vacuum tantum & inanem umbram Christianæ legis ac fidei Vivarienses retinebant. Ædes aliquot sacræ semirutæ; aliquot cærimoniarum nondum obliterated usus, deformes religionis antiquæ reliquias ostendebant.

Hæc erat Vivariensis diœcesis luctuosa facies, cum partim hæreticorum in schismate pertinacium, partim catholicorum, divinæ

vintæ legis ignorantia, & morum infamiâ laborantium, tetra col- Lib. II.  
lucies sacra pariter & profana omnia miscuerat. Ludovicus Fran-  
ciscus *dela Baume de Suse* Vivarii creatus fuerat Episcopus jam  
indè ab anno 1621. Clarum viri genus, & spectatum non semel  
religionis studium, Ludovicum XIII. impulerant ut ejus fidei curæ-  
que committeret hunc Episcopatum, magni, ut erant ea tempora,  
præter ceteros, momenti. Tristes suæ diœceseos ruinas jam du-  
dum Præsul optimus deplorabat, idque eò dolentiùs, quòd nulla  
remedii adhibendi patebat via. In omnem ejus lustrandæ occa-  
sionem imminens, ad hæreticos veritate, ad catholicos vera pietate  
imbuendos, retardatus semper fuerat desperatione rei unquam feli-  
citer conficiendæ. Advenit fortunata demum dies, qua populum  
infelicem respicere divina benignitas decreverat.

E multorum sermonibus litterisque cognoverat Præsul vigilan-  
tissimus, quàm prospere, quàm secundis Superis, rem Euangelicam  
gereret in Missionibus P. Joannes-Franciscus Regis; ut viam sibi  
per omnia vel maximè clausa & invia cælestis facundiæ beneficio  
faceret: nihil putavit à se fieri præstabiliùs posse, quàm si hunc  
meditati operis adiutorem ab ipsius moderatoribus postularet. Ita-  
que scripsit ad P. *La Case*, Provinciale Societatis; ejusmodi ho-  
minem sibi opus esse dictitans ad reparandas suæ diœceseos ruinas.  
Provincialis, nec fas nec rectum judicans, Episcopo quod postu-  
labat negare, datùmque sibi locum gaudens pios ejus conatus ad-  
juvandi, Patrem Regis ultrò illi concessit, cui comitem adjunxit  
P. Jacobum *Beyssen*, in hoc Missionum campo non sinè laude ver-  
satum.

Regis, cognita superioris sui voluntate, gratias divinæ Pro- *Diœcesim*  
videntiæ ingentes egit, per quam obtingeret sibi tam præclara oc- *Vivariien-*  
casio pulcherrimæ messis colligendæ; & in viam statim se dedit. *sem cum*  
Præsul visendi hominis avidus, cujus egregias dotes, ac præsertim *Episcopo*  
insignem sanctimoniam, consentiens ubique fama vulgabat, ve- *lustrat,*  
nientem summa cum voluptate, ac propemodum veneratione, am- *anno 1633.*  
plectitur: narrat deinde quid audierit de rebus ab eo ad fructum  
animarum mirificè gestis in diœcesibus Nemausensi & Montispes-  
sulani; sperare se haud minùs utilem inter Vivarienses operam i-  
psius fore: deliberatum sibi esse obire atque inspicere diœcesim  
suam, utque negotium è sententia succederet, nihil sibi melius vi-  
sum, quàm si eundem operis tanti socium assumeret. Ad extremum  
oravit commendatam DEO suis in precibus rem haberet, ex qua  
tot animarum salus pendebat.

Lib. II. Regis primùm gratias amplissimas egit illustrissimo Præsuli, à quo se tanto affectum honore cerneret; deinde promisit se effecturum, quantum posset consequi, ut votis ejus & electioni responderet. Addidit agi secum præclare quòd liceret sibi tanti Præsulis ductu regi, & exemplis accendi, quibus instructus non dubitaturus esset quietem suam, imò vitam ipsam, ovium ejus salutis & obsequio devovere.

Præsul modestiam famuli DEI suspiciens, & nescio quo sanctitatis odore delibutus, quem ejus sermo, ac totus ipse, redolebat, jam tum ex hoc primo colloquio illi se suavissimo amicitiae vinculo devinctum sensit. Consequentibus diebus eidem se candidè ac penitus aperuit. Quàm lamentabilis dioeceseos suæ status esset, quid cepisset consilii ad restituendos cum disciplina mores, exposuit.

Postquam rerum agendarum modum & ordinem cum illo constituit, lustrationis initium fecit sub finem veris anni 1633. triennio post generalem Vivariensium defectionem. Prævit Regis ut populum adventanti præsuli præpararet. Ut autem coràm asperxit morum tetram luem, tota latè dioecesi fusam, malo minorem cognovit esse famam, & imaginem quam animo informaverat, licet fœdam atque horridam, longè tamen à vero abesse intellexit. Totum visitationis tempus in perpetua Missione consumpsit. Loca vel maximè inculta, derelicta, & abstrusa, tanquam Episcopi præcursor peragrabat labore ac molestia incredibili. Agrestes illi, ac pæne barbari montium incolæ, qui nunquam sacrum Evangelii conspexerant ministrum, stupebant cùm Missionarium infatigabilem cernerent obire singillatim mapalia, & vitæ capitisque periculum adire, ut ipsos per vias situ aspectuque horridas conveniret. Ejus sanctitatis perspecta brevè & sparsa lux, omnium oculos in illum, tanquam hominem peculiari Superùm dono datum, convertit. Cùm venturus aliquem in locum audiebatur, illuc toti concurrebant pagi. Addebant se socios Catholicis Calviniani, tam novæ, tam inaudite virtutis exemplo perculsi; nec satiari poterant prædicandâ & admirandâ Evangelici Missionarii vitâ, quem neque ipsorum agrestis & immunda rusticitas, nec tuguriorum paupertas & angustia, deterrebant quin eorum casas, vel spelæa potiùs ac latibula, subiret. Flentes & ad ejus genua provoluti, totos se ipsius curæ caritatisque permittebant.

Egre-



Egria, qua pollebat insigniter, comitate non solum paupe- Lib. II.  
 res & infimos quosque demerebatur, sed genere opibusque claros, Comitem  
 quorum in moribus tantum est ponderis ac momenti, seu vitii, seu de la Mo-  
 virtutis partes amplectantur. Enituit inter illos Comes the perfe-  
*de la Mo-* Etioris vi-  
*the Brion*, qui se socium & asseclam Apostolico deinde viro sic ta studio  
 junxit, ut ab ejus latere non discederet, & cujus exemplum univer- accendit.  
 sa ferme nobilitas regionis est imitata. Eum inter provinciæ pri-  
 mores præcipue commendabant non solum à majoribus accepta  
 claritas, verum etiam propriæ dotes eximæ; prudentia singularis,  
 usus dexter, ac tractatio negotiorum, sæpius experta; intelligentia  
 denique non vulgaris rerum ad religionem spectantium, de qui-  
 bus non aliter ac doctores, magistrisque, differebat. Tot laudes  
 in unum hominem congestæ magnam illi conciliabant auctorita-  
 tem inter populares suos, in quibus locum insignem obtinebat.  
 Missionum P. Joannis-Francisci successum nemo felicius promovit;  
 ac proinde non erit alienum docere quo ex fonte orta sit hæc ami-  
 citia, quæ illum cum DEI famulo arctissimè conjunxit.

Cum tota regio nomine ac rebus gestis novi Missionarii cir-  
 cumsonaret, illius visendi studio contulit se Comes in pagum, ubi  
 solitas obibat functiones. Imbuta cælesti quadam unctione con-  
 cionatoris oratio, æquè ac vita mirum in modum illi placuit.  
 Sempiternæ salutis negotium, magnum illud præ cæteris, atque  
 unum porro necessarium, secum reputans, hominis amicitiam ex-  
 petiit, quem divino spiritu plenum esse prorsus apparebat. Mul-  
 to id magis persuasum habuit cum eundem est allocutus; itaque  
 intimos illi recessus animi sui aperuit, eumque conscientia suæ ar-  
 bitrum sumpsit.

Sanè ad eam usque diem ita vixerat Comes, ut exactam ad  
 omnes Christiani officii leges probitatem palam sectaretur; anti-  
 quæ religionis cultor perquam studiosus, & acerrimus defensor.  
 Sed, quo more solent sapientes hujus sæculi, elatus avitæ nobilita-  
 tis gloriâ, & in rem semper augendam intentus, blandas amplio-  
 ris fortunæ spes alere non cessabat. Concionibus & colloquiis  
 servi DEI permotus Euangelicam profiteri sapientiam decrevit. Ac  
 principio quidem curæ fuit emendare quidquid in suis vel familiæ  
 moribus vitiosum esse deprehendit; deinde animum impensius  
 adjecit ad res divinas meditandas; Pœnitentiæ & Eucharistiæ sa-  
 cramenta singulis diebus Dominicis usurpavit; totum se sublevan-  
 dis dedit pauperibus, & purgandis ab errorum lolio hæreticis, qui-

K

bus

**Lib. II.** bus ipsius prædia scatebant : denique viri sancti monitis & consiliis tam feliciter est usus, ut exemplar veræ virtutis in eo tota nobilitas haberet.

Dici non potest quanto usui & adjumento Comes fuerit famulo DEI ad exequenda quæ moliebatur in rem animarum. Ubique præstò erat ad pios ejus labores provehendos ; utque magnum in provincia nomen Comitis, magnæ opes, erant ; nihil occurrebat sancto Missionario tam arduum ac difficile, quod tam potenti patrocínio fretus, ad optatos exitus non perduceret. Illi nummos affatim Comes subministrabat ad levandam pauperum inopiam, invitabat nobiles ad eum audiendum, hæreticos ad conferendum cum eo sermonem hortabatur : flagitiosos, & in vulgus malè notos ad eum adducebat, ut illos in viam salutis virtutisque reduceret ; quid piè, quid utiliter fieri posset suggerebat, utque fieret, auctoritatem suam insigni studio & fortitudine interponebat. *Alterum nobile ad perfectæ virtutis culmen erigit.* Per idem tempus P. Regis alterum nobilem virum vitæ perfectioris amore succendit. Nomen illi *de La Suchere*. P. Joannis-Francisci discipulus fuerat Anicii, ejusque virtutem exinde per magni semper fecerat. Ceterum pietatem altis radicibus habebat in animo defixam, quam nullus seculi corrupti turbo convellere potuerat. Lætus reperto magistro carissimo, quem semper ut sanctum suspexerat ; nec minùs delectatus Apostolici ministerii, ab eodem tam præclare utiliterque gesti, successu, totum se ipsi regendum tradidit ; eoque rectore tantum profecit, ut suæ conditioni consentaneam perfectionem virtutis omnem brevè sit consecutus. Sancto deinde pietatis & amicitiæ fœdere cum Comite *de la Motte* conjunctus, unà cum eo in rebus gerendis, quas P. Regis ad divinam gloriam aggrediebatur, adjutor illi semper & administrator extitit. E duobus istis, nobilibus æquè ac prudentibus viris cognita est magna pars eorum, quæ sanctus Apostolorum imitator, in Vivariensium urbibus egregiè gessit, & quæ oblivioso sepulta silentio, nunquam, absque illis testibus, in lucem historiæ venire potuissent.

Quemadmodum libidinis fœdæ lues Ecclesiam una vel maxime populatur ac deformat, sic ad eam extirpandam vires omnes industriamque Regis contulit ; præsertim cum eandem per omnes populi gradus, etiam sanctissimos, impunè grassari deprehendit. Nihil familiare magis atque obvium erat quàm concubinatus inter ipsos templorum ministros. Tetrum atque immane monstrum, cui

cui ortum hæresis, auctoritatem consuetudo, jus quoddam licentia dederat! Huic sanctus Missionarius acerrimum bellum, neque unquam intermissum, indixit, & debellatum profligatumque omnibus vulgò locis, ubi pedem figebat, expulit. Præcipuum illi certamen cum mulieribus, quæ libidine publicâ infames cladem latè ac vastitatem afferebant. Illas partim Christiana lenitate, partim invicta fortitudine, ad deditionem ferè universas compulit.

Dominus *de Simiane* Vicarius Generalis Diœcesis Vivariensis, sæpe testatus est datum id divinitus servo DEI, ut feminis vel perditissimis amorem castimonie inspiraret. *Non raro contingit*, addebat ille, *ut ejusmodi prostibula post factas aliquandiu inducias, referant se ad pristina impudicitie castra, consuetudinis impetu tyrannico abrepta, ac priora scelera gravioribus cumulent. At nullam earum, quas P. Regis in viam salutis reduxerat, vidi quæ locum virtutis deseruerit, quæque illum, ad extremum usque spiritum etiam inter medios hostes & aperta pericula, non tenuerit.*

Hoc ab uno exemplo cognoscere licebit. Dum diœcesim lustrat, incidit in mulierem ex isto grege, scopulum & perniciem lectissimæ juventutis. Doluit ejus vicem, & eorum quos malè perdebat. Aggressus miseram turpi jugo liberare, opus magnæ molis, & opinione difficilius invenit. Quippe mulier elegantiam ingenii cum forma elegantiore conjunxerat. Adde patrocinia multorum, quos sibi devinctos tenebat, & quibus potens ac ferox erat. Itaque subeuntem Missionarium superbo fastu & contemptu excepit. Non turbatus aditu tam parum prospero Christi peritus miles, acrior ad pugnam redit. Visit illam identidem, & tempore dato, alloquitur, semperque salutarem aliquam infligit nec opinanti plagam, victrici suavitate, quâ ferocissimos quosque animos expugnabat.

Instantem, & in hac sudantem pugna, conspiciens Vicarius Generalis: *Nihil agis*, inquit, *& frustra te maceras ac torques, mi Pater: validioribus catenis peccato est obligata, quam ut eas frangere unquam possit. Equidem*, subjecit Pater, *ita se rem habere, ut dicis, crederem si mea considerem industria; at misericordiâ divinâ fretus, quæ mortalium mentes frangit flectitque, ut lubet; bonâ, imò non dubiâ, spe sum fore ut perruptis vinculis, scdam exuat servitutem, & Christiana pœnitentie memorandum specimen evadat.*

Spem non temere, nec falsò conceptam exitus docuit. To-

Lib. II. tam se DEO reddidit, ac. nè datam illi fidem aliquando frangeret, contulit se Avenionem, & in eam accepta domum est, quam vulgi sermone *Conversarum mulierum* appellant. Ibi, sancti propofiti tenax, è corporis vinculis paucis post annis excessit, non sine desiderio luctuque civitatis, quæ illius exemplis & pietate fruebatur. Hic divinæ gratiæ triumphus longè latèque celebratus, efficacis Missionarii virtutem novo splendore illustravit.

*In mores  
parochorū  
emendan-  
dos incū-  
bit.*

Jam pridem ille induxerat animum operam à se frustra in emendandis ovium moribus consumptum iri, nisi pastores ipsos emendaret, quorum ad normam populus vulgò se componit, rectum licitumque judicans, quidquid illorum exemplis veluti comprobatur. Huc ergo curam contulit ut agrestium parochi vitam, quæ in illis erat sanè probrosa, dignam sacris altaribus instituerent. Principio inquirebat quid in singulis præcipuè vitiosum, quid cum aliqua conjunctum laude, foret. Si quos nancisceretur nondum ministerii sui & nominis oblitos, illis addebat animum, hortabatur ut constantiam tuerentur; adhibebat illos in consilium de rebus gerendis, commendabat eosdem Episcopo, ipsorum integros mores, diligentiam in fungendo pastoralis munere, laudabat.

At quorum comperisset vel negligentiam in officio, vel turpitudinem in moribus; nihil omittebat, ut istorum excitaret vigilantiam, horum sordes elueret. Agebat cum omnibus reverenter ac demissè; tam modestè, tam suaviter eosdem admonebat, ut monitorem spiritu Christi & caritate impulsus fuisse, facillè appareret. Illud ante omnia studebat ut eorum existimationi ac famæ consuleret; nunquam illos nisi privatim admonens, idque cavens ut sine ambizioso strepitu peccantes in viam revocaret. Cum de illis rationem Episcopo redderet, tacebat quidquid occultum & arcanum erat, ex eorum autem vitiis noxisque nihil aperiebat, nisi quod celare non posset, aut cui medicinam à se afferendam desperaret. Sic multos reduxit ad frugem, partim captos illecebræ lenitatis, partim fractos robore sermonis & facundiæ.

*Ejus solertia in  
reducendis ad  
frugē pa-  
rochis de-  
teriori-  
bus.*

Ad eos sanandos, quorum erant vulnera graviora & pejoris ad populi offensionem famæ, præsertim ob libidinosa commercia, paulò plus artis industriæque afferebat. Norat hominum genus in scelere obfirmatum, projectæ impudentiæ, & ad humanas pariter divinæque rationes obsurdescere assuetum. Itaque cautiùs agebat cum illis & circumspectiùs. Objurgationes tantæ oris ac sermonis suavitatem condiebat, ut iis offendi non possent. Ponebat

bat ob oculos privatim turpitudinem vitæ, quam ducēbant; san- Lib. II.  
ctitatem sacerdotalis statûs ac ministerii, quam indignissimè temē-  
rabant; gravitatem scandali quo populum subvertebant; multi-  
tudinem animarum quibus perniciem & exitium creabant sempitet-  
num. Quæ omnia sic exponebat, ut patrem sentirent, non mole-  
stum objurgatorem, aut censorem. Deinde illos amantissimè am-  
plexabatur; eorūque deplorans ac miserans infirmitatem, obse-  
crabat denique ut salutari pœnitentiâ noxas antea actæ vitæ expia-  
rent. Valuit hæc lenitas & mansuetudo ad complures parochos  
emendandos, qui postea, compositis ad officii leges moribus, tan-  
tum emolumenti populo attulerunt, quantum illi offensionis ante-  
hac & detrimenti obtulerant.

Hæc tamen lenitas aculeo suo, si res postularet, ac severitate,  
non carebat. Extiterunt in iis parochis nonnulli quorum nequi-  
tia pertinax cum patientiam omnem ac mansuetudinem superaret,  
pergerentque propudiosas libidines in catholicorum juxta & hære-  
ticorum oculis defigere, liberam pectoris Apostolici fortitudi-  
nem sunt experti. Consumptis incassum precibus, indulgentiâ, &  
minis, improbos justæ ipsorum Episcoporum severitati permisit; nè si-  
bi commissas oves, quas depravare cœperant, omnino profligarent.

Præsul egregius, qui DEI famulum consiliorum suorum con- *Collecti  
ab eo fru-  
ctus in Di-  
ocesi Vi-  
variensi.*  
scium, adiutorem, & arbitrum esse voluerat, quique diocesis suæ  
regimen illius fidei & virtuti penitus crediderat, summa cum vo-  
luptate ingentem fructum suæ visitationis aspexit, exterminata vi-  
tia, Christianæ pietatis exercitationes, quacumque se conferret, re-  
stitutas; in primis autem Calvinii discipulos, relicto magistro, ad  
communionem & auctoritatem Ecclesiæ catervatim reversos. Hæc  
omnia palam profitebatur tribuenda curis, vigilantia, & laboribus  
P. Joannis-Francisci Regis.

Omnino ejus virtus tot illustribus testata signis, caligantibus  
hæreticorum oculis novum lumen ingerebat: ejusdem verba ad  
persuadendum efficacissima voluntates ipsorum vel obstinatissimas  
concutiebant ac labefactabant; demum exempla victos penitus  
deditosque dulci veritatis jugo submittebant. Persuadere sibi non  
poterant virum, tam insigni prædium sanctitate, aut velle quem-  
quam fallere, aut ipsum falli posse in iis quæ ad religionis verita-  
tem pertinerent. Comparabant ejus vitam non levibus, neque  
adumbratis, pœnitentiæ notis inustam, cum suorum ministrorum  
vita liberali, commoda, & ad profani seculi lautitias legesque ac-

**Lib. II. commodata.** Iadè religionem, quam docebat, non posse veram non esse concludebant. Hæc tam sapienter considerata plurimos non difficile perpulerunt ut erroris partes desererent. Unum modo exemplum proferam, ex quo multum gloriæ famulo Christi & auctoritatis accessit.

*Primaria  
femina  
catholica  
religioni  
restituta.*

Degebat Ucetix (quod Occitaniae inferioris oppidum erat in ditione Comitum *de la Mothe*) primaria femina, non minus splendore natalium, quam pertinaci erroris defensione, clara. Hanc ut Ecclesiae Comes restitueret nihil intentatum, nihil inexpertum reliquerat. Allocutus illam non semel, doctissimis theologis erudiendam debellandamque tradiderat. Nihil actum colloquiis & disputationibus, nisi ut magis magisque occallesceret. Theologorum desperatio, plausus & favor Calvini gregalium, extulerant muliebres animos, & opinione ingenii atque eruditionis vehementer inflaverant. Cernebat summo cum dolore grex catholicus atque adeo Comes *de la Mothe*, mulieris exemplum contagione funesta serpere ad hæreticorum perniciem, quorum & confirmabat audaciam & numerum augebat. Quippe alios copiosa & eloquenti corroborabat oratione, alios insidiosa liberalitate retinebat: ipsa columen sectæ ingens ac decus, non solum propter nobilitatem, opes, & doctrinam; sed etiam propter morum integritatem, in quibus nihil erat, quod reprehenderes.

Comes *de la Mothe* expertus non semel nihil resistere Patri Regis, quoties arma facundiae caelestis expromeret, hanc victoriam illi divinitus reservatam credidit, utque se ad pugnam accingeret hortatus est. Nulla fuit in viro sancto mora, id unum vestiganti quemadmodum animas DEO vinceret, domumque mulieris rectè petit. Solam nactus, utendum putavit oblata opportunitate, ac, missis ambagibus, *Jam dudum, inquit, vocat te DEUS, urgeatque ut illius tota sis. Quamdiu vocanti & urgenti resistes? Nihilne tuâ, nihil DEI, refert se detrimentum animæ tuæ facias, pro qua DEUS in cruce mortuus est? An unquam tecum seriò reputasti quid sit æternum perire?*

Hac brevi oratione percussa mentem aliam subito induit; & illa pridem adversus divini verbi præcones contumeliosè ferox, dicentem perhumaniter audivit, ac viri sanctitatem, de qua multa jam audierat, quæque in modestissimo eminebat vultu venerans, *Egone ut perire æternum velim! exclamat: Prohibeant, queso, superi: nihil mihi prius, nihil antiquius, quam servare animam meam.*

*meam. Ergo age, subjecit Pater, Catholicam Religionem ample- Lib. II.*  
*tere, quam tui majores coluerunt, quam solam fundavit Christus,*  
*in qua sola salutis locus est.*

Mulier, ad eam diem invicta, mutatam se admirans, vix-  
 que se ipsam agnoscens, *Vincis, ait, nec habeo quod opponam. Ha-*  
*tenus repugnaui, hactenus cunctis, qui me de reditu ad Ecclesiam*  
*catholicam interpellarunt, restiti; nunc arcano divini spiritus*  
*impulsu trabor, & manus dare compellor. Nunc demum Catbo-*  
*licam profiteri fidem volo: doce me, precipe, rege, ut lubet. Ni-*  
*bil mortale sapere mihi videor, quod quale sit nec ipsa capio, nec*  
*satis explicare possum.*

Voti compos Missionarius, post actas ingentes DEO bono-  
 rum omnium auctori gratias felicem prædam Episcopo gratulanti  
 obtulit. Pleniùs edocta palàm ejuravit hæresim spectantibus Ca-  
 tholicis, itémque Calvinistis, quorum plurimi exemplum nobile  
 sunt secuti.

Ex epistola Patris Petri *Vertbamon*, tunc Rectoris collegii *Nonnulli*  
 Aniciensis scripta Præposito Generali Societatis, intellexi datam *Episcopu*  
 per id tempus servo DEI, dum illi omnia maximè fluèrent ad vo- *Vivariæ-*  
 luntatem, exercendæ patientiæ materiam sanè difficilem. *sem, ab eo*  
 est in eum ejusmodi procella, quæ vel firmissimam virtutem deji- *alienare*  
 cere potuisset. *tentans.* Ipsius operâ magna pars dioceseos pristinam exue-  
 rat faciem: id verò fieri non potuerat sinè molestia multorum,  
 qui se dolebant excitari è veterno vitiorum, & ingratiis probi esse  
 cogebantur. Monebatur sæpe Regis ab amicis de excitatis in i-  
 psum odiis plurimorum; nihil ab eorum furore non esse metuen-  
 dum; rectiùs aiebant facturum si paulum sibi temperaret. Hæc  
 monita si parum apud Patrem Regis fuerunt efficacia, nimium ta-  
 men vera, nec inanes fuisse metus, statim intellectum est.

Nonnulli parochi, quorum desperaverat emendationem, &  
 quos amovendos curaverat, initâ cum aliquot pariter improbis so-  
 cietate, de illo vicissim eliminando, remittendoque Anicium, &  
 ejus præcipuè cum Episcopo gratia rescindenda, conspirarunt.  
 Igitur delecti ex eo numero Præsulem adeunt, & in sermonem  
 de Christi famulo ingressi, describunt illum ut perturbatorem;  
 non consilio & ratione duci solitum, sed æstu pietatis inconside-  
 rato abripi; ab eo familiarum pacem convelli, carpi & objurgari  
 promiscuè illustrissimos quosque sacerdotes & magistratus; ejus  
 conciones non tam cohortationes ad colendam virtutem esse, quàm  
 petu-

Lib. II. petulantes satyras, quibus obvium quemque lacerabat. Coer-  
cendum intrà cancellos effrenem hunc impetum, nec fieri quid-  
quam opportunius posse, quàm ut amandaretur aliò, & superiori-  
bus suis redderetur.

Hæc ut hærent altius in Præsulis animo defixa, submitte-  
bant identidem ex composito certos homines, qui ad eum venti-  
tantes easdem querelas iterarent. Porro tam atrociter, tam pu-  
blicè ista jactabantur ut servum DEI latere non possent. Qui tam  
*Adduci non potest ut impossi-  
tas sibi calumni-  
as refel-  
las.* avidus opprobriorum, quàm Divinæ gloriæ sitiens, audiebat hæc  
solemni sua, oris & animi serenitate. Nihil ipsi præter expecta-  
tionem accidebat; amicisq; instantibus ut idoneas refutandæ ma-  
ledicentiæ vias iniret, respondit præclarè secum agi, quòd nonnihil  
contumeliæ Christi causâ pateretur; permittere se DEO causæ suæ  
defensionem: neque adduci unquam potuit ut iis assentiretur.

Non eadem Episcopo tranquillitas adfuit. Cùm planè perspectâ  
fidelis operarii probitatem ac prudentiam haberet, nihil omisit ini-  
tio ut concitatam adversus illum tempestatem sedaret: ubique homi-  
nem laudare, ubique defendere. Ad extremum, tot querelas us-  
que usque audire non sustinens, & paci consulendum putans, age-  
re statuit cum P. Petro *Verthamon* ut ejus revocandi causam ali-  
quam honestam quæreret. Priusquam tamen eò deveniret, vocat  
illum privatim, & paulò asperius conqueritur, quòd commissâ au-  
ctoritate abutatur, quòd sinè discrimine in personas invehatur,  
quas observari præcipuè oportebat; dolere se quòd eum remitte-  
re cogatur.

Objurgantem Episcopum audivit humilis DEI famulus placi-  
dissimè, neque ullum perturbati aut impotentis animi signum de-  
dit. Mox gratias benignè monenti magnas agens, *Equidem fateor,*  
inquit, *multa me in DEUM & graviter peccasse: nec dubito,*  
*quæ mea imbecillitas & ignorantia est, quin multa mihi exciderint,*  
*quæ ab hominibus merito reprobenderentur; quin interdum pru-*  
*dentie parum memor fuerim: ceterum DEUM mentis meæ con-*  
*scium & judicem testor, nihil mihi, præter ipsius gloriam proposi-*  
*tum fuisse.*

*Episcopus ejus hu-  
militate  
mirum in  
modū de-  
lectatur.* Præsul vehementer admiratus humilitatem servi DEI, qui ne-  
que ad accusandos inimicos, neque ad se purgandum excusandū-  
que verbum ullum fecisset, abjicere consilium ejus remittendi coe-  
perat; cùm superveniens Comes *de la Motte*, non parum adju-  
vit ut mentem hanc omnino deponeret. Certior de amici pericu-  
lo



lo factus, ad Episcopum accurrit : compertum sibi mysterium ini- Lib. II.  
 quitatis docet. Ejusmodi turbarum caput & machinatorum esse,  
 parochum nequam & dissolutum, qui devinctos sibi nefario foedere  
 aliquot similium criminum reos in virum sanctum armaverit.  
 Non aliam ob causam Patrem Regis perditorum istorum odiis pre-  
 mi, quam quod illorum nequitiam apertius exagitaret. Concio-  
 nantem, inquebat, audiui non semel : sanè invehitur sanctâ qua-  
 dam libertate in publicâ flagitia, sed non minori prudentiâ & mo-  
 deratione.

Non solus Comes patrociniû amici sedulò suscepit. Ejus *A pleris-*  
 sanctimonix præclara existimatio excitavit proborum studia, qui *que viris*  
 non minùs indignè adversariorum audaciam ferebant, quàm *probis de-*  
 muli DEI patientiâ lætabantur. Interim Simianus, Episcopi Vica- *fenditur:*  
 rius Generalis, reversus est ex Urbe Vivario, quò erat profectus ad *ac præfer-*  
 negotia quædam diceceseos componenda. Ejus absentiam isti ca- *tim ab E-*  
 praverant, ut consiliis suis opportunam. Nimirum exploratam *piscopi Vi-*  
 habebant viri solertiam, cum pari pietate, doctrina, & nobilita- *cario.*  
 te conjunctam; neque ignorabant quo apud ipsum numero esset  
 sanctus Missionarius.

Ut Vicarium præsul vidit, nihil cunctatus, suam ipsi de Pa-  
 tre Regis solitudinem memorat; delatas ad se de illo querelas,  
 probra, & criminationes; tum Vicarii, de tota re sententiam ro-  
 gat. Respondit Simianus consideratum à se P. Joannem-Franci-  
 scum diligenter fuisse toto tempore lustrationis, neque ullum un-  
 quam sibi visum fuisse sanctiorem, & manifesto Numine plenio-  
 rem: censorem illum quidem & castigatorem vitiorum non timi-  
 dum, at moderatum & prudentem; mirum non esse si de viri  
 probi exitio improbi conjuraverint; contemnendos eorum clamo-  
 res, tumultusque negligendos; neminem ignorare quo prorum-  
 pere soleat hominum perversorum, ac præsertim impudicorum,  
 furor adversus eos, qui foedis eorum libidinibus injicere frena ten-  
 tant.

Adjecit Simianus, insigni fructu, quem omnes è Missioni-  
 bus præstantis operarii colligebant, satis defendi ac laudari, ardens  
 illud studium Divinæ gloriæ, & salutis animarum, quo longius ef-  
 ferri nonnullis videbatur. Cernis, inquit, dicecesim tuam dissi-  
 milem priori vultum induisse, ultróque confiteris gloriam hujus  
 præclaræ mutationis deberi pæne totam immensis laboribus istius  
 excellentis Missionarii. Ego quidem ità censeo non posse, sine

M

per-

Lib. II. perspicuo divini honoris & religionis detrimento, causam hominis deferi, qui non aliam ob rem vexatur, quam quia DEI causam apostolica fortitudine propugnavit.

*Publicè  
laudatur  
ab Episcopo.* Habuit eam vim oratio Simiani, quam par erat. Episcopus omni sinistra opinione ac suspicione liberatus, arcessit continuò P. Joannem Franciscum, eumque omni existimationis & benevolentiae significatione palam prosecutus, hortatur ut solitâ prudentiâ bellum vitiis inferre pergat. Sic viri sancti patientia & humilitas inimicos exarmârunt; obmutuit calumnia, & victrix innocentia de improbitate triumphavit.

Reductâ per hunc modum malaciâ, Regis majore animo, majore successu, in opus incumbibat, cùm Episcopus, exeunte Sextili anni 1634. coactus est suæ diocesis visitationem interrumpere, ut cœtui ex omni Provincia collecto, deinde comitiis generalibus Cleri Gallicani, tanquam à Provincia delectus, interesset, habendis ineunte anno 1635. Sangermani in Layâ. Præsul Missionarium remittens, Provinciali gratias egit, quod hominem sibi donâisset *potentem opere & sermone*. In iis litteris multa singillatim recensibat, quibus significabat, quàm gratus sibi P. Joannis Francisci labor accidisset. Laudabat ejus prudentiam, studium indefessum salutis animarum, invictum ærumnis animum, caritatem nullis finibus circumscriptam, integritatem vitæ labis omnis expertem. Addebat utilitates pæne incredibiles, quas animis attulerat. *In uno parum mihi satisfecit, inquebat extrema in epistola, quòd valetudinis fuerit prodigus, quòdque sepe à me admonitus ea de causa, parum se docilem præbuerit. Hoc perpetuum inter nos dissidium extitit: cùm ego conqueri & increpare non cessarem quòd ultra legem ac modum opus tenderet. Vobis illum reddo: vaferum est pro ea, quâ valetis in eum auctoritate, perficere ut valetudini tam pretiose diligentius parcat; ac providere nè qui ceteris tam suavis & amicus est, sibi sit ipse, tam asper & inimicus.* Hujus epistolæ, quam hîc ad verbum retuli, exemplum ad Præpositum Generalem Provincialis misit.

Regis, Præsule salutato, petiit Anicium, ut jussus erat. Vix eò pervenerat cùm collegii Rector ingenti beneficio affectum se prædicans, quòd operarium aded præstantem accepisset, his verbis ad Præpositum Generalem litteras dedit quinto Idus Octobris 1634. *Consentiunt omnes mirificam esse P. Regis ad Missiones obtinendas indolem, quam acuit incenditque ardentissimum Divina*  
glo.

*glorie studium. Ea dos & virtus cum saepe alias, tum verò eni-* Lib. II.  
*tuit apertissimè cum Episcopum in diœcesis lustratione comitatus*  
*est. Infinitus sum si velim enamerare quam multos à vitio ad bo-*  
*nam frugem traduxerit, non minùs exemplo sanctioris vitæ, quàm*  
*cœlesti concionum efficaciam. Itaque modò illum omnes ut Vivari-*  
*ensium Apostolum intuentur. Ego verò affirmare verè possum*  
*sanctum esse Missionarium, ac divinæ gloriæ salutisque animarum*  
*unice sitientem.*

Paucis post diebus quàm Anicium accesserat, audivit initium *Canaden-*  
*datum esse anno superiori 1633. laboriosis Canadæ apud Hurones sem Mis-*  
*Missionibus, à P. Paulo le Jeune, qui per obseptum sexcentis dif-* *fonem à*  
*ficultatibus ac salebris iter, patentem Evangelii præconibus cam-* *Preposito*  
*pum illic aperuerat. Hoc in votis P. Joannes-Franciscus semper ha-* *Generali*  
*buerat ut oceanum transgressus barbaris nationibus Christum in-* *postulat*  
*ferret: tum autem ardebat desiderio non solum multa pro Christo*  
*patiendi, sed etiam profundendi ejus causâ sanguinis. Narraban-*  
*tur Hurones & Hiroquæi esse præ ceteris barbari, qui præter ex-*  
*ternam speciem hominis haberent nihil: tetrum & immane genus*  
*per silvas, instar ferarum vagari assuetum, sinè ullo humanitatis*  
*sensu, adeò ut mactatos etiam homines, feralibus epulis appone-*  
*rent.*

Hæc satis supérque sancto Missionario fuerunt ut in Cana-  
dam evolare percuperet. Contrà suadebant amici & hortabantur  
ut operam utiliore inter Vivarienses poneret: ibi reperturum, ut  
in Canadensium nemoribus, animas ad DEUM perducendas; ha-  
biturum pro barbaris, quibus prima fidei traderet elementa, hæ-  
reticos ad avitam fidem revocandos. Objiciebantur pericula quæ  
nascentem Missionem circumstabant: iis accendebatur magis, &  
in sententia confirmabatur. *Non sum nescius, ajebat, adire me*  
*periculum dire necis: at in lucri & felicitatis parte pono, quòd*  
*imitaturus sum plurimos è nostris fratribus, qui pro Christo in Ja-*  
*ponia & Indiis præclara morte perfuncti sunt. Possem equidem*  
*inter Vivarienses rem gerere minore cum periculo, cum fructu*  
*etiam, si vultis, majori; at non deerunt hic operarii, quibus no-*  
*va Francia est destituta. Quod si caritas urget nos, ut aliquis pro*  
*misere ac derelictæ gentis salute se devoteat, quenam victima po-*  
*tius immoletur quàm hic homuncio nauci & nihili? Illic me DE-*  
*US vocat, vocantem sequar.*

Ubi stetit hæc sententia, Canadensem Missionem à P. Mutio

Lib. II. Vitellescho, Præposito Generali Societatis sexto, postulavit. Ejus litteras Anicii datas 18. Cal. Januar. anni 1634. latinis totidem, ut erant ab eo scriptæ, verbis exhibeo. *Admodum Reverende Pater. Tanto teneor desiderio Missionis Regni Canadensis, ut verear ne vocationis neglecta reus existam, si quos in hac parte experior in me motus Vestra celem Paternitati. Hos itaque lubens aperio, petoque quibus possum precibus, ut his meis annuat votis; & certe tanta est mihi in ejus clementia spes posita, ut vix dubitem quin sim, quod exposco, obtenturus. Novit, ni fallor, vestra Paternitas me esse robusto corpore; utinam aequè robusta foret virtus! sed virtus in infirmitate perficitur. Roborabitur mea, ut spero, DEO. duce, in infirmitatibus, quæ non possunt non esse frequentes in medio illius nationis prava. Admodum Rever. P. Vestra Filius ac servus in Christo obsequentissimus Joannes Franciscus Regis. Anicii 15. Decemb. an. 1634. Præpositus Generalis cui majorem in modum curæ & cordi erat progressus peregrinarum Missionum, ac præsertim istius Canadensis nuper institutæ, lætus intellexit quem admodum ad hanc sacram expeditionem comparatus esset P. Joannes Franciscus, eique tertio Kalendas Februarias 1635. ita rescripsit. Placent mihi divina gloriæ, servandarumque animarum nobiles impetus; & habeo illarum auctori gratias ingentes. Ducenda erit illorum ratio, cum maturuerint. Eo sunt interim fovendi precibus, & virtutum usu roborandi, ad difficultates, non uti nunc procul, sed cominus, & conferta manu, expugnandas. Adde, quod afflatus ejusmodi affusi calitus, hoc debent teneri, & colitarius, quod Christi sanguinis hos esse pretia non dubie constat. Quod ego facturam uberius Reverentiam Vestram sperans, quam possit à me commendari, ejus me potius sanctis sacrificiis commendando, Romæ 30. Januarii, 1635.*

Oppida  
Comitis  
de la Mo-  
the vari-  
is Missio-  
nibus ex-  
colit.

His litteris erectus in spem consequendi quod votis omnibus ambiebat, jamque velut neci devotus, & Canadensibus addictus, statuit interim Anicii consistere, ibique ponere tirocinium quoddam illius ærumnosæ ac laboriosæ vitæ, quam inter Iroquæos, & Hurones, brevè se acturum confidebat. Sed DEUS, qui neque fidelem servum dedere barbaris, neque in una tantum urbe continere decreverat, effecit ut à Comite de la Mothe invitaretur ad obeundam Missionem in oppidis suæ ditionis, & ad extirpandam cum vitiis hæresim, quo duplici malo graviter laborabant. Laudavit Comitis consilium Episcopus Vivariensis, cujus men-

mentem Comes exquisiverat : itémque P. *la Case* Provincie To- Lib: II.  
losanæ præpositus, à quo jussus est statim Regis properare Chey-  
lardum, ubi Comes, istius oppidi dominus, tunc degebat. Nec  
distulit vir obediens eò se conferre, quò jubebatur : Vivariensem  
agrum aperiri sibi denuo gaudens, donec aditus in Canadam pa-  
teret.

Cheylardum Anicio profectus est incunte anno 1635. *Urbem*  
Equum à Comite submissum accepit ille quidem, ut ne officium *Gbeylar-*  
& gratiam amici aspernari videretur; at statim desiliens, famulum *dum à vi-*  
à quo fuerat adductus, in eo sedere jussit. Incolæ Cheylardi fe- *tus & er-*  
rè omnes Calvinii erroribus inquinati erant: exiguis catholicorum *roribus*  
numerus externa quædam & vacua religionis ornamenta retine- *purgat,*  
bat; ità ut, quemadmodum idonei testes affirmant, oppidum to- *anno 1635*  
tum aliud nihil esset, quàm terra farrago, ex hæreticis, & nihilo *incunte.*  
melioribus catholicis, conflata; inter quos hæc una videbatur, es-  
se contentio, utri alteris pejores essent. Furta, cædes, homicidia,  
quidquid est turpe dictu, quidquid factu obscœnum, scelera pæne  
omnia, in consuetudinem venerant. Hæc monstra beneficio cæ-  
lestis gratiæ, & operâ P. Joannis Francisci, brevi fuere propulsata.  
Paucis diebus elapsis, alia civitas, alii mores fuerunt. Quàm avi-  
dè audiebatur sanctus concionator, tam obstabant nè audiri facile  
posset suspiria, gemitus, & planctus audientium. Sceleratissimi qui-  
que verum de peccatis dolorem palàm uberibus lacrymis testaban-  
tur. Ipsimet hæretici vim dicentis non sustinebant, & plurimi  
cum errore pertinaciam abjicerunt. Vel ipsa opinio, quæ omni-  
um animos pervaserat, sanctum esse qui loqueretur, qui mone-  
ret, qui hortaretur, stimuli & argumenti, ad detestanda vitia satis  
erat. Res in hoc oppido tam bene, tam præter opinionem ge-  
sta, miraculi simillima visa est. Comes *de la Motte* lætitiâ simul  
& admiratione ingenti affectus, cum videret populum, quo vix in  
toto Vivariensi tractu nequior habebatur, adedò immutatum, ægre  
oculis ipse suis credebat: neque clariùs perspectum unquam est  
quid Apostolica virtus possit.

Non hujus tantum oppidi finibus curas suas Regis continuit.  
Ut est regio tota frequens pagis & vicis, huc atque illuc inter ne-  
mora montesque sparsis; omnes perlustravit labore incredibili, ob-  
hiemis inclementiam, & vim frigoris per hunc annum solito gra-  
viores. Cerneret virum admirabilem, spretâ durissimæ tempe-  
statis asperitate, per stagnantes exundantibus aquis vias, festinare;

Lib. II. torrentes eluviésque superare ; silvas & montes nivibus coopertos permeare ; ad præruptas cautes , manifesto cum periculo in altas voragines , si vestigium falleret prolabendi , perreptare , ut devium aliquod mapale attingeret , ac familiam derelictam erudiret. Sæpe inter ignotos calles rectâ decurrabat viâ ; nec semel fuit coactus inter silvas pernoctare. Vulgò sub vesperam Cheylardum se referēbat, adeo exhaustis viribus, ut consistere non posset : postridie repetebat laborem , cessationis & quietis immemor. Altissimos regionis montes aliquando ingressum nix occupavit tam densa, ut itinera omnia obstrueret, neque potestas daretur ulla progrediendi ulterius, aut regrediendi. Hæsit tres hebdomadas costrictus, & omnibus rebus destitutus, in hac nivali solitudine, humi cubans, mucidi panis frusto victitans, apud montanum miserabilis tugurii hospitem. Quid ærumnarum ibi tot dies pertulerit facilius colligi conjecturâ, quàm explicari verbis, potest. Verùm DEUS servos suos arcanis consolationibus sustentare novit, quibus perfusi, ærumnas suas non tantum obliviscuntur, sed etiam in loco deliciarum habent. Post religionem in urbe Cheylardo vicinisque locis pristino splendori restitutam, rationem iniit cum Comite *de la Motte*, quemadmodum recens ille nitor nunquam obsolesceret ; mox Lachaum versum iter convertit. Oppidum erat omnino Catholicum, in ditione Comitum, cujus vigilantiam effectum fuerat ut Hæresis eò aspirare ausa non esset. Mores, etsi multò, quàm Cheylardi, meliores ; Labis tamen aliquid è pravitate vicinorum duxerant. Simul atque auditum fuit adesse ministrum Evangelicum, detractis impietati atque errori spoliis onustum, concursus ingens, etiam hæreticorum, undique Lachaum est factus. Ipse continuo suggestum ascendens verba fecit ad populum plangentem & pio tumultu omnia miscentem. Aucta in dies confluentium turba contineri templo non potuit.

Missionis Lachaum : & ædibus, domesticisque negotiis, concurrentes Lachaum, emensis decem, duodecimve passuum millibus, per medias nives & sævientem aspero gelu hiemem, ut DEI servum concionantem audirent, ut ab eo peccata confitentes audirentur. Sed multò erat admirabilius illum ipsum intueri, cum licet labore fractus, jejuniis voluntariisque pœnis debilitatus, turbam agrestem nihilominus alacer & promptus erudiret, eique sacramenta ministraret, tantâ constantiâ, ut multa jam nocte cogendus esset paulum cessare, ut cibo refice-

re-

retur. Interdum contingebat ut, corporis viribus mentis ardorem Lib. II. adæquare non valentibus, è suggestu descendens animo linqueretur: vixque receperat animum, cum subito se ad excipiendas confessiones referebat.

Exeuntem è templo, post exantlatas multo sudore functiones matutinas, invasit agrestium multitudo, è longinquo veniens, & quidam ex illo agmine, *Caritatem tuam per DEUM obsecramus, mi Pater*, ait, *ut solitam nobis opem impertias. Heri nos in viam dedimus, & nocte tota, itineribus impeditissimis, duodecim leucas confecimus, ut te docentem audiremus: siccine tantum laboris, tantum viæ frustra susceptum à nobis esse patieris?* Non tulit orantes vir DEI, & illacrymans, *Adeste*, inquit, *filioli, vos in sinu, vos in oculis meis fero.* Nec plura. Quasi nihil eo die laboris exhausisset, rursus concionatur, audit confitentes, monitis salutaribus singulos instruit, & ad vitam sanctè degendam accensos, ovariantesque, dimittit.

Quæ fuerit Apostolici viri virtus, quàm copiosa messis ab eo collecta in postremis istis Missionibus, cognosci certiùs non potest, quàm è sermone quem Comes de la Motte habuit cum Comite de Fay de la Tour Monbourg, præcipuè inter Velaunos dynastas auctoritatis & famæ. Is quæ audierat à Comite de la Motte pro testimonio retulit, extantque in publicis actis, cum ageretur, de referendo in Sanctorum numerum Beato Regis, conscriptis. *Nunquam vidi, inquebat illi Comes de la Motte, neque sanctiorem Missionarium Patre Regis, neque fructuosiores Missiones illis, quas obibat. Ad ipsum quod attinet, exploravi hominem & inspexi per octo menses, quibus populum meum erudit. Nulum in eo vestigium animadverti earum cupiditatum, quibus vulgò mortales laborant. Hominem videbatur exuisse, ut DEUM induceret. Una eminebat in eo cupiditas, unum studium, omnes ad Numinis cognitionem & amorem adducendi.*

Non contentus restituere pietatem & alere in eo loco, qui Missionis quodammodo centrum erat, pagos omnes & casas circumfusas perlustrabat. Non dense nives, non durata gelu camporum vastitas, non immanitas frigoris, aut ventorum injuria, moram illi & obicem unquam injecerunt, parum sollicitus sudum esset celum, an perturbatum & procellosum; peragrabat mapalia, docens, ministrans sacramenta, consolans egenos & sublevans, incumbens

Lib. II. *operi sine intermissione ; cibi, somni, quietis, oblitus. Mirari satis non poteram quo pacto tantis laboribus par esse posset.*

*Corpus, ceteroquin fractum ac debilitatum, diris excruciebat modis ; quotidiano, quod Numini de se offerebat in permolestis itineribus sacrificio addens varias carnis afflictationes, quibus merito quisvis obstupefat. Aliquantum panis & lactis, herba, calida, sine ullo condimento, incocta, mensam illi struebant ; lectum sternebant tabula tres, aut pavimentum ; somni spatium definebant duae, tresve, ad summum hore : nulla nox sine acri verberatione, nullus dies sine cilicio, quod nunquam deponebat, ut ipsemet arcano comperi. Monebam, at incassum, hac austeritate immodica cum tot laboriosis ministeriis conjuncta, ipsius vires absumi, ac denique omnino profligatum iri.*

*Hac in oculis populi posita cum essent, omnes illum scilicet ut sanctum venerari ; ejus voces, ut oracula totidem, excipere, morem illi ad nutum gerere. Itaque in meis praeclis quidquid designavit, perfecit, eâ felicitate & fructu, quem complecti oratio nulla potest. Praeter multos haeresi & sceleribus ereptos, pro certo habeo emendatam sacerdotum vitam complurium, ab eorum sancta professione abhorrentem : nec pauciores viros religiosos ad ipsorum instituti perfectionem moribus & vita profectendam adductos ; nobilitatem regionis universam in illo parentem & rerum suarum arbitrum habuisse ; mores demum ubique ejus ductu, exemplis, auctoritate, reformatos & compositos. Quare Missionem ab illo meis in latifundiis susceptam, inter praecipua, quae divinitus accipi, beneficia semper numeravi.*

*Addi nihil potest huic testimonio Comitris de la Motte, cujus gravitas, fides, & probitas apud Vivarienses notissima sunt. Totum hoc Missionum genus, quorum tam illustre specimen in P. Joanne Francisco perspexerat, tanti faciebat, ut Missionem perpetuam in urbe Cheylardo fundaverit, assignata Societati summâ sexdecim millium Francorum argenteorum, quorum fructibus Missionarii duo alerentur, & concessa ipsis ad habitandum amplâ, quam in urbe possidebat, domo.*

*Missio  
Privatii.*

*Peracta Lachai Missione, aliam aggressus est, Privatii. Hanc urbem ante sex annos Ludovicus XIII. in suam potestatem restituerat : sed cum suo se Principi redderet, ad Ecclesiae auctoritatem referre se pertinaciter adhuc recusaverat. Missionarius minime lautus, & Christiana simplicitate gaudens, civibus initio parum pla-*



placuit. Occursum, congressumque fugiebant hominis incompti Lib. II.  
& inculti: adeo ut nihil sibi relictum viderit, præter solitudinem  
& preces. Itaque illas adhibere impensius, exemploque patientiæ,  
humilitatis, & caritatis devincire homines sibi Deoque statuit.

Nec eum fefellit opinio. Ad sublevandos pauperes, quod  
illum insita & virtutis & naturæ indoles ferebat, statim aggressus,  
eorum inopiam prolixis eleemosynis, nullo Catholicorum aut hæ-  
reticorum discrimine sustentavit, suggerente affatim nummos Co-  
mite *de la Motte*, cujus liberalitas famulo DEI nunquam defuit.  
Ut autem animabus simul & corporibus prodesset, eleemosynæ  
piam aliquam cohortationem & salubre documentum semper ad-  
debat. Curam pariter adhibuit ad visendos ægrotos, tum in pu-  
blico valetudinario, tum in privatis civium ædibus. Sternebat  
illorum lectos, sudorem abstergebat, obligabat vulnera, lintea la-  
vabat, ad infima quæque ministeria descendebat: idque alacritate  
tanta ut eximiæ caritatis blandissima suavitas intuentes mirè cape-  
ret. Hæc opera Christianæ misericordiæ commendabat austeritas  
vitæ, cum victitaret pane ostiatim corrogato; modestia incessus  
habitûsque, cum prodiret in publicum oculis in solum dejectis,  
animo intrâ se collecto, & in præsentem DEUM intento.

Hæc species tam religiosa, tam sancta, melius omni concio-  
ne peroravit. Ac primum hæreticos percussit, quibus exempla  
ejusmodi parum erant familiaria. Mutatos erga se populi animos  
Regis animadvertens, solitas Missionis exercitationes auspicatus est  
ab instituendis pueris, futurum sperans, ut quæ pueros doceret, ea  
permanerent ad ipsorum parentes. Elementa doctrinæ catholicæ  
puerili turbæ tradita, & plerisque civibus ignota vel oblita, eos au-  
diendi cupiditate inflammarunt. Qui cum discederent non doctio-  
res modò, sed meliores, quàm venerant, alios ad audiendum simi-  
liter adduxerunt. Hoc innocenti artificio assuefecit se populus il-  
lius voci auscultandæ, cujus nè vultum quidem antea sustinebat.

Excitatus Regis hoc primo successu putavit posse se tutò in  
concionem ascendere. Ascendit. Audita est concio, & laudata  
non tantum plausu assensûque totius populi, sed etiam fructu vix  
credibili. Cum autem hæreticorum concursus ad audiendum in  
dies augetetur, peculiare illis erudiendis conciones addixit, quibus  
permoti non pauci nuncium pristinis erroribus remiserunt. Haud  
minùs utiliter in reformandis Catholicorum moribus elaboravit.  
Quid multa? ejus & Comitæ *de la Motte* expectationem hæc mis-  
sio longissimè superavit. O Quan-

Lib. II. Quantò plus admirationis habuit pertinacis oppidi non ex-  
*Rogatus ab Episco- po Valen- tino, Mis- sionem ad Fanum S. Agripiani suscipit.* pectata, & ferè desperata, mutatio; tantò cupidius expetita est à parochis, & à populis opera præpotentis Missionarii. Non dum Privatii Missionem clauserat, cùm venêre ad illum oratores è variis locis rogantes ut ad se transfiret. Fanum sancti Agripiani, vulgò Santaggrevium, oppidulum refertum hæreticis, ubi se felicem ob patientiæ materiam fore prævidebat, ceteris locis prætulit, rogatu Episcopi Valentini, Caroli Jacobi *Gelas de Leberon*. Ille Cleri Gallicani Comitii interfuerat cum Episcopo Vivariensi, ex eoque cognoverat quàm solerter & fructuosè munia Euangelica exercuisset P. Joan. Franciscus in lustranda ipsius diocesi. Eisdem igitur utilitates suis popularibus impertire gestiens Valentinus Præsul, famulum DEI rogavit, ut agrum sancti Agripiani, vitiorum & errorum lolio silvescentem, repurgaret. Hunc enim tractum hæresis ità deformaverat, ut religionis catholicæ vix quidquam superesset, præter nomen.

Cùm tamen hæreret Patri Regis penitus in medullis Missio Canadica, priusquam Fanum S. Agripiani peteret, contulit se Albenacum, ut Patri Labatuto, collegii Rectori, suum de inferendo barbaris Euangelio desiderium exponeret, ejusque sententiam pernosceret. Respondit Rector luculentam mensem apud Vivarienses in promptu esse; hanc illi destinatam à Superis videri; tot Missiones felicissimè confectas haud dubium Divinæ vocationis argumentum esse. Neque ager iste, inquit, crebris crucibus consitus non est, ut tute ipse expertus es, non semel.

*Missionem Canadensem alteri litteris ad Præpositum Generale datis flagitat.* Quamvis hæc verè dici sentiret, nihilominus tenere se non potuit quin iterum ad Præpositum Generalem Societatis scriberet undecimo Kalendas Decembres 1635. in hæc ferè verba.

*Reverende Admodum Pater. Rescripserat Vestra Paternitas mihi, quæ est ejus humanitas singularis, tum se habituram rationem desiderii mei circa Canadensem Missionem, cùm primum id maturum foret. Ecce jam integer decurrit annus ab eo tempore, quo mihi divinitus, ut opinor, injectum est. Crevit interim, meis non semel rigatum lacrymis, & igne Sancti Spiritus magis in dies incalescit; adeo ut jam permaturuisse videatur. Faveat igitur, oro atque obtestor, votis meis vestra benignitas. Permulti conantur me deterrere ab ista missione, quam nimis periculosam ac difficilem affirmant: credo, quia me parum illà dignum, parum idoneum, arbitrantur. Quod ut ita esse constitear, nihilominus voti me*

*me compotem fore non despero, præsertim cum magnam mihi suâ Lib. II.*  
*epistolâ, Vestra Paternitas jubeat spem habere brevè ipsius conse-*  
*quenda. Det igitur, quod jubet, supplex per illud, quo flagrat*  
*divina gloria studium, precor. Ceterum quidquid jusserit, equi*  
*boni consulam, & ingenti animo, divinâ ope fretus, exequar. Ve-*  
*stra Paternitatis servus in Christo humillimus, & filius indignus;*  
*Joannes Franc. Regis, Albenaci 21. Novembris 1635.*

His litteris ad Præpositum Generalem suum datis, confestim *Ad Fanû*  
 ad Fanum S. Agripani est profectus. *S. Agri-*  
 Erat hibernum iter, tempe- *ni profe-*  
 state perfrigidâ, per congestas nives, in quas sæpe demergebatur *ctus tri-*  
 genuum tenuis; per angustos tramites, præcipitiis vallatos, per quos *nere dif-*  
 pedibus manibûsque reptabat; per duratam frigore glaciem, quâ *scillimo,*  
 perruptâ viam difficilem aperiēbat. Per tot pericula, per tot ob- *inde zi-*  
 jectas neces, Fanum S. Agripani denique attigit. Continuo lo- *zania vi-*  
 liam, & seges infelix apparuit. Ignota vulgò religionis prima ca- *tiorum e-*  
 pita tetram mentibus & moribus caliginem obduxerant; Catholici *vellit*  
 cum hæreticis permixti errores illorum hauserant & vitia. *1636.*

Ubi primùm Euangelicus messor falcem Apostolicam expe-  
 divit, evulsâ zizania jacuerunt; & patrisfamilias reparatum nova-  
 le restoruit. Inter ista zizania vim præcipuam ad obterendum  
 triticum habuerat ebrietas. Hinc rixæ, cladésque familiarum, ma-  
 trimoniorum dissidia, maledicæ impiæque voces, impudicitia, pro-  
 fanus dierum festorum contemptus, quos in popinis & crapula in-  
 colæ consumeabant. Hanc pestem succidere potissimùm Regis la-  
 boravit, neque incepto destitit, quoad illam penitus extirpâset.  
 Statim atque auditus fuit, æternum cauponis & ganeis vale concla-  
 matum est: fugerunt vitia, quæ primarium illud comitabantur;  
 non tamen citò, nec sinè difficili certamine, ut ex uno, quod at-  
 texam, exemplo constabit.

Rescivit collectos in taberna diversoria cum hæreticis catho- *Heroica*  
 licos die Dominica pergræcari, utque assolet in vino, voces im- *patientia.*  
 pias effutire, & alia quæ suadet ebrietas designare. Dolore scili-  
 cet exarsit, & potores sceleratos primùm non acerbè adortus, quàm  
 graviter peccarent ostendit. Dicentem impius ganeo, inflictâ in  
 vultum palmâ percussit. Cui vir sanctus, immoto atque irretor-  
 to vultu, genam alteram porrigens *Habeo gratiam,* inquit *mi fra-*  
*ter, graviora mereor.* Laudârunt qui aderant exemplum insi-  
 gne patientiæ: ipsi comessatores indignum gregalis sui facinus de-  
 testati, veniam supplices rogaverunt, & relictis exitiis mensis,

Lib. II. pudore ac verecundiâ cooperti recesserunt ; dum sanctus fortissime monitor, ebrietate domitâ lætus, & auctus merito contumeliæ toleratæ, triumphabat. Illi demum concionatores persuadent, qui talibus exemplis loquuntur.

Egressus Fano S. Agripiani procurrit in circumjecta latè loca ; inculta magnam partem & agrestia ; graves ærumnas fructu non poenitendo bene pensatas existimans. Dolentibus ejus vicem inter tot asperrimæ rēgionis incommoda, respondebat animam vel unam tanti esse ; hanc sceptris omnibus coronisque præferendam, nec se dubitaturum unius causâ vitam millies profundere. Per tres, non amplius, menses, initio anni 1636. quindecim aut viginti, quâ majores pagos, quâ vicos, peragravit, Sanbartholomæum, Planum, Batiam, Nozieras, Zaignes. &c. Evasisit usque Rochepaliam, quatuor à Fano S. Agripiani leucis distantem, & ubique præclara pietatis restructæ, aut ornatæ, monumenta collocavit.

*Missio in oppido S. Valentini. Andrea de Fangas, & finitima regione.*

His Missionibus peractis, longius exspatiatus est in diocesim oppido S. Valentini. Ità quippe jussu Episcopi, à quo constitutum fuerat oppidum Sancti Andreæ de Fangas, quasi centrum Missionum, quas esset inchoaturus. Iter capeffenti obtulit se rusticorum cæterva numerosa, longam, ut apud eum peccata deponeret, viam emensa, & euntem retinendi avida. Sed cum ad Fanum S. Andreæ Missionem indixisset in diem certam, profectio differri non potuit. Quid agerent tantâ expectatōe depulsi ? Sequuntur proficiscentem, jejuni tota die & defatigati. Missioni simillimum iter fuit. Consistebat identidem, ut audiret confitentes, ut pios affectus eliceret ac proponeret, nunc doloris de peccatis, nunc amoris DEI. Circumjecti montes sacris hymnis, & festis cantibus personabant, Apostolum Sanctum adventare prædicantium. Quò longius procedebat, eò frequentior apparebat comitatus, pagorum qui occurrebant in itinere, incolis prodeuntibus, & ad priorem turmam se aggregantibus. P. Gabriel *Clement*, collegii Turnonensis Procurator, cum per istos montes iter faceret, cerneretque procul hominum multitudinem propè infinitam, eadem viâ pergere ; quæsit quid hoc esset, quidve sibi vellent confusæ, quas audiebat, voces : & aliquis, *Transeuntem*, inquit, *Sanctum multi pagi affectantur*. Idem Procurator aliquantum progressus, vidit in aditu majoris pagi effundi portis contento cursu præcipientem turbam. Rursum interrogavit quonam isti properarent. Responsum est : illos obviam ire Sancto adventanti. Denique Fanum

num S. Andreæ ingressus, & ante sacram ædem populum innumera- Lib. II.  
bilem ex ipso pago, & aliunde collectum conglobatúmque ad-  
mirans, rogavit ex illis quosdam, quid rerum hic agerent: *Expe-*  
*ctamus*, inquiunt *sanctum, & indictam ab eo Missionem*. Talem  
DEI famulum esse arbitrabantur, talem appellabant.

Hac pia & triumphali pompâ templum subiit, quò jam con-  
venerant plerique incolæ Sancti Juliani, S. Boniti, Vocantiæ, Villi,  
Vanosci, Vandenai, & aliorum locorum complurium. Nec dee-  
rant viri nobiles bene multi, quos fama pariter exciverat.

Hanc esse veram statim è prima concione intellexerunt, quâ  
mirificè sunt affecti, adeoque permoti ut plurimi descendentes è  
suggesto consequerentur ad peccata deponenda: nec minùs eos  
movit patientia concionatoris, qui licet dicendo fessus, ipsorum  
confessiones per multas horas exceperat. Respondit exitus Missionis  
principiis tam felicibus; omniumque voluntates in potestate sua  
sic habuit, ut eas quocumque libuit, inclinaverit.

Cùm legem divinam populo exponeret ( ità narrat Comes de  
la Motte, hujus Missionis testis & præco minimè suspectus ) inerat  
in sermone natus quidam & simplex nitor, qui vel tardissimò-  
rum mentes illuminabat; vis & robur, quo vel pertinacissimè  
frangebantur; sapor dulcissimus, qui vel maximè fastidiosos inea-  
scabat, iisque gustum virtutis & appetentiam excitabat. Ma-  
gnam sermoni pondus addebat vita sanctior; eloquenti morum si-  
lentio, nutu ipso aspectuque loquebatur & persuadebat. Illas ve-  
rò faces, illa fulmina, quæ torquebat è superiore loco non aliunde  
ducebat, quàm è sacra fornace orationis, cui sic erat deditus, ut in  
solicitis ac tumultuosis Missionum occupationibus, præsentem DE-  
UM semper circumferens, ab ejus suavissimo complexu nunquam <sup>In sacro-  
rum mi-  
nistriorum</sup>  
divelleretur. Magnam vulgò noctis partem pervigilabat orans. <sup>pio tu-  
multu,</sup>  
Quo loco prætereundum non est, quod illi contigit apud paro-  
chum, cujus domi habitabat. Puer septennis, parochi nepos, <sup>præsentem</sup>  
nocte intempesta surgens, cùm è scalis desiliret, graviter ab alto <sup>DEO &  
artissimè</sup>  
humi prolapsus est. Ad strepitum cadentis, & notas pueri voces, <sup>conjuncto,</sup>  
accurrit cum familia parochus exanimis metu. Sed hunc timere <sup>semper</sup>  
DEI famulus veruit, ab eo inter eundem deprehensus orans in an- <sup>fruitur.</sup>  
gulo, & in genua pronus. *Metum omitte*, inquit Regis, *nepos*  
*tibi salvus est, & è lapsu incolumis: gratias age DEO, cujus be-*  
*neficio periculum effugit*. Non dubitavit parochus quin illud etiam  
beneficium deberet servo DEI, & quin idem suas preces auditas  
fuisse divinitus cognovisset.

P

Reli-

Lib. II. Reliquam ferè hiemem peragrandis oppidulis & pagis finitimis contrivit sanctus Missionarius, ac tanta facta est ubique morum commutatio, ut non iidem, qui priùs, esse homines viderentur.

*Missio in pago Marlbes, exeunte an. 1635.* Missionibus agri Vivariensis finem imponebat cùm invitavit illum parochus *de Marlbes* ad Evangelicum opus in sua parœcia faciendum. Ultro annuit, sèque ad iter accinxit. Erat anni tempestas sæva, præter solitum, & horrida. Rustici efferre domo pedem non audebant, nè haurirentur nivibus, aut torrentibus tumidis abrepti perirent. Claudius *Bensac* socius P. Regis, eum rogabat ut Missionem in aliud differret tempus. Sed is erat vir Apostolicus, quem nulla incommoda, nulla unquam pericula, retardarent. Nè punctum quidem temporis interponi passus est, quin viæ se committeret, spretâ tempestatis sævitiâ, & itinerum inexplicabili difficultate. Illa vero tanta fuit, ut candidè postea confessus sit nunquam se aliàs gravioribus objectum periculis, aut incommodis majoribus conflictatum fuisse.

*Incommoda & pericula in itinere exhausta.* Bensacus, Patris comes, Anicium elapsa hieme, ac Missionem Marlhensi confecta, reversus, varios hujus itineris casus ità denarrabat. Profectos caliginoso cælo nox oppressit, cùm adhuc abessemus longiùs ab eo, quò tendebamus, loco. Tum ego. *Quid agimus, mi Pater, & quorsum iter frustra prosequimur, his tenebris, hoc cælo? An non satius fuerit in proximam villam divertere, ubi amicus existimabit se ingens beneficium accepisse, si nos exceperit? Atqui, respondit Pater, Missionem indiximus in crastinum. Possumusne datam populo fidem fallere? Nihil esse tanti debet, ut moram nobis injiciat.* Rursum ego: *Periculum est nè deceremus, & pernoctare cogamur in hac solitudine.* Et ille; *Macte, mi frater; præeant nobis ac viam sternunt Angeli Custodes nostri; nihil his ducibus timendum.*

Hæc oratio me aliquantulum confirmavit: sed in pristinos rediî metus simul atque cognovi nos rectâ excessisse viâ. Duas ipsas horas erravimus inter nemora, montesque, nunc in alta sublati juga, nunc in imas dejecti valles: modò sidente nive obvoluti; modò in lubrica titubantes glacie; aliàs inter præruptos anfractus deprehensi, & ubi essemus, quò pergeremus, ignari: sæpe in aliam ex alia fossam ruens, hærebam consilii & auxilii penitus inops.

Noctis caligo, nivium copia, luporum, quibus abundant hæc nemora, tristes ululatus, horrorem augebant ac metum. Hic ego

ego tenere me non potui, quin de Patre gravius expostularem, qui Lib. II.  
nos tantum in periculum conjeeisset. At me vicissim ille increpi-  
tans: *Modice fidei! Siccine tam levi, tam nulla de causa animum  
despondes? DEUS ipse nobis praeit, dux via, & hoc duce times?  
En exercenda patientia, en ornanda corona locus!* Sed ego parum  
hæc audiebam, ita metus animum occupaverat. Videbar mihi al-  
tero quoque passu demergendus in voraginem, aut sepeliendus in  
nivibus, aut à lupis oberrantibus devorandus. Interim ex illo ti-  
more identidem sancti Patris cohortatione atque adeò exemplo re-  
creabar. Tandem aliquando è tot erroribus in viam redimus, &  
paulò post mediam noctem subimus Marthem, eneçti frigore &  
fame. Pro certo habeo, subdit Benfacus, fieri sinè miraculo non  
potuisse, ut emergeremus è tot periculis, idque sanctitati Regis tri-  
buo, qui unicè DEO fretus solitam tranquillitatem, tot malis ob-  
fessam, eripi sibi passus non est.

Paucis post diebus, quàm advenerat, mulier ejus pallium sex- *Egroti*  
centis pertusum locis, & foedè lacerum conspicata, dari sibi resar- *duo ad-*  
ciendum rogavit. Porro ut eximiam de illius sanctitate opinio- *motis ejus*  
nem hauserat, lacerata & decisa frustra in pretio & honore habens, *pallii fru-*  
diligenter asservavit. Nec fuit sinè præmio caritas. Liberis suis *stis persua-*  
duobus, quorum alter aquâ intercute, alter acutâ febris laborabat, *nansur.*  
admovit istos panniculos, & ambobus perfecta sanitas subitò con-  
stitit. Iisdem panni particulis vim deinde admirabilem ad curan-  
dos morbos inditam esse cognitum est.

Ejusmodi prodigiis cum sancti Missionarii nomen latius incre-  
bresceret, facta est ingens ad ejus auctoritatem accessio, ingens ad eum  
hominum concursus, quos egregiæ virtutis odor undique Marthem  
allectabat: ut perspicere liquidò potest ex iis, quæ parochus Marl-  
hensis, Jacobus André, postea Canonicus Cathedralis Ecclesiæ  
Aniciensis, jurejurando affirmavit, & referenda curavit in tabulas  
publicas de cælitum honoribus Beato viro decernendis confectas.

*Cupidiolem, inquit, divine gloriæ & salutis animarum vidi* *Elogium*  
*neminem. Dies noctesque totus erat in ministeriis Evangelicis,* *servo DEI*  
*nunquam labore fractus, nunquam victus. Spatio unius mensis* *à paroco*  
*solus in mea parœcia audivit amplius duo confessionum millia, &* *Marlben-*  
*ferme peccatorum per totam vitam admissorum; aures pauperibus* *tributa.*  
*libentius dabat, quàm nobilibus. Totum se juvando calamitosi*  
*dedidit; quibus paternum in morem opitulabatur & inserviebat.*  
*Intimo dolore commovebatur cum DEUM audiebat offensum. Tunc*

Lib. II. tantum insita lenitatis oblitus, efferri sanctâ cernebatur iracundiâ; tunc tonante ac fulminante voce perditissimos quosque perterrefaciebat. Non dubitasset vitam millies projicere, ut nè divinum Numen culpâ graviore offenderetur. Unâ voculâ vel frigidissimos accendebat, emolliebat vel durissimos. Itaque mortalium numerus iniri non potest, quos ad bonam reduxit frugem, & in ea confirmavit. Absoluta Missione, parochianos meos vix agnovi; adeo mutatos inveni, & in alios homines transformatos. Non satis habebat impendere se totum curandis ovibus meis, excurrere in vicina loca incredibili studio & alacritate. Iter aliquando ingrediebatur sevientem asperissima tempestate, quæ vel audacissimis moram ac metum injecisset.

Non frigus, nostris in montibus intolerabile, non tumidi collectis imbribus torrentes, non obstructa nivibus via, non sexcenta alia incommoda, virum insuperabilem avocabant. Quin, suum illud imparvidi pectoris robur aliis afflare & impertiri videbatur. Cum aliquò proficiscebatur concionaturus, contemptrix periculi multitudo sequebatur: transeuntem operiebantur rustici, seque comitanti turba adjugebant. Adeo suavibus vinculis constrictos homines ejus lenitas & sanctimonia trahabant. Illum ego mediis frigorebus vidi coactum in silvis consistere, ut populo verba de DEO facientem audire cupienti, satisfaceret. Vidi summo in monte stantem, è durata nivis cumulo, tanquam è suggestu, celestis verbi panem distribuere, totosque dies in hoc divino ministerio continere ac noctem præterea totam audiendis confessionibus consumere. Nunquam ejus valetudo, nunquam vita ipsa, tot laboribus sufficere potuisset, nisi DEUS utramque potenti & prodigiosâ manu ad suam gloriam & salutem animarum sustentasset. Non tantum paræcia mea, (subdit idem parochus) verum etiam Clevea, Argentonum, Sancti Servatoris pagus, S. Juliani, & S. Apollinaris, Molina, Muletta, compluresque alii pagi & vici, easdem à viro sancto utilitates, eadem beneficia sunt consecuti.

Post Marlhem & omnem viciniam presidii Evangelicis penitus instructam, exacta jam bieme, retulit se se Anicium, Aprilis exeunte 1636. Collegii patres revertentem è difficillima expeditione lati receperunt. Sciscitantibus de valetudine tot laboribus exercita, tot ærumnis attrita: Illâ vero, inquit, nunquam meliorem usum: vires emenso curriculo, quàm inchoato, validiores experior; nec in me quidquam est moræ, quin actutum, si jubeant superiores, eidem me labori reddam.

Nihi-



Nihilo feciùs alebat pristina de convertendis ad Christum Lib. II, Canadensibus vota, & diurnis nocturnisque desideriis in Novam Franciam ferebatur. Interdum socium suum alloquens, *Me beatum*, aiebat, *si Canadensibus ad rectam fidem vocandis occupatum gloriosa mors inter focos Iroquæorum, aut Huronum secures, opprimeret!* Ejusmodi desideriis totus flagrans, statim atque subiit collegium, nihil antiquius habuit, quàm ut ab ejus Rectore P. Sebastiano *Vineau* quæreret, num quas ad se litteras accepisset. Unas dedit Rector, quibus Præpositus Generalis respondebat 18. Kal. Februar. 1636. epistolæ ipsius Romam Albenacq missæ anno superiori. Summa litterarum erat, tam multos è juventute religiosa Societatis, tam enixè Canadensem ambire missionem, ut eam omnibus concedere non posset. Exigua recentis Missionis vectigalia multis capitibus alendis paria non esse. Cùm forent paulatim aucta, locum pluribus operariis, atque ipsi præ ceteris datum iri. Curam interim ad comparandas virtutes Apostolicas intenderet, ac præcipuè ardentissimum amorem Crucis, quæ in istis Missionibus tam aspera, tam familiaris, erat.

Hoc responsum non sinè mœrore accepit: negatâ scilicet Canadensi Missionem, ademptam sibi martyrii coronam ratus. *Negatam sibi Missionem Canadensem mæstus audit.* Repulsam hanc suis assignavit peccatis; nec tamen dolorem, licet acerbissimum, ullâ significavit querelâ; moderatores suos tanquam certissimos divinæ voluntatis interpretes intuens. Speravit futurum ut Superi aliud sibi stadium aperirent, in quo utiliùs elaboraret, cursûsque feliciter confecti metam attingeret. Eâ spe mœrorem suum consolatus est; nec frustrâ. Nam injecta illi mens divinitus fuit sacræ messis inchoandæ Anicii, quod Velaunorum est caput, & per circumfusus montes ducendæ. Hic enimverò magna patientiæ, nec minor, quàm in Canada, seges extitit: ac felices manipuli petmulti ex agro tam fecundo collecti. In hoc, dum vixit campo, tam fortiter, ut modò videbimus, quàm gloriose, desudavit.



# V I T A

## B. JOANNIS

### FRANCISCI REGIS.

### Liber III.

P. Joann.  
Franc. Re-  
gis fru-  
ctuosâ la-  
bores in  
urbe Ani-  
ciensi.  
Quis tunc  
urbis fla-  
tus, qui  
mores.

**B**Eatus Joannes Franciscus Regis, post excultum annis circiter sex Montempessulanum, Lavonagiam, & agrum Vivariensem eo, quem diximus, successu: quatuor postremos vitæ annos collocavit in restituenda & stabilienda pietate apud Velaunos, quorum regio fines Vivariensium attingit; Anicium gentis est caput. Totum hoc quadriennium obeundis Missionibus consumpsit; æstate quidem Anicii, hieme autem ruri, & inter agrestes. Ut nè res eadem sæpius repetantur, narrabimus hoc libro quæ gessit Anicii; & in sequenti libro, quæ in Velaunorum oppidulis & pagis perfecit. Anicium, ampla civitas & numerosa, non solum indigenis frequentatur, verum etiam advenis, quos invitat opportunitas commercii; & earum artium copia, quæ quia solerti & subtiliore tractantur manu, inde nomen *Manufactures* apud Gallos habent. In civibus ingenium; elegantiam quoque passim ac lautitiam meritò laudaveris. Frustrà jugum illis imponere tentaverat hæresis; vicinorum exempla funesta detestati, decus antiquæ religionis illibatam servaverant. Non eadem in moribus constantia, quorum corruptela tetram fidei, quam profitebantur, labem inurebat. Justus *de Serres* Aniciensem per id tempus regebat Ecclesiam. Splendorem generis ornabat insigni eruditione, prudentiâ singulari ac pietate: in primis autem tuendæ majorum religionis præstanti studio. Diocesim suam sæpe contemplatus, dolebat eam vitiis sentibus spinisque silvescere; quid remedii afferret non habebat. Bellorum civilium perturbatio laxaverat frena licentiæ, & nè malum ægresceret medendo, illud dissimulare cogebatur. Deerant etiam operarii, quibus ad eam curationem adjutoribus uteretur; quippe ad clerum & cœnobìa magna pars corruptelæ manaverat. Hæc secum agitans audit Anicium venisse sanctum Missionarium, de

de cuius virtute, & rebus cum publico plausu fructuque gestis, Lib. III. multa jam cognoverat. Datum in eo sibi à Superis putavit auxilium, quo destinata perficeret. Arcessit illum, ac docet sibi esse in animo uti ejus consiliis ac ministerio ad reformandam dioecesim suam. Paratos, inquit, virtuti tuæ adversarios multos, & difficiles pugnas, prospicio : sed ubique tibi præstò erit auctoritas mea, & jam nunc omnem muneris mei potestatem concessam tibi volo. Regis, summa cum voluptate patefactam illustrem arenam intuens in qua & pugnandi & vincendi facultas amplissima foret ; operam suam Episcopo prolixè detulit ad ejus populum vera pietate imbuendum ; affirmans curæ, solitudinis, & industriæ, nihil à se desideratum iri. *Ceterum, subjecit, in hoc suscepto cum vitiosis populi moribus bello, non tantum mihi terroris est ab hostibus & adversariis, quos prædicas, quam à peccatis meis. Verum uno DEO fretus, in quo spem omnem meam collocaui, bono & securo animo sum.*

Illuxerat Aprilis anni 1636. cum Regis habere conciones, & <sup>Illius Con-</sup> elementa doctrinæ christianæ enucleare in collegii templo cœpit. <sup>ciones A-</sup> Petrus le Blanc, Episcopi Vicarius Generalis, testatus est explicari <sup>niciis, & e-</sup> solita & evolvi ab eo religionis mysteria tanta perspicuitate, ut ea <sup>arū suc-</sup> vel maximè rudes ac pæne cæci, viderent in bono lumine colloca- <sup>cessus.</sup> ta ; tantâ vi, ut fidem à maxime incredulis extorquerent. Crederes eum quasi reducto velo ipsa coràm intueri ; adeò penitus habere certa & persuasa sentiebatur.

Oratio simplex sinè calamistris & cerussa ; nervosa tamen, grandis, & splendida ; quam vox adjuvabat mirè ad movendos animos efficax : totum dicendi genus acre, vehemens, incitatum ; hominem numine afflatus redolens, & cælesti succensum igne, quo inflammatus à terris, & à se ipso abripi longius, & superis proximè jungi, videbatur.

Quamvis id illi unicè propositum esset, ut pueros & infimam plebem erudiret, nihilominus principes civitatis, atque lectissimi è cœnobiis, & clero, ad eum audiendum certatim concurrebant. Dum locum occupare quisque properat, subsellia duabus, tribusve, antequam verba faceret, horis referta erant : omnesque fatebantur potiore sibi esse illius sanctam simplicitatem, aliorum concionatorum pigmentis & elegantia. *Christum prædicat inquebant, & purum putumque DEI verbum ; alii prædicant se ipsos, & humanum verbum pro divino venditant.*

Lib. III. Cùm ædes sacra collegii multitudinem non caperet , transiit

*Oratori* ad templum S. Petri Monasteriensis , quod erat Benedictinorum.  
*præclaro* Sed istud , quantumvis amplum , brevè angustum turbæ fuit. Oc-  
*non placet* cupatis & repletis odeis , plurima tabulata & theatridia , populo non  
*concionan-* suffecerunt. Audientium corona quinque circiter millia capitum  
*tus Regis* vulgò numerabat : cunctis affirmantibus talem concursum nun-  
*Euangelis-* quam esse visum ; nunquam talem concionatorem auditum. Non  
*ca simpli-* æquis oculis concursum hunc aspexit celebris concionator , qui per  
*citas.* quadraginta solemnis jejunii dies tunc Anicii concionabatur in tem-  
 plo cathedralis Ecclesiæ. Molestè ferebat , se deserto , currere po-  
 pulum ad catechisten audiendum , quem sibi nequaquam compa-  
 randum arbitrabatur. Dolorem suum palàm ferre non ausus , oc-  
 cultiore , ad imponendum æmulo silentium , grassatus est viâ. Pro-  
 vinciæ præpositum adit ( is erat P. Joannes Filæus , & Aniciense  
 collegium lustrabat ) Fatetur Patrem Regis virum esse sanctum ,  
 verùm ejus rationem concionandi abhorrire à dignitate sacri sug-  
 gestûs : stilum humilem & incultum , sumptas è trivio sententias ,  
 divini verbi ministerium dedecorare. Provincialis , quorûm hæc  
 pertineret oratio subodoratus , respondit videri sibi rem attentius  
 examinandam , & cum illo ad audiendum sanctum Missionarium  
 rectâ pergit. Provinciale adeò movit viri Apostolici concio non  
 solida minùs , quàm cælesti unctione delibuta , ut lacrymas toto  
 tempore cohibere nequiverit. Mox ad comitem suum in templi  
 limine conversus , & adhuc æstuans ardore sacro ac dulcedine , quâ  
 fuerat perfusus : *Ultinam verò , mi Pater , hoc stilo concionatores*  
*omnes uterentur ! Sinamus virum sanctum frui simplicitate sua.*  
*Digitus DEI est hic.* Domum reversus , & cum Patribus collegii  
 differens de Christianæ doctrinæ , quam modò audiverat , explica-  
 tione , *Jam non miror* , inquit , *Patrem Regis audiri tanto concur-*  
*su , tanto fructu.* Ego quidem certè , *si Anicii degerem , operam*  
*illi sic dicenti dare nunquam omitterem.* Concionator , alio con-  
 silio ad audiendum Apostolici Missionarii catechismum cum Pro-  
 vinciali profectus , permotus illo tamen , perinde ac ceteri , fuit :  
 quique censor futurus accesserat , laudator , etsi subtristis , discessit.

*Provin-* At Provinciale divina P. Regis eloquentia sic delectavit ,  
*ciaPræpo-* ut postridie ad eum audiendum redierit cum P. Antonio de Man-  
*sis lau-* geon , philosophiæ professore in collegio Aniciensi , præstantis in-  
*dat ejus* genii ac pietatis viro , cum quo familiarissimè atque amicissimè vi-  
*sanctâ es* xi. Oriundus erat è Lotharingia , cùmque esset confessarius Du-  
*simplicem* cissæ  
*facundiâ.*

cissæ Aurelianensis, uxoris Gastonis, fratris Ludovici XIII. scripto Lib. III. mandaverat varia exempla virtutum, quas in P. Regis, dum unâ versabatur, observaverat. Ex eo scripto, cujus autographum habeo præ manibus, excerpam id, quod jam sum dicturus.

*Cum doctrinæ Christianæ capita P. Regis explicaret, oratio miram vim ad movendum habebat: plane ut appareret infusam divinitus eloquentiam esse, non datam naturæ beneficio, vel studio & labore comparatam.* P. Joannes Filleus, Provinciae præses, quamvis esset postridie discessurus, voluit à me in templum deduci, ubi P. Regis verba faciebat. Instabat hora diei duodecima; & ad duodecimam cum dimidia suggestum consensurus erat. Cum dixissem loci nihil, ubi sederemus, futurum: *Esto sanè, inquit; stantes, & procul, si licet, audiemus.* Pars mihi voluptatis erit excludi, aut in angulum aliquem compingi, ab infinita illa populi multitudine, quam heri tantopere sum admiratus. Ivimus igitur, & repertus illi aliquis est, licet agre admodum, locus. Dicentem stans audit per horam integram: tantumque lacrymarum fudit, tamque suaviter est affectus, ut me discedens ita sit allocutus: *Ne ego passuum millia duodecim libenter pedibus ambulaverim, ut eum auscultarem, si longius ab urbe concionaretur.* DEO plenus est iste, & amore Christi flagrat; parem habet neminem. Præcipuam P. Joannis Francisci methodum tradendæ populo doctrinæ Christianæ, non leviori laude prosequitur idem Provincialis, ad Præpositum Generalem scribens, eique reddens rationem Iustrati à se collegii Aniciensis: *Inter omnes collegii Patres, inquit, dignus est omni laude P. Regis: peculiari celestis gratiæ dono & facultate pollet ad explananda Fidei Christianæ primaria capita; de quibus verba cum facit, concurrat multitudo infinita. Scribere mihi promptum non est, quàm strenuè, quàm feliciter indefessus hic operarius in salutem animarum incumbat.* Rescribens Provinciali Generalis Præpositus illi præcipit ut Anicienses Patres horretur ad eum imitandum; ipsique gratuletur quòd penès se habeant hominem, cujus præclara sequi exempla cuncti possint.

Ejus sanctitatis opinio in animis omnium altè defixa, vim ipsius verbis & novas ardentissimæ orationi faces subministrabat; *te vita* ea verò nusquam clariùs enituit, quàm Anicii. Nusquam vita au- *sanctita-* sterior: semel tantum in die reficiebatur cibo; & quidem olu- *tem mini-* sculis, aut paucis fructibus. *sterii sui* Per duos, quos cum illo vixi annos, *tuetur, &* ait P. Antonius de Mangeon, *nam* nunquam vidi vespertem carnibus: illustrat.

R

nam

Lib. III. *nam vino jam dudum penitus ultrò abstinuiffe notum est. Non contentus tam rigido, tam continuo jejunio, aliquod pœnitentiæ instrumentum corpori inducebat.*

Tenuatus macie & exanguis vultus, modestus idem, & habitum animi bene compositi exhibens, blandissima in congressu comitas; vox, actio, oratio, divini amoris igne succensa; hæc pondus concionibus, & auctoritatem concionatori, conciliabant.

Societatis sacerdos, Anicii degens, hæc de illo ad Præpositum Generalem scribit: *Inter plurimos diligentes operarios, qui versantur in hoc collegio, admirationem movet P. Regis caritas, & inexhaustum ad mortales è vitiorum cœno educendos studium. Cum divinam explanat legem, à dicentis ore pendent ad quatuor amplius hominum millia; estque omnibus persuasum majorem ex uno ejus catechismo fructum percipi, quàm è multis sacrorum oratorum vel præstantissimorum concionibus.*

*Benedictinus Apostolicæ ejus vitæ prædicat.*

Andreas verò Pavè, sacerdos religiosus è Divi Benedicti familia, hoc pro testimonio scriptum reliquit. *Eum audiimus in templo nostri monasterii concionantem tanto ardore, ut totam commoveret civitatem, & frigidissimum quemque amore divino inflammaret. Novi multos, vel potius innumerabiles, quorum perditos mores emendavit, quorum virtutem ad culmen Christianæ perfectionis erexit. Nullus illi sermo nisi de DEO, idque semper cum sacro animi effervescentis impetu, quem stupentes attonitique mirabamur. In ipso verò cernebamus omnium ornamenta virtutum, summum rerum infimarum, & sui ipsius, contemptum; prodigiosam humilitatem, sitim inexplebilem salutis animarum, tenerriam erga pauperes caritatem. Ejus sermonibus, atque adeò exemplis deliniti, gratias immortales universi superis habebamus, quòd nostris temporibus Apostolum hunc suscitassent, qui sædè lapsos incolarum mores pristinam in formam, decusque reponeret.*

*Egregia illius in pauperes caritas.*

Porro inter laudes, quæ hîc Patri Joanni Francisco Regis jure ac meritò tribuuntur, haud scio an ulla plus ad illustrandum & juvandum ejus ministerium profecerit, quàm sollicita & indefessa cura pauperes sublevandi. Cum eos præcipua secundum DEUM caritate complecteretur, suarum ubique partium ducebat esse, illorum & animis & corporibus, quamcumque posset, opem afferre. Huc omne tempus à functionibus Apostolicis vacuum conferebat. Vix divinam legem explicare populo desierat, cum defectus viribus, & sudore diffluens, properabat ad eos visendos in eorum casis,

sis, in custodiis, in nosocomiis. Ter singulis hebdomadis cun- Lib. III.  
ctos, quibus in urbe ipsa domicilium erat, congregabat, utque so-  
lemne habebat animi pabulum à corporis levamento nunquam se-  
jungere, initium ducebat à precibus, quas idonea & vehemens co-  
hortatio sequebatur. Deinde panem, aut nummos, dividebat :  
denique agendis DEO gratiis finem huic officio caritatis impone-  
bat. Oppressos calamitate pauperes intueri non poterat, quin  
eâdem peræque ac illi ipsi, moveretur : verum commiserationem  
suam non pio tantum animi sensu, aut verborum suavitate metie-  
batur, sed procurandis, quæ responderent commiserationi, subsi-  
diis. Ut verò nullius indigentia vigilantiam ipsius effugeret, ha-  
bebat semper libellum præ oculis, in quem retulerat nomina om-  
nia oppidanorum egentium, itémque incommodorum, quibus sin-  
guli premerentur ; nec non matronarum, quarum caritas & copia  
illorum inopiam sublevare posset. Earum unicuique regionem  
urbis assignavit, itémque certum numerum pauperum, quibus su-  
stentandis curam impenderent.

Cum autem cerneret istarum nobilium ac piarum feminarum *Piarum*  
pleraque onera caritatis, quæ ipsis imponebat, subire sponte suâ, *sodalitatem*  
& perferre, constituit unam quandam ex illis conflare *matrona-*  
quæ familias totius urbis, à re domestica graviter laborantes, *rum insti-*  
necessariis commodis instrueret. Ejusmodi ad eas orationem habuit, *tuit sub-*  
cui nihil solebat resistere : adeò ut sinè ulla cunctatione decreve- *levandis*  
runt in unum coire cœtum, cui onus incumberet incolarum egen- *pauperi-*  
tissimo cuique opitulari. Omnibus id universè propositum, ut *bus.*  
per vices alimenta compararent egentibus familiis, panem, jacula,  
carnem : sua deinde munia singulis præscripta ; aliis data pro-  
curatio negotiorum sodalitatis ; aliis cura corrogandarum à civi-  
bus ostiatim, & in templis, eleemosynarum. Aliarum partes erant  
familias hebdomadis singulis perlustrare, & quo quæque plurimum  
indigeret explorare, ut ad cœtum universum, cum primum omnes  
convenirent, referrent ea, quæ comperissent. Dici non potest  
quantum voluptatis probi, quantum allevationis egeni, ceperint  
ex hac pia sodalitate sic instituta, quæ magno civitatis commodo  
diu viguit. Hanc verò fundasse parum habuit Missionarii, verè  
pauperum patris, caritas ; ipse non cessabat per se divitum libera-  
litatem sollicitare atque urgere. Illis ponebat ob oculos non alio  
consilio inductum à DEO conditionum discrimen, quàm ut divi-  
tes beneficiâ, pauperes patientiâ, sempiternas opes conseque-

Lib. III. rentur : divites ministros esse Divinæ providentiæ, pauperumque procuratores. His rationibus adducti plerique, & verò sanctitatis famâ, quæ de viro Apostolico percrebuerat ; magnam pecuniæ vim ejus fidei arbitrioque committebant. Quin, vicitim domos obibat, & quidquid offerretur, triticum, lectos, lintea, vestes, supellectilem, omnia muneri & lucro, in gratiam pauperum, apponens, reservabat.

*Totius urbis indigentiam levat.*

In horreum quoddam domesticum congefserat ingentem frumenti copiam, cujus distribuendi, prout juberet ipse, provinciam dederat Margaritæ *Baud*, piæ feminæ. Collegii verò Rector cubiculum ipsi permiserat, in quo conderet quæ in usum pauperum corrogasset. Cubiculum hoc thesaurum suum vocabat, ac sanè

*Luc. XII. ibi cor ejus erat.* In eo variæ cernebantur apothecæ, hîc indusiorum, illic calceorum, alibi vestimentorum, & omnigenæ supellectilis, quam dividebat in egenos, ut cuique opus erat.

Cùm in isto thesauro cuilibet egestatis parti, & malo, remedium præstò esset, ad hanc officinam confluebant è tota civitate pauperes, nec quemquam sua spes frustrabatur. Quibus, deerat panis, eos allegabat ad Margaritam *Baud*, horreo suo præpositam, tantumque critici illis imperabat erogari, quantum ad sustentandam ipsorum familiam opus esset ; qui lecto, qui veste, qui domestico carebant instrumento, hæc illis ipsemet impertiebatur. Copiosum penus, quod in omnes paratum habebat usus, sufficebat universis. Temporibus duris, cùm frigebat commercium, ipse à pauperibus artificibus opera confecta deportabat ad cives locupletes, orans ut emerent, ac pretium prolixius quàm pro consuetudine, ac liberalius, caritatis studio, persolverent.

*Præcipua ejus erga illos pauperes caritas, quos paupertas pudor premebat.*

Porro illas familias teneriori commiseratione prosequabatur, quæ priori statu dejectæ, cùm premantur gravi egestate, nihil tamen gravius egestatis famâ timent ; leviùsque summas inopiæ angustias, quàm inopiæ pudorem ferunt. Aequè movebatur & miserabili earum conditione, & verecundiâ. Quamvis autem suam tegere calamitatem summa ope niterentur, ipse tamen intentiore cura studebat tegere quæ illis procurabat, subsidia, ità ut sæpe sentirent se sublevatas, at manum beneficam, à qua erant sublevatæ, non sentirent. Nè illos quidem erroneas ejus caritas, nullis circumscripta metis, excludebat, qui proborum indignationem excitant sæpius, quàm commiserationem. Ceterum, cùm panem à se corrogatum illis divideret, nihil prætermittebat, ut eos ab illa

vaga



vaga & otiosa vivendi ratione abduceret. Satiùs autem esse di-  
 citabat falli, datâ indigno eleemosynâ ; quàm, negatâ digno, se-  
 ipsum fallere. Lib. III.

Nullum misericordiæ officium ejus caritas cupidissimè non *Primari-*  
 amplectebatur. In vinculis detentos quotidie visebat ; tantòque *as mulie-*  
 majorem ex eorum miseria capiebat dolorem , quantò minùs mi- *res ple-*  
 serandi vulgò existimantur. Tum eò loci redacti sùnt, ut signifi- *rasque u-*  
 care nequeant calamitatem suam, & opem sibi necessariam postula- *num in*  
 re. Primarias aliquot mulieres unum in cœtum collegit, quæ *cœtum,*  
 miserorum vincula solarèntur. Jam, inter vinctos iis peculiarem *ad vin-*  
 impendebat misericordiam, quos egestas sola facit reos. Ipsorum *ctos sub-*  
 causam agebat sedulò apud judices, ut custodiâ emitterentur ; & *levandos,*  
 apud eorum creditores, ut aliquâ tolerabili conditione cum mise- *colligit.*  
 ris paciscerentur.

Mirum autem & incredibile videbatur hominem unum, &  
 quidem pauperem omnibus urbis pauperibus subvenire posse, &  
 onus tot familiarum alendarum sustinere. E testium jurata fide  
 constat innumerabilem egentium incolarum multitudinem difficil-  
 limis temporibus ab eo fuisse sustentatam. Nihil non audebat,  
 nihil non suscipiebat, Divinæ confisus providentiæ, quæ nunquam  
 illi defuit.

DEUS ipse prodigiis non semel editis declaravit quàm gra- *Pauperes*  
 tam haberet Beati viri caritatem. Id tribus duntaxat exemplis il- *omnes a-*  
 lustrioribus docere fatis erit, quorum testis omne Anicium fuit. *lentos su-*  
 Anno 1637. cùm spem agricolarum & vota messis fefellisset, fru- *scipit in*  
 menti pretium crevit supra modum, & annonæ gravissimâ difficul- *summa*  
 tate tota regio laboravit. Plerique opifices omni auxilio destitu- *difficulta-*  
 ti, conficiebantur fame, aut propè aberant ab exitio. Doluit ca- *te anno-*  
 lamitate publicâ Regis, ut si sua unius fuisset ; pauperùmque mul- *na.*  
 titudinem propè infinitam, ut unam familiam, ut suam, spectans,  
 omnes, incepto perquam audaci, alendos suscepit. Ergo divi-  
 tum ostia concursans, si quos audiret frumenti copiam domi com-  
 primere, ac præstolari vendendi opportunitatem dum maximum  
 tritico pretium necessitas imponeret, eos admonebat, nequaquam  
 ipsis licere fructum è communi calamitate petere, & inopiâ tot mi-  
 serorum ditescere. At quibus benefaciendi voluntatem pietas ;  
 facultatem, res familiaris lauta, dabat ; iis revocabat in memoriam  
 statuendum beneficentiæ modum pro modo miseriæ ; hæc dum  
 augeretur, illam quoque augendam & emulandam esse : in ex-

Lib. III. tremâ necessitate graviolem impositam esse divitibus legem porrigendæ stipis, & DEO iudice, plectendos tanquam homicidas egentium quos non pavissent.

His verbis sopitum caritatis ignem ubique denuo accendit: alii sua patefecerunt horrea, & triticum, quanti æquum erat, vendiderunt. Eo pacto laxata est aliquandiu annona: alii resignârunt loculos, & latentes nummos eduxerunt. Tantum denique, sive pecuniæ, sive tritici partim corrogati, partim vili pretio empti, est inventum, ut apothecam ingentem frumento repleverit: in ea quadraginta quatuor majores modii, quæ tunc in foro maxima mensura erat, numerati sunt. Ingens profectò numerus; sed pro tanta pauperum turba, quam susceperat alendam, exiguus.

Multi ejus prudentiam desiderabant, qui onus humeris impar subiisset? verùm cælestis auxilii viribus, nec temere, nitebatur. Margarita *Baud*, cui tradita hujus apothecæ custodia & dispensatio, tantâ fide, tantâ sollertiâ, frumentum distribuit, ut nulli familiæ defuerit, & nulli negatum esse Regis voluerat. Ceterùm ingravescente annonâ, exhauriebatur frumentarius thesaurus: crumenæ locupletum fiebant in diem arctiores, dum suum quisque periculum anteponit alieno. At provida Numinis benignitas, cujus fiduciâ tantum opus DEI famulus aggressus erat, in tempore ipsò adfuit hunc in modum.

DEUS semel, iterum, ac tertio, frumenti ab eo collectum multiplicat.

Monitus aliquando à Margarita *Baud* consumptum esse frumentum, consumptos nummos, quibus novum compararetur, nihilo secius ad eam misit pauperulam mulierem, onustam catervâ liberorum, jussitque, illi, quantum frumenti peteret, dari. Obstupuit Margarita, & accurrens, mirari dixit sibi rem ab eo imperari, quam præstare non posset, ut ipse probè norat. *Quin tu pergis domum*, subjecit Pater, *& hujus pauperula saccum implet?* Affirmat Margarita nè tritici quidem granum sibi superesse. *Perge, inquam*, instat Regis, *abunde reperies quod & illi, & aliis bene multis, sufficiet.* Morem gerit Margarita, & horreum suum aperiens, redundare frumento stupet, datoque statim, quod petebatur, tritico, ad collegium properat lætitiâ gestiens, ut certiolem de prædigio Beatum virum faciat. Quam ille procul conspicatus, subrisit, & priusquam proloqui verbum posset, *Aliàs*, inquit, *divina bonitati plus confide, & horrea DEI semper esse plena scito. Abi, ac rem totam silentio tege.* Hoc prodigium addidit animos sancto Missionario, qui fiduciæ plenus jussit erogari obviis quibuslibet

libet frumentum prolixè, ac pæne prodigè. Populus quid acci- Lib. III.  
disset ignarus, capere non poterat quo fieri pacto posset, ut in tanta omnium penuria unus frumento affluens, tot familiis panem subministraret. Cunctis obstupescens, Margarita tenere se non potuit quin mysterium evulgaret; cuius fama continuò urbem implevit. Interim annonam ingravescens secuta fames, diram inter rusticos edebat stragem: civitas pauperes suos communis expertes calamitatis cernebat læta, & servo DEI gratias ingentes agebat. Cùm tamen dandi nullum faceret modum, fons solitæ benignitatis exaruit. Vacuum apothecam Patri Margarita significat, monétque ut replendam denuo curet. *Quiesce*, inquit Regis, *providebo*. Mulier, quasi venturo tritico paratura locum, purgare apothecam ac verrere studuit. Eodém die Margaritam adierunt egeni complures à Patre missi, & frumentum rogantes. Illa de accipiendo frumento, non de dando, sollicita, cum ipso met expostulat, urgétque ut frumentum recens veteri consumpto substituatur. *Nihil urget*, respondit ille, *necdum omne triticum in horreo consumptum est; imò suppetit adhuc ad multum tempus. Atqui horreum everri*, retulit Margarita, *& clausi: en tibi ejus clavam*. Cùm Regis perseveranter affirmaret frumentum in apotheca superesse, rediit illa propere, ac plenam, ut prius, invénit.

Cùm Beati viri benignitas consulere pauperibus indefessa perstaret, in ejus quoque gratiam edere prodigia bonitas divina perstitit. Restabat in horreo semodius tritici tantum. Adsunt egeni complures, & saccos suos Margaritæ offerunt, jubere patrem ut impleantur. Ad illum excurrit anxia, & docet vix semodium superesse. *Istis omnibus tribue*, respondit, *& adhuc supererit quod tribuas*. Nihil opponere ausa, sumpsit saccos, implevit, & superfuit plus, quàm quantum dederat. Hoc præcipuum & insigne habuit tertia ista multiplicatio, quòd ut cuique distribuebatur frumentum, ita crescebat in Margaritæ manibus; idque tandiù perseveravit, quandiù annonæ gravitate laboratum est.

Ipsa incredulitas vel pertinacissima istis prodigiosis multiplicationibus fidem abrogare vix, opinor, ausit. Positæ in omnium oculis & auribus, jactatæ in vulgus eodem loci ac temporis vestigio, & excussæ, neminem, qui falsitatis eas coargueret, habuerunt. Easdem vir Sanctus inficiatus non est. Laudes quidem, quas merebantur, præ modestia, respuit, rem ipsam, studio veritatis, non negavit. Vidit universa civitas innumerabilem hanc

Lib. III. pauperum turbam, in summa ciborum penuria sustentatam, cui vita & incolumitas constare, nisi miraculo non poterat. Confessa sunt Acta, testes protinus interrogati, à iudicibus, tum è populo tum è Clero selectis. Margarita Baud, honestæ sortis mulier, notæ probitatis & iudicii, jurejurando confirmavit coram magistratibus & Episcopo, triplicem hanc multiplicationem gestam domi suæ, ac postremis durioris annonæ mensibus eductum à se fuisse prodigiosum frumenti numerum ex apotheca sua, cum illuc nihil intulisset. Sanctorum Evangeliorum inter jurandum venerationem & auctoritatem interposuit, ejusque testimonio civitas suffragata est. Accessit jurata quatuordecim idoneorum testium fides, quorum verba in Actis Canonizationis (venia sit huic Ecclesiastico vocabulo) referuntur. Sic DEUS constantem famuli sui

*Ejus in ægrotis ac morientibus adjuvando.*

erga pauperes caritatem calculo suo comprobavit. Nec levioribus argumentis, licet interdum occultioribus, ejus, in ægrotis ac morientibus consolandis & adjuvandis diligentiam commendavit. Nam ea pars Christianæ misericordiæ semper illi potissimum cordi fuit. *Quamcumque navamus operam peccantibus, inquebat, donec vivant, incerta semper est; SEMINAMUS BONUM SEMEN, at venit inimicus, & SUPERSEMINAT ZIZANIA, quibus triticum opprimitur. Quidquid boni confertur morientibus, tutum, & in omne tempus fixum est: nec humane inconstantie levitatem, aut hostium insidias, reformidat.* Vocatus ad audiendas ægrotantium confessiones, nullâ distinebatur occupatione, quo minus advolaret; eratque peculiari quadam arte, divinitus concessâ, præditus, ut eos ad sanctè moriendum præpararet. Initium hujus præparationis à peccatorum detestatione & pœnitentia ducebat: pernoctabat ad eorum lectos, nec ab iis oculos dejiciebat quoad ipsorum salutem aliqua ratione in tuto collocasset. Itaque nihil ægrotis accidebat jucundius, quàm extremum spiritum in ejus sinu deponere. Ut autem esset paratior ad procurrendum quocumque necessitas vocaret, nunquam vestes exuebat noctu, semper expeditus ad minimos inclamantium nutus.

*Puellam nobilem salute animæ periclitantē, ad sanctè moriendū comparat.*

Ejus caritati cælum sæpe obsecundabat, significando illi periculum, in quo ægroti versabantur. Puella nobilis novem & viginti annos nata, fallacibus rerum caducarum decepta illecebris, induerat se in laqueos aut exitiales, aut exitio proximos. Incidit in morbum, nihil de morte, & necessaria ad eam piè obeundam præparatione, cogitans. Regis, post explicatam populo Christianam

nam

nam legem, Dominicâ Quinquagesimæ, fortè transit præter ægro- Lib. III.  
tæ domum. Ibi arcana manu retentus medio in vico hæsit, &  
alienato à sensibus animo, constitit immobilis. Vidit puellæ so-  
ror, & ad sororem accurrens: *En, ait, P. Regis transit.* Ad has  
voces ægra velut evigilans, acciri Patrem jubet. Qui subito in-  
gressus, periculum ægrotæ divino lumine cognovit, ac moribun-  
dam de illo tam efficaciter monuit, ut acerrimo dolore correpta,  
peccatorum onus abjecerit, ac postridie rationis usu amisso, diem  
supremum expleverit: nemine dubitante quin DEUS manum P.  
Regis adhibuisset, ut eam sempiternis suppliciis eriperet.

Cum autem ad morbum paupertas accesserat, tunc ad ejus *Ejundem*  
caritatem novus accedebat stimulus: Ægroti maximè omnium *studium in*  
destituti, erant illi omnium carissimi. Hujus Angeli consolatoris *sublevan-*  
aspectus satis erat ad delendam omnem paupertatis & morbi acer- *dis agro-*  
bitatem. Fugiebat eo præsentē dolor omnis & sollicitudo. Mo- *tis, maxi-*  
dò ac scirent notam illi suam calamitatem, bono erant animo ac *me desti-*  
tranquillo; remedii ab eo certissimè afferendi fiduciâ. Ut autem  
miseris inserviret, ad omnia ministeria, etiam infima, descende-  
bat. Conspectus est non semel Anicii, ut aliis in locis, deferre ad  
eos imposita humeris cubilia, culcitas stramineas, vestes, & alia in-  
strumenta domestica: idque tanta oris & animi alacritate, ut faci-  
lè intelligeres quantum dignitatis in eorum persona vili ac despe-  
cta, docente fide cerneret.

Post eam sterilitatem, quâ regio tota, ut diximus, labora-  
vit, tanta vis morborum in plebem incubuit, ut congesti promi-  
scuè confertique ægri valetudinarium publicum implerent. Non  
deterruit immensam Beati viri caritatem infinita propè multitudo;  
quin omnium curam in se susciperet. Obibat singillatim jacentium  
lectulos, consolationem aliis, aliis aliud quidpiam levamenti affe-  
rens. Non contrahendi morbi, quamvis contagiosi, metu; non  
stomachosâ ægrotantium intemperie; non odoris gravitate; non  
labore ullo, rejectus, pergebat ore læto, animo lætiore, licet ita  
plerumque debilitatus, vix ut pedibus niti posset. Heroicam pro-  
fectò fortitudinem esse oportuit, quæ tot incommodis, à quibus  
natura tantopere abhorret, non vinceretur. Sed quò plus ægroti  
creabant nausæ, ac fastidii, eò cupidius ad eos applicabat se se:  
ut exemplis aliquot patebit.

Jacebat æger pauperculus in extrema oppidi regione, ulce- *Rarum*  
ribus, scabie, pedibus olidis, coopertus. Nemo reperiebatur qui *exemplū*  
ad *heroicæ*  
caritatis.

Lib. III. ad hoc vivum cadaver auderet aspirare : tantus erat fœtor, tam miserabilis & hominis & loci facies ! Ergo , nullo consolante , nullo sublevante , paulatim doloribus & egestate conficiebatur. Audivit Regis , ac deforme tugurium ingressus , aliquandiu obortis lacrymis hæsit , aspectu lamentabili contrerritus. Mox purgat centones , lavat ulcera , conquirat lectum & lintea , quin etiam vulneribus medicam admoveat manum. Tam novam , tam inauditam benignitatem admirans miser , seque referendæ gratiæ imparem sentiens , illum liberatorem suum & patrem appellavit. Quem vir DEI suavissimè atque arctissimè complectens ; *Ab , parce , frater , exclamat ! Ex hac mea , qualiscumque est , opellâ majorem , quàm tu fructum capio. Leve est quod tua causâ facio ; plura facere debeo , plura velim. Unum à te peto ut ignoscas , quòd ad opem tibi ferendam tam serò accesserim.*

Eâdem caritate ductus curandam suscepit pauperrimam mulierem , quam pudor & morbus tenebant latentem atque abditam casâ , in Sancti Ægidii suburbio. Immanis cancer faciem sic arroserat , ut fœdissimam humani vultûs imaginem , ac pæne larvam , præ se ferret. Nullus ad eam oculos aut gradum propius ferre sustinebat. Ipsa sibi intolerabilis , ultro lucem hominésque fugiebat. At perspicaces Apostolici exploratoris oculos non effugit. Adest , & ad patientiam cohortatus , cibum singulis diebus , interdum etiam aliquid obsonii lautioris infert. Cùm autem tantâ rerum omnium inopiâ premeretur , ut nè cathedra quidem dormi esset , unam attulit , quæ servatur etiamnum Anicii , tanquam sacrum caritatis heroicæ monumentum. Hanc periclitantes in partu feminae , afferri sibi rogant ; in eâque confidentes permultæ , fœtus incolumes citò ac feliciter effuderunt.

Cùm vitam suam egenis & ægrotis addictam unicè ac devotam crederet , vix unquam è collegio pedem efferebat , nisi ad eos consolandos , eorûmve confessiones excipiendas. Hoc illius occupationum caput : tunc se vivere ac regnare arbitrabatur. Quidam è Societate & Provincia Lugdunensi , transiens Anicio , à Rectore petit dari sibi aliquem à quo deduceretur per urbem ad ea visenda , quæ nobilis & antiqua civitas advenis contemplanda servat. Regis ad omne caritatis officium semper expeditus , illi se deductorem obtulit. Vix egressi domo erant , cùm DEI servus quæsitivus , num molestè laturus esset si viserent inter eundem pauperem graviter ægrotantem. Annuit advena. Regis consolatur

tus agrum adjuvit ad eliciendos complures pios virtutum varia-  
rum affectus : remque bellè processisse videns, hac domo digres-  
sus, alteram subit, itémque tertiam, ac demum quartam. Abre-  
ptus æstu solito pietatis, & focii dieique immemor ; instare de-  
mum noctem animadvertit, & in collegium recipere se coactus  
est. Erubuit, & à Patre, cui se deductorem obtulerat, veniam  
imprudentiæ petiit. Ille verò confessus est auditum à se Regis de  
rebus divinis colloquentem majori cum voluptate quàm si pulcher-  
rimam totius orbis civitatem perlustrâisset. Hinc facîle colligi po-  
test, quantus in Apostolico pectore arderet amor erga pauperes, in  
quibus visendis, consolandis, sublevandis, totus esse, rerum cete-  
rarum oblitus, videretur.

His maximarum virtutum illustribus documentis, quæ præ-  
cipua sunt Apostolicæ Missionis argumenta, donum miraculorum  
DEUS adjecit, ut servo suo, quem ad reformandos mores, & re-  
stituendam pietatem, suscitaverat, major auctoritas & certior divi-  
næ Missionis fides, inesset. Abiret longius oratio, si recenserentur  
singillatim omnes morbi, quibus præsentem fecit medicinam,  
victis naturæ artisque legibus. Insigniores quosdam ex ingenti  
acervo decerpam.

Puella continenti æstuans febris, cum gravibus incrementis, *Plures a-*  
narrabat illi non solum morbi sui acerbicatem, sed etiam calamita-  
tem parentum, quibus unicum, unde alerentur, vectigal erat filia *grotes*  
labor, & opera quotidiana. Permotus infelicis familiæ miserabi- *morbus li-*  
li statu, in genua procumbit, prope lectum ægrotantis, ejusque sa- *berat.*  
nitatem clara voce, audientibus bene multis, qui aderant, à DEO  
postulat. Sensit se exauditum. Surgit, & supra jacentem ducta  
in modum crucis manu, tollensque vocem, imperantis ritu, *Fe-*  
*bris*, ait, *faceffe procul, & agram banc omitte, cujus valetudo est*  
*ad sustentandam familiam necessaria.* Morem gessit febris, &  
puella confestim sana surrexit. Recitatur hoc miraculum in Actis  
Canonizationis, & admiratione totam urbem complevit.

Catharina *Boutaud*, imminente partu, cruciabatur doloribus  
acerbissimis. In summum adducta periculum, Patrem Regis ar-  
cessivit ; qui postquam laborantem, excitata divinæ misericordiæ  
spe, confirmavit, audita ejus confessione, discessit. Egressum æ-  
grota subito revocat, jussisque occludi foribus ædium, *Hinc exire*  
*te non patiar, inquit, nisi mortua, aut precibus tuis liberata.* Re-  
gis adstantes propinquos rogat, ut secum preces fundant in vicino  
cubi-

Lib. III. cubiculo. Ibi vix recitatae fuerant litaniae B. Virginis, cum puerpera edito feliciter partu, paulò post omnino convaluit.

Aliquanto plus admirationis habet sanatio quae sequitur. Feminae à medicis depositae, & animam agentis confessionem exceperat. Orant, profusis lacrymis, propinqui, & obtestantur, ut vitam & sanitatem moribundae à DEO exoret: ità consultum iri familiae, quam copiosam & omni destitutam ope relinquebat. Movit Beatum virum illorum fides, & sacrum numisma, quod appensum Rosario gerebat, immitte in vas aquae: mox aquae benedicens, potendam aegrotanti dedit, quae subito liberata febris, & pristinae restituta valetudini sic fuit, ut si nullum unquam ejus detrimentum fecisset.

Septennem puerum multos jam dies ardentissima torrebat febris. Nihil in remediis auxilii, nihil in Medicis. Pueri pater dolore oppressus nocturni diurnisque lacrymis conficiebatur, negabatque se superstitem esse posse unico filio, cujus vitam potius ducebat suam. Auctores amici fuerunt ut opem imploraret viri sancti, de quo tam multa, tam mira, omnium sermone celebrabantur. Eum convenit, ac lacrymis pluribus, quam verbis, obsecrat, ut miserescat filii, quem morbus; & patris, quem dolor exanimabat. Flentem & luctu perditum videre siccis oculis non potuit vir benignissimus; sequitur, & domum, ubi jacebat puer, ingressus, familiam omnem aspicit in fletus, lamentationes, & ejulatus effusam, quia puer cum instante morte luctabatur. Ut primum conspectus fuit DEI servus, quasi ad benigni sideris exortum, tetra illa caligo tristitiae, quae mentes & ora occupabat, est depulsa: spes nova, contra spem omnem, affulsit. Ipse puer vocibus intermortuis paulò antè affirmaverat, si videre sanctum Patrem posset, se persanandum certò fore. Spes illum sua & omnem familiam frustrata non est. Animum & vires reddere moribundo visa praesentia servi DEI, qui post brevem & sollicitam precationem, haustum aquae, à se consecratae, dari puero jussit. Ille dulci statim correptus somno, sanus & valens evigilavit.

Videbatur Sanctus Pater imperium quoddam in omnes cujuscumque generis morbos obtinere. Cumque ista *gratia curationum* majora in dies incrementa caperet, omnes ad eum aegroti concurrebant. Mulier profluvio sanguinis laborans, rogandum curavit, ut ad se diverteret. Aliquot precibus cum ea recitatis, sanguis momento constitit.

Aegro-



Ægrotorum domos pro more perlustranti occurrit femina Lib. III.  
 in summas morbi angustias adducta propter pertinacem dysente-  
 riam, cum febre continua conjunctam. Primum illud suavit, ut,  
 voto piè nuncupato, alicujus è numero cælitum opem flagitaret.  
 Respondet illa jam factum, nec semel, sed frustra. Hujus nempe  
 morbi propulsandi gloriam DEUS seruo suo reservabat. Humi  
 pronus in genua preces cum ægrota fudit. Mox eam sedulo ad-  
 hortatus, ut spem suam omnem in divina bonitate reponeret, affir-  
 mavit nequaquam hoc morbo morituram. His vocibus abacta  
 cum febre dysenteria diffugit. Noctem quietam duxit ægra, &  
 manè restitutam sibi cum viribus integram valetudinem sensit. Re-  
 versus ad eam postridie Regis cum audivisset exclamantem præ  
 gaudio, *Ab, liberator meus!* tacere jussit. Sed quanto enixius si-  
 lete jubebatur, tanto impensius acceptum beneficium evulgavit.  
 Erepta morti virginis non obcuræ vita latius ad famam emanavit.  
 Exhaustæ medicorum artes, spem salutis omnem ademerant. Cer-  
 tior factus Regis ægram in præcipiti esse, cumque ipsa morte lu-  
 ctari, advolat. Quem aspectans medicus, *Nihil*, ait, *opus est pro-*  
*perato: neque plus agrotam præsens, quam absens, juveris.* Om-  
 nino puella totis artibus dirè convulsa; vocis, mentis, ac pæne  
 motus expers, supremam decurrebat horam. Tanto plus doloris  
 jactura præstantis virginis afferebat sancto Missionario, quanto  
 plus utilitatis ex ejus, cum valeret, sedulitate, industriæque capie-  
 bat. Ergo medicum & parentes virginis rogat ut parumper sece-  
 dant. Ipse cum socio solus procumbit humi, prope lectulum, &  
 multis cum lacrymis Patrem cælestem orat, ut respiciat benignè  
 tot pauperes, quorum puella curam gerebat, eamque vivere ac  
 valere jubeat, quæ illis in loco matris esset. Hunc in modum pre-  
 catus; erigit se, & moribundam nomine inclamans: *Gratias age*  
*DEO*, inquit, *qui longiorem tibi concedit usuram vite, ut eam stu-*  
*dio deinceps majore in ejus honorem & pauperum commoda im-*  
*pendas.* Tunc velut ex alto suscitata somno, aperuit oculos, &  
 sanctum virum conspiciens, recepto cum voce spiritu, *Ab! mi*  
*Pater*, exclamat, *quem in statum deductam me vides? Bonum,*  
 subdit ille: *jam vivis & vales; vide ut restitutâ divino benefi-*  
*cio sanitate rectè utaris.* Addidit salutaria quædam monita, &  
 medicum, ac parentes revivens, quasi rei totius ignarus: *Non vi-*  
*deo*, inquit, *cur tantopere desperanda sit ejus salus: nec ita ma-*  
*le, meâ quidem sententiâ, se habet.* Movit medico & parentibus  
 U ad-

Lib. III. admirationem hæc affirmatio : ac multò magis obstupuerunt, cum ipsam virginem audierunt clamantem se valere, quam modò animam agentem reliquerant. Medicus, explorato arteriæ motu, febrim decessisse cognovit. Rogata quid accidisset; nescire se respondit; hoc unum scire, venisse cum socio Patrem Regis, & post brevem cohortationem ad pietatem diligenter colendam, recessisse.

Hæc adhibita, favente Numine, curandis corporum morbis remedia, hominum existimationem auxerunt de præcipua Beati viri apud DEUM gratia, & ejus sedulitatem extimulârunt ad curandos animorum morbos, quorum gravitatem & pericula cum probè intelligeret, visus est sæpe diffluere lacrymis, interdum etiam animo linqui; cum de nonnullorum improborum flagitiis audiret. At simul ingeniosa caritas illi remedia suggerebat, quibus ejusmodi ægroti curarentur.

*Solertia  
in curan-  
dis ani-  
morum  
morbis.*

Sic vulgò sunt improbi, morbos suos amant, medicos odierunt. Itaque multa tulit vir Apostolicus ab istis voluntariis ægris, perpeßu aspera, dum illorum sanare cupiditates molitur. Verùm istis acerbitatibus tantum abest ut restinctus fuerit ejus ardor ad vitia curanda, ut etiam ipsæ vexationes, DEO gubernante, vim remedium & vicem habuerint. Id exempla, quæ sequuntur, docebunt.

Mercator locuples, legum ac pietatis contemptor, qui nullum pridem dicendi & faciendi, nisi quem libido suasisset, norat modum, apertè odium in sanctum Patrem profitebatur; idque nullam aliam ob causam, quàm quia ille publica flagitia, & flagitiosos, libere insectabatur. Ejus famam calumniis atrocibus clam vellicabat: palàm temerarium, audacem, inconsultum, simulatorem pietatis, appellabat. Quin etiam eò progressa erat hominis protervia, ut illuderet occurrenti atque insultaret: solo aspectu Regis efferabatur & exandescibat.

Quantò videbatur injustius mercatoris odium, tantò visa est justior causa famulo DEI cur illum salvum, totque gravibus liberatum malis, vellet. Occasione data iniecit illi nescio quid obiter de sempiternæ salutis negotio. Rejecit sermonem improbus ferociter atque inhumanè. Non deterritus stolidâ feritate medicus sapiens, & phrenericum aliâ viâ curandum ratus, molles aditus in mercatoris libidinosi animum & amicitiam captat. Sensit lucri avidum. Ergo huc intendit curam ut ejus commercio fa-

veret,

veret, ac mercium venditionem quàm posset honestissimè ac facil- Lib. III.  
limè quæstuosam illi procuraret. Ipse ab eo mercabatur quæ opus  
erant ad alimenta, & usus necessarios pauperum; ipse cum fami-  
liaritate quadam ac fiducia consilium ejus & mentem exquirens per-  
contabatur quid agendum censeret, ad sustentandas familiarum  
inopiam angustias.

His officiis mercator factus multò humanior, & commodior, *Improbū,*  
audire cœpit, quem antea nè intueri quidem sustinebat. In spem *publicā*  
vicissim adductus vir sanctus hominis tandem aliquando expugnan- *laborantē*  
di, & occasione utendum existimans: *infamī,* *expugnat.* *Nullam vigilarum, valetu-*  
*dinis, ac nè vita quidem rationem habes, ut congeras opes, inquit:*  
*at quis tandem erit tanti laboris exitus? Quæ parâsti cujus erunt?*  
*Hæc omnia momento mors auferet. Propter hæc tamen bona, mor-*  
*ti sic devota & addicta, vixisti hætenus immemor & negligens*  
*beate immortalitatis, quæ tua, si velles, erat. Quid, obsecro,*  
*proderit congestas opes opibus cumulâsse, si tute ipse jacturam tui*  
*feceris?* Percussit hæc oratio mercatorem: inquietam & insom-  
nem, iis quæ audierat secum reputandis, noctem egit: mox acri  
dolore concussus, ubi primùm diluxit, pergit ad P. Regis, eique  
suos terrores denarrat. Venientem excepit vir DEI summâ oris &  
animi lætitiâ: ejus tamen terrorem ità consolatus est, ut eum non  
leviter augeret ob oculos posito letali veterno, in quo tot annos  
obtorpuerat. Indè spem timori blandè admiscens, commemora-  
tâ cælestis Patris in filios peccantes & prodigos clementiâ, pristi-  
num sanctæ caritatis ardorem excitare conatus est. Luctatus ali-  
quandiu secum reus, deditionem fecit, sibi que certum denique ac  
deliberatum esse renuntiavit, alios mores, aliam vitam inire. Sin-  
ceram voluntatem præsentī statim pignore demonstravit. Do-  
mum quippe repetens mulierculam, cum qua turpiter consueverat,  
sociam illecebramque scelerum, ejecit: tum elemosynis ac preci-  
bus ad sacram confessionem rite præparatus, delicta omnia supe-  
rioris ætatis explicuit, tantamque vim lacrymarum profudit, ut  
magnitudine doloris pœnarum, facinorosæ vitæ sceleribus debita-  
rum, gravitatem aliquo pacto compensari posse Regis putans, no-  
vum poenitentem paulò indulgentiùs habuerit.

Ille verò impositam sibi in Sacramento poenam leviorē ju- *Ejus cari-*  
dicans, & cum DEI famulo amicè conquestus, *tus in reū*  
*cillitati meæ parcis? Quo pacto pœna tam levis tam scelerata par* *multorū*  
*esse vite potest? Rectè judicas,* respondit Pater; *scelerum,*  
*graviorem me* *at pani-*  
*veris, sentem.*

**Lib. III.** *reris, & expectare debuisti pœnam, si tuorum criminum numero & moli consentanea foret: sed ego quidquid solvendum tibi restabit, luam.* Ità se de industria gesserat prudens sacerdos; hinc quidem cavens, nè invalidis adhuc humeris onus iusto gravius imposeret; indè verò non dubitans, quin hac illectus indulgentiâ graviores à se pœnas ultro expeteret: uti reipsa contigit. Et ipsa comper-tum experienciâ rector animarum exercitacissimus habebat, cùm animus ab amore peccati verè abstractus totum se in DEI jura transcripsit, tunc novo pœnitentis fervori frena esse injicienda, nè ultra prudentiæ terminum excurrat, dum injurias, à se illatas DEO, in se vindicare nititur. Hic, de quo nunc agimus, reliquos vitæ dies in gravissimis, quibus pœnitentia fontes pios plectit, pœnis duxit, exemplisque sanctioribus prava, quæ populo præbuerat, exempla sarcire laboravit.

Hoc ingenium servi DEI, ea dos & virtus erat, ut asperitatem semper suavitate condiret. Sic animos vel maximè aversos ac rebelles, ad se, Deumque, convertebat; & qui ejus aspectum horruerant, humanissima lenitate deliniti, sponte, quocumque ducebat, sequebantur.

*Multos ad bonam frugem lenitatis illicio adducit.*

Juvenis libidine æstuans, atque odio in Patrem, à quo ereptam sibi dolebat feminam, cujus vinculis irretitus misere tenebatur, consilium de illo macando inierat. Rem ut certiùs occultiusque conficeret, devium iter occupat, quà sciebat esse transi-turum. Hunc ubi primùm aspexit Regis, mentem ream, DEO docente, perspexit; & procurrens, *Novi*, ait voce blandissima, cui nihil erat inexpugnabile, *Novi quid isthic agas, & quid velis. Non facies.* Mox in amplexum ruens; *Ab, frater carissime, cur hunc perditum vis, qui te tantopere salvum ac beatum cupit? qui salutem & vitam sempiternam, summum & unicum bonum, comparare tibi morte sua non dubitet?* Exarmatus tanta caritate cecidit insani hominis furor: advolvitur ad Beati viri pedes, veniam petit, ac bonam in posterum frugem pollicetur. Constitit promissis fides: flagitia detestatus, totum se regendum servo DEI permisit.

Non dissimilem habuit exitum nefaria trium è primariis Anicii familiis juvenum conspiratio. Idem illos, qui hunc modo memoratum, accendebat dolor, erepta impuris amasiis amica. Subeunt collegium vergente in noctem die, illumque arcessendum curant. Monitus à janitore tres nobiles adolescentes adesse ad januam, qui paucis ipsum velint: *Scio, inquit, quid velint, illos in tem-*

*templum inducito. Ipse aliâ viâ in ædem sacram se infert, & ado-* Lib. III.  
*rato Christo, cui se victimam, ejus gloriæ immolandam obtulit,*  
*rectâ pergit ad conjuratos, vultûque interrito, & animosa voce,*  
*Non me fugit quid consilii ceperitis. De me DELS arbiter vitæ*  
*meæ viderit; in ejus manu ac potestate sum: quam inferre mihi*  
*mortem conjurâstis, hæc meorum summa votorum est; eâque me*  
*minus movet, quàm luctuosa mors animarum vestrarum, quæ vos*  
*tam parùm movet.*

Cùm se deprehensos detectosque senserunt, hæere attoniti & conturbati, præsertim cùm non intelligerent qua rescire viâ consilium potuisset, cujus neminem esse conscium voluerant. Ut vidit trepidos & immobiles, *Obsecro vos, inquit, & obtestor, ut in gratiam cum DEO redeatis. Si vos rea multorum criminum conscientia perturbat ac dejicit, erigat in spem divina clementia, quæ vobis patentem & obvium misericordie sinum pandit.* Hæc locutus singulorum collo brachia circumdat, orans ut DEUM patrem & amicum habere, quàm judicem & ultorem malint; ejusque justam severitatem salutarî pœnitentiâ præveniant. Hæc inermis & imperiosa lenitas arma de manibus juvenum, & sceleratum ex animo consilium extorsit. Amor odio successit, veneratio contemptui, horrore fiducia. Complectuntur vicissim ejus pedes, & insani furoris veniam supplicibus lacrymis rogant. Cùmque instaret ut in gratiam recipi cum DEO festinarent, omnium audacissimus confestim sacra confessione noxas deterfit. Alii duo postridie venerunt, & in sinum Beati Patris onus peccatorum deposuerunt. Hæc omnia singillatim ex iis ipsis fuere cognita, referentibus acceptum DEI famulo, & suum à vita libidinosa transitum ad sanctiorem; & constantiam in emendatis moribus, quam postea tenuerunt.

Mortalium omne genus amplectebatur ejus caritas; nulla vitæ conditio illius exfors erat. Messis tempore concurrebat Anicium è vicinis agris turba rusticorum ingens, ut operam suam locarent ad frumenta demetenda. Tunc P. Joannem Franciscum cernebat lata civitas in ea occupatum cura, ut miseris agrestibus domum, ubi pernoctarent, procuraret, tum verò ut provideret nè quid peccaretur per istam colluviem virorum ac feminarum; inter quas adolescentulæ non deformes reperiabantur. Itaque viros à feminis segregans, utrisque seorsum diebus dominicis & festis doctrinam Christianam explicabat, & immane peccati odium in omnium ani-

Lib. III. mis imprimebat ; multorum excipiebat confessiones, ægrotes omni ope adjutabat. Hac sollicitudine duo potissimum est assecutus, primum ut rustici complures Calvinii lolium è depravatis mentibus extirpaverint ; deinde ut rigata crebris cohortationibus pietas radices altas egerit in istis adolescentulis , adè ut convelli neque minis, neque promissis potuerit. Quin etiam audivit non sinè voluptate aliquas per longum iter vexatas à protervis juvenibus, eorum improbitati ac petulantia acriter restitisse.

*Multos improbos prudenti severitate debellat.*

Admiscendam interdum lenitati severitatem Christus, operariorum Evangelicorum exemplar, docuit. Magistri vestigia persequens attentus discipulus non leviora prudenti severitate de vitiis trophæa retulit, quàm blandâ illâ conciliatriculâ lenitate, cujus suavissimum robur aliquot exemplis hætenus declaravimus. Juvenis centurio accusaverat se in sacro pœnitentiæ tribunali, quòd dicatam DEO virginem ad peccandum allicere tentasset. Hujus immanitatem facinoris tanta verborum gravitate DEI servus reo demonstravit, ut quasi percussus fulmine, obriguerit. Idem ætate provectior sæpe amicis familiariter affirmavit, obversari adhuc sibi quæ tunc à viro sancto audierat ; séque ex eo die sic affectum & comparatum permansisse, ut fixum penitus ac statutum haberet vitæ potius, quàm divinæ gratiæ jacturam facere. Hæc illa scilicet

\* *vox Domini confringentis cedros, & extinguentis impetum ignis.* \* *Psalm. 28.* Eadem Domini vox eandem in famulo suo vim habuit ad confringendum civem ebriosum, cujus impotentiam uxor, & liberi, tanquam infelices victimæ cæco furori devotæ, deplorabant. Monitus non semel à P. Regis de turpitudine scelerum, in quæ vino gravis ruebat, parùm ejus verbis movebatur. Insanum furorem lacrymæ conjugis, & liberorum gemitus irritabant. Mulier tot victa malis, vixque sui compos, ad B. Patrem confugit ; non tolerabilem præterea viri amentiam, nec ullum jam belluinæ intemperantiæ modum esse clamitans. Adhibuit miseræ, quam potuit, consolationem DEI servus : tum parumper se colligens, & sublati in cælum oculis, *Bono animo, inquit, esto, & magnas DEO gratias age, qui mariti tui mores in melius referet, tuamque sortem felicissimam, & omnibus Anicii feminis invidendam, reddet.*

Paucis post diebus ebriosum in devia urbis regione solum nactus, verbis, quæ justus accendebat dolor, & oculis fulminantibus, nec opinum aggreditur : *Sceleratum caput, & indignis milies perire dignum modis ! nunquàmne sani hominis ac sobrii mentem*

*tem suscipies ! Ecquem vidisti honeste fortis civem , qui rationem* Lib. III.  
*vino mergat , & in uxorem se viat ? Pecudum est hoc vitium , non*  
*hominum. DEUM nisi resipiscis , ultorem pertimesce.* Ad hæc  
 verba infelix , tanquam de cælo tactus , retrò præceps ruit. Dein  
 assurgens , & terrore paulum discusso , ereptam sibi mentem indo-  
 lémque pristinam , & evulsas ebriosis furoris fibras omnes sensit.  
 Bellum cauponis omnibus indixit , in quas nunquam deinde intu-  
 lit pedem ; imò vini usum omnem sibi deinceps in perpetuum in-  
 terdixit. Ab eo tempore vixit conjunctissimè cum uxore , ac mu-  
 nia cetera Christiani diligentis implevit. Hac forti severitate nun-  
 quam pugnavit acrius strenuus & impiger operarius , quàm adver-  
 sus istud genus impiorum , qui contumeliosas in DEUM & San-  
 ctos jactant voces. Eas si quando auribus acciperet , largo fletu  
 rigabat vultum , ac toto interdum corpore contremiscebatur. Tunc  
 intimo dolore percitus prorumperebat in atroces minas ; quæ si erant  
 inanes , omnem movebat lapidem , uti suadet S. Joannes Chryso-  
 stomus , ut illatam injuriam divinæ Majestati omnibus modis , quos  
 comminisci justus dolor potest , vindicaret. Sanè tota civitatem  
 tanquam capitalem ejusmodi impiorum hostem spectabat , neque  
 præsentius aliud remedium ad eorum coercendam impietatem oc-  
 currebat , quàm si hæc P. Regis auditurus diceretur. Hac sola de-  
 nuntiatione petulantissimi quique obmutescabant. Incidit ali-  
 quando in duas mulieres inter se rixantes in platea , & per cæcum  
 furorem nomen DEI sanctissimum contumeliosè usurpantes. Mo-  
 nuit , obsecravit , nec voci & minis pepercit. Cùm surdas mulier-  
 ularum aures verberaret , ora saltem ut obstrueret , cæno imple-  
 vit manum , & impetum in vociferantes fecit. Quo spectaculo  
 attonitæ subito constiterunt , cecidit compressus furor , & reconci-  
 liatâ inter ambas gratiâ muliebrem rixam omnino composuit.

Remedio durior personati ganeonis impietatem compescuit.  
 Quò vehementiùs monebatur & objurgabatur , eò petulantius di-  
 vinum numen ore scelerato incessebat. Non tulit vir Apostolicus ,  
 & , ut alter Phinees , injuriam tam protervè DEO suo factam ultu-  
 rus , improbum impactâ in malam palmâ percussit. Id , instinctu  
 peculiari divini spiritûs , contra vulgaris prudentiæ leges , factum à  
 viro sancto fuisse statim apparuit. Quippe impius , ubi se percus-  
 sum sensit , ad ejus procidit pedes , larvâ depositâ , & emendatio-  
 nem pollicitus , opem illius ad eam præstandam depoposcit.

Ità unius hominis castigata fuit impietas : eadem labe à mul-

Lib. III. ris simul est depulsa non minùs efficaci ratione, licèt non tam splendide severâ. Cùm hanc impia in DEUM verba effundendi pessimam consuetudinem inter certæ professionis cives inolevisse rescivisset, omnes in concione, quam ad S. Petri habebat, rogavit ut ad se in ædem collegii accederent, diémque & horam quâ convenirent, edixit. Ut vidit collectos, de hac impia consuetudine disseruit, tantâ vi, tantâ copiâ, ut cunctos metu ac terrore impleverit. Nec sterilis terror fuit. Peraçta concione, omnes una & clara voce sunt polliciti, se nunquam, verbo impio, ac nè juramento quidem, debitam nomini divino venerationem violaturos. Et ut quisque templo excedebat, eâdem se apud P. Regis sponsione obligabat, affirmans nihil unquam tanti fore, ut datam DEO, ipsique fidem frangeret. Hoc amplius; legem hanc ultro sibi communiter dixerunt, nullum ut aggregari suum ad numerum, aut in eo versari paterentur, qui fidem tam sanctè datam falleret: ac plerique consecutis diebus totius vitæ noxas cum sincera significatione veri doloris expiârunt. Hoc pectoris Apostolici robur erat in propulsandis divinæ Majestatis injuriis, sive illas cerneret præsens, sive absens audiret factas. Sibi temperare non posse videbatur, quin ad eas prohibendas, etiam proposito vitæ periculo, nervos omnes contenderet. Sed hæc firmitas tamen & constantia, ut Christiana, ut heroica sit, duci moderatione, patientiâ fulciri, debet. Hanc verò laudem Heroi nostro nequaquam defuisse jam patebit.

*Debitam  
sacris a-  
dibus ve-  
neratione-  
nem contra impi-  
os suetur.*

Toto ante quadragenarium jejuniū triduo, templum Societatis magnificentissimè adornatum erat. Illectus pompâ & novitate spectaculi populus, relictis Bacchanaliorum nugis, & flagitiosâ licentiâ, concurrebat ad Christum adorandum, publicæ venerationi propositum. Accidit per unum è tribus istis diebus, ut personati adolescentes pro foribus templi, cum tympano & majoribus tibiis, profano tumultu & vociferatione perstreperent, frementibus qui rem indignissimam intuebantur. Insano strepitu excitatus Regis, & impietatem non ferendam existimans, procurrit ad juvenes, ac benignè primùm orat, ut nè divinum cultum ac populi pietatem interrumpant. Repulsus feroci & minaci convicio, vultum cum voce tollit, ac denuntiat, se nec minis nec ipsa morte deterrendum, quominus religionis causam dignitatēque tueatur. Mox imperioso nutu tympanotribam cessare ac silere jubet. Cessavit ille ac siluit. Jussit contra juvenum procacissimus tympano-

*Rarum e-  
xemplum  
patientia.*

tri-



tribam pergere, obstantisque animosè sacerdotis impavidi genæ ma- Lib. III.  
num explicitam infixit. Qui sedato animo ac vultu, genam al-  
teram porrexit. Civitatem universam, quæ Patrem ut sanctum  
venerabatur, concussit fama tam gravis injuriæ. Senatoribus è  
curia Senescalli visum est nequaquam committendum esse ut facinus  
atrox impunitum abiret. Ergo regiarum causarum patronum, cui  
nomen *Le Blanc*, ad Rectorem collegii allegant, eique dant nego-  
tium, ut de criminis auctoribus, circumstantiisque, diligenter co-  
gnoscat. Is ubi Rectori mandata sibi data exposuit, arcessitus est  
Regis, qui rem totam, uti gesta fuerat, explicaret.

Subeunti Regius advocatus occurrit, ac docet permolestam  
accidisse toti curiæ contumeliam, qua fuerat affectus: placere se-  
natoribus, ut reorum supplicio satis ipsi pro injuria fieret; cumque  
publica fuisset contumelia, pœnam quoque publicè persolvendam  
videri: ideò se missum, ut ex ipso rem totam accuratè cognosceret:  
ac proinde rogare nè quid celatum vellet, ac præsertim auctores  
contumeliæ nominaret, quos ipsi notos esse constabat. Cum Re-  
gis ingentes clarissimis magistratibus, ac præcipuè regiarum causa-  
rum patrono gratias egisset, respondit neminem esse de quo posset  
conqueri: hoc uno pacto satisfieri sibi velle, ut nihil suâ causâ  
moveretur, nève quid in quemquam durius statueretur. Frustrâ  
magistratus distinctius aliquid exculpere conatus est. Tacere per-  
severavit, & illatam contumeliam beneficio ac lucro apposuit; si-  
mulque pensatam magna mercede patientiam lætus vidit: nempe  
auctor injuriæ, paucis diebus interjectis, ejus pedibus affusus, &  
crimina piè confessus, voluntariâ sancti doloris pœnâ, DEO, ser-  
vo DEI, populoque illustrius satisfecit. Sed alia pericula, hostes *Assiduū*,  
alii, probandæ & exercendæ viri fortis constantiæ parabantur. Cum *et acce-*  
cetera vitia debellaret acriter, tum verò impudicitiam eò vehemen- *cum im-*  
tius insectabatur, quòd eam regnare Anicii, ac pæne triumphare, *pudicitia*  
cerneret. Ut verò belli causas præcideret, investigabat latibula *bellum ge-*  
muliercularum, quæ captos turpibus illecebris cives in miserrimam  
servitutem abducebant. Eas ipsas ut melioribus captas illecebris  
in libertatem virtutis assereret, omni contentione laborabat.

Rescivit unam in opificis ædibus delitescere. Urget homi-  
nem, ut mulierem ejiciat. Ille verò negat ullam esse domi, seque  
falso crimine accusari vociferans, urgentem, malè verbis accipit.  
Tum Regis magna voce, *Cedo, inquit, cedo, quam domi tue ser-*  
*vas. Novit hoc omnis vicinia, et scelus tuum detestatur.* Opi-  
fex,

Lib. III. fex, ut erat impotens iræ, vocem altius tollit, minaturque vim ultimam, nisi protinus abscedat. Vir sanctus, mortalium omnium, cum agebatur DEI causa, confidentissimus, sonum & vultum imperantis induens, *Hominum*, ait, *omnium perditissime, aut illam reddes lubens, aut per vim auferam.* Nec plura effatus, opificem manu correptum trudit foras, irrumpit domum, latentemque prædam abstrahit, ac deducit ipse ad matronam lectissimam, cujus erudita monitis & consuetudine, pudicitia pariter ac famæ confu- luit. Haud ita multò post respexit se opifex, & quam peccatis so- ciam habuerat, pœnitentiæ ducem magistràmque secutus est.

Haud minùs fortiter quàm feliciter erepta sceleri mulier hæc fuit: non item altera, quàm matrimonio junc-tam civis libidino- sus, idemque locuples ac præpotens, à viro abduxerat. DEI fa- mulus, re cum marito mulieris deliberata, eoque annuente, illam honestâ custodiâ includendam curavit: hoc saltèm providens ut populi sermones offensionemque compesceret. Improbus ama- tor, opibus & auctoritate pollens, istis duabus machinis, quæ jura omnia vulgò perrumpunt, perfecit ut magistratus latâ sententiâ mulierem custodiâ liberandam edixerit. Torsit se in omnes par- tes actiosa viri sancti solertia, ut moram aliquam exequendæ sen- tentiæ impetraret. Instantem superbè repulit magistratus, ac ra- tam sinè ulla cunctatione sententiam esse jussit.

Affirmavit Regis nihil sibi unquam gravius hac repulsa con- tigisse. Antequam reciperet se in collegium, divertit ad domi- num *Dryde* amicum suum, & ei quid accidisset narravit, identidem in istas, præ sancta indignatione, voces erumpens: *En*, ajebat, *quomodo rationibus & commodis humanis divina ducuntur poste- riora, & proculcantur.* His dictis, oppressus mœrore subito con- ticuit. Illum amicus, itemque P. Michael *Charbonier*, Regis so- cius, nitebantur consolari, cum dicerent satis magnum operæ pre- tium ab eo factum fuisse, quòd per ipsum steteret, nè DEUS per aliquot saltèm dies peccato gravi læderetur: neque præmio cari- turam apud DEUM strenuam ejus voluntatem, & curas ad abrum- pendum flagitiosum commercium, licet irritò incœpto, consum- ptas. Dum P. Charbonerius & D. Drydus inter se colloqueban- tur, animadvertunt P. Regis, totum in mœsta cogitatione defixum, parùm attendere ad ea de quibus differebant. Hominem diligen- tiùs contemplati, viderunt sedere immobilem, innixum abaco, tacitum, totòque vultu inardescentem. E pectore alta suspiria, ex-  
ocu-

oculis uberes lacrymæ prorumpabant. Tandem, redeunte animo, **Lib. III.** derepente surgit, & manum abaco incutiens, *Ab! ignavum*, exclamat, velut afflatus Numine, *ab meticulosum! Siccine pro nibilo putat quòd DEUS offendatur? Antequam circumagatur annus, pœnas ultori DEO dabit.* Funesta Magistratûs, nondum anno vertente, mors veritatem prædictionis comprobavit. Haud minus asseveranter & verè denuntiavit necem imminentem illustri & juveni feminae, quam turpibus expedire laqueis frustra dudum tentaverat. *Nimum diu*, inquit, *urgenti DEO resistis. Moram pervicacem brevè ulciscetur.* Paucis pòst diebus colloquentem cum amasio plumbea glans, è ferreo tubulo per errorem emissâ, interemit. Hæc aliâque id genus exitia, quæ à viro sancto prænuntiata fuisse nemo nesciebat, urbem universam perterruerunt. Narrabatur lugubris multorum improborum exitus, qui ad bonam frugem invitanti, & instanti, morem gerere pertinaciter detrectaverant. Hinc plurimorum metus, & ex metu, salus. Neque verò *Mortis se obicit, ne puella pudorem in tuto collocet.* minorem adhibebat curam, ut eos à lapsu prohiberet qui periclitabantur in lubrico; quàm ad erigendos qui jam lapsi erant. Sic puellæ pauperis, & parentibus orbatæ, at eximiâ formâ præditæ, pudorem admirabili fortitudine, & cujus pauca extant exempla, tutatus est. Hanc civis opulentus promissis illectam seduxerat; jamque locum in quem conveniret, assignaverat. Admonitus Regis accurrit. Impudicum viri sancti præsentia conturbavit: mox tamen ex illa trepidatione recreatus, *Quid isthic negotii tibi est, mi Pater?* inquit. *Multis rebus te admisces, quæ ad te nihil spectant.* Adsum, retulit Regis, *ut oviculam banc serveim, quam tu, instar rapacis lupi, DEO eripis.* Recede Pater, subjecit libidine atque iracundiâ æstuans. *Si pergis, magno tibi stabit audacia.* Cui pudicitie patronus, fortiter ac libere negavit se recessurum, donec virginis pudorem in tuto collocasset. Ceterum, addidit, *minas tuas nihil moror.* Dulce mihi ac decorum arbitrabor, furori tuo immolatum cadere. Ad hæc furiosus, jam non sui potens, stricto gladio in obvium ruebat. Et Regis, veste ad excipiendum vulnus diloricata, *Præsto sum*, clamat: *nunc tandem datur sanguinem pro Christo fundere. Feri, mæta. Quod efficere verbis nequivi, hoc fortasse mea morte consequar, ut peccare desinas.* His verbis, atque adeò interriti vultûs, qui nihil mortale spirabat, constantiâ, cecidit subitò repressus amentis furor. Trepidè se proripuit, dum Regis puellam in securum detulit locum, ubi

Lib. III. ubi vitam innocentissimam duxit; acceptum à DEI servo beneficium immortale prædicans, quem, ut pudicitiae suæ oblatum sibi divinitus custodem semper agnovit.

*Perditas mulieres innumeras in viâ salutis revocat.* Innumeras ex eo genere feminas, quæ venalem pudicitiam vulgant, à P. Regis in viam salutis reductas testati sunt Petrus le Blanc Generalis Episcopi Aniciensis Vicarius, & alii complures; quorum legitima testimonia litteris publicis habentur consignata. Scelere ac periculo liberatas dividebat in varias ædes minime suspectas, ubi essent contra vim & insidias clausæ ac munitæ. Easdem alebat eleemosynis proborum ac liberalitate, quam initio cum ostiarum corrogaret, vetuit collegii Rector nè faceret, cognitis quorundam ganeonum jocos, quibus odio & ludibrio caritas Regis erat. Paruit ille quidem: sed quod facere per se se vetabatur, id per administratos suæ pieratis & vicarios præstabat. Principio matrona dives, accepit domi suæ quatuor ex illo seminarum poenitentium grege, deinde sex, denique decem, adjuvantibus aliquot nobilibus feminis. Cum autem illa prædiorum suorum ferè omnes fructus, & rem familiarem ad sustentandum hunc numerum conferret: questi sunt cum servo DEI matronæ cognati, & istud onus ab ea depellere studuerunt. Obstitit Regis, & eorum querelas more suo contempsit.

Majorem illi sollicitudinem injecit illa ipsa nobilis matrona, quæ poenitentes mulierculas alebat domi suæ. Hæc sacerdotem collegii de se malè meritum existimans, in ipso recentis doloris æstu renuntiavit viro sancto, sibi neque voluntatem præterea, neque facultatem suppetere rectum & alimenta novis istis ac molestis hospitibus ministrandi: onus hoc alteri quàm primùm imponeret: sin minus, se omnes continuò dimissuram. Hæc denuntiatio P. Joannem Franciscum tantò gravius conterruit, quantò à perspecta matronæ virtute videbatur alienior. Repentini consilii ac doloris causam introspiciens, *Satisne consentaneum*, inquit, *pietati, quam profiteris, putas abjicere opus DEI ob injuriam, quam tibi ab homine factam suspicaris, & ejus poenas à tot innocentibus animabus repetere? Quo suo tandem merito peccatum à se non admissum lueant?* Hæc oratio lepore quodam humanitatis & benevolentiae condita, vim omnem, quam sperabat, habuit. Collegit se mulier, seque imprudenti dolore parùm fortiter victam confessa, veniam errati postulavit.

Cura

Cum agmen istud muliebre variis locis sparsum aliquandiu Lib. III. rebus ad vitam & pietatem necessariis instruxisset; venit illi in <sup>Domum</sup> mentem universas communi tecto claudere. Continuo amici plu-<sup>feminis</sup> ribus verbis detertere conati sunt, nè rem arduam susciperet. Præ-<sup>pœnitentibus reci-</sup> ter molestias & sollicitudines, quibus novæ familiæ, cum primum <sup>piendis</sup> instituuntur, laborant, non defuturos, qui negotium disturbare <sup>compa-</sup> conarentur. Sed viros Apostolicos, cum agitur DEI gloria, nul-<sup>rat.</sup> li morantur obices, nulla pericula retardant.

Regis, explorata crebris precibus DEI voluntate, & implo-  
rato Superum præsidio, ante omnia certiore de suo consilio Epi-  
scopum fecit, quo inconsulto nihil aggrediebatur. Exposuit cor-  
ruptelam juventutis, per feminas profligatæ pudicitie invectam,  
cum gravi justæque populi offensione & querelâ. Mentem sibi à  
DEO, ut confidebat, injectam fuisse, cunctas una claudendi do-  
mo, ubi, certis legibus & accuratâ morum disciplinâ regerentur.  
Eâ maximè viâ provisum iri, nè relaberentur in pristina flagitia, &  
constantiam in suscepto melioris vitæ consilio tenerent. Præsul  
optimus, idemque sua sponte comparatus ad amplectenda omnia,  
quæ ad promovendam & fovendam in suo grege pietatem pertine-  
rent, laudavit consilium, seque DEI famulo ad illud exequendum,  
adjutorem & patronum promisit. Admonito hunc in modum &  
conciliato Episcopo, Regis de re tota deliberavit cum Petro *le*  
*Blanc*, Episcopi Vicario Generali, & sibi amicissimo. Ille, consi-  
derata mali gravitate, ac necessitate remedii, mentem viri sancti ve-  
hementer probavit: & quidquid in se opis atque auctoritatis fo-  
ret, est pollicitus. His ita cum Episcopo & Vicario compositis,  
negotium in vado esse videbatur. Eò confidentiùs adiit collegii  
Rectorem, rogans, ut opus approbaret, illudque consiliis suis gu-  
bernet. Is erat P. Sebastianus *Vineau*, vir sanè probus, at paulò  
timidior, & ad omnes difficultatum salebras titubans atque adhæ-  
rescens. Tum autem parùm favorabilis ac propitius erat P. Joan-  
ni Francisco, cujus fervido, licet prudenti, zelo sæpe se in graves  
metus & angustias conjectum fuisse meminerat.

Ad primam novi contubernii mentionem expalluit. Nega-  
bat id fieri posse sinè perturbatione & querelis totius civitatis; vi-  
deri sibi penitus omittendum opus tam lubricum, tam periculo-  
sum. Fatebatur P. Regis non vacare opus periculo ac difficulta-  
te; sed futurum sperabat ut faveret piis conatibus divina benigni-  
tas, quâ fretus rem tentabat: expertum se fuisse non semel præ-

Z

sen-

Lib. III. sentem DEI tutelam iis adesse, qui omnem suam in eo spem reponerent. Adjecit daturum se operam, ut negotium leniter ac circumspectè, sinè cujusquam querela, sinè perturbatione, & aliis, quæ timeri poterant, incommodis, conficeretur.

*Rektor collegii ut ista domus, Refugium vulgè dicta, ponatur agere annuit.*

Quæsit Rectör quænam haberet conficiendæ rei adminicula & adjumenta; quis coëmpturus esset domum; quis novæ familiæ cibaria, quis alia præsidia, suppeditaturus: ubi reperturus esset ipse magistras & gubernatrices, quæ feminas è flagitio recens emerfas in officio continerent. Respondit Pater non dubitare se, quin DEUS, auctor hujus consilii, subministraturus esset omnia, quæ forent illi conficiendo necessaria: paratam & in promptu jam esse civium plurimorum, opibus, & virtute præstantium, liberalitatem, quâ domus emeretur, instrueretur, starétque deinceps ac floureret. Provisas denique magistras & rectrices contubernii, quarum virtus & prudentia nemini veniebat in dubium. Tam liquida, tam explicata responsioni quod opponeret Rectör, nihil habuit. Inficiari operis utilitatem non poterat: sed verebatur ne quid sibi molestiæ ac negotii plerique cives primarii facerent. Differendam rem igitur in aliud tempus existimavit. *Tam pium opus, inquit, deferri omnino nolim, in aliud duntaxat tempus censeo rejiciendum, donec opportunitas exequendi major adsit. Cave nimium festines: molles rei conficiendæ vias tempus ipsum aperiet. Prepropera festinatio consilia vel optima corrumpit.*

Docebat contrà Regis magnum esse periculum in mora: vix unquam feliciorem exequendi operis facultatem oblatum iri; probari consilium ab Episcopo ejusque Vicario; destinatam esse domum, ac pæne certam: plerasque alias dari opportunitates, quarum fiduciâ negotium haud dubiè successurum crederetur. Rectör quantumvis contra DEI servum præventus, facere tamen non potuit, quin laudaret ejus consilium, & approbaret. Parumper adhuc obluçtatus, ad extremum cessit, & omnibus quæ proponebantur est assensus. Regis, approbatione sui Rectöris magis magisque in sententia confirmatus, operi manum admovit, celeritate singulari ac diligentia; nec minori prudentia. Nobiles æquè ac pias feminas convenit, utque partem curarum ac liberalitatis in tantum conferrent opus, excitavit. Matröna, cujus modò mentionem fecimus, summam pecuniæ non contemnendam statim obtulit, ac facem compluribus aliis prætulit: adeò ut brevè repertum fuerit idoneum domicilio emendo, instruendoque pretium: nec distu-

diffultit Regis viginti feminas, quæ se ad bonam frugem recepe-  
rant, in paratas ædes inferre. Respondebant omnia viri sancti vo-  
tis: florebat recens contubernium; & in eo pietas, ac disciplinæ  
cultos ordo pulcherrimus, vigeat: cùm hostis animarum faustis  
iniciis invidens, machinas omnes, quibus hoc ædificium subrueret,  
explicuit.

Libidinosi nebulones, quibus hæc nova familia non arride-  
bat, ejus conditorem aggressi, sparsis in vulgus libellis, ipsum,  
domumque Refugii, ab illo institutam, probris omnibus & con-  
tumeliis lacerârunt. Nequaquam hoc viro Apostolico novum &  
improvisum accidit; & is erat, quem improborum odia & moli-  
tiones corroborarent potius, quàm infringerent: neque illum vi-  
les & humani metus unquam ita inflexerant, ut causam Numinis &  
animarum proderet. Quamobrem perrexit iter institutum tenere,  
spretis atrocibus istorum maledictis & opprobriis: quorum tamen  
effrenatus furor hîc non stetit.

Reçtori suggerunt non aliud hanc domum fore, quàm rece-  
ptaculum perditarum mulierum, quas nulla ratio, vis nulla posset  
unquam disciplinæ virtutisque jugo submittere. Ejus contubernii  
auctorem honestissimo cuique permolestum esse, dum operi teme-  
re suscepto subservire collatis nummis obvios quoslibet promiscuè  
cogebat: palàm immurmurare civitatem, & indignatione liberri-  
ma fremere. Hæc illi. Quibus etiam suffragati homines nonnul-  
li Societatis, & à falsis seculi sapientibus, quos nimium audiebant,  
inducti, Patrem apertè condemnârunt, quòd condendam & sustentan-  
dam domum, non provisus antea vectigalibus necessariis, suscepisset.

Hæc à Rectore facîle credita, qui nondum sinistras quasdam  
opinionem de P. Regis & Refugio penitus exuerat, & qui pæne in-  
vitus de hac familia instituenda consenserat. Eum arcessit ac præ-  
cipit, ut istius domus curam omnem deponat, quam negabat stare  
posse certis redditibus destitutam. Perculit DEI servum hæc orá-  
tio, quæ obicem bene cœptis ineluctabilem afferebat. Re cum  
DEO deliberatâ, suarum esse partium duxit anniti totis viribus ut  
Reçtor mutaret mentem, & edictum triste revocaret: ceteroquin  
obtemperaturus, si postquam illum accuratiùs edocuisset, in sen-  
tentia perseveraret. Ergo ipsum adit supplex, profusisque lacry-  
mis orat, ut nè tot animas perire patiatur, quibus certa perniciēs  
imminebat, si Refugii curam abjicere cogeretur. Siquid creabitur  
huic domui cladis, inquit, ac damni, culpa omnis in superiores re-  
cidet,

Lib. III. cidet, in quos onus hoc transfero, ipsi viderint. Laudavit Rector animum salutis alienæ sitientem: negavit tamen tutum, aut consultum esse, ut præterea se in procurationem istius domus interponeret, quam brevè ruituram constabat, non sinè illorum dedecore, qui fabricam malè fundatam & malè materiata irrito labore fulcirent.

*Regis jussus curam Refugii deponere, obsequi-*

Inanes merus discutere frustra servus DEI tentavit. Surdas aures falsæ prudentiæ strepitus obstruebat. Vetuit Rector nè pedem in Refugium inferret, ac mulieres ibi servatas deinceps alloqueretur, aut minimam hujus negotii attingeret partem, donec idoneos huic tutando contubernio proventus invenisset. Quamvis opus tanta mole ad culmen ferè perductum hoc præcepto disturbandum, & æquandum solo videretur: nihil tamen objecit Regis; imperium æqui boni consuluit, nec pedem in Refugium posthac intulit. Interim conceptam de divina bonitate spem nequaquam debilitavit negotii pæne desperati durissima conditio; quin potius erexit, confirmavitque; adeò ut amicum secretò alloquens, affirmaverit pro certo se habere futurum ut hæc nova domus, victis quæ ad eam labefactandam conspirare videbantur, difficultatibus, post hæc illustrior emergeret. Hæc enim, inquit, operum DEI sors est, ut rebus adversis conflictentur.

*Ejus patientiæ exercet Rector & illustrat.*

Per idem tempus Rector patientiam servi DEI adhuc durius exercuit. Flagrantem studio divinæ gloriæ & salutis animarum ejus ardorem exiguo spatio inclusit: certos dies, quibus nosocomia lustraret, edixit; modum caritatis operibus & limites angustos præscripsit. Neque hoc satis. Cum eo liberiùs & contemptim agere, molestiam ubique, ac veluti deditâ operâ, illi exhibere; oburgare palàm & privatim; nullum denique locum ejus vexandi prætermittere. Ferebat hæc omnia silentio vir patientissimus; neque ulla vexationis acerbitas ab eo vocem querimoniarum, aut justæ defensionis, expressit.

Die festo cùm domum rediret ex aliquot pagis, ubi concionando, & audiendis confessionibus multum sudaverat, audivit è socio se accusatum fuisse apud Rectorem, qui haud mollem pœnam redeunti parabat imponere. *Novi ego falsitatem accusationis,* adjecit socius, *& apud Rectorem te purgabo.* Rogavit Regis nè faceret, quidquid hoc probri foret intueri se dictitans tanquam pulcherrimam laboris sui mercedem; quæcumque nobis pudorem incutiunt, & aliquam dedecoris inurunt notam, ea divinæ in nos boni-



bonitatis pignora esse certissima ; jam dudum se DEO famæ suæ Lib. III. sacrificium quoddam obtulisse , & ex quo se vocatum ad Evangelicum ministerium intellexisset , jam tum se locum & animum sumpsisse victimæ , hominum insectationibus , maledictis , ac telis omnibus expositæ. Heroicos ejusmodi sensus non imbecillitas naturæ , sed gratiæ potentior vis , & ardentissima caritas , parturire tantum potest.

Non expers doloris tamen & tristitiæ Regis erat : non suâ quidem causâ , quem accipi tam malè cerneret ; id potiùs triumphabat : sed vicem tot animarum dolebat , quibus subvenire non poterat ; tot pauperum , quos destituere cogeatur. Ità DEUS servum suum evehebat ad perfectæ virtutis fastigium : sic illum sibi conjungebat arctissimè ; ac si qua humani affectus labecula purissimum animi nitorem inficeret , hanc patientiæ salutaris igne per-purgabat.

Oppressus aliquando æstu tenerrimæ caritatis temperare sibi non potuit , quin abjiceret se ad Rectoris pedes , & , *Cernis inquit , ad omnia me inutilem esse propter talenti virtutisque inopiam , præterquam ad erudiendos juvandisque pauperes ; id unum restare mihi quod agam , Et quo meam tenuitatem consoler : obsecro te igitur atque obtestor per viscera misericordie Christi , ut respicias tot pauperes , tot animas derelictas , quæ meam opem implorant.* His precibus , hac suavissima obtestatione , nihil profecit aliud , quàm ut objurgaretur ejus præceps & parùm prudens imperus , indocilis contineri , & frena domesticæ disciplinæ pati. Ad hæc nè mutire quidem visus , continuit se domi , neque ut confessiones exciperet , ægrotos viseret , pauperes erudiret , nisi diebus horisque præscriptis , adduci potuit.

Tandem aliquando huic vexationi finem DEUS imposuit , & servi sui vota expectationemque superavit. Mutatus repente Rector , erratum agnovit : nimium duriter & acerbè actum cum illo , & auditas à se faciliùs nonnullorum criminationes , ultro est confessus , eundemque amantissimè amplexatus , liberrimam pristinarum functionum potestatem fecit , quippe quem à divino gubernari spiritu intelligeret , haberetque persuasum nihil fieri consultiùs posse , quàm si permitteretur ipse sibi , vel potiùs cælesti prudentiæ , cujus lumen ductumque sequebatur. Accessit aliud ad consolandum tutandumque DEI famulum efficacius. Metuendum erat nè Rector , homo parùm fortis & constans , in pristinas suspiciones revolveretur.

Lib. III. tur. Itaque singulari Numinis providentiâ factum est ut præter omnium expectationem Bliteras missus, acciperet successorem P. Ignatium *Arnoux* longè illi dissimilem, sive prudentiam, sive virtutem spectares. Novus Rector, Patrem Regis pridem admirari solitus, ejus consiliis tam prolixè favit, quàm ejus antecessor iisdem obnixè adversatus erat; utque bene cœpta denuo, ac totis viribus promoveret hortatus est. Illo ipso die carum poenitentium feminarum gregem revisit: quæ reducem pastorem incredibili gaudio

*Refugii* exceperunt. Primus labor exitit in conquirendis vectigalibus. Eo certatim operam & opus civitas contulit, ac divitum crumenæ sua sponte patuerunt. Paucis mensibus annui redditus ad alendum incertum numerum sunt inventi. Aucta civium liberalitate auctus est numerus, & ad triginta fuerunt acceptæ. Excitatus tam felici progressu Pater, de ultima operi manu imponenda, eoque suis omnibus numeris absolvendo, cogitavit: conscripsit leges; pietatis exercitationibus, labori, & quieti, ceterisque occupationibus, suum tempus, & modum, definivit.

Antequam ad hibernas Missiones profisceretur, domestica Refugii negotia componebat. Singulas hortabatur ad præstandam sedulo suis Rectricibus obedientiam: istis verò vigilantiam & sollicitudinem commendans, easdem peculiaribus quibusdam, ut familiam sibi creditam rectè administrarent, monitis instruebat; imprimis autem præcipiebat ut singulis hebdomadis, dum abesset, facerent se de statu domus certiores. Reperta est post ejus obitum scheda, quam ad Refugii præpositam scribebat in hæc verba: *Carissima Soror. Sic habeto, me inter gravissimas occupationes meas quotidie tui ac filiarum tuarum memorem apud DEUM esse. Salvere singulas meis verbis jube, illisque omnino persuade, me ipsis ac tibi nominatim, esse penitus deditum. Accepi summa cum voluptate ipsas pacis, concordie, legumque domesticarum esse observantissimas. Perge omnia diligenter ad me perscribere.* Quantum his curis vir sanctus proficeret, documento erant plurimæ ex istis feminis, quæ peculiari gratiæ cœlestis auxilio roboratæ, superioris vitæ noxas vero dolore omnibusque Christianæ poenitentiae officiis expiabant.

Florebat, ut cum maximè, Refugium, ejusque conditor ingentem hauriebat animo voluptatem, procedere opus, & majora in dies capere incrementa cernens: plaudebant omnes boni, & ei, ovantes gratulantesque, gratias agebant: cum tempestas repenti-

na

aspēs latissimas propemodum evertit. Juvat, quæ causæ pro Lib. III.  
cellam hanc moverint, & quo vultu animoque mortem cominus  
intentatam vir Apostolicus laceffiverit, paulò enucleatius aperire.

Hora post meridiem septima fluebat, cum subitus ad eum <sup>Refugiū</sup>  
nuntius advolat perditorum juvenum catervam ad expugnandum <sup>tutari, e-</sup>  
Refugium concurrere, ac foribus disjēctis, id agere ut mulieres <sup>tiam pro-</sup>  
vindicerent in libertatem, imò domum ipsam in cineres redigant. <sup>posito pe-</sup>  
Attonitus ferali nuntio supplex à Rectore petit, sibi ut per eum li- <sup>riculo vi-</sup>  
ceat misero gregi opem ferre. Cui Rector: *Tūne solus, mi Pa-*  
*ter, sustineas impetum tot juvenum, quos amentia precipites ra-*  
*piti? Et Regis: Stabo, inquit, pro foribus, nec eorum quisquam,*  
*nisi per me casum & calcatum, introibit: certum est perire prius,*  
*quàm tot animarum salutem, fidei ac tutela mea creditam, desere-*  
*re.* Rector, cui notus Regis animus omni metu & periculo major,  
ac timens nè pio abreptus impetu longiùs prodiret, negabat pru-  
dentis esse inferri sic inermem & imparatum in medios hostes, qui  
occasionem hanc sibi oblatam gauderent sui furoris in eum exprom-  
mendi: si quid accideret adversi, non dubitatueros homines cul-  
pam omnem in ejus imprudentiam conjicere. Ubi dubium Re-  
ctorem hærare vidit Regis, nec locum esse cunctationi tantò in di-  
scrimine, instare pergit: *Possumne, inquebat, sedere hic lentus &*  
*cessare, dum tandiu tot posita laboribus domus scelere istorum ga-*  
*neonum momento destruitur?*

Obstare contrà pergebat Rector, neque committendum aje-  
bat ut dissolutorum adolescentum furori caput objicere sineretur;  
sibi tribuendum uni, si quid in eum auderet illorum impotentia.  
*Neque sustinere culpam times,* subjecit Regis, *tot pereuntium ani-*  
*marum, quarum salus in dubium vocatur? Patierisne destrui opus*  
*DEI, nè quid periculi subeat homuncio, qualis ego sum? Quid eve-*  
*nire mihi gloriosius potest, quàm datà occasione tam præclarà, mor-*  
*tem oppetere?* Ulteriùs obistere non potuit Rector viro sancto,  
atque adèò divino, quo erat animatus, spiritui. Tum autem spe-  
rabat fore ut ejus aspectus, auctoritas, & fama quòdcumque in-  
staret periculi, facilè propulsaret. *Ito, inquit, perge, quò DEUS,*  
*quo tua te pietas, vocat.*

Regis omnem vitæ suæ curam in DEUM projiciens, evolat  
tanquam ad certam necem. Egrediens collegio incidit in P. An-  
tonium de Mangeon, eumque rogavit, ut si quid sibi accideret,  
aliquantum pecuniæ, quod apud collegii procuratorem deposuerat,

**Lib. II.** istis miseris mulieribus distribueret. *Id mihi negotii dedit*, inquit P. Mangeon, in suo de rebus illius gestis commentario, *quia certam sibi mortem imminere judicabat vixque sui, pro gaudio commiserat.* Verùm DEUS voluntate servi sui contentus, tempestatem sedavit. Paulum in vico progressus audit fugatam ac dissipatam juvenum catervam, concurrentibus ad mulierum clamores & planctus è vicinia civibus. In collegium revertenti occurrit P. Mangeonus, &, *Nempe*, inquit subridens, *ad martyrium properare te credidisti: certè testamentum rite feceras.*

Procellam hanc malaciæ secururæ omen interpretatus Christi famulus, opinione sua falsus non est. Non modò nihil deinceps contra Refugium perturbationis excitatum fuit ac periculi, verùm etiam stabilitum, & suis omnibus expletum numeris, in dies magis viguit, hodièquæ, tanquam æternum ad posteros monumentum ejus caritatis, industriæ & fortitudinis, efflorescit. Sub annum 1651. decem post ipsius obitum annis administratio domus commissa est religiosis virginibus, cùmque angusta esset multitudinì seminarum ad hoc asylum pudicitie confugientium, instituta est altera domus, ejusdem, ac prior illa, formæ atque utilitatis; adeò ut parens & conditor utriusque domicilii dici meritò Regis possit.

Dum pax & otium Refugio constabat, non continuò quies erat Beato viro ab innumeris hostibus, quos in illum armabat indefessa in mulieribus à libidine revocandis diligentia. Quæ prælia cum istis commiserit hostibus, quæ trophea retulerit, quia singula enumerare non vacat, illustriora duntaxat aliqua recensēbimus.

*Dum peccantes à vitio revocat, gravia improborum odia, & opprobria sustinet. Ejus heroica fortitudo.* Puella elegantis formæ, elegantioris ingenii, gravissimas inferebat clades universæ civitati. Monendam privatim curavit Regis, pro sua prudentia, deinde spretis monitis, durius objurgandam. Cùm nè sic quidem resipisceret, adest ipse demum, & victrici fortitudine ac suavitate sic pugnat, ut expugnaverit. Victa, receptui cecinit, seque sponte poenitentiâ, tenebris, & solitudine, damnavit. At victorem hæc victoria propemodum oppressit. Qui puellâ mihi familiariter utebantur, inexpectata mutatione perculsi, de illius auctore perdendo conjurârunt. Prodeuntem ex ædibus S. Agathæ, ad Orphanorum domicilium, invadunt quatuor furiosi, totque plagis malè mutant ut mortuum rati, accurrente populo, diffugerint. Cognitum fuit è civibus, qui barbaro spectaculo interfuerant, conspectum à se DEI servum jacentem humi, sublati in cælum oculis & manibus, excipere duram plagarum grandinem, &

*Malè mulcatur. Insidia struuntur ejus vitæ.*

& pro percutientibus orare. Contusus verberibus, & vix affur- Lib. III.  
gens, majore animo, majori fiducia divinæ tutelæ, ad pretiosa pe-  
ricula revolavit.

Aliàs cum ad excipiendam moribundi confessionem perge-  
ret, obvios habuit aliquot nebulones, quorum scelerata consilia  
disturbaverat, ad inferendam ipsi necem accinctos. Ultro se ob-  
tulit venientibus, & familiari atque innata humanitate: *Adsum*,  
inquit, *quem queritis, paratus pro Christo mori. Conficite: ni-*  
*bil vos moror, nihil malim.* Mirum! Vix hæc ediderat, hæserunt  
metu ac stupore defixi, & resupini omnes conciderunt: ipse do-  
mum interim, quò vocabatur, incolumis tenuit. Haud scio an  
quisquam unquam in præsentiore mortis periculo versatus sit. Sed  
illum DEUS providentiæ suæ tutissimo scuto protegebat, ad ejus  
custodiam tantò intentiore cura excubans, quantò minorem ipse  
curam sui gerebat.

Audivit aliquando seductam ab adolescente virginem in ejus- *Alapa*  
dem adolescentis ædibus delitescere. Non destitit in omnes quo- *percuti-*  
dammodo formas se vertere, donec turpia exosam vincula in Refu- *tur.*  
gium perduceret. Paucis post diebus impudicus assertorem pud-  
icitæ nactus in medio foro, conviciis illiberalibus & probris one-  
rat; tum odio ac furore incensus vultum porrectâ palmâ ferit. *En*  
*tibi alteram genam*, retulit placidè ac sui compos vir sanctus: *di-*  
*gnus sum, in quem hæc dicas & facias; dignissimus magister meus*  
*ac Dominus Christus, cujus causa hæc feram.* DEUS in ipso tem-  
poris articulo meliorem adolescenti mentem injecit. Stetit ali-  
quandiu conturbatus, & voce captus. Postremò advolutus sancti  
sacerdotis pedibus, veniam multo cum fletu rogavit, ac promisit  
nunquam se commissurum, ut debitam ejus virtuti venerationem  
violaret. Addidit se paratissimum esse ad pœnam, quamcumque  
præciperet, luendam, sèque ultorem sui criminis primum, nec  
mollem, futurum. Hæsit illi verò gravitas culpæ tam altè in ani-  
mo insculpta, ut cum post aliquot annos cognovisset DEI servum  
vitâ cessisse Lalovesce, denuo sceleris imagine perterritus non con-  
quieverit, donec se ad ejus tumultum conferret, patronum in eo quæ-  
siturus, quem tam insigni contumeliâ læserat. Abjecit se ante sa-  
cros cineres supplex, ibique diem integrum pervigilavit, lacryma-  
rum vim profundens, iisque culpam eluere gestiens, quam sangui-  
ne suo delere peroptasset. Nunquam verò intermisit, dum super-  
fuit vita, semel quotannis sancti sepulcrum venerabundus visere,

Bb

ut

Lib. III. ut illatam ipsi olim ignominiam repetitâ & solemni honoris professione sarciret.

*Pessimè  
verbis &  
verberibus  
accipitur.*

En aliud adhuc illustrius heroicæ servi DEI constantiæ documentum. Adolescens nobilis, adolescentulam pariter nobilem, cujus mores P. Joannes Franciscus regebat, frequentioribus urbanitatis officiis colebat, quàm ut vacare utriusque periculo assiduitas tanta posset. Persuasit Virgini Regis ut missum faceret adolescentem, ejusque officia & urbanitatem benignè respueret. Ille verò sic exarsit dolore, ut oblatum sibi in obscura & devia urbis regione auctorem molesti consilii, primùm verbis & conviciis, deinde verberibus humi dejectum pessimè acceperit. Indignum facinus tulit Christi famulus æquitate animi summa, ipsiusque vicem dolentibus respondit: nihil hoc quidem esse præ aliis, quæ divinæ gloriæ causa pati vellet. Tum festivè adjecit: *Sanè, ut est juvenis ferox, & ira impotens, non putabam me tam leniter ac perfunctoriè tractandum.* Omnino credi vix posset quantò ejus odio flagrarent improbi, & quousque illorum furor processerit, nisi quæ narrantur locupletissimorum testium fide niterentur. In eum velut effusis habenis ruebant ubique præcipientes; nullus jam conviciis, opprobriis, contumeliis, & plagis modus. Fuere qui Bacchanalibus personati urbem obirent, imitantes ejus vocem, incessum, gestum, & habitum concionantis. Quod ubi rescivit, *Nè isti probe me nôrunt, ait, qui hominem ridiculum tam bene, tam ridiculè, sint imitati. Hoc saltem proficiam apud populum, quòd risum illi moveam.* Nimirum vir sanctus æquè apponebat lucro & DEUM à contemptu offensaque vindicare, & sui contemptum libentissimè tolerare. Addo aliud hujus tolerantiae exemplum, & quidem luculentum.

*Contumeliis & injuriis atrociter obruitur.*

Nebulonum grex quo majorem haberet ejus irridendi pulsantique facultatem, ipsum curavit evocandum intempestâ nocte; quasi ad excipiendam moribundi confessionem. Prodit confestim & præeuntes, ut putabat, ad moribundum, sequitur. Diu circumductus per implexas viarum ambages, per ignotos viculorum & compitorum anfractus, postquam in ampliori platea constitit, tollunt immanes cachinnos, & sannis petulantibus, proletariis jocis, atrocibus contumeliis, omni ludibriorum genere nec opinantem adoriuntur. Alii amentem & stolidum clamitare; alii cubitis impactis huc atque illuc protrudere; alii pugnos in ventrem & pectus ingerere; alii vultum & vestes cœno deformare. Christi famu-

famulus nocturnæ hujus tragœdiæ præsens ac triste argumentum , Lib. III. inter varios ejus actus velut intercalare Pauli Apostoli verbum lætus concinebat : *Nos stulti propter Christum.* \* Vicit Beati viri patientia proterviam impiorum , & expectationem elusit. Id age. <sup>1. Cor. 4.</sup> \* bant nimirum , id moliebantur , ut victus tædio tot incommodorum , quiesceret aliquando , & ipsis molestus esse desineret : ignari scilicet zelum Apostolicum flammæ esse persimilem , quæ , quò validior vento jactatur , eò vehementius inardescit. Quamvis à falsis ejusmodi monitoribus decepta sæpe P. Regis caritas fuisset , nocturnamque morientibus & ægrotis operam cum suo gravi damno periculòque præstaret ; nunquam tamen officium pietatis tam utile vel omisit penitus , vel negligentiùs exercuit ; bene redemptam quolibet suo periculo putans opem quamcumque morienti vel ægroto ferre posset.

Infinitus sim , enumerare si velim quàm sæpe insectantium malitiam ejus patientia vicerit. Simile portenti visum est tot hostium in se conjuratorum vim ac tela effugere potuisse : at profecto portenti non minoris locò ducendum , quòd tot inter hostes , in tanta sævientium immanitate , tam atrocibus contumeliis appetitus , tam malè verbis & verberibus acceptus , nullam tamen daret significationem impatientis animi , aut stomachosi ac tetrici ; imò nè vocem quidem questûs & mœroris ederet. Misèratur adversariorum cæcitatem , infelicitatem deplorabat , excusabat furorem , sequestrum se pro illis ac deprecatores apud superos præbebat ; DEUM ipsis , ipsos DEO conciliare , nec irritò semper labore , conabatur ; omnibus amicitia officiiis prosequeretur , quos sibi præceteris infensos & inimicos experiebatur. His armis , hac patientiâ & mansuetudine , quidquid piis ejus conatibus obstiterat , felicissimè hætenus superaverat : Refugium optimè constitutum stabat : vigeat in eo pax & disciplina sanctissimis adstricta legibus ; concordia , & pietas , in omnes civitatis ordines per eum inducta frenum licentiæ , & vitio pudorem injecerant : videbaturque vir Apostolicus , quocumque avida gloriæ divinæ vota extenderet , eò pervenire nullo negotio , superis juvare perguntibus , posse ; cum nova tempestas huic serenitati teterrimam caliginem offudit.

Hostes pudiciæ , quorum repressus potiùs , quàm omnino *Quid eg-* domitus furor , cum cernerent se consequi nullo pacto posse , ut *rint im-* ejus famam calumniis obscurarent , patientiam fatigarent ærumnis ; *probi ut e-* fortitudinem contumeliis frangerent ; breviorē excogitârunt vi- *um Ani-* cio pelle- *am rent.*

Lib. III. am ut molestissimum excuterent hominem, & Anicio exterminarent. Id autem non palàm & aperta vi, sed per cuniculos, & clàm ità sunt aggressi. Homines Societatis in ipsum armare ac stimulare constituunt, quorum videlicet manu graviùs certiùsque feriretur. Ergo Patres quosdam collegii conveniunt sibi notos, at quibus ipsi non satis erant cogniti, & graviter de P. Regis conqueruntur, quem præpostero pietatis studio intemperantiùs abripi ultra omnes prudentiæ metas criminantur. *Admifcet se, inquiunt alienis negotiis; arcana familiarum intropficere gestit, earumque pacem perturbat. Inroebitur promiscuè in omnes, & honestissimum quemque in satyricis concionibus vellicat, ac tetricis coloribus descriptum proponit. Idem, præ mentis imbecillitate, credulus, & somniantis muliercule deliria audiens, litem intentat lectissimis feminis & earum famæ notam turpitudinis inurit. E floribus purissimis ducit venena, & omnia pejorem accipiens in partem, ac depravatam imaginandi vim in consilium adhibens, innocentissima mutua urbanitatis officia, & colloquia, sceleribus annumerat. Mirantur omnes, vobis videntibus hæc peccari ab uno è vestris Fratribus, necdum remedii quidquam huic malo allatum esse: istas sibi partes samet civitas universa, & in totum collegium iusta precipuarum familiarum indignatio erumpet. Illi ipsi, qui se societatis vestre studiosos profitentur, inertia vos accusant, qui tandiu feratis hominem, à sensu communi & prudentia malè instructum, arrogare sibi munus & auctoritatem sacre Inquisitionis, in vestigandis feminis peccantibus: patrociniùmque illarum suscipere, qua cum è publicato pudore suo questum ampliùs facere nequeant, per eum invenère, quemadmodum publico sumptu alerentur. Hæcine tandem occupatio, hæc famosi domicilii administratio, sacerdotem Societatis decet? si vestris in superioribus satis animi & opis non est, ut peccantem emendent & coërceant; hortatur illos certè caritas, ut fratrem suum ab hominum oculis procul amoveant, qui seriùs ocyùs inimicorum furori iusto immolatus cadet. Quippe si hæc impunè ferre pergetis, & abuti civitatis patientiâ, denuntiamus vobis non defuturos, qui pœnas ipsimet ab infano ardelione, quas dignum est, repetant.*

Hæc isti, & eorum gregales, cum ad incutiendum terrorem vociferari non cessarent, conturbati Patres querelis tot civium, quorum etiam aliqui numerabantur inter amicos Societatis, auctores fuerunt Rectori collegii, ut ageret cum Provinciali de amovendo

P. Re.



P. Regis, ut Anicio discedens, hominum odia, quæ in ipsum, & Lib. III. ejus causâ, in Societatem, exarserant, placaret. *Insiciari non possumus, inquebant, quin ejus mens optima sit, quin ipse verè sit sanctus; at negare nemo potest, quin oblitus modi feratur interdum longius, quàm prudentia lex patiatur. Utilis aliquibus privatim, omnibus univèrse nocet. Multos abalienavit, multos offendit; plurimi etiam ultionem, quæcumque potest excogitari durissima, meditantur: magna pars vulneris, quo ferietur, in totum corpus redundabit. Neque nos tamen damnum Societatis ullum moveret, si gloria Numinis ageretur, sed animum nobis non inducimus valere ad illustrandam DEI gloriam posse ardorem pietatis, normâ prudentia destitutum, unde offensio probis, periculum necis uni è nostris fratribus, damnum collegio & Societati gravissimum, oritur.*

Hæc omnia erant apertiora, quàm ut latere DEI servum possent. Sanè parùm laborabat, quid de se jactarent aut sentirent improbi, quorum non modò sermones & judicia contemnere jam pridem assueverat; verùm etiam censuram & opprobria laudi ducere; amplum sibi existimans, quòd *dignus haberetur pro nomine JESU contumeliam pati.* \* At cùm suorum quoque fratrum arma in se conversa vidit, confessus est nullum unquam sibi certamen *Act. 5.* durius propositum fuisse. *Si mihi cum vitiis tantum, aiebat, & vitiosis hominibus dimicandum esset, gratularer & gauderem; nunc verò mihi cum ipsa virtute certandum est.*

Non tamen animo concidit: divinis præsidüs tanto certius *Quam* fidens, quantò minùs humana suppetebant. Quin, ipsum Rectorem ut adiret, eique se purgaret, adduci non potuit. *forsì animo pro-* Spem, inquebat, *cellam* *banc ca-* *teris.* *meam omnem in DEO collocavi: ipsi mea fama curam permitto. Quid expediat gloria sue novit. Serviat ejus bonori mea fama, & vita: utramque illi pridem devovi; meamque sortem beatissimam arbitrarer, si ejus augere gloriam mea gloria ac vite jacturâ possem.*

DEUS, id unum spectans ut servi sui virtutem ab omni vel levissimo nævo purgaret, illi defensorem paraverat in eo ipso, qui acerrimus eidem adversarius destinabatur. Is erat P. Ignatius Arnoux, collegii Rector, homo limati, si quis alius, judicii, & cui P. Regis erat exploratissimus. Auditis quæ de illo circumferebantur, opinionem de virtute sancti viri dudum animo impressam non exuit. Persensit etiam causas, quibus obrectatores incita-

Cc

ban.

**Lib. III.** bantur. Neque illud ignorare poterat, antecessorem suum ab iis inductum in fraudem, errorem demum agnovisse. His impulsus, patrociniū Regis aperte suscepit. Et quoniam ejus inimici prædicaverant ab hominibus ipsis Societatis condemnari temeritatis ardorem illum incensum, & aviditatem quā ferebatur ad opera pietatis, Rector eundem & in urbe, & in collegio summis laudibus ornavit. Hortatus etiam est, multis audientibus, ut Apostolicas functiones obire pergeret, seque fautorem, ad suscipienda quæ constitueret pro salute proximorum, & adiutorem ad exequenda, promisit.

*Ejus patrociniū collegii Rector suscipit; præsertim apud Præpositum Generalem.*

Præterea privatim allocutus singulos Patres, qui præ ceteris Beatum virum oppugnaverant, illis renunciavit, nequaquam se Provinciale interpellaturum de P. Joanne Francisco ab urbe removendo: nefas esse spoliare Aniciū excellenti operario, & collegium virtutis exemplo non vulgari. Virum esse sanctum, qui nullo modo sua, omnibus verò modis ea quæ DEI sunt, quæreret; qui nihil haberet propositum aliud, quàm salutem proximorum; cujus acer & experrectus ad gloriam DEI promovendam ardor finibus Christianæ sapientiæ circumscriptus esset; qui denique nihil, inconsulto DEO & Superioribus, aggrederetur. Non audienda quæ de illo jactarentur ab hominibus eam ob causam infestis, quia capitales cum ipsorum vitiis inimicitias exercebat.

Hæc fortis æquè ac sapiens Rectoris oratio sinistras Patribus opiniones, quibus contra DEI servum erant occupati, eripuit: factum sibi ab improbis fucum agnoverunt. Nihilominus quia minimè dubitabat, quin eorum aliqui tentassent Præposito Generali persuadere, quæ sibi ipsis perperam persuaserant, ad eum scripsit exeunte Februario anni 1639. hunc in modum.

*Reverende admodum Pater. Non dubito quin minus commodè ad Paternitatem vestram nonnulli scribant de P. Regis, deque illius præcipiti, ut ajunt, ac temerario zelo. Rogo illam ut nè se decipi patiatur falsis coloribus, quibus depingi vir iste sanctus posset; habeatque pro certo indefessum esse operarium, divinam gloriam unice anbelantem. Bellum vitiis indicit Apostolicâ fortitudine, neque ullo respectu humano retardatur quò minùs ministerii sui munia strenuè ac palam exequat. Id unum causa fuit cur illum sibi vexandum sumpserint plerique publicis flagitiis infames, imò etiam Patres aliquot collegii, clamoribus, querelis publicis, minisque istorum sceleratorum conturbati. Ego verò confirmare verè possum, nihil à me in eo deprehendi, quod quis meritò repreh-*

*prehendat ; multas contra virtutes egregias observari, quas nemo Lib. III.  
non meritissimo laudet. In hoc autem bello quod cum sceleribus ad  
publicam offensionem & pestem grassantibus, suscipit, ita se gerit,  
ut peccata quidem acriter infectetur, peccantibus verò parcat,  
eosque cum omni lenitate, prudentia & caritate corripiat. Illum  
probi omnes ut sanctum venerantur. Elementa doctrinae Christianae  
explicat in eade S. Petri eo plausu, quem verbis consequi vix quis-  
quam possit. Illud præcipuè laude & gratulatione dignum, quod  
ejus conciones infinitis morum mutationibus, & vitiorum publicæ  
emendatione, commendantur. Ceterum, addebat Rector, in tan-  
to successu, cui sensum aliquem inanis gloria obrepere proclive esset,  
nemo religioso humilitati magis deditus est, nemo demissius de se  
sentit. Humilitatem adequat obedientia, in qua sic excellit, nihil  
ut gerat, nihil aggrediatur, nisi de sententia superiorum, e quo-  
rum nutu totus pendet.*

Adeò satisfecit Præposito Generali Rectoris testimonium de *Provincia*  
virtute P. Joannis Francisci, ut Patribus Aniciensibus gratulatus *Præpositus*  
fuerit, quod inter ipsos tam strenuus, tam sanctus minister Euange- *Romam*  
lii versaretur. Provincialis, ad quem suas etiam querelas Patres, *scribit de*  
parùm initio Christi famulo propitii detulerant, suarum quoque *P. Regis,*  
partium esse judicavit certiore facere Præpositum Generalem de *summa*  
prudentia P. Regis in tractandis animarum causis, deque singulari *cum lau-*  
fructu, quem ex Evangelico labore colligebat. Litteris Provin-  
cialis dies adscriptus est pridie Id. Augusti, 1638. & quintus Kal.  
Octobres 1639. Illarum summa hæc erat. Patrem Regis inter  
omnes Socios Anicienses, ob eximias virtutes, præcipuam laudem  
mereri: Missionarium esse admirabilem, indefessi, & inexhausti  
zeli; vitam ducere prorsus Evangelio consentaneam; totum in  
officiis caritatis, in adjuvandis pauperibus, sublevandis ægrotis,  
excipiendis confessionibus, adducendis ad bonam frugem impro-  
bis, explicanda pueris & populo doctrina Christiana, in S. Petri,  
& collegii templo, concursu fructuque incredibili.

Præpositus Generalis Provinciali rescribens, jubet illum re-  
nuntiare Patri Regis, probari sibi vehementer zelum ipsius Apo-  
stolicum, ac nominatim operam, quam assidue ponebat in expo-  
nenda populo doctrina Christiana: precari se Deum, ut similes ipsi  
quàm plurimos operarios Societati largiatur. Primarii Patres col-  
legii litteras pariter ad Præpositum Generalem dederunt, in qui-  
bus ardentissimum P. Regis ad gloriam Divinam & animarum sa-

Lib. III. litem procurandam studium, multa cum laude & admiratione, *Res ad* commendabant. Sed nihil DEI servum in rebus adversis, & *fructum* vis conatibus improborum, suavius consolabatur, nihil tam assidue *animarū* vexationis acerbiter æquè mitigabat, atque uberrimus fructus, *bene ac* quem inter istos tribulos, DEO faustos labores fortunante, decer- *feliciter* pebat. Complures oculati testes, atque in iis Episcopi Vicarius *Aniciige-* Generatis, multi Canonici, multi civitatis parochi, legitime con- *sta. Eum* firmarunt in Actis Canonizationis, inductam ab eo novam pietatis *civitas in* formam in Ecclesiam Aniciensem; ejus heroicam fortitudinem, *sanctum* diligentiam, & patientiam eo successu remuneratam, qui omnium *venera-* expectationem superaverit: multitudinem hominum innumerabi- *tur.* lem cujuscumque conditionis & ætatis è *peccati servitute* in liber- *tatem justitie* ab eo vindicatam; purgatam impudiciæ luem, quæ urbem hætenus fœdè commaculaverat; ingentem numerum per- ditarum feminarum è cœno libidinis eductum; nec pauciores vir- gines, à jacturæ innocentiae facienda, prohibitas: castigatam cleri solutioris licentiam, & sanctioris disciplinæ vinculis adstrictam: re- vocatas multis in cœnobiis pristinas Instituti veteris leges, quas in- curia & desidia laxaverant: exterminatam impiè jurandi consuetu- dinem, quæ jus quoddam possessionis sibi arrogaverat; restitutum frequentem sacramentorum usum propè obsoletum & antiquatum; depulsam à pueris incitiam, constitutum ordinem in familiis; ci- vium adeò immutatos mores, ut quæ gravissimis vitiis laborabat civitas, iis feliciter persanatis, inter sanctissimas regni urbes nume- raretur: adeò dissimilis illi, quæ tum erat, cum primum in ea con- cionari cœpit, ut vix eadem esse agnosceretur; & qui recentem ejus faciem, à pristina tam diversam intuebantur, vix oculis ipsi suis crederent. Hæc omnia, ut modo sunt à me singillatim narrata, sic totidem pæne verbis recitantur in Actis Canonizationis, audita de testibus qui viderant ipsimet quæcumque pro testimonio affir- mabant.

His adjungunt iidem testes, illum ab omnibus, ut virum san- ctum, in pretio & honore habitum; eos à quibus immanissimè vexatus fuisset, tot virtutum luce perstrictos, & victos ejus mode- ratione, verso in venerationem odio, è contemptoribus admirato- res, è vexatoribus & obrectatoribus laudatores evasisse: conjectis in eum falsis criminibus & calumniis præclaram hominum de illo existimationem nunquam exolevisse; patientiam verò contumeliis & opprobriis illustratam.

Non

Non parùm celebritatis addebant ejus nomini peculiaria ta-  
 li dona, quibus ejus sanctimoniam DEUS tunc maximè ornabat, *Sæpe in*  
 cum eam obscurare ac deprimere scelerati contendebant. Utenim *mentis*  
 omittam sanationes morborum prodigiosas, de quibus antea me- *excessum*  
 minimus, sæpe animo velut à corpore peregrinante, in rerum cæ- *rapitur.*  
 lestium cogitationem altissimam rapiebatur, modò inter precan- *Animorū*  
 dum, modò inter divina mysteria celebranda. Idem arcanos men- *sensus ar-*  
 tium pervidebat recessus, & futura prædicebat. Illustriora quæ- *canos in-*  
 dam ejusmodi donorum exempla, quoniam omnibus commemo- *transpicit.*  
 randis locus non est, delibare satis erit; hinc divinam licebit lau-  
 dare bonitatem, quæ servos suos, nostris etiam temporibus, miris  
 nobilitate modis gaudet.

Jacobus *Jacmon*, insignis medicus Aniciensis, pro testimonio  
 juratus asseruit, intimos animi sui sinus à Beato viro divina luce  
 collustrato, fuisse perspectos: eundem multa quæ postea sibi con-  
 tingerant prænuntiâsse. Tres illi protervi & libidinosi juvenes qui  
 de ipso, ut diximus, necando conspiraverant, & quorum scelera-  
 tam mentem, DEO monstrante, cognoverat, testati sæpe sunt ne-  
 minem consilii sui fuisse conscium, neque signi quidquam se de-  
 disse, unde illud cognosci potuisset, cum ipsos vir sanctus ita est  
 allocutus; *Scio quid agatis: de mea necè conjurastis; sed ei, quem*  
*DEUS tuetur, nihil est metuendum.*

Alium, simile facinus meditantem, repressit his verbis. *No-*  
*vi quid consilii ceperis. Sed animum tuum ita DEUS immutabit,*  
*ut quem tanquam hostem nunc intueris, in amicorum numero ha-*  
*beas, & quem odisti modò pessimè, diligas.* Paucis post diebus ju-  
 venis, sanctiorem vitam amplexus, regendum se DEI servo tradidit.

Prophetiæ donum adeò ipsi familiare atque ulitatum erat, ut *Prophetia*  
 futura conspicere non secus videretur, ac si præ oculis fuissent. Ma- *domo fu-*  
 ter fortunas filii bene constituere percipiens, eumque in amplissi- *sura pro-*  
 mo dignitatis gradu, cujus opportunitatem oblatam sibi gratulaba- *spicit ac*  
 tur, collocare summo studio laborans, negotium precibus P. Jo- *prædicis.*  
 annis Francisci commendavit. At ille: *Quid attinet, ait, tam*  
*anxiè sollicitam te esse de fortunis filii, cujus vita tam angusto spa-*  
*tio debet esse definita.* Aliquot mensibus interjectis ille filius, spes  
 ac deliciæ parentis, tam subitâ, quàm improvisâ, morte de medio  
 sublatus est. Altera mater funestam filii sortem lugere non cessa-  
 bat, qui damnatus ultimo supplicio, propediem rapiendus ad pati-  
 bulum dicebatur. Solatium aliquod dolori suo quærens, venit

Lib. III. ad Patrem Regis, asylum commune miserorum. Cui Pater :  
*Nota de filii corpore magis, quam de anima laborare. Hominum  
 judicia eripere corpori vitam possunt : DEI judicia corpus & ani-  
 mam exitio mactare sempiterno possunt.*

His dictis paulum conticuit ; mox, ore læto ; *Jubeo te*, in-  
 quit, *bono animo esse ; filius tuus in patibulo non morietur.* Quam-  
 vis prædictioni fidem omnia derogare viderentur, quin tamen illi  
 constatura fides esset, mater minimè dubitavit ; adeò nescio quid  
 divinum in dicentis vultu suspexerat ! Paucis post horis audit filium  
 fuisse perductum in plateam plectendis facinorosis destinatum ; ibi  
 fixum in patibulo, cumque mortuus putaretur, refixum à sodali-  
 bus Agonizantium sodalicii. Ab iis deportatum in ædem Carme-  
 litarum ; cumque jam sepeliendus esset, vivum fuisse deprehensum.

Marcellinus *du Fornel*, nobilis adolescens, oriundus è sancti  
 Desiderii Fano, in Velaunis, Anicio transiens Patrem Regis saluta-  
 vit. Cui de causa itineris, ut sit, percontanti, respondit se Valen-  
 tiam petere, ut ibi Doctoris gradum & insignia sumeret. *Nihilne  
 præterea ?* Subdit Regis. *Imò, ait juvenis, de contrahendo matri-  
 monio cogito : sponsa nobilis & locuples offertur, ac tota res prope-  
 diem transigetur.* Adolescentis ingenium, forma, præclara indo-  
 les bonis artibus exulta, nihil non lætum ac fortunatum ipsi pol-  
 liceri videbantur. Familiæ, in quam erat inferendus, dignitas, be-  
 ne nummata uxor, ambitionem ejusdem & cupiditatem blandissi-  
 mè permulcebant. Quem ubi perituræ felicitatis illecebris captum  
 Regis sensit, *Cave*, inquit, *ne tibi hujus matrimonii commodis, &  
 amœna spe, blandiariis : brevè omnis illa fortuna fallacis aura dis-  
 flabitur & evanescet ; quin, antequam circumagatur annus, tiro-  
 cinium vitæ religiosa in Societate nostra pones.* Adolescens totus  
 in novi, quem animo designabat, statûs, & præclaræ fortis cogita-  
 tione defixus ; qui nihil in se nec facultatis nec propensionis depre-  
 hendebat ad amplectendum vitæ genus, cui destinatus dicebatur,  
 vaticinationem accepit in eam partem, in quam accipi somnia de-  
 lirantium solent. Interim matrimonium, quod omnino constitu-  
 tum existimabat, disturbatum est : evanuit imago fortunæ blan-  
 dientis ; ipse quasi de curriculo, quod ingredi parabat, depulsus,  
 hæsit aliquandiu anceps & incertus quam deinceps viam iniret. De-  
 nique perspectâ rerum humanarum inanitate, quam è sermonibus  
 Regis, & sua experientia cognoverat, fastidire seriò spes caducas  
 coepit, ac Tolosam profectus ad ponendum tirocinium, vaticinii,  
 quod

quod irriserat, comprobavit veritatem, & magnum deinde inter Lib. III.  
societatis concionatores nomen obtinuit. P. Joannes Petrus du  
Fornel, ejus frater, qui Provinciam Tolosanam summâ prudentiæ  
laude gubernavit, rem ita gestam esse mihi confirmavit; de qua  
pariter meminere, qui Beati Regis vitam posteris prodiderunt.

Puella nobilis extinctum sororis filium gemens, DEI servum  
adiit levandi doloris causâ. Hanc ille lugere vetuit, futurum af-  
firmans ut ejus soror novâ prole, post menses novem editâ, jactu-  
ram prioris amissæ sarciret. Utî prædixerat, ita contigit.

At non potuit ipse non lugere miserandam alterius puellæ sor-  
tem, quam ad solita redituram flagitia prædixerat eo ipso tempore,  
quo ejus constancia firmioribus nixa radicibus videbatur. Dege-  
bat apud sacras Virgines Congregationis S. Caroli, quibus multo  
cum fletu promiserat se nuntium peccato remissuram in omne tem-  
pus, si earum ope liberari morbo posset, quem intemperantiâ suâ  
contraxerat. Pix virgines motæ promissis, quibus nihil subesse  
falsi apparebat, Christi famulum consuluerunt, cumque haberent  
exploratam ejus ad quælibet opera misericordiæ suscipienda prom-  
ptissimam voluntatem, minimè dubitârunt quin istud esset omnino  
probaturus. Regis ubi paulisper se collegit, sic eas est allocutus.  
*Agite sanè ut lubet; non possum non laudare vestram caritatem,  
cui merces apud DEUM sua manebit: erit illa tamen infelici pu-  
ella funesta; sanitatem corporis, ope vestra partam, pernicies ani-  
me consequetur.* Dicti veritatem exitus docuit: pristinam ade-  
pta valetudinem, ad pristina crimina se retulit.

Aliquanto post edidit vaticinium isti planè contrarium. Pri-  
maria femina libidinoso implicata commercio, apud ipsum, quem  
ignorabat, peccata deposuit. Hortatus illam est vehementer ut  
vincula, quibus turpiter ligata tenebatur, perfringeret; in primis  
autem ut coetus profanos & periculosos omnino fugeret. Hor-  
tanti restitit acriter, illecebris voluptatis delinicta, & vincula sua di-  
ligens: *Egone, inquit, caream subito jucundissimis illis coeta-  
bus, & vitam insuavem in tristitia & solitudine transigam?* Re-  
gis parumper cunctatus, ut solebat, hæc verba, tanquam dictante  
DEO, subjecit: *Tuum illud cor, durum modo & saxeam, ante-  
quam sex menses fluxerint, divina bonitas emolliet; teque senties  
tam dissimilem tui, ut ipsa tibi non videaris ipsa. Negas fieri mo-  
dò posse ut aliam vite rationem instituas? tunc miraberè qui fieri  
potuerit, ut eam antea non institueris.* Cor novum, cor mun-

Lib. III. *dum*, mores novos, creavit in illa DEUS, ut vir sanctus præmonuerat, cujus verba nunquam illi exciderunt.

En aliam prædictionem, cujus circumstantiæ mirum quiddam ac prorsus singulare habent. Virgo studiosa pietatis, & cujus solertiâ in caritatis operibus Regis plurimum utebatur, illi operam navare aliquando detrectavit, subirata Patri collegii, à quo nescio quid offensusculæ accepisse se judicabat: *Negas opem, quam pro DEI gloria rogo, mihi nunc prestare*, inquit vir sanctus; *Erit illud tempus cum opem meam in gravissimo tuo periculo implorabis*. Aliquanto post, cum jam DEI servus obiisset, sicarii facto in virginem impetu, tot plagis eandem malè multârunt, ut à medicis & chirurgis, sanationem desperantibus, fuerit omnino deposita. Tunc memor carissimi Patris, curavit se deportandam ad ejus tumulum multis jam miraculis clarum, ex eoque persanata rediit.

Vaticinium quod modò sum narraturus, eò fuit illustrius, quod in oculis populi & luce totius urbis editum est. Vigebat Anicii ars conficiendæ teniæ denticulatæ, & plurimas familias occupabat alebátque; cum hanc negotiationem Ludovicus XIII. edicto prohibuit. Ad Patrem Joannem Franciscum trepida plebs confugit, quæ sublato ejusmodi tæniarum commercio, ad extremas inopiæ redigebatur angustias. Doluit populi vicem, ac præsertim virginum complurium, quarum egestatem utilis occupatio sustentabat, & castimoniam tutabatur. Earum periculo, precibus lacrymisque permotus, & oculis in cælum sublati aliquandiu moratus, *Confidite*, inquit, *restituetur negotiatio*, simulque tempus conficiendæ rei designavit, *stabit, ut pridem, & in posterum florescere perget*. Ea vox mœrorem publicum discussit, dubitante nemine quin pristinum in statum restituenda negotiatio foret. Et accidit eo ipso tempore, quod à viro sancto designatum erat, ut Rex edicto posteriore prius abrogaret; redditoque urbi commercio longè utilissimo, vigeret ars populo necessaria, quæ floret etiamnum, & prædictionem eventu lætissimo confirmat.

Istæ vaticinationes, aliæque plurimæ, quibus recensendis superfedeo, vehementer auxerunt venerationem, quâ populus eum prosequabatur; nec populus tantum sed universa nobilitas Anicii, Clerus omnis & cœnobitæ: in primis autem Episcopus, ejusque Vicarius Generalis.

Julius quidem *de Serres*, Aniciensis Episcopus, non genere, quàm doctrinâ & virtute, clarior, *cujus memoria* per omnem diccesim,



cesim, adhuc *in benedictione est* \* tanti æstimabat ejus sapientiam Lib. II. & virtutem, nihil ut majoris momenti susciperet religionis causâ, *Quanti ipso inconsulto: nullus habebatur pietatis cœtus, quò illum non fieret ab Aniciensi Episcopo, & ejus Vicario Generali.* introduceret, nullum opus caritatis, cujus curam illi non committeret, ut ejus regeretur consilio, & auctoritate fulciretur. Non semel famam illius apud egregium præsulem decerere nonnulli conati sunt, verùm, spretis invidorum aut improborum sermonibus, defensorem semper ipsius laudatoremque se præbuit; cùm persuasum haberet nihil obijci viro sancto posse, nisi quòd modum in colenda virtute vix teneret. Ut autem ejus adversariis pudorem & silentium imponeret, omnem de industria captabat occasionem significandi quanti eum faceret, quantum ejus probitati ac prudentiæ confideret. Eundem in omni sermone sanctum, Apostolum, hominem sibi mortuum, & divino plenum spiritu, vocitabat. Gratiâ agebat superis, quòd sibi tam excellentem submisissent operarium ad instaurandam aut ornandam populi sui pietatem. Quin etiam illius vultum in tabula pictum habere domi voluit, negotiumque celeberrimo urbis pictori dedit, ut ejus oris ductus & lineamenta observaret, dum rem divinam faciebat, haud dubius nunquam futurum fuisse, ut assentiretur, si tentata res alio tempore fuisset.

Petri *le Blanc*, Vicarii Generalis Episcopi, erat observantia erga DEI servum par, & veneratio. Amborum animos, ubi primum inter se nòrunt, amicitia suavissimè conjunxit, quam ut initio conciliaverat indolis & morum similitudo, sic deinceps aluit atque confirmavit. Nihil suscipiebat & moliebatur P. Regis, nisi de sententia jussuque Vicarii Generalis, qui pariter amici consilium & mentem in omnibus exquirebat. Quemadmodum viri sancti virtutes nemo notiores habebat, sic inter eos numerari testes voluit, qui auditi fuerunt in causâ ejus Canonizationis. Ibi sanctitatem servi DEI miris quibusdam coloribus depingit, ac testimonium concludit his verbis, quæ locum ingentis elogii obtinere possunt. *Illum, inquit, semper sum contemplatus, ut Angelum, propter morum purissimam integritatem; ut imitatore genuinum & fratrem S. Francisci Xaverii, propter Apostolici zeli fortitudinem & ardorem; ut patrem pauperum, propter excellentissima caritatis amplitudinem; ut sanctum primæ notæ, propter virtutum Christianarum & Evangelicarum absolutissimam complexiorem.* Omnes Anicienses cum semper spectarunt, & spectant eti-

Ec

annum

**Lib. IV.** *annum non modo ut sanctum, sed ut sue urbis Apostolum, quam concionibus & exemplis erudit, reformavit, ac vera sanctitate perpexit; nullâ ratione habitâ quietis, fame, ac ne vite quidem, quam, ipsorum saluti, semper devovit.*

Sic virtutibus, prodigiis, & heroicis facinoribus, quæ DEI servus edidit Anicii per æstivos menses, postremis quatuor vitæ suæ annis, gloriosum Apostoli Aniciensium nomen est consecutus. Ad eundem modum, ea, quæ totidem annis gessit ac toleravit hieme in Missionibus apud Velaunos peractis, illustrem titulum Apostoli Velaunorum illi pepererunt.

# V I T A B. JOANNIS FRANCISCI REGIS. Liber IV.

*Oppidum  
Fay, & vi-  
cina loca,  
Missioni-  
bus exco-  
lit, 1636.*

**G**raviter ac molestè tulerat Regis, ut diximus, negatam sibi à Præposito Generali Missionem Canadensem. Ut mœrorem suum solaretur, decreverat, consultis superioribus, totum se dare frequentandis in agro Velauno Missionibus, quo in tractu magna populi pars nec minùs barbara, nec fortasse facilioris culturæ, quàm ipsi Canadenses, erat. Hæresis, tunc inter Vivarienses regnans, funesta contagione proserpserat in plerasque Velaunorum partes, & bellorum civilium furore subnixa, incolas ità depravaverat, ut legum humanarum ac divinarum soluta vinculis licentia ubique volitaret. Qui montium incolebant iuga, tanquam ab hominum consortio secreti, erant illi quidem catholici, verùm fœdissimis vitiis honorem apud ipsos ac securitatem consuetudo tribuebat. Religionis mysteria jacebant sepulta in tenebris & oblivione; sacramentorum, aliorumque pietatis officiorum, usus ferè omnis obsoleverat. Istorum montanorum formandis moribus postremum vitæ suæ quadriennium sanctus Missionarius addixit, concursans singulis annis per hiemem pagos & vi-  
cos

Primus illi labor in oppidulo Fay, & vicinis locis, initio anni 1636. Sedet istud oppidulum inter densa nemora & inaccessos montes. Hunc tractum præcipue sumpsit excolendum, quia per eum grassata latius hæresis, graviorem catholico nomini labem intulerat. Hoc veluti centrum esse voluit Missionum, quas in Famum S Symphoriani, & S. Juliani; Chagnacum, Champelouxum, & plerosque finitimos pagos, dividere constituerat.

*Daebus  
caci vi-  
dendi  
sensum  
restituit.*

Millionis aditus felicior esse non poterat. Hæc prodigia famam, quæ de sacerdotis sanctitate percubuerat, planè confirmarunt, eique dociles omnium animos, aurésque præpararunt. In-  
finitus, ad videndum, ut prædicabant, & audiendum sanctum, concursus est factus non populi tantum, sed nobilium, cœnobitarum, &c.

Lib. IV. rum, & sacerdotum, qui quatuor leucas non dubitabant ambulare, ut concionantem auscultarent. Ipsi Calvinistæ, virtutis admiratione capti, catholicorum ardorem æmulari & vincere certabant.

Nimirum Apostolica vita omnes arcanis illecebris rapiebat. Cernebant illum diu noctûque occupatum in populo erudiendo, excipiendis confessionibus, pauperibus sublevandis, visendis ægrotis, cibi, somni, & valetudinis oblitum. Nec leue sanctitatis eximie argumentum erat præcipua pauperum cura, quos amplecti teneriore quodam affectu videbatur, quamvis neminem repudiaret, nec salutem divitum minore haberet in pretio. Pauperes ad sacrum confessionis accedentes tribunal libentius admittebat, quam nobiles: ad eos consolandos itabat in eorum casas, in custodias, in publicum valetudinarium; & quæ ipsis opus forent, ostiatim emendicare non cunctabatur. Animorum egestati & incommodis non segnius medebatur, quam corporum. Itaque in oppido Fay, bellum vitiis, ut aliis omnibus locis, indixit, ac potissimum impudicitiae, cujus capitalem ubique hostem se profitebatur. Oppidum ingressus cognoscere ante omnia studuit e probis ac prudentibus viris suspectas domos; cumque rescivisset mulieres aliquot eâ peste infectas esse, illis turpitudinem intemperantis vitæ tam gravi, tam incensâ oratione demonstravit, ut infanda commercia resciderint. Perrarò accidebat ut flagitiosi vim dicentis, & agentis constantiam sustinerent, ac si qui pertinacius utrique resisterent, non rarò contingebat, ut exitu vitæ luctuoso divinæ severitatis ac justitiæ triste documentum darent. Multa jam hujus generis exempla retulimus; his unum addimus, quod in oppido Fay gestum, & peculiaribus quibusdam notis est insignitum. Civis locuples, foedissimis jam pridem cupiditatibus mancipatus, eo ipso tempore concubinam alebat domi. Venit ad eum Regis, & oratione, quamcumque suavissimam excogitare caritas potest, molles in ejus animum aditus captavit. At impudicus dicentem nè aspectu quidem dignatus est. Non deterritus hac inhumanitate sanctus Missionarius, redit ad eum postridie, cumque ipsi paterna benignitate foeditatem sui sceleris, offensionem justam populi, lamentabilem, in quo versabatur, statum ob oculos posuisset, durum pectus concutere conatus est metu imminentis mortis, divini judicii, & æterni supplicii, quod effugere non poterat, si deprehensus in scelere periret: ad extremum obtestatus ut se respiceret, ut saluti sempiternæ tandem aliquando consuleret, lacrymis ubertim profus-

sis

*Civem  
publico  
flagitio  
infamem  
revocare  
conatur a  
scelere.*

sis peroravit. Improbis tædio victus, nec dicentem audire diu- Lib. IV.  
tius sustinens, interpellat ferociter, ac facessere procul jubet. Pa-  
rantem plura, conviciis onerat, & manu correptum domo exigit.

Regis, quasi nihil accepisset injuriæ, acrior ad pugnam postri-  
die redit, armisque validioribus expugnare hostem nititur. At  
ille ferreum pectus omnibus telis objiciens, amicam vim sceleratâ  
vi retundit, monitis cachinnos, precibus contemptum, minis mi-  
nas & opprobria reponit. Hic enimvero cernere licuit quàm ve-  
rè dictum sit ab Apostolo, *Caritas patiens est.* \* Perseveravit  
DEI servus integro mense singulis diebus pertinaciter in peccato 1. Cor. 13.  
perseverantem visere. Addidit preces & jejunia, ut iram DEI  
vindictam à scelerato capite averteret. Demum tentatis frustra  
omnibus remediis, omnibus exhaustis, sancto dolore percitus, ho-  
minem convenit, divinamque ultionem, & imminentem ruinam  
denuntiat. *Hodie postremum te video*, inquit, *hodie postremum*  
*te DEUS meis verbis ad pœnitentiam invitat: nisi modò resipi-*  
*scis, actum est.*

Impius magis, magisque induratus, minas joci & stomacho Pertinaci-  
so risu excepit: at non impunè. Paucis post diebus globulo plum- improbi  
beo, ferreâ emisso fistulâ, petitus interiit, nullo dato ad pœniten- pœna præ-  
tiam spatio. Hæc tam præsens, tam perspicua improbi pœna sens.  
multis terrori, multis saluti fuit. Peractæ in oppido Fay & vici-  
na regione Missionis imago verior adumbrari nulla potest, quàm  
insertis hoc loco verbis Claudii Sourdou cujus hospitio multos men-  
ses Regis usus est. Hic igitur, cum testimonium rite diceret, au-  
dientibus duobus Episcopis, ita est locutus.

*In summi beneficii, à superis mihi concessi, loco semper duxi,*  
*quod Patrem Regis hospitio acceperim, dum Missionem obibat in pa-*  
*tria mea. Vultus nescio quid majus homine præferens; totus ipse,*  
*si quid loqueretur, agerétve, sanctitatem spirans, venerationem*  
*conciliabat. Nemo præsentem intueri, nemo dicentem audire po-*  
*terat, quin amore divino succenderetur. Sacrosancta mysteria ce-*  
*lebrabat tanto ardore, tanta suavitate pietatis, ut ad aram stare*  
*Angelus, non homo videretur. Illum vidi sæpe in familiari ser-*  
*mone derepente conticescere, mox colligere se, & inardescere: tum*  
*de rebus divinis verba facere, ea flagrantis animi contitatione,*  
*que illum præsentem DEO afflatum, aperte ostenderet. Nusquam*  
*autem ille Divini Spiritus, quo intus movebatur, impetus clariùs*  
*apparerebat, quàm cum populum in templo erudiret. Tunc effata*

FF

Chri-

**Lib. IV.** *Christiane doctrine tam disertè proponebat, tam fortiter inculcabat, ut convinceret vel maxime rebelles; Et quamvis oratione simplici ac velut illaboratà uteretur, eam tamen actio, voxque ardoris. Et suavitatis plena, in animis audientium altissime desigebat.*

*Absolutà concione, concurrebant omnes cateruatim ad sacrum pœnitentiæ tribunal, in quo ipse totos dies sæpe jejunus considerabat. Interdum advenarum è longinquo confluentium ut eum audirent, ut ipsi peccata explicarent, tanta erat multitudo, ut omnem Velaunorum agrum, cum suis incolis, in oppidum Fay effusum collectumque crederes. Non contentus aures confitentibus accommodare interdum, laborem producebat in multam noctem; Et quamvis nihil sumpsisset cibi, avellendus erat à sacro tribunali, ut eo parumper reficeretur. Mirabamur omnes qui fieri posset, ut tantà defatigatione non frangeretur; Et mea mater quandoque id sibi sumebat ut eum idcirco liberius objurgaret: sed frustra.*

*Admirationem nostram illud maxime cumulabat, quòd, cum die ac nocte cingeretur agrestium coronà, qui è Velaunis montibus continenter alii ex aliis accedebant, nunquam tamen audivimus de illorum numero vel rusticitate conquerentem. Imò ipsum intuebamur in hac importuna turba perstare tantà oris serenitate, tam invictà tranquillitate animi, ut facile appareret ipsum gentis misera ac pene barbara gaudere consortio, Et in ejus congressu suavissime conquiescere.*

*Post navatam oppido Fay diligentissimam operam, contulit curas ad faciendam in vicina regione sementem Evangelicam. Quotidie dabat se in viam summo manè, ut rusticos in silvis montibusque sparsim degentes, inviseret. Interdum imber densus, aut procellosi venti, celo biberno sæviebant: interdum solute nives, torrentesque tumidi, omnia obstruebant itinera. Hortari Et urgere mea mater non cessabat, ut nè se committeret viæ, tam alienà, tam acerbà tempestate, quàm vel audacissimi pedem efferre domo non sustinebant: certum vitæ periculum demonstrabatur. Nullà denuntiatione periculi, nullis precibus amicorum movebatur. Diem totum perlustrandis singillatim tuguriis consumebat, idque semper pedes, Et jejunus, nisi forte mea mater pomum sumere cogeret, quod ille in peram abdebat. Oppidum, nisi serà jam nocte, non revivebat, nec toleratis per diem totam ærumnis impediebatur, quominus solitas repeteret functiones, seque ex labore, novo labore recrearet.*

*Cum*

*Cum ex uno loco, post impositum Missioni finem, in alium pro-* Lib. IV.  
*ficiscebatur, novam inchoaturus, volupe erat cernere innumeram*  
*sequentis populi multitudinem: permisti catholicis Calviniani, quos*  
*odor eximie sanctitatis alliciebat, comitabantur. Talis fuit ejus*  
*ex oppido nostro discessus, in quo quam multa praeclare gesserit, nul-*  
*la satis explicet oratio. Magnus haereticorum numerus ad veram*  
*fidem traductus: mulieres plurimae à libidinosa peccandi consuetu-*  
*dine revocate, compressa dissidia, odia extincta, inducta pax in fa-*  
*miliis, restitutus sacramentorum usus, pueri doctrinâ Christianâ*  
*rite instituti, emendati mores oppidanorum, exterminata impietas,*  
*regio tota sanctioribus institutis legibusque devincta, ejus Apostoli-*  
*ci zeli fructus, & illustria monumenta, extiterant.*

Regis hac Missione defunctus, Anicium, pro more, se rece- <sup>Marlem-</sup>  
 pit sub initium ætatis anni 1637. eaque ibi perfecit, quæ libro III. re- <sup>sem Mis-</sup>  
 tulimus. Appetente hieme sanctum Missionarium multa oppidu- <sup>tionem in-</sup>  
 la, pagique, certatim flagitabant. Ut ceteris Marlem anteponeret, <sup>choat ex-</sup>  
 ubi jam ante aliquot annos Missionem obierat, Jacobus <sup>unse anno</sup> *Andrè*, 1637.  
 loci parochus, summis precibus evicit. Marles, amplus & nume-  
 rosus Forensium pagus, in agri Velauni limite, novem leucis Ani-  
 cio distat. Illuc profectus est Regis circiter Idus Novembres an-  
 ni 1637. Erat tempestas asperrima, immodicum frigus, terra ni-  
 vibus cooperta: viæ, per quas transeundum, aspectu accessûque  
 horridæ. Nunc erependum illi fuit in cautes lubricâ obsitas gla-  
 cie; nunc descendendum in valles congestâ nive oppletas; modò  
 rumpendum per densos vepres & rubos, iter. Hic ostendit in-  
 signi prodigio DEUS tantò majori curæ sibi esse servi sui salutem,  
 quantò minùs ipse de illa laborabat.

Cum arduum montem superare per obductos glacie calles  
 contenderet, virgulta & dumos prensans, accidit ut corrueret, er-  
 rante manu, fallente vestigio, & crus frangeret. Haudquaquam  
 tristi territus casu, & ore (quod semper illi serenum) nihil muta-  
 to, pergit ire, ac duas conficit leucas baculo nixus, & à Socio su-  
 stentatus. Tandem pagum attingit; ibique, omisso, qui vulne-  
 ri medicinam faceret, chirurgo, magis de animarum salute, quàm  
 de sua incolumitate, sollicitus, rectâ contendit in sacram ædem, ubi  
 illum conferta turba opperiebatur, & confitentibus operam per  
 multas continenter horas dat. Monitus ab ejus socio parochus,  
 ac trepidè accurrens, obsecrabat ut parumper domum subiret. Im-  
 petrare nihil potuit. Postquam populo & caritati suæ satisfecit,

**Lib. IV.** passus est inspicere fractum crus; cumque ipsâ cunctatione, atque adeo laboriosa itineris, post tibie fracturam emensi, contentione malum ingravescere debuisset, imò sanandi spem omnem ademisse, sanum crus omnino deprehensum est. Divinæ providentiæ nutu contigit, ut ipse amico rem totam, uti postea dicitur, ingenuè aperiret.

*Testimonium Mar-  
lenfis pa-  
rochi de  
vita ejus  
Apostoli-  
ca.*

Nusquam populi major ad audiendum sanctum Missionarium concursus, nusquam uberior fructus, quam in Marlenfi pago fuit. Parochus, ejus hospes, affirmavit ipsum solitis Missionis exercitationibus ita districtum fuisse, ut sacrum Eucharistiæ cibum horâ post meridiem sextâ sæpe distribueret: totas pervigilasse noctes in populo erudiendo, & confessionibus audiendis; nullâ cibi & somni mentione, aut curâ, donec animum iis explevisset, qui ad eum è vicinis locis confluebant: exhaustis viribus aliquando sic fractum jacuisse, ut pedibus insistere non valeret. Tot immensis laboribus, ut idem parochus testificatus est, miras quasdam corporis pœnas adjiciebat, quotidianum & acre jejunium, itémque cilicium; nocturnam singulis diebus verberationem: somnum in scamno, eumque duabus, tribusve horis circumscriptum: cum reliquam noctem in ministerio Evangelico, vel meditandis rebus divinis, occuparet.

*Parochus  
frustrâ  
conatur  
efficere ut  
modum  
labori, &  
corporis  
afflictati-  
onibus  
imponas.*

Usque eò processit sanctum illud odium, quo carnem suam prosequabatur, ut parochus valetudini ejus atque adeo vitæ timens, putaverit seriò admonendum, nè mortem ipse sibi conscisceret, ac festinato interitu, dierum numerum, ipsi à superis definitum, præcideret. Negavit Regis se adduci posse, ut quæ suggerebat, valetudinis præsidia & levamenta, cautionesque ab humana lenitate & indulgentia dictatas, usurparet; cibum suum, quietem, & vitam, salutem esse animarum; nullo nos argumento probare certius posse nostrum amorem erga DEUM, quam ejus gloriæ devovendo quod habemus in terris carissimum, valetudinem, & vitam.

Non contentus parochus responso, cujus gravitatem & sapientiam mirabatur, cum nihil monendo rogandoque proficeret, aliam sibi viam ineundam putavit. Ad P. Ignatium Arnoux collegii Aniciensis Rectorem scribit, oratque ut sancti Missionarii zelum & austeritatem certos intrâ cancellos coërceat: *Nullum, inquit, labori & voluntariis pœnis modum statuit. Unam video frenandi hominis rationem, si tuam mihi demandes auctoritatem, adeo ut sumum*

*in*



*in me rectorem agnoscens, morem imperanti mibi gerat. Id nisi Lib. IV, fit, brevi ad extremas valetudinis & vite angustias redigetur.*

Rector, cui jam pridem notus Regis animus laboris & poenitentiae supra modum avidus, scripsit hinc quidem Parocho place-<sup>Jubetur obedire Parocho.</sup> re sibi ut Superioris partes omnes in DEI servum & auctoritatem suam obtineret; inde verò Patri Regis præcepit ut Parochi nutus omnes auscultaret in iis, quæ ad suam valetudinem pertinerent, tumque deinceps tanquam divinæ voluntatis interpretem haberet. Regis non erat e numero istorum, qui sic officia virtutis colunt, ut ea velint arbitrio suo moderari, sententiæ suæ tenaces, indociles alienæ. Imperio Parochi ac potestati se omnino subjecit: quemcumque ille præscribebat laboris modum, quæ levamenta fesso suggererat, ea sic accipiebat omnia, tanquam si fuissent à DEO ipso præscripta. Sanè permolesta illi accidebat indulgentia Parochi, quâ parcere sibi ac temperare jubebatur; sed obedientia, quam DEO præstabat in homine, spiritum poenitentiae, & odium sui ipsius, quo flagrabat, superavit.

DEUS obedientiam servi sui præcipuis quibusdam donis in <sup>Studium orationis: mentis excessus.</sup> hac ipsa Marleni Missioni muneravit. Quod functionibus Apostolicis tempus detrahare cogeatur, id in familiari cum DEO congressu consume-<sup>mentis excessus.</sup> bat, jacturam publicæ utilitatis, & animarum damnum quoddam, privatæ pietatis lucro sarcians. Parochus interdum noctu consurgens, & quid tandem rerum ageret observans, illum intuebatur nunc vultu prono, humi stratum, & in lacrymas effusum; nunc stantem, oculis in cælum coniectis, & in alta contemplatione demersum. Aliàs audiebat suspiria ducentem ab impectore, tum in eas voces, quas flamma caritatis accendebat, erumpentem: *Quid mibi est in celo, aut à te, quid volui super terram?* \* Per totum istud tempus beata mens servi DEI suavissimo Numinis amantissimi congressu fruebatur, aut à sensibus alienata, <sup>Psalm. 72.</sup> veluti rapiebatur foras. Testatus est Parochus, cujus mentionem jam feci, sæpe illum à se, dum oraret, conspectum, instar Seraphini ardere toto vultu, per complures horas immobilem, ac sensus omnis, ut apparebat, & cognitionis, expertem.

Hæc illustria gratiæ dona valuerunt ad declarandam privatim <sup>Energumenum liberat.</sup> viri Apostolici sanctitatem: alia in oculis hominum edita, latius eandem celebrârunt. Adductus ad eum est aliquando in ædem sacram à malo dæmone ab annis amplius octo possessus. Tartareum hospitem nulli exorcismi sæpius adhibiti abegerant. Ut ven-

Gg

nit

Lib. IV. nit in conspectum, jactare se scilicet ferocius, ululare, bacchari miris modis, populo cohorrescente, & ipso Regis diram possessionem deplorante. Qui fixo in cælum obtutu, postquam salutare crucis signum misero impressit, redditus sibi ille, ac lævâ possessione liberatus in perpetuum fuit.

*Multa a-* Alias, inquit idem Jacobus André, cum ex eadē sacra sanctum  
*lia prodi-* Missionarium domum meam reducerem, secuta nos est hominum  
*gia patrat* infinita multitudo. Rusticus è longinquo adveniens, confiteri pec-  
*in Mar-* cata nequiverat, quia Patrem è templo discedere multa jam nocte  
*lensi pa-* jusseram, pro ea, quam mihi dabat epistola Rectoris, auctoritate.  
*go.* Instabat avidus Patris alloquendi senex, utque obstantem turbam dimoveret, manibus, pedibusque præceps per medios ruebat. Prope meas ades clivus satius arduus assurgit. Urgentibus qui pariter festinabant, cecidit rusticus, & impacto in lapidem molarem brachio, humerum loco movit. Hominis calamitatem egerrimè Regis tulit: relegit vestigia, & humerum luxatum leniter attrectans, ei que bene precatus, illum in pristinum locum subito restituit. Deinde, exceptâ ejus confessione letum, sanumque, dimisit. In eadem Missione multis arcanas ipsorum cogitationes & consilia patefecit: aliis multa prædixit, que postea iisdem contigerunt.

His prodigiis magnus ad præclaram de sanctitate præstantis Missionarii opinionem cumulus accessit, omnesque Velaunorum montes vulgata latè fama complevit. Proprium illi nomen sancti, & Apostoli Velaunorum, consensus gentis fecerat. Perbeatos se arbitrabantur, quibus benediceret, quos audiret confitentes, quibus panem Eucharisticum porrigeret. Pio furto subducebantur ea quibus uti consuevisset, ac sacrarum reliquiarum ritu servabantur. Cum hac opinio de viri sanctimonia omnium animos peritè imbuisset, quid mirum si in pago Marlensi tam admirabilis facta fuerit morum in meliorem statum conversio?

Apostolici Missionarii excellentem virtutem cò certius prædicare possum, ( addit Parochus idem ) quòd ejus confessiones excepti tempore trium Missionum, quas in mea parœcia peregit. Quamvis degeret vitam ab omni labe ac rerum humanarum contagione disjungtam, nihilominus animum sacrâ confessione singulis diebus purgabat, eâ pietate atque humilitate que mihi pudorem incutiebant. Affirmare verè possum acceptam in sacro fonte innocentiam ad extremum usque spiritum ab eo conservatam fuisse. Nunquam hujus sancti viri memoria recurrit animo, quin me incredibili qua-  
dam

*dam voluptate delibutum sentiam. Ejus nomen, virtus, & vene-* Lib. IV.  
*ratio vigent adhuc inter Velaunos, ejusque laudibus nostri montes*  
*personare non cessant.*

Post emendatos Marlensium ac vicinorum mores, & è Chri- *Varios pa-*  
 stianæ disciplinæ legibus compositos, perrexit ad insigniores regio- *gos & op-*  
 nis pagos similibus præfidiis instruendos, Fanum S. Salvatoris, San- *pidula lu-*  
 cti Petri Machabæorum, S. Boniti frigidi, Vourcium, &c. Idem *strat, e-*  
 ubique successus, eadem animarum lucra. Non persequar omnia *rudisque.*  
 singillatim, nè repetendis iisdem rebus molesta sit narratio. Reli-  
 gio tamen est præterire quædam illustriora, quæ ad gratiæ cælestis  
 in servo DEI commendationem præcipuè valuerunt.

Venit ad eum rusticus in Fano S. Salvatoris mœrore exani-  
 matus, quia duos ejus boves militum turma præteriens abduxerat.  
 Eos nisi recuperò, aiebat, perii funditus; in iis enim fortunas  
 omnes meas, & alendæ familiæ spem collocatam habeo. Movit  
 virum benignissimum rustici calamitas, moverunt lacrymæ.  
 DEUM breviter precatus, *Abi*, inquit, *boves tuos recipe, ac præ-*  
*te resumptos age; nemo, crede mihi, molestiæ quidquam tibi ex-*  
*bibebit, aut quo minus eos abducas, obstabit.* Lætus promisso ru-  
 sticus in eum evolat locum, ubi milites prandii causâ constitierant.  
 Recipit, ut jussus erat, boves, ac præ se agit; militibus, qui ade-  
 rant, nihil contrà opponentibus. Gilbertus, sancti Petri Macha-  
 bæorum Parochus, gratias ingentes DEO semper egit, quòd sibi  
 contigisset nosse P. Regis, eumque hospitio excipere, dum in sua  
 parœcia Missionem obiret: negabat cognitum sibi quemquam au-  
 sterioris vitæ, & zeli ardentioris.

A Fano S. Petri Machabæorum progressus est ad parœciam  
 S. Boniti frigidi. Id nominis loco impositum propter inclemen-  
 tiam frigoris, quod ibi acerrimum. Senferat hujus pagi Parochus  
 Patrem Regis singulis noctibus egredi clanculum cubiculo. In-  
 cessit curiositas vestigandi quò pergeret, quid rerum ageret. Do-  
 mum aliquandiu scrutatus, cum nusquam appareret, procedit in sa-  
 cram ædem, non longè distantem. Ibi offendit ante valvas pro-  
 volutum in genua junctis manibus, & aperto capite, dum sævus  
 Aquilo aërem undique perflabat. Rogavit ut aliquam rationem  
 haberet valetudinis, quam in manifestum conjiciebat periculum,  
 complures noctis horas extrahens sub dio, tam rigidâ tempestate.  
 Cum eum ab orandi studio non posset avocare, templi claves illi  
 tradidit, in quo injurias aëris tectus effugeret. Rem gestam, uti

Lib. IV. à nobis narrata est, Parochus sæpe memorans, affirmabat DEI famulum pernoctâsse in templo, contemptâ frigoris immanitate, quæ intolerabilis anno illo extiterat.

*Ejus laborem immodicum Parochus Vourcii reprehendit.* Appetente æstate Anicium, ut solebat, properantem remoratus est Mauritius *Boyer*, Vourcii Parochus, olim Regis discipulus, & sancti Magistri venerationem altè infixam animo retinens. Dies non amplius octo in hac mediocri parœcia consumpsit, sed laboris diurni nocturnique plenos.

Indoluit Parochus pro sua singulari erga illum benevolentia. Quippe timuit nè fractis tam assiduo labore viribus, concideret penitus ac deficeret. Suum illi metum significavit, addiditque ipsum rationem concessæ valetudinis DEO redditurum, quam si prodigere pergeret, eò brevè redactum iri ut ad ferendam proximis opem, inutilis & mancus evaderet. Regis vicissim putavit se posse, hac datâ occasione, amico ingenuè confiteri, quod sibi ante menses aliquot eunti Marlem acciderat, quo in itinere cum fregisset crus, fuerat paucis post horis mirabiliter à DEO persanatus. *Post tam evidens divine bonitatis pignus*, inquit, *quid dubitem, timeamne, valetudinem illi meam, vires, & vitam, omnino permittere?* Hoc totum Mauritius *Boyer* coram Melchior de *Chabanes*, Vicario Generali Aniciensi, jurejurando interposito, testificatus est.

*Missio in pagum Monteregardo per hiemem anni 1638.* Finitâ Vourcii Missione retulit se anno 1638. Anicium, ad æstivam stationem, & solitas caritatis functiones. Exactâ æstate, hiems illum ad rusticanas Missiones revocavit. Earum initium à Monteregardo facere placuit. Major est pagus, septem tantum leucis Anicio distans. Eò paulò tardius, & noctu, pervenit propter asperum & incommodum tempus. Licet enectus frigore, defatigatus longitudine ac difficultate itineris, nihilominus templum rectâ, pro more, petiit; quod cum reperisset clausum, ante fores oraturus in genua procidit. Quamvis hibernum frigus atrociter desæviret, preces tamen attentissimâ contentione, producebat, cum à rusticis illac fortè transeuntibus deprehensus est humi jacens, & ferme totus nive coopertus, quæ densissima depluebat. Vix ab eo summis precibus impetrârunt ut vicinas in ædes se reciperet, depellendi frigoris, & cibi parumper sumendi, causâ.

Ut primum postera dies illuxit, Missionem aperuit, auditusque est incredibili studio & aviditate innumerabilis populi, qui ex pagis finitimis vicisque confluerat. Inter alias Missiones hæc una illum maximè delectavit, idque ob eam causam, quia fuit præ ceteris

teris laboriosa, ob acerbiter frigiditatem, & varia itinera, quibus **Lib. IV.**  
 Montemfalconem, Marcoum, & Chambonum, per inexplicabiles  
 vias lustravit: tum autem quia messem ex ea longè uberrimam  
 collegit. Pars hujus messis præcipua extitit numerus ingens hære-  
 ticorum ad catholicam fidem reductus. Cùm admirabili ac divi-  
 nitus insitâ polleret arte animos conciliandi, hanc feliciter adhibuit  
 in restituendis Ecclesiæ plurimis Chamboni, aliorumque pagorum  
 incolis Calvinianis, qui ad eum audiendum certatim concurrebant.  
 Sed nullam illustriorem de pestilente secta victoriam reportavit,  
 nullum illi gravius intulit vulnus, quàm redditâ partibus Catholi-  
 cis Ludovicâ de Romezin.

Hæc, vidua dives, annos duntaxat duos & viginti nata, ori- *Dominâ*  
 unda ex pago Chambono, Montemregardum tunc habitabat. De- *de Roma-*  
 derant operam pater & avus, quorum in ditione ac dominio erat *zin Eccle-*  
 nobilis fundus *de Mazaud*, ut arcana omnia Calvinianæ *sia Catho-*  
 scholæ ab adolescentia perdisceret, in iisque tantum profecerat, *lica resti-*  
 ut inter sectæ proceres non minùs eruditione & ingenio, quàm ge-  
 neris & formæ præstantiâ, emereret. Ceterùm ampla feminæ  
 mens, & nihil humile spectans, eadem recta, & veri, quod habe-  
 ret persuasum, tenax; judicium limatum, benigna indoles, & ad  
 virtutem quodammodo nata factaque. Errori, quem profiteba-  
 tur, decus & speciosam commendationem conciliabat feminæ sin-  
 gularis probitas, & erga inopes beneficentia. Tot collectis simul  
 dotibus id consecuta erat, ut exemplum mulieris numeris omni-  
 bus expletæ inter suos populares haberetur. Id unum jure ac me-  
 ritò doleres, quòd istæ dotes egregiæ ad famam tantum & aucto-  
 ritatem pernicioso dogmati comparandam valerent: in ipsa qui-  
 dem nihil reprehenderes aliud, quàm pertinaciam in errore, in quo  
 nata erat; unum desiderares, ut eundem aliquando deponeret.  
 Felix illud momentum advenerat. Res præclare ac mirabiliter ge-  
 stæ, quas prædicari de viro sancto audierat, illius videndi cupidi-  
 tatem illustri viduæ injecerunt, atque adeò concionantem audjen-  
 di. Sed cùm esset quasi dux Calvinianarum in ea regione partium,  
 id palàm facere verebatur. Præterea deterrebat innotum in ho-  
 mines Societatis odio, quamvis eorum neminem unquam nosset.  
 Vicit humanos metus curiositas. Cùm aliquando verba facturus  
 esset ante solis ortum, accessit clam, idque in turba, nè agnosce-  
 tur. Sanctitatis suavissima lux, quæ in vultu P. Regis emicabat;  
 cælestis verborum unctio, quæ aures animosque dulcissimè permul-  
 cebat;

Hh

cebat;

Lib. IV. cebat ; actio plena spiritûs & animi ; divinæ caritatis ardor, quo flagrare totus, cùm diceret, sentiebatur, Ludovicam admiratione percusserunt, assuetam audiendis aridis & jejunis suorum conciunculis, vel atrocibus in religionem Catholicam satyris. Tam piè tam vehementer affecta est primâ illâ concione, ut reliquis omnibus interesse decreverit : ac reipsa nullam deinceps prætermisit. De mutanda religione nihildum sanè cogitans, quin potius palàm affirmans se ad hanc mutationem nunquam adductum iri ; sed æquitaris studiosa mens faciebat, ut virtutem in concionatore catholico diligeret.

Hæc omnia postquam DEI servo renunciata fuere, intellexit quanti momenti esset, Ecclesiæ catholicæ reddere feminam tantæ dignitatis & famæ ; remque DEO impensè commendatam aggredi constituit. Opportunitatem cum ea colloquendi non difficile nactus, tam religiosè, comitèrque in sermonem ingressus est, ut ejus virtute congressûque capta, eundem iterum videre summo studio expetierit. Ac primus quidem ille sermo totus in rebus ad pietatem spectantibus versatus erat, nullâ mentione factâ eorum capitum, quæ Catholicos inter & Calvinianos veniunt in controversiam. In altero colloquio sensim inducta est in disputationem. Objecit multa ; multa quæsiuit : omnibus ità respondit vir sanctus, ut quamvis ejus rationibus convictam se non omnino fateretur, dicentis tamen modestia & eruditio ipsi planè satisfecerint ; nec dubitavit confiteri catholicum neminem à se auditum, qui mysteria nostra tam dilucidè ac luculenter explicaret ; utque tertium ad se rediret rogavit. Regis initio tam felici lætus, revisit illam postridie. Plurimos sacræ paginæ locos mulier, in Calvinii schola non rudis, citavit, quibus confirmari Calvinianum dogma videbatur. Eorum genuinum sensum tam enucleatè Regis evolvit, ut quod objiceret illa nihil habuerit. Interim, DEO ministri sui diligentiam & sollicitudinem adjuvante, veritas, post hunc congressum & alios duos, qui sunt consecuti, caligantibus oculis interlucere cœpit. Utque erat amans recti, stomachum ipsi præcipuè movebat mala Ministrorum hærescos fides, qui falsis coloribus depingentes catholicam religionem, ei dogmata, quæ nusquam docebat, affingerent. Hinc diffidere sectæ cœpit, quæ tam indignis ac putidis artibus ad inescandam simplicium credulitatem obreperet. Indè verò servi DEI sanctitas acres non improbæ mulieri stimulos admovebat. *Fierine posset, inquiebat, ut homo tam perspicax, tam humilis, tam soli-*

*solicitus de divina gloria, tam suorum commodorum negligens, ver. Lib. IV. faretur in errore, aut alios in eum inducere tentaret?*

Quàm difficile est opiniones, quibus, natalium & educationis vitio, imbuti pravè sumus, subito deponere! Ludovica de Romezin aliquandiu inter veritatem & mendacium miserè anxia fluctuavit, vocem decretoriam mittere trepidans, & sententiam pro catholica religione ferre. Longè ab illis mulieribus obstinatis discrepabat, quæ sectam semel amplexæ, sic illam retinent mordicus, ut apertis rationibus nihil præter inexpugnabilem pertinaciam opponant. Veritatem bonâ fide investigabat; semel cognitam omnino secutura; sed cavebat nè quid inconsultâ festinatione peccaret, ipsamque præcipitis postea consilii pœniteret.

Caligabat adhuc paululum in uno capite, quo scilicet Christum reipla præsentem in sanctissimo sacramento fides docet. Caliginem pæne momento DEUS discussit. Simul ac sacerdos eruditus exposuit quàm plurimos Euangelii & sanctorum Patrum locos qui hoc mysterium perspicuè demonstrant, illæ tenebræ, quibus obvoluta veritas tenebatur, evanuerunt. Expugnata hunc in modum mente, voluntas, nondum domita, repugnabat. Mutationis pudor, propinquorum & amicorum fuga, contemptus, odium, à quibus deserendam se videbat statim atque Calvinum deseruisset; jactura loci honorati, quem obtinebat inter sectæ primores, à quibus pæne instar idoli colebatur; sermones quos datura esset populo; in primis verò amantissimi patris ira, cui molestissimum id fore sentiebat; matris carissimæ dolor, quam ad desperationem adigeret. Hæc, aliæque id genus, animo dies noctesque obversantia, totidem vincula erant, quibus arctissimè constricta tenebatur, & quibus frangendis imparem se esse judicabat. Intestinum hoc animi bellum viro sancto aperuit, qui tam efficaci oratione declaravit ipsi necessitatem ineluctabilem veritatis amplexandæ, repudiato mendacio, ut humanis terroribus generosè superatis, in Ecclesiæ sinum redire omnino decreverit. Negotium tamen ut occultè transigeretur optavit; dandum hoc existimans familiæ, quæ graviter stomacharetur, ac fortasse ansam indè arriperet ad sæviendum in Catholicos, si ambizioso strepitu statim res prodiret in vulgus.

Ubi dies advenit ad hæresim ejurandam constituta, illi nuntium remisit eâ pietate, quæ lacrymas omnibus qui aderant, expressit. Ipsa triumphare gaudio visa, cum se in filiorum Ecclesiæ numerum cooptatam vidit. Expleri verò non poterat agendis

**Lib. IV. DEI servo gratiis, quem tanti beneficii auctorem professa, obsecravit ut operi suo manum extremam adderet, sibi que dux ad Christianæ vitæ perfectionem esse non gravaretur, ut morum innocentia sanctitati religionis, à se modò susceptæ, responderet. Ille, mulieris animum ad omnes virtutum satus excipiendos tam bene comparatum cernens, peculiarem adhibuit curam ut eandem ad vitæ spiritualis exercitationes rite formaret; in iisque, tanto rectore, magnos brevè progressus habuit.**

Cùm probè intelligeret Regis quantum ad religionis dignitatem & fructum pertineret ut feminæ tam illustris receptus ad Ecclesiam in publicam prodiret lucem, id magnopere cupiebat. Igitur, post aliquot mensium moram, jam, inquit, tempus est in apertum proferre, quod ad hanc diem clàm habuisti, & susceptam fidem solenni professione declarare. Quæ hæcenus fuerunt à te provisæ sapienter ad vitandam parentum offensionem & stomachum, ea certis circumscribi limitibus debent. Illi demum discipuli Christo probantur, qui non erubescunt Euangelium: \* illosque *coram Patre suo*, ut ipse profitetur, *erubescet*, \* *qui se coram hominibus erubuerint.*

\*  
Rom. 1.

\*  
Luc. 9.

Prudenti consilio morem sponte gessit mulier verè catholica. Publicè denunciavit se, relicta novâ religione, ad veterem rediisse; ac deinceps in suis moribus, in colenda pietate, in frequentando SS. Eucharistiæ Sacramento, in fugiendis rerum caducarum & profani seculi oblectamentis, splendidum Christianæ perfectionis exemplar veteranis æquè ac recentibus Catholicis exhibuit. DEUS vicissim ejus in accipienda & bene collocanda gratia fidem expertus, cælestibus illam deliciis, quas impetiri suis sanctis solet, eumulavit; tamque liquidis inter precandum delibuta gaudiiserat, ut iis neque exprimendis vox, neque mens capiendis, par esset.

His munienda propugnaculis meritò videbatur, ut quæ instabant, prælia sustinere posset. Ejus parentes auditâ solenni, quam ediderat fidei professione, velut icti fulmine, diriguerunt. Hæretica factio in eam, & in DEI servum, tanquam dementis transfugii principem atque architectum, atrociter est invecta. Omnes deinde machinæ, doli, captiones, admotæ ad labefactandam feminei pectoris constantiam: sed fides, quamvis recens fundata, & munita, sævos oppugnantium impetus inconcussa atque immota, propulsavit. Parentes expugnandi spe ademptâ, negotium illi præterea facessere desierunt.

At



At spes in quam adductus fuerat Christi famulus fore ut exem- Lib. IV.  
plum lectissimæ feminæ ad multorum salutem valeret, nec irrita  
fuit, nec lenta. Suscepta tam apertè, tam consideratè religio ca-  
tholica, eadèmq̃ue integerrimis ornata constanter moribus, ingen-  
tem catholicis lætitiâ, Calvinistis non paucis, Chamboni & aliis in  
locis, stimulos acres ad imitandum subjecit. Eorum non pauci  
nominantur in Actis Canonizationis. Ipsa tam studiosa modò re-  
ligionis veræ tuendæ ac propagandæ, quàm fuerat antea falsæ,  
partes & munia implebat concionatoris & Apostoli. Præclara opi-  
nio de illius virtute magnum ejus verbis pondus addebât; tum  
autem nihil aggrediebatur nisi de sententia sancti sui rectoris, cui  
se sociam, & adjutricem ubique præbuit, præsertim in Missionibus  
ab eo præctis in Montefalconis, Rocullis, Veirinii, & Lalovesi,  
ubi Evangelici curriculi, ac vitæ metam, vir beatus invenit.

Anno 1702. cum ageret ipsa annum 84. optavit publicum de  
sanctitate servi DEI testimonium dicere coram Episcopis Aniciensi  
& Valentino, qui Acta Canonizationis, & processum, ut vocant,  
instruebant Monasterioli (loco nomen vernaculum est *Monistero-  
les*) Abest hic locus spatio leucæ duntaxat à Monteregardo, ubi  
Ludovica degebat. Hoc iter, licet satis impeditum, licet affectâ  
jam ætate, pedibus & jejuna conficere voluit. Dum diceret te-  
stimonium, quod per horas quatuor tenuit, totidem pæne lacry-  
mas præ gaudio, quot verba, fudit. Mirati sunt duo Præsules in  
tam gravi ætate, vim ingenii, memoriæ fidem, & innatæ copiam  
facundiæ. Illud præ ceteris suspexere, quòd, cum sermonem pro-  
duxisset ad horas quatuor, cum tria passuum millia pedibus & je-  
juna confecisset manè, affirmavit nihilominus, si proficiscendum si-  
bi Anicium eodem die fuisset, hoc est, si conficienda amplius vi-  
ginti passuum millia, ut pro veritate testimonium rursus diceret,  
non dubitaturam dare se subitò in viam, ad enarrandas ejus egre-  
gias virtutes, quem, secundum DEUM, auctorem sui ad Eccle-  
siam regressus ac salutis, agnosceret. Tam beneficii memor, tam  
gratus erga DEI servum animus ejus erat!

Armandus de Betbunes, tunc Aniciensis Episcopus, qui non-  
minus honoris habebat illius virtuti, quàm generi, scripsit ad sum-  
mum Pontificem, visam juvenescere, ac vires novas recipere; non  
potuisse verò, cum testimonium diceret, à lacrymis temperare,  
quoties magistri carissimi nomen appellabat. Ejus filius annum  
agens septuagesimum secundum declaravit etiam non ità pridem,

Lib. IV. matrem suam ingravescente jam senio, annos octo & octoginta natam, nunquam de P. Regis sermonem intulisse, quin multo fletu sermonem aspergeret. Juvat ipsam loquentem audire. Quippe ex iis, quæ pro testimonio dixit sexto Idus Octobres anni 1702. facilius intelligi poterit egregia præstantis feminae indoles, & simul quam præclare de servo DEI existimaret.

Testimonium Ludovici de Romanis de sanctitate B. Regis.

*Elucebat in P. Regis, inquit, ipsi concessa divinitus præcipua dos homines à peccato ad poenitentiam, ab hæresi ad obedientiam Ecclesie, revocandi. Utrosque excipiebat modestia singulari & humanitate, eoque pacto attentos ad audiendum, & dociles ad obtemperandum præstabat. Simul atque miserat vocem, divino plenus esse spiritu judicabatur. Qui primus ejus sermo veritatem mihi catholicam explicuit, idem errores omnes, quos cum lacte hauseram, dispulit. Fateor nihil deinde à me auditum vel accommodatius ad docendum, vel ad persuadendum efficacius. Evangelica, quæ proponebat, effata, non tam per aures in animum demitti, quam ipsis oculis subjici, ac propè manibus tangi, videbantur; vel potius sentiebatur DEUS potentissima gratia voce intus loqui, cum ejus vox ad aures accederet.*

*Permagnum ejus verbis pondus afferebat austeritas vite: diurnas horas, ac plerasque nocturnas in templo consumebat; adeo ut sæpe à Parochis, ipsisque agrestibus, cogeretur paulò ante mediam noctem, è sacro poenitentiae tribunali discedere, cibi capiendi causâ. Quin, biduum quandoque traducebat cibi omnis expertus, totasque hebdomadas impastus exegisset potius, quam oblatam juvandi proximos occasionem omisisset. Tota ejus victus ratio continebatur aquâ, & pane secundario, qualem servis damus: bis interdum addebat oluscula, & paulum lactis. Si quid illi piscium mittebam, continuo in pauperes dividebat, nam ut carnes mitterem nunquam mihi in mentem venit, quippe quarum usum ab eo sibi penitus interdictum scirem.*

*A Montereguardo procurrebat per vias, visu incessuque horridas, ad erudiendos agrestes, nostris in montibus dissipatos. Nulla de temporis asperitate, aut difficultate itineris, querela: imò nunquam latior videbatur, quam cum gravioris aliquid incommodi tolerasset.*

*Accidit aliquando ut templo egrediens, ubi plurimum laboris exhauserat, multitudinem agrestium foris accurrentium conspiceret. Rediit continuo in templum, neque inde discessit antè, quam*

om-

omnium confessiones excepisset. Tot virtutes tam longè vulgarem Lib. IV.  
egressa modum, animos omnium ipsi mirè concitiabant; inde san-  
cti nomen illi vulgò factum. Certè persuasum erat omnibus nul-  
lum hereticum, nullum flagitiosum, aut ejus diligentiam effugere,  
aut sanctimoniam ac mansuetudinis illecebris posse resistere.

In Montisregardi Missione multis Calvinii discipulis eripuit er-  
rorem, quorum in numerum venisse me singulari meâ felicitate  
factum reor. Initio celatos parentes meos volui de impio Calvinii  
errore, quem ejuraveram, ut omnem fragoris ac tumultus inde  
oriturus, & excitanda fortasse in Catholicos vexationis acerrime,  
occasionem præciderem. Sed quanquam versarer in medio natio-  
nis pravæ, & in heretica familia sinu, sacrum tamen fidei meæ de-  
positum custodivi \* Per causam salutandi nobiles, in vicinia Mon-  
tisregardi, adibam proximorum pagorum Parochos, & apud eos 1. Tim. 6.  
peccata deponebam, mox in eorum templis, nemine conscio, panem  
Eucharisticum sumebam. Postquam felix meus ad Ecclesiam redi-  
tus vulgari coëptus est, ingens à parentibus, & amicis procella in  
me incubuit. Vim ejus omnem excepi & sustinui fortis in fide, \*  
quam à sancto magistro meo & rectore didiceram. Itaque nec 1. Petr. 5.  
preces nec lacryma matris mihi carissima; nec stomachus & mina  
patris, quem verebar equè ac observabam, unquam extorserunt  
ut ullam è perniciose sectæ, à me derelictæ, caerimoniis inanibus  
obirem. Quin etiam videbar mihi catholicam religionem, profu-  
so sanguine, libentissimè defensura; atque ita deinceps, nisi me  
fallit animus, comparata semper fui. Dux res (pergit fortis &  
pia mulier) potissimum adjuverunt, una, ut religionem catholi-  
cam susciperem; altera, ut susceptam constantissimè retinerem.  
Primum, viri sancti lenitas & admirabilis patientia. Licet enim  
verissimis & gravissimis ejus rationibus convicta, manus dare co-  
gerer, non cessabam tamen illi objicere agmen locorum è sacris pa-  
ginis sumptorum, quos memoria mandatos, tanquam in aciem edu-  
cebam pertinaciâ muliebri, ac furore potius. Ibi moderationem ho-  
minis admirata sum. Nullum ipsi verbum excidit, quo mihi crea-  
ret molestiam, aut superbiam meam contunderet. Audiebat omnia  
perbenignè, ac modesto interdum risu pervicaciam in tuendo errore  
increpitare satis habebat. Alterum, meam de Eucharistiæ myste-  
rio valde confirmavit fidem, & simul viri sancti pietatem declara-  
vit. Montemregardum ingressus primis se intendentibus tenebris,  
non itineris defatigationi, non frigori quo pane confectus erat, le-

**Lib. IV.** *armamentum ullam quaesivit, verum ad templum rectè contendit, pro  
cujus foribus clausis orans complures horas perstitit, à frigore in-  
victus, cujus illà hieme vis fuit longè gravissima.* Ea sunt quæ  
de virtutibus heroicis B. Regis rite testificata est Ludovica de Ro-  
mezin coram Armando de Betbune, Episcopo Aniciensi; & Guil-  
telmo de Champigni, Episcopo Valentino.

*Missiones  
circa  
Montem-  
regardū  
exeunte  
anno 1639.*

Hunc in modum felicissimè peractā Missionē Montisregardi,  
servus DEI, Anicium æstare, ut consueverat, regressus anno 1639.  
Autumno ejusdem anni senescente reuertit se ad hibernas Missiones  
circa Montemregardum, Isenjaum, Marcoum, Chambonum, &  
Monasteriolum, ubi obiter duntaxat concionatus erat. Consue-  
tos labores, ardorem, & vigilantiam, consueta quoque animarum  
utilitas, & successus est secutus; ut intelligitur è litteris P. Arnoux  
Rectoris collegii Aniciensis ad P. Murium Vitelleschum Præposi-  
tum Generalem Societatis, datis sexto Idus Januarias 1640.

P. Joannes Franc. Regis, inquit, *amplissimam ab Aniciensi  
Episcopo potestatem obtinuit, ad ejus diocesim solitis Missionibus ex-  
colendam. Promptum non est explicare quàm letas, quàm uberes,  
ex animarum cultura fruges indefessi bujus operarii zelus Apostoli-  
cus collegerit. Populi tanta frequentia, & Missionarii pervigilis  
labor tam assiduus extitit, ut minùs quatuor mensibus solus audie-  
rit decem minimùm millia confessionum, quarum ampliùs quingen-  
te totam vitæ seriem erant complexæ. Meritò nescias magisne mi-  
rari libeat tam ardens in populo studium salutis sempiternæ, an tan-  
tam in servo DEI alacritatem, sollicitudinem, patientiam, ut popu-  
li commodis ac pietati serviat.*

*Missio in  
Monte-  
falconis  
initio an-  
ni 1640.*

Jam dudum cupiebat Montifalconis operam navare, illectus  
spe opimæ messis. Distat hoc oppidum Anicio leucis septem, in-  
signi prætoris jurisdictione, quam balliviatum vulgò vocant; le-  
ctā & frequenti nobilitate, lautis & locupletibus civibus quàm plu-  
rimis, ornatum. Illuc pervenit sanctus Missionarius sub finem Ja-  
nuarii anni 1640. Anteverterat venientem innumerabilis populi  
turba, è circumjectis locis collecta. Votis ejus ac zelo responde-  
bat successus, cum repentina clades interruptit laborem & spes egre-  
gias profligavit.

Oppidum invasit pestilentia furore tanto, ut intrà paucos dies  
robustissimi conciderent. Mali contagies ad sanos momento per-  
manabat; nihil in arte humanisque remediis præsidii. DEI ser-  
vum incredibili dolore affecit populi calamitas. Crescente malo;

coa-

coactus intermittere ministerii sui functiones, hac unâ consolatio-  
 ne dolorem suum sustentavit, quod speraret se moriturum, instar  
 caritatis victimæ obsequio peste contactorum devotæ. Hortanti-  
 bus plurimis ut egressus oppido, salutis suæ consulere, respondit se  
 nullo mortis metu adductum unquam iri, ut eos defereret, quos  
 DEUS curæ suæ credidisset: nihilque cunctatus Ludovicum *de la*  
*Greul*, oppidi Parochum, rogavit sibi ut per eum liceret devo-  
 vere se obsequio laborantium.

Diu repugnavit Parochus, satis  
 gnarus eum voti compotem facere, aliud nihil esse, quàm eundem  
 in discrimen certissimum necis, ut erat vitæ prodigus, conjicere.  
 Ad extremum tamen populi sui necessitate durâ, & servi DEI re-  
 petitis precibus impulsus, quod petebat, annuit. Quàm misera-  
 bilis erat civium status, tam admirabilis fuit Beati viri labor ad eos  
 sublevandos. Sui contemptor, & periculi securus, omnium agro-  
 rantium curam unus suscepit. Lustrat diu noctûque infectas do-  
 mos; ubique præstò est jacentibus; aliis remedia, aliis alimenta,  
 universis quamcumque res tulit, opem subministrat. Si quis præ-  
 tereunti occurrebat derelictus æger, hunc amantissimè comple-  
 tens, imponebat humeris, & in valetudinarium deportabat. Quid  
 non molitur Apostoli zelus, quid non audet?

Ejus exemplo rursus accensa, quæ intepuerat, multorum sa-  
 cerdotum caritas, ad imitandum exarsit, & gloriosi pariter ac peri-  
 culosi laboris in partem venit. Quamvis inter putres halitus, &  
 ora ferentia, pestilentem auram continuò duceret; quamvis fere  
 omnes qui ad moribundos accedebant, ulcere letifero ferirentur,  
 contigisse haud sinè miraculo creditum est, ut illi valetudo & vita  
 constaret. DEUS nimirum invigilans servo suo, eum ad publicam  
 utilitatem salvum & incolumem servabat. Unus ipsum angebat  
 dolor, quòd se in omnes dividere, omnibûsque satisfacere, nequi-  
 ret. At ejus dolorem cumulavit Parochus, cum animadvertens  
 eum nullâ cautione adhibitâ, morrem laceßere, vetuit nè præterea  
 laborantibus adesset. Id porrò hac ratione contigit.

Nonnulli è Clero, Regis exemplum & caritatem imitati, mor-  
 bo corrépti perierunt. Multorum ardor refrixit illorum obitu, qui  
 novas contrâ DEI famulo subjecit faces, novos ejusdem curis & as-  
 siduitati stimulos addidit, spreto fortiter discrimine, quod quisque  
 ipsi timebat. At sacerdotes, quos à curandis ægrotis metus ab-  
 terruerat, Parochum convenerunt, & per speciosum publici com-  
 modi nomen, ac reipsâ ut suæ debitum ignaviæ pudorem leva-

Kk

rent,

**Lib. IV.** rent, seriò Parochum monuerunt ægre totum oppidum ferre, quòd Patrem Regis, hominem scilicet quantivis pretii, manifestum vitæ discrimen adire pateretur. Non esse committendum ut diutius in urbe remaneret. Id prudentiæ, id caritatis legem postulare. Parochus, cui curæ & cordi salus P. Regis erat, non difficilè monentibus est assensus. Nè quid tamen præproperè decerneret, nève populus conqueri jure posset ereptum sibi nulla satis gravi de causa hominem adeò necessarium, placuit exquirere sententiam Joannis de Chabanacy, notæ nobilitatis & sapientiæ viri, quem Patris Joannis Francisci amicissimum esse constabat. Primum illud ambobus minimè dubium est visum, si Regis pergeret habenas laxare pietati suæ ac zelo, futurum ut brevè, ceterorum more, succumberet. Hoc posito, considerârunt hinc quidem, si discedere cogeretur, spoliandos cives solo, quod illis restabat in tanta calamitate, solatio: indè verò non esse consentaneum, nè quid civitas una pateretur incommodi, tot alias privari auxilio, quod ipsis ad suarum profectum animarum afferre viri sancti labor & incolumitas posset; salutem & commodum integræ provinciæ anteponendum privatorum aliquot solatio & utilitati.

*Jubetur à  
Parocho  
curam la-  
borantiū  
deponere.*

Hæc ratio potior visa. Itaque vocat sanctum Missionarium Parochus, eique denuntiat cedendum oppido; se invitum huc descendere; illius quidem discessum omnibus incolis molestum fore; sibi verò eundem esse permolestum; ac conscius gravis culpæ mihi viderer, inquit, si pergerem te in periculum inferre, quem salvum & incolumem esse, totius regionis interest: ac mihi Rector tuus meritò succenseret, si te diutius tam evidenti exitio committerem.

Regis, imperio tam inexpectato attonitus, aliquandiu obtinuit. Mox ad Parochum conversus, *Siccine*, inquit, *invides felicitati meæ? Siccine falsâ commiseratione ductus, oblatam mihi pretiosæ mortis meritum doles, & coronam quam habeo ferè præ manibus, eripis? Malum & periculum esse gravissimum confiteris, ergo mihi ob eam vel maxime causam manendum est, ut laborantibus opem feram. Quid miseris, quæso, fiet, si eos in tanto periculo destituam? Illorum animæ, & earum salus millies meâ mihi vitâ carior est.* His adjecit alia plurima quæ caritas Apostolica suggerebat. In vultu, in sermone, dolor, quo intimis sensibusangebatur, eminebat: crevit ille majorem in modum ubi Parochum nullis precibus, nullâ obtestatione victum perseverare in sen-

sententia vidit. Nihilominus cum haberet persuasum nullam of- Lib. IV.  
ferri DEO victimam gratiorem posse, quàm animum quodam qua-  
si obedientiæ cultro mactatum, morem gessit imperio Parochi,  
quem tanquam divinæ voluntatis interpretem spectabat.

Mœstissimum oppidum, inter plangentis populi gemitus, ip- *Oppidum*  
se mœstissimus deseruit. Parochus & optimates carissimum paren- *mœstissi-*  
tem comitari, & magnam cum eo viæ partem conficere voluerunt. *mus dese-*  
Occurrit erecta crux ad ducentissimum ab urbe passum. Ibi posi- *rit.*  
tis humi genibus aliquandiu oravit, & assurgens, manantibus la-  
crymis, oppido bene precatus est. Prout aliquantum viæ proce-  
debat, oculos mœrore ac fletu suffusos urbem versùs, & carissimos,  
à quibus avellebatur, filios reflectens, tristes gemitus edebat. Cum  
autem Parocho & ejus comitibus supremum valedicendum fuit, in-  
gens utrinque coortus mœror. Ejus affusi genibus oraverunt ut  
omnibus bene precaretur, eosque suis apud DEUM precibus com-  
mendatos haberet: ipse singulos suavissimè complexus, lacrymis  
suis perfudit. Tunc arcano se instinctu impulsus sentiens ut pro  
iis pestilentia liberandis Numini supplicaret, paulum se collegit  
orandi causâ; & statim sereno vultu, *Macti animis*, ait, *carissi-*  
*mi; quæ vestram urbem populatur plaga, brevè consanescet.* Ex-  
ceptæ sunt voces instar prædictionis; lenivit metum spes promissæ  
& expectatæ sanitatis, & civium animos vel abjectissimos erexit.

Regis vicissim, monstrato quasi per caliginem lumine, ac spe *Suis præ-*  
injectâ latus, Montemregardum illo die petiit. Postridie, ac se- *cibus ur-*  
quentibus diebus vicinam Montifalconis viam ingrediens, in lo- *bem pesti-*  
cum editiorem evadebat, unde prospectus totum patebat in oppi- *lentiâ li-*  
berat.  
dum. Ibi ardenti prece Patrem misericordiarum obtestabatur, ut  
miseram gentem pretioso filii sui sanguine redemptam benignè re-  
spiceret. Ità diu ac multum precatus, ter oppido sublatâ manu  
benedicebat. Non longa fuit prædictionis implendæ mora. Non-  
dum elapso triduo abiit omnino pestis, & iis ipsis, quos invaserat,  
valetudo rediit.

Inutilis Montiregardo Regis præsentia non fuit. In oppi- *Peste la-*  
dum pestilentia tristi contagione prorepserat, & quamvis multò *boranti-*  
mitius, quàm in Montefalconis, sæviret, materiam tamen exercen- *bus operâ*  
dæ caritatis in sublevandis ægrotantibus, sanè gravem & laborio- *navat in*  
sam servo DEI obtulit, gratulanti repertam in Montere- *Montere-*  
gardo.  
ream, quam sibi perquam invito amicorum timida benignitas in  
urbe vicina eripuerat. Statim atque rescivit pestilentiam Mon-

**Lib. IV.** tefalconis decessisse; illuc rediit ad instaurandas intermissæ Missionis exercitationes. Redeuntem excepit publica lætitia. Personabat civitas vocibus plaudentium: hunc patrem, hunc liberatorem suum omnes prædicare, illique sanitatem & vitam acceptam referre. Sic affectos incolas nactus, animos quocumque voluit inflexit. Nusquam major numerus redeuntium ad bonam frugem; nusquam reditus sincerior: nec dubitabat fateri nullam Missionem tantum sibi voluptatis attulisse.

*Missionis  
Montis-  
falconis  
rursum  
abrumpe-  
re cogi-  
tur.*

Dum laboris Euangelici dulcissimos fructus in horreum Patrisfamilias condere pergebat, novus obex necessitatem rursus interrumpendæ Missionis imposuit. Anicii Rector illi properè significari jubet, nè cunctetur advolare ad implendum vacuum Professoris in collegio locum, cui subrogari aliquem alium confestim oporteat. Facile quisque intelligit quàm durum accidere sancto Missionario debuerit, maturam messem, cum jam feliciter succidebatur, abrumpere. Ipsa res hortari videbatur, ut dolorem justum superiori suo exponeret, nec ea reticeret quæ Apostolici zeli facundia libertasque suggererent. Sed obedientiæ meritum vir sanctus ceteris omnibus semper antetulit. Frustrà Parochus rogavit ut iter, bidui spatio, non amplius, procrastinaret: daturum se interim operam ut Rector de rerum statu doceretur. Nullam interponi moram passus est vir obediens, & neglectâ tempestatis asperitate, viam illâ ipsâ die pedibus arripuit, summo incolarum omnium mœrore, quem consolari nihil potuisset, nisi se autumno sequentis anni rediturum esset pollicitus.

Ubi primùm Anicium attigit, litteras ad Præpositum Generalem dedit, quibus postulabat, sibi ut per eum liceret reliquum vitæ tempus in rusticanis Missionibus consumere, aded ut in his saltem sex menses singulis annis collocaret. Extant litteræ in tabulario domus Professorum Romæ. Appositam diem habent Kalend. April. 1640.

*Obtinet a  
Præposito  
Generali  
Societatis  
facultatē  
sex men-  
ses collo-  
candi  
quotannis  
in rusti-*

*Eò confidentiùs ad Reverendam Paternitatem Vestram scribo, inquit, quòd scio illi maximè cordi esse unum quod hac epistolâ summis votis efflagito: scilicet mihi ut liceat obeundis ruri pagis, quod superest vitæ & virium salutem rusticorum devovere. Certè non potest explicari quos pariant fructus hujusmodi Missiones; nec id mihi persuaderem, nisi expertus id ipse essem: atque utinam experiri sapius contigisset. Obtestor igitur per DEUM, ut mihi liceat saltem singulis annis, quinque aut sex menses in hoc divino ministerio*



sterio ponere. *Episcopus Aniciensis dedit mihi amplissimam potestatem in totam suam diocesim. Complures parochi, populique summis precibus Missionem postulant. P. Rector operam meam in suo collegio necessariam existimans, in eo me identidem occupatum tenet, dum agrestis multitudo jacet in pagis presidio destituta. Consideret, queso, vestra Paternitas, arbitrium incolas abundare panibus, ubi miseri rustici male pereunt fame, quia deest amica manus que divini verbi panem illis frangat. Confido fore ut meis votis paterna vestra benignitas annuat: ita meum dolorem de negata mihi Canadensi Missionem consolabor. Reverende Admodum Pater, Reverende vestra Paternitatis Humillimus in Christo servus Joan. Franc. Regis. Anicii, Kalendis April. anni 1640.*

Præpositus Generalis, cui nota pridem Regis Apostolica virtus, quod petebat ultro concessit. Responsum Præpositi ad servum DEI perlatum est, quo tempore P. Joannes Fillæus Provincia-  
lis collegium Aniciense lustrabat. Is, de Præpositi Generalis epistola & assensu certior factus, vehementer lætatur est approbari ab illo & ratam haberi facultatem, quam ipse Patri Joanni Francisco jam concesserat: ad eumque scripsit tertio Kal. Sextiles 1640. brevè repetendas à DEI servo solitas Missiones. P. Regis, inquit, hoc anno per quinque menses, jussu Episcopi Aniciensis, in consueto Missionum curriculo defudavit, admirabili fructu, qui superiorum Missionum ubertatem longè superavit. Ad opus idem Evangelicum statim rediturus est, ut parochorum & populorum votis satisfaciat, à quibus certatim expetitur.

Dum ejusdem anni ætatem exigebat Anicii, totus in emendandis peccantium moribus, & sublevanda egentium inopia, venire ad eum frequentes legati ex omnibus agri Velauni, & plerisque Vivariensis agri partibus. Orabant ut regionibus suis partem aliquam soliti laboris impertiri dignaretur, idque illi ut persuaderent, varias animarum clades, ac detrimenta pietatis fusiùs exponerent. Morum corruptela, inscitia religionis, quæ dolenter describebantur, summo illum mœrore affecerunt. Sed quid ageret solus in tantis malis? Post longos gemitus ad implorandam DEI misericordiam, dignum heroico pectore consilium animo informavit, nempe ut unum in cœtum congregaret complures Missionarios bene lectos, & eodem, quo calebat ipse, spiritu animatos, qui, agminis expediti more, arma doctrinæ Evangelicæ per Velaunorum, Vivariensium, & Gebennicos montes, circumferrent, bel-

Lib. IV. lúmque internecinum vitiis, impietati, & hæresi continenter indicerent, præsertim in montibus Gebennicis; hanc enim provinciam peculiari curâ censebat indigere, propter vastitatem & immanes ruinas, quibus per hæresim jacebat miserè deformata & prostrata.

Injectam sibi à DEO mentem constandæ hujusmodi Missionariorum sodalitatis, ex qua prodirent excellentes operarii ad excolendas Velaunam, Vivariensem & Gebennicam provincias, Reçtori suo aperuit. Addidit in collegio Aniciensi, aut Turnonensi, collocari seminarium posse, in quo ad functiones Evangelicas, homines illi Apostolici formarentur. Quod si non displicet consilium, inquit, non est laborandum de executione: in me recipio curam & onus inveniendi necessaria operi fundando tuendóque vectigalia. Summopere placuit Reçtori consilium, seque litteras ad Præpositum Generalem daturum pollicitus, in hæc verba illi scripsit. *P. Joannes Franciscus Regis mihi significavit se magnum opus moliri, auctore, ut apparet, DEO; nempe Socios sibi adsciscere meditatur strenuos plures Missionarios, quibuscum, collatis consiliis & curis, incumbat in erudiendos montium nostrorum incolas, qui miserabili rerum divinarum ignorantia laborant. Vix quisquam cogitando assequatur quo studio, quâ vigilantia, sanctus hic Missionarius Apostolica munia exerceat, & quam præclaros ex illis fructus colligat. In postremis, quas obiit, Missionibus confitentes audire incipiebat tribus ante diluculum horis; neque finem imponebat huic sanctæ & laboriosæ occupationi, nisi pluribus post solis occasum horis. Sæpe accidit ut numerosa agrestium catervæ, post confectas tota nocte quinque sexve leucas, jejune toto die insequenti perstiterint, quia potestas nulla propter affluentem turbam erat peccata deponendi, aut Eucharistia sumenda, ante vesperam. Hinc intelligi facile potest quæ fructuum ubertas futura sit, si meditatum opus ad exitum perducere, uti spero, possit, & unam in sodalitatem similes sui Missionarios congregare. Præpositus Generalis mentem servi DEI vehementer probavit; ut patet è litteris, quibus Reçtori sic respondet. Magna cum voluptate cognovi è R. V. litteris quàm utiliter, & fructuosè operam in Missionibus Pater Joannes Franciscus Regis collocaret. Nec minore latitia sum affectus cum ejus consilium rescivi de constanda Missionariorum societate, agrestibus erudiendis unice addicta, quæ illius Apostolico zelo & ampliora porriget spatia, & perpetuitatem quandam conciliabit. Vix credas quantum mihi probetur opus tam salutare.*

Hor-

*Hortaberis illum, meis verbis ut ei manum ultimam imponat. Vel Lib. IV. ipsa operis idea & imago mirificè me recreat, & in spem magnam adducit summa cujusdam utilitatis à populo capiendæ. Societati nostræ gratulor, ac nominatim Aniciensi vestro collegio, tam sanctos, tam gloriosos, hujus hominis Apostolici labores.*

In eandem ferè sententiam rescripsit P. Joanni Francisco Præpositus Generalis. Addit in extrema epistola, se piis ejus consiliis, quamcumque posset, opem allaturum, ac potissimum præcipit, ut se faciat certior in quo possit auctoritate suâ promovere sanctum & nobile opus, quod ipsi significaverat.

Hoc loco est observandum eandem injectam à DEO mentem fuisse hoc ipso anno 1640. P. Juliano Maunoir, excellenti pariter Missionario Societatis JESU è provincia Franciæ. Is, cum jam annos 43. vixisset, informavit animo simillimum opus ad propagandas in Britannia Aremorica, quas felicissimè inchoaverat, Missiones; & habuit satis spatii ut operi culmen imponeret; idque adeò solidis nixum est fundamentis, ut ab eo instituta Missionariorum Societas hodièque vigeat, & Apostolicas functiones obire singulari cum fructu pergat. Quod attinet ad P. Regis, cujus attritæ exhaustæque laboribus, & voluntariis cruciatibus vires erant, ille solam operis tanti designati laudem tulit.

Instabat nihilo secius, & omnes indagabat vias, quibus opus *Instaurat* ex sententia succederet, cum albicantia jam nivibus montium ca- *Missionē* cumina monuerunt advenisse tempus hibernarum Missionum. *Montis-* *falconis,* *Autumno* *anni 1640.* Ergo, relicto Anicio, ubi ætatem exegerat, promissi memor, quo se Montemfalconis repetiturum fuerat pollicitus, huc iter flexit in-  
unte Autumno anni 1640. ad redintegrandam Missionem, bis in eodem loco intermissam.

Ubi primum felix de illius adventu nuntius percerebuit, exilire omnes ac triumphare gaudio. Cum verò coram intueri licuit Apostolum & liberatorem suum, (sic enim eum appellabant) nullus lætitiæ & festis cantibus, nullus lacrymis, quas tenera pietas eliciebat, modus fuit.

Novam sancto Missionario alacritatem hæc civium alacritas addidit: cumque præsensisset arcano quodam instinctu se non abesse longè à curriculi sui metâ, nusquam sibi minùs pepercit, nusquam fructus uberiores decerpit. Præter doctrinam Christianam, pueris assiduè traditam, ter singulis diebus ad populum verba faciebat; reliquum tempus audiendis confessionibus, visendis pau-

Lib. IV. peribus & sublevandis, terebatur. Nulla in Missione populus ad pietatis exercitationes magis assiduus, & frequens; in nulla promptior ad castigandam morum licentiam. Oppidani, alios in homines transformari, nascentis Ecclesiæ imaginem pulcherrimam exhibebant. Tam altè insculpta insidebat omnium animis opinio de sanctitate Missionarii, nemo ut illi dicenti repugnaret. Ad eum concurrebant omnes, ut sanctum viderent; sic enim loquebantur; omnes ardebant eundem alloqui, & quæ dabat ipsis monita, excipiebant venerabundi, perinde ac si fuissent ex ipsiusmet DEI ore profecta. Surripiebatur ipsi, quidquid usu domestico contrectasset. Petrus de Chabanacy Montisfalconis medicus, clàm suffuratus ipsi scipionem, quo iter faciens utebatur, affirmavit hunc baculum ægrotis admotum, quo more sacræ solent adhiberi reliquiæ, morbos innumeros mirabiliter depulisse.

*A Monte-  
falconis  
transit Ro-  
cullas, &  
Veirinum.*

Postquam Montisfalconis incolæ cœlestibus præidiis per mensem integrum instruxit, Rocullas, atque indè Veirinum transit, quibus in locis ejus caritas eodem ardore, nec dissimili fructu, longè latèque ad salutem animarum se profudit. Magna fuit hoc anno hiemis inclementia, sed nulla vis frigoris laboriosum tenuit operarium, quo minùs vicos omnes & mapalia pedibus obiret. Istarum, quas omnium postremas peregit, Missionum nullum specimen illustrius dare possum, quàm si verba ipsa Ludovicæ de Romezin hîc intexam, quæ illas velut in tabella breviter, at graphicè, depinxit in suo, cujus mentionem fecimus, testimonio. *Secuta sum, inquit, sanctum animi mei rectorem à Montereardo ad Montemfalconis, Rocullas, ac Veirinum, cum aliis plerisque cujuslibet ætatis & conditionis. Testis fui, & magna pars agri Veirini mecum, nunquam ejus sanctitatem, nunquam studium salutis alienæ, splendidiùs, quàm in his ultimis Missionibus, enituisse.*

*Res illi erat cum hominibus imperitis, rudibus, insulsis: in quibus nihil non asperum atque agreste; qui opportunè, importunè, in eum irruebant. Illos vir sanctus excipiebat admirabili suavitate, incredibili patientiâ auscultabat. Nulla de illorum gravi numero, aut narrationum inficeta longitudine, querimonia: imò etiam ad reculas ipsorum, & rei familiaris tricas percipiendas, atque componendas, maternâ quadam sollicitudine descendebat. Idonea curandis eorum animabus remedia, ut ejusque status, & captus erat, adhibebat. Itaque successum salito feliciorum ejus labori DEUS indulxit, & in ea regione, cujus mores valde contamina-*

*ti*

*ti erant, infinitos propè mortales è peccati sordibus eduxit. Illo-Lib. IV.*  
*rum benevolentiam & fiduciam arte mirabili concessa sibi divinitus*  
*adjungebat. Neminem improbum discedere ab ipso vidi, non per-*  
*fusum lacrymis, non serio dolore concussum. Nec in eo minus au-*  
*xilii probis erat, quos inflammabat exemplis vehementius, quàm*  
*verbis. Totus ipse divinum amorem spirabat, eoque statim accen-*  
*debatur, cuicumque illum intueri, aut alloqui contigisset. Ceteris*  
*cupiditatibus in illo velut mortuis, una vivere videbatur, DEUM*  
*amandi, & ad ejus amorem omnes adducendi.*

*Post diem totum sine cibo potuque in laboriosis Evangelici mini-*  
*sterii exercitationibus consumptum, vulgò sub vespèram abstraben-*  
*dus quasi per vim erat à sacro pœnitentiæ tribunali. Nemo ca-*  
*piebat quo pacto sustentare vitam posset in tanto, tam assiduo labo-*  
*re; in gravissimis quibus affligere corpus consueverat, cruciati-*  
*buis. Benignè illum identidem admonebam, sibi necem ipsum con-*  
*sciscere; futurum tandem aliquando ut natura tot laboribus victa*  
*fatisceret. Verùm amor crucis nè me audiret prohibebat.*

Jam salutaris doctrinæ ac perfectæ pietatis rorem per agros *Divino*  
 Montisfalconis, Rocullensem, & Veirinensem abunde sparserat; *lumine*  
 novum laborem otii, & quietis immemor aggreditur, ac Missio- *collustrat-*  
 nem Laloveschi habendam ultimis Adventûs Dominici diebus, in- *tus immi-*  
 dicit. Tunc, DEO docente, perspicuè cognovit Missionem hanc *nentem*  
 sibi postremam fore. Quamobrem redire Anicium statuit, ut a- *sibi mor-*  
 nim colligeret per dies aliquot, rationesque supremo judici red- *sem co-*  
 dendas componeret. Anicium revertenti occurrit collegii villa, *gnoscat.*  
 in qua cum adesse Patres illo die rescivisset, ingressus est ad eos sa-  
 lutandos. Tantò gratior ipsius adventus fuit, quantò minùs expe-  
 ctabatur; nonnullisque dictitantibus eum scilicet advenisse ut na-  
 talitias Christi Domini ferias cum Patribus transigeret, negavit li-  
 cere sibi diu jucundissimo ipsorum conspectu frui, indictam Lalo-  
 veschi Missionem ad pridie Natalem Domini, expectari se à popu-  
 lo, quem non conveniebat commodi sui causâ frustrari prædiciis  
 spiritualibus ipsi promissis.

Cum Patribus aliquandiu collocutus, seduxit unum è turba,  
 quo familiariùs utebatur, & imminentem, inquit, obitum certis  
 indiciis auguror; id ago ut ad novissimum hunc diem piâ dierum  
 aliquot solitudine me comparem. Fac, obsecro, ut me consiliis  
 tuis in re tanti momenti adjuves. Aggressus Pater hanc illi men-  
 tem, & instantis mortis persuasionem eripere, ubi vidit rem con-

Mm

stan-

Lib. IV. stanter & affirmatè ab eo pronuntiari, minimè dubitavit quin se meliore vita brevè donandum, DEO ipso monente cognovisset.

*Ad mortē* Noctu Anicium subiit, nè quis eum rediisse cognosceret, nè *se compa-* ve hominum concursu pia, quam destinabat, solitudo turbaretur. *raturus*, Collegium ingressus, continuò se in cubiculum conclusit, in eoque *in sacram* triduum perstitit, nemine ad familiarem congressum admissio; se- *dierum a-* cum, & cum DEO, habitans, ac propheticum illud animo inte- *liquot so-* riore versans. *litudinem* *fecedit.* *Cogitavi dies antiquos, annos aeternos in mente ha-* *bui.* \* Jam terras deseruisse videbatur, ac tanquam proximè ad *Psal. 76.* supremum vadimonium, summumque judicem venturus, nihil omisit ut expeditam, & ad severiores calculos probè subductam, totius vitæ rationem illi redderet. Exacto triduo, confessionem ab ultima ætate repetitam, ut illo ipso die moriturus, exposuit sacerdoti, cui deinde in familiari sermone aperuit ardentissimum, quo flagebat, DEI sui possidendi desiderium, & mentem æternitatis beatæ cogitatione votisque defixam.

Lalovescum petiturus, & amicum valere jubens, quærenti an non rediturus in collegium esset ineunte Januario, ut Renovationi votorum interesset. *Id quidem*, respondit, *facerem non invitus: sed redire me berus vetat.* Pro certo habeo, retulit amicus, *fateturum te rem gratissimam P. Rectori, si præstò sis ad banc carimoniam obeundam; addo illum id percipere, ut pietatem nostram accendas præsentia tuâ.* Non mihi venit in dubium, subjecit Regis, *P. Rectoris erga me voluntas: sed iterum dico, nè revertar prohibet berus.* Aderit Socius meus, ipse non adero. Atqui, institit amicus, *nequaquam deceret stare te solum ruri.* Sic erit tamen, inquit Regis, *sic berus jubet.* Quid lateret in hac oratione mysterii, amicus tunc assecutus non est; verum decimo post die, cum de morte viri sancti allatum esset, facile intellectum fuit quid sibi veller, cum aiebat per herum stare nè rediret. Pridie quàm discederet, nihil prætermisit Rectoris cura ut eum Anicii retineret, tam importuna, tam tetrica temporis facies erat. Objicit viarum inexplicabilem difficultatem; vim frigoris intolerabilem adultâ jam hieme, inter horrendos & inaccessos Lalovesci montes: hoc uno itinere valetudinem ipsius, quatuor mensium Missionibus & ærumnis debilitatam, profligari penitus posse. Respondit Regis constitutam Lalovesci Missionem, datam populo fidem, quam fallere nefas esset: ceterum se arcano impulsu, & potentiore quadam vi ad

ad discedendum urgeri. Quæ narrabantur aspera, & perperu in Lib. IV tolerabilia, hæc Apostolico viro in votis erant.

Compositis quibusdam, ad pauperes & Refugium spectantibus, negotiis, Anicio discessit undecimo Kalendas Januar. Lalovescum postridie perventurus. Quamvis hic pagus septem tantum leucis absit Anicio, nihilominus hoc iter à peditibus hieme confici, nisi biduo, non potest, ob effusos campis torrentes, & altissimos agri Velauni montes, tunc nivibus & glacie coopertos, ac vallibus difficillimis intercisos, adeò ut plerisque in locis ascensu perpetuo, descensuque, via & longior & molestior evadat.

Quid ærumnarum in hoc itinere, pertulerit videtur fidem superare. *Via*, inquit Ludovica de Romezin, *tam difficiles erant, tam invia, ut vir sanctus coactus fuerit glaciem multis locis per-rumpere, ut iter aperiret, & manibus reptando scandere nunc in mo-* *Lalovescum petit itinere difficilli-*  
*præruptas cautes, nunc in angustos calles, lubricos, & præcipitiis ac voraginibus tremendis præcinctos, in quas corruendi periculum præsens & continuum imminebat.* Hæc totidem verbis dixit pro testimonio lectissima femina, quæ postremis emeriti operarii Missionibus interfuit, atque huic novissimæ Lalovesci, tribus tantum leucis distantis à Monteregardo, ubi tunc ipsa morabatur. Ità rationes suas subduxerat Regis, ut Lalovescum decimo Kal. Januar. accederet; verum eò ipso die itinere deerravit, & media inter nemora nox errantem oppressit. Diu evagatus deprehendit se Veirino non longè abesse, quo in pago Missionem paulò antè obierat; nec erat Lalovescus procul, & eò usque pergere summopere avebat: sed ità languēbat de via, ut ad aliquod tugurium divertere necesse habuerit, ubi exhaustas vires quiete modicâ reficeret. Pulsat igitur casas ostiatim, cumque, ut apparet, nulli se cognoscendum præbuisse, nemo repertus est qui viatorem ignotum, intempestâ & perfrigidâ nocte admittere sustineret. Quæcumque fuerit istius inhumanitatis causa, videtur illa non sinè peculiari nutu DEI contigisse, qui cum sit *admirabilis in sanctis suis*, servi sui virtutem, ut aurum obryzum, expurgare sic destinaverat.

Defectus viribus, & ægre pedibus insitens, evasit denique *Pernoctat in tugurio* ad semirutum & derelictum in pagi limite tugurium; vento, im-  
bri, & hiemi, pervium. Ibi noctem exegit, stratus humi, & sæ- *semiruto, ac lateris*  
vitiam omnem liberi Aquilonis excepit. Ut parietinas illas subie- *dolore*  
rat sudore diffuens, concrevit frigore aspero constrictus sanguis, *gravi cor-*  
& lateris dolore gravissimo, simulque acutâ febris, correptus est. *ripitur.*

**Lib. IV.** Crescebat interim majorem in modum dolor; sed hunc vicissim *Missionē* suavissima consolatio leniebat. Mapale ruinosum genuinam offerebat animo imaginem Bethleemitici stabuli, ubi Christus oppido toto pulsus, omnibus destitutus commodis, in orbem hunc prodierat. Illum summa cum voluptate intuebatur in stramine jacentem, nec cessavit totam noctem gratias agere superis, quod sibi divini sui Magistri paupertatem & ærumnas persimili tempestate, persimili loco, liceret imitari. Spreta doloris acerbitate, ac febris æstu, viæ se commisit primâ luce, & Lalovescum usque ægerrimè prorèpens, eò demum manè pervenit nono Kal. Januar.

*Novissimi  
ejus &  
immediati  
labores:  
illum ani-  
ma sapius  
deficit.*

Quamvis mortem conceptam sinu gereret, nullum tamen de morbo verbum cuiquam fecit, postremum vitæ mortalis actum saluti animarum consecrare gestiens. Populum frequentem, jam è vicinis collectum montibus, intuens, visus est morbi partem depellere, ac novas haurire vires. Itaque licet semianimis & spiritum vix trahens, rectâ pergit ad templum, & Missionem auspica- tur à concione, in qua corporis imbecillitatem ardor animi superavit. Indè, nè sumpto quidem ad respirandum spatio, aures præbuit confitentibus toto die, nono Kal. Jan. ac totâ nocte insequenti. Ardens in intimo pectore caritas imbecillum corpus sustentabat, itâ ut vires ex ipsa ducere imbecillitate videretur. Die Natali Domini, multò deterius valuit, nihilominus, ter ad populum verba fecit, ac reliquum diem in sacro pœnitentiæ tribunali sedit. Postridie, quæ lux Sancto Stephano sacra, licet moribundus, licet æstuans, atque anhelans, tres quoque conciones habuit; ac majore quidem, quàm unquam aliàs, contentione. Tertiâ concione peractâ, referebat se ad pœnitentiæ tribunal, sed illud numerosa turba sic obsessum tenebat, ut aditum aperire nulla vis potuerit. Ergo ante majorem aram ad confessiones audiendas consedit, è regione fenestræ nullis specularibus, aut ligneis repagulis, munitæ. Hic exhaustis omnino viribus, & animâ deficiente, concidit. Domum parochi deportatus assedit ad focum. Post quartam horæ partem, recepto spiritu, cum animus ingens, & labori cedere indocilis, parumper se collegisset, perrexerat audire confitentes aliquot rusticos, qui eum in ædes parochi è templo secuti fuerant. Postremus hic Apostolici zeli conatus fuit: cum enim iterum animo linqui cœpisset, jussus est in lecto se continere.

*Totius vi-  
tae max-  
imæ sacræ con-*

Statim accitus è vicinia medicus malum immedicabile primo aspectu judicavit. P. Jacobus Lascombes, collegii Turnonensis

pro-



procurator, P. Chabru, & P. Audibert, Annonæi tunc versaban-<sup>Lib. IV.</sup>  
 tur, quod oppidum Lalovesco tribus tantum leucis distat. Ad<sup>confessione</sup>  
 opem ægroto ferendam advolârunt, qui licet ante dies octo, se se<sup>purgat.</sup>  
 ad mortem comparans, totius vitæ noxas confessione sacrâ expiâ-<sup>Singula-</sup>  
 set Anicii, tamen easdem optavit iterum judicio sententiæque Pa-<sup>ris ejus</sup>  
 tris Lascombes subjicere. Ille, post obitum viri sancti, hæc duo<sup>tia.</sup>  
 reliquit scripta, & rite declaravit. Primum, Patrem Regis ad su-  
 premum usque spiritum solidi judicii ac mentis integræ compotem  
 extitisse: alterum, in ejus confessione totius anteaetæ vitæ, non  
 modò culpam letalem nullam à se observatam fuisse, sed nè levio-  
 rem quidem, quæ nec opinanti quodammodo non excidisset.

Regis, peractâ confessione, tertio Kalend. Januar. sacro via-<sup>Novissi-</sup>  
 tico & extremâ unctione muniri postulavit. Quibus perceptis in-<sup>mis Sa-</sup>  
 signi pietate, quam caritatis æstus flagrantissimus accendebat, ro-<sup>cramenti</sup>  
 gavit ut remotis arbitris liceret sibi cum DEO suo versari, cujus<sup>rite mun-</sup>  
 conspectu beandum se brevî sperabat. Haud ità multò post, ob-  
 latum sorbere jusculum recusavit, cum diceret, se hæcenus victi-  
 tasse pauperum cibus, iisdem etiam nunc usurum: & parum lactis,  
 pro illa pingui sorbitione, petiit. Quærentibus num quid præte-  
 rea vellet, respondit, ut mihi parumper soli esse liceat.

Gravissimis doloribus cruciabatur: eos allevabat Christi cru-  
 cifixi effigies, quam complexus manu, deosculari suavissimè non  
 cessabat. Sua semper constitit serenitas ori; nemo visus unquam  
 media in morte tranquillior; sua quoque voci libertas, sua menti,  
 semper adfuit. Assidue preces, & sacri ardoris plenæ; dulcia  
 cum DEO colloquia; crebri, tenerique affectus animi cælestem  
 patriam suspirantis, totum occupabant.

Ingravescente in horas malo, à parocho & P. Lascombes po-<sup>In stabulo</sup>  
 stulavit, ut in stabulum deferretur, quo similior esset Christo in<sup>mori cu-</sup>  
 stramine nascenti, & eum imitaretur saltem in stabulo moriens,<sup>pit.</sup>  
 quem imitari non posset moriens in cruce. Negârunt per imbe-  
 cillitatem virium, & morbi gravitatem licere ut in stabulum de-  
 ferretur. Negatam sibi mortis conditionem optatissimam eâ co-  
 gitatione consolatus est, quòd mortem oppeteret inter pauperes &  
 rusticos, quibus juvandis & erudiendis vitam omnem & labores  
 addixerat. Eo nomine gratias ingentes agere superis sæpius audie-  
 batur. Ultimam Decembris lucem summa in pace duxit, ocu-<sup>JESUS, &</sup>  
 lis & animo in Christum è cruce pendentem defixis. Sub vespe-<sup>MARIA</sup>  
 ram, in ipso jam æternitatis limine positus, repentino gaudio præ-<sup>se viden-</sup>

Lib. IV. ter modum efferri visus est. Paulò ante mediam noctem aperiri  
*dos mori-* cœlum conspexit. Christus JESUS, & Virgo Mater illi se viden-  
*enti præ-* dos præbuerunt, ad cœleste regnum, & immortalis gloriæ coro-  
*rent.* nam, invitantes. Hoc cœlesti viso sic est absorptus, ut inundan-  
 tis lætitiæ vim intimo pectore continere nequiverit. Conversus  
 ad Fratrem Bideau, socium suum, & velut ex alto mentis excessu  
 Emersus: *O me beatum, exclamat, mi frater! Ut libens ac letus*  
*morior! Video JESUM, & MARIAM, qui mihi sunt obviàm, ut*  
*me ad beatorum patriam deducant.* Pòst paulò, junxit manus, &  
 sublati in cælum oculis hæc disertè & clara voce pronuntiavit:  
 Christe JESU, Salvator mi, in manus tuas animam meam com-

*Moritur:* mendo. Quibus dictis, placidè animam efflavit, circa mediam  
*magno sui* noctem ultimæ diei anni 1640. Annos quatuor & quadraginta  
*desiderio* minùs uno mense confecerat, quorum quatuor & viginti traduxe-  
*apud om-* rat in Societate, & ex istis, decem in Missionibus consumpserat.  
*nes reli-* Videbatur tam sancta vita, tam Apostolica, nequaquam spatio  
*cto.* tam brevi concludenda. DEO aliter visum, qui hominem ardo-  
 re caritatis, & piis laboribus confectum, donandum æternitatis  
 præmio, & *consummatum in brevi, tempora multa explevisse,* \*

\*  
 Sap. 4.

judicavit.  
 Vix è vita cesserat, cùm lugubris fama per vicinos montes  
 carmen triste inter plangentis populi lacrymas dispersit, *Obiit san-*  
*ctus, sanctus obiit.* Licèt asperum anni tempus vias difficiles clau-  
 deret, brevì tamen Lalovesus ingenti hominum concursu, ad vi-  
 sendum sanctum Apostolum undique confluentium, redundavit.

Exequiarum pompam postero die peragendam, differri o-  
 portuit, ut populo satisfaceret, ad figenda sacro corpori pia oscula  
 turmatim procurrenti. De loco sepulturæ aliquandiu deliberatum.  
 Alii deportandum censuerunt Anicium, aut Turonium, ad colle-  
 gium Societatis, ut Patribus depositum redderetur, quod jure illis  
 debitum videbatur. Alii judicârunt non sinè peculiari divinæ pro-  
 videntię consilio factum esse, ut Regis exuvias mortalis vitæ pone-  
 ret inter eos populos, quos tam singulari benevolentia complexus,  
 tanto studio erudierat. Vicit ea sententia, & Lalovesi sepultus  
 est. DEI nutu profectò accidit ut conservaretur corpus in loco  
 devio, & ad eam diem obscuro, ut DEO soli nimirum tribuere-  
 tur gloria, qua servi sui tumulum honorare decreverat. Celebra-  
 tum est funus quarto Nonas Januarias. Interfuerunt parochi duo  
 & viginti. Movit admirationem tantus numerus, cùm nemo in-  
 tel-

telligeret quo fieri pacto potuisset ut per montes avios huc illuc te-  
 Lib. IV.  
 mere sparsi, confluxissent, quasi ex composito, ad iusta sancto  
 Missionario facienda. Solemne funeris modicum, pro loci ob-  
 scuritate & inopia: concursus populi & publicus dolor, instar ma-  
 gnifici apparatus fuere. Pauperum gemitus mortuo parentant il-  
 lustrius, quàm panegyricorum calamistratæ laudationes, & Mau-  
 solæorum operosa monumenta. Quando corpus humo conte-  
 ctum est, erupit lamentabilis hujus immensæ multitudinis planctus,  
 qualis solet esse filiorum, amissum patrem, & in eo perditæ omnia,  
 lugentium.

Collocatum est feretrum prope majorem aram, ad latus E-  
 uangelii, & humo altius infossum, nè clàm refoffum aliò deferre-  
 tur. Aliquanto post, ne quid ad thesauri divitis custodiam deside-  
 raretur, altius in terram depressum fuit, & intertextis trabibus co-  
 opertum, nè qua vis aut dolus eò aspirare posset. Nec sanè defu-  
 erunt qui rem tentare auderent, sed excubans ad pretiosum pignus  
 conservandum populi pietas, tentantium conatus, sumptis etiam  
 armis, compescuit. Simul atque compositum tumulo corpus fuit, *Publica e-*  
*mira facta est animorum commutatio: versâ in venerationem tri-*  
*sticiâ, nemo de fundendis pro DEI servo precibus; omnes, arca-*  
*bitam ve-*  
*neratio.*  
 no quodam impulsu moti, de flagitandis ejus precibus cogitarunt.  
 Pulverem ex ejus tumulo sibi quisque certatim sumpsit, eoque avi-  
 dius, quòd hoc pulvere, instar sacrarum reliquiarum, ægris ad-  
 moto, complures morbos statim fuisse curatos compertum est. Par  
 ad eum colligendum diebus insècutis concursus, par pietas fuit. Ex  
 omnibus Lalovesci montibus gregatim incolæ concurrebant ad ho-  
 norem cineribus sancti Apostoli habendum: omnesque fateban-  
 tur, quò propius ad ejus tumulum accedebant, eò vehementius  
 venerationem suam & pietatem inflammari. Nemo viri Beati  
 morte magis indoluit, quàm Ludovica de Romezin. Ad primum  
 ejus nuntium, carissimo suo magistro iusta solvit largo lacryma-  
 rum imbre; mox accurrit Lalovescum, ubi occupante doloris lo-  
 cum tenerrimo pietatis affectu, quid senserit, quàm dulci mistos  
 gaudio planctus ediderit, ipsa sic testatur in Actis Canonizationis.  
*Ut primum in montibus nostris dissipatus est rumor de morte P. Re-*  
*gis, vicina regio ad ejus tumulum catervatim confluit. Magno*  
*dolore sum affecta, quòd, cùm ejus ultimis concionibus interfuissem,*  
*mibi non contigisset adesse morienti. Ut ad meas aures tristis*  
*nuntius accidit, statim, relicto Monteregardo, Lalovescum, tribus*

Lib. IV. *indè leucis distantem, profecta sum, ut sacros venerarer cineres patris anime meae, cui secundum DEUM, acceptum referebam inestimabile beneficium mei ad fidem catholicam & veram pietatem reditās. Eadem sacram ingressa fossam vidi sanè profundam, in eaque feretrum viri sancti contactum humo. Percontanti quid esset causa cur tantum spatii vacuum non implerent, responderunt fossam quidem, cum primum ingesta fuerat humus, equatam fuisse pavimento templi, sed prohiberi populum non posse confertis agminibus concurrentem, quin auferret partem aliquam terra, quā feretrum operiebatur. Eam vix sufficere multitudini propè infinita undique adventantium: tam praeclara omnium animos opinio de viri sanctitate pervaserat! Haud aliter affectam me sensi. Delapsa in ipsam sepulcri fossam, flexi genua, & humum beatam, quae sacros tegebat cineres, saepius exosculata, lacrymis rigavi. Quo perfusa gaudio tunc fuerim; quā suavi, quā tenero pietatis sensu delibuta, eloqui non possum. Diutius ibi precata, nullius sancti opem mihi videor confidentius implorasse. Ut recederem egerimè imperare mihi potui. Ut verò à dulcissimis liberatoris mei reliquiis longius nè abessem, statui domum edificare Lalovesci, ut mortalis vitae cursum apud ejus tumulum clauderem, quem vitae sanctiaris auctorem & magistrum habueram, & cujus apud DEUM meritis ac deprecatione adjuvandam me omnino confidebam. Eā cogitatione dolorem discessus mei & absentia consolabar. Sed cum adhuc in potestate parentum essem, per eos mihi non licuit, quod animo destinaveram exequi.*

*Urbis Aniciensis  
luctus de  
morte  
servi Dei.*

Dolor de obitu servi DEI nusquam gravior & apertior, quā Anicii, fuit. Statim atque cognitum est eum vitā cessisse, ubique luctus, ubique consternatio, ut si cuique quod erat in vita carissimum periisset. Xenodochia, custodiae, Refugium, coenobia, viduae, pupilli, amissum communem patrem, ereptum columen, solatium, consilium, paratum adversus quaelibet mala subsidium, denique omnia in uno sibi erepta lamentabantur. P. Ignatius Arnoux, collegii Rector, divinam rem pro mortuo fieri iussit, solemniter ritu & apparatu, qui nusquam in Societate, nisi in exequiis Praepositi Generalis, usurpari solet: eique funebri caeremoniae atrata civitas interfuit. Verum, & Anicii, & in reliquis Velaunorum oppidis, brevè lacrymarum poenituit, ac propè puduit. Omnes paratum sibi patronum in caelo rati, votis illum ac precibus prosecuti sunt, praesertim in iis, ubi plurimum versatus fuerat, locis, & ad

ad sacrum pœnitentiæ tribunal, ubi judicia de peccatis toties ex-Lib. IV. ercuerat. Quot capita, quot ora, tot præcones viri Apostolici, tot laudatores extiterunt heroicarum virtutum, quas in eo quisque observaverat. Rector Præpositum Generalem de illius obitu certior fecit Nonis Januarii 1641. his verbis. *P. Joannes Franciscus Regis complures pagos & vicos Velaunorum quatuor mensibus perlustravit, labore tam indefesso, & valetudinis tantâ incuriâ, ut ærumnis exhaustus decesserit, publico totius regionis luctu, maxime rusticorum & agrestium, quorum saluti totum se devoverat.*

*Patrum  
littera ad  
Præpositū  
Generale  
de ejus  
morte ac  
virtutum  
fama.*

Varii Patres è collegio ad Præpositum Generalem de eodem argumento scripsere. Litterarum sententia ferè hæc erat. *P. Jo. an. Franciscus Regis strenuam in Missionibus plurimis per aliquot menses operam navavit, insolito ardore fructuque. His præteritis natalitiis Christi Domini feriis DEUS labores ejus complevit, dum illum ad se se evocavit. Vita ultimum, sicut & anni, diem prematurâ morte clausit, non tamen improvisâ: quam prævidere facillimum erat, ob immensos labores quos solus continuo exantlabat, & quibus ferendis multi Missionarii pares non fuissent. Ejus omnis vita in erudiendo populo, rusticis excolendis, & sublevandis pauperibus collocata semper fuit, ac facit ut ejus memoria in benedictione modo sit, & mortem eximie sanctitatis opinio prosequatur.*

Respondit Præpositus Generalis Nonis Februarii ejusdem anni hunc in modum. *Immaturam P. Joannis Francisci Regis mortem graviter & moleste tuli. Nihilominus in hac acerbissima jacitura illud me consolatur, quod Apostolica vite mors simillima responderit, quod se ad novissimum usque diem germanum Societatis filium præbuerit; sanctis laboribus immortalus, cum maxime pro animarum salute contra peccatum demonemque pugnaret.*

Servi DEI sepulcrum brevè celeberrimum evasit, & Lalovescus, exiguus tunc vicus, nunc frequens incolis pagus, & advenis refertus est, è remotissimis provinciis undique confluentibus, ad honorem habendum Velaunorum Apostoli sacris cineribus; & miraculorum quæ ibi DEUS operatur, crebritate ac magnitudine allectis. Jam quis intueri possit religiosum virum, nullâ peculiari dignitatis notâ in Ordine suo insignitum, vias omnes abjiciendi sui ac demittendi, avidè consecretantem, id unice ambientem ut nesciretur & lateret; qui semper in deliciis habuit versari cum infima plebecula, sæpe summo cum contemptu & verbis & verberibus malè acceptum, mortuum in loco pæne ignoto, in asperi montis

Lib. V. jugo : quis, inquam, hominem hunc tam sui, tam humanæ gloriæ contemptorem, repente propositum publicæ venerationi, ejus tumulum infinito populi concursu, miraculisque innumeris nobilitatum, videat, qui pariter non intelligat *mirabilem DEUM in Sanctis suis esse*, nec aliud ad veram & solidam gloriam iter, quàm per Numinis obsequium & cultum, patere. Ad hujus Historiæ clausulam nihil restat, nisi ut collatam in pauca præcipuarum servi DEI virtutum sub uno conspectu ponamus imaginem : itémque miraculorum, ejus deprecatione ac meritis editorum. Utrumque geminus, qui sequitur, liber dabit.

# V I T A B. JOANNIS FRANCISCI REGIS. Liber V.

**E**X iis quæ narrata sunt superioribus libris, satis superque intelligi posset, quàm cumulatè perfectèque omnia virtutum Christianarum officia Beatus Régis expleverit : quia tamen coacti sæpe fuimus, nè historiæ cursus sæpius abrumperetur, nonnulla dicta factaque præterire, quæ ad declarandam excellentem servi DEI sanctimoniam valere majorem in modum possunt, ea duximus in hunc librum, ad pium animarum fructum, conjicienda. Sanctorum virtus ipsorum factis omnibus, ac sententiis ingens pondus addit.

*Ejus caritas erga DEUM.*

*\* Psalm. 72.*

Qui cum servo DEI familiariter vixere, testati sunt illum crebris sermonibus propheticas voces usurpare solitum. *Quid mihi est in celo, & à te quid volui super terram, \* DEUS meus !* Sæpe audiebatur divino amore succensus exclamare. *DEUS cordis mei, quin amare te possum quantum amari dignus es, & quantum amare te velim !* Sacro divinæ caritatis igne sic interdum flagrabat, ut illi sustinendo par non esset. Interdum est conspectus dor-

dorsum subgrundæ subjicere , ut aquam è tecto stillantem exciperet. Ibi demisso capite, inundanti rivulo perfundendum se præbebat, ut ardorem animi, quo ipsum corpus exæstuabat, temperaret. In sermone quot verba, quot sententiæ, totidem erant veluti faces, quæ & ardentem imo in pectore Numinis amorem ostenderent , & alios ad eundem inflammarent. *Quàm sanctè, quàm suaviter ejus colloquiis afficerer, explicare non possum,* inquit Ludovica de Romezin ; *ejus singulis vocibus tanquam singulis ardentibus telis, pectus meum & transfigebatur & incendebatur.* Ipsi pueri quorum teneram ætatem formabat in scholis, prædicârunt ità se ab illo instructos litteris fuisse , ut ad amandum DEUM assiduè ipsos excitaret, cùmque de amore divino verba faceret, ejus orationem melleo quodam sapore conditam fluxisse : nec semel coactum suas cohortationes interrumpere , ut lacrymis prorumpentibus liberiores aperiret viam : adeò illius mentem divinus amor totam occupabat !

Ex hac in DEUM singulari caritate oriebatur incensum illud desiderium procurandæ in omnibus divinæ gloriæ. *A DEO creati, aiebat, & propter DEUM solum creati, solius DEI proinde sumus ; & ad ejus gloriam omnia referre nos oportet.* Ad hoc sanctissimum effatum, tanquam ad certissimam normam, vitæ suæ rationes semper exegit, adeoque sui , & suorum commodorum erat oblitus, ut aliquando dixerit Vicario Generali diocesis Aniciensis, nequaquam se recusaturum cœli deliciis tardiùs frui, si per eam dilationem daretur sibi locus adducendi plures ad cognitionem & amorem DEI sui.

Hic animus, ab omni amoris proprii labe perpurgatus ; hoc fuimet ipsius sacrificium , quod est indicium amoris divini longè certissimum & verissimum, eluxit præsertim in laboribus & ærumnis quas vir Apostolicus toleravit. In iis unicè acquiescebat, ac majorem in modum placebat sibi : cùmque nescio quis vicem illius dolere visus esset, quòd vitam in Euangelico ministerio tot molestiis & incommodis objectam duceret , respondit , *Quidquid laboris DEI causâ toleramus, laboris nomen perdit. Cruces Apostolicas celestis unctio & dulces & lèves facit.* Sanè , quò plus patiebatur, eò plura pati gestiebat ; sacram illam famem nulla explebant incommoda, sed irritabant. Cùm à nebulonibus provolutus in luto graviter aliquando vapularet, auditus est exclamare : *O si liceret, mi DEUS, pro tui sancti nominis gloria perpeti gra-*

Lib. V. *viora* ! Stimulatus hoc amore crucis , ad summum & heroicum processit divinæ caritatis gradum. Quippe martyrii cupiditate, dum vixit, semper flagavit. Assiduè monebatur ut parcius & cautius bellum cum vitiis vitiosisque susceptum gereret. Illo efferari ac furere certum genus improborum induratæ nequitiae ; sibi non temperaturos quin eum furori suo seriùs ocyùs immolarent. Caveret in primis nè prodiret ad ægrotos noctu, neque se temere indueret in manus & laqueos hominum, qui de ipsius nece conspiraverant. Monentibus respondebat, nihil sibi antiquius, nihil optatius accidere posse, quàm ejus causâ mori, qui suâ mortuus causâ esset ; quàm sanguinem in honorem ejus fundere, cujus in se amore tot illustribus compertum documentis haberet. Periculi gravitas animos illi faciebat. *Quantulum est*, inquebat, *quòd vivam, aut peream ? At quantum est divinæ gloriæ amplificandæ servire ? in ea promovenda vires, vitamque consumere ? Possûne illis succensere, qui me tanti compotem boni facere meditantur ? Verùm ad hanc tam beate mortis aspirare laudem heroum est, non hominis nequam, nauci, & nibili, ut ego sum.* Sic animatus perrexit inter gravissima, quæ virtutem vel firmissimam labefactare poterant, pericula, & bellum vitiis palàm inferre, & nocturnam moribundis opem ferre.

*Ejus intima cum DEO conjunctio.*

Hoc mentis invictæ robur hauriebat ab oratione, cui sic erat deditus, ut noctem ferè totam in familiari cum DEO colloctione traduceret, neque finem orandi antè faceret, quàm diurno labore fractum corpus, somno denique vinceretur. Non tantùm in Societatis domiciliis, verùm etiam in Missionibus nocturnas precationi horas dabat, postquam diurnas laboriosis functionibus occupasset.

Petrus *le Blanc*, cum quo diutissimè ac familiarissimè vixit, testatus est nunquam à se conspectum fuisse, quin vultum præ se ferret hominis secum & cum DEO intus habitantis. Hæc oris modestissimi & religiosissimi species ita omnes capiebat, ut cum prodiret in publicum, efferrent pedem ex ædibus foràs, ut prætereuntis aspectu fruerentur, negarèntque hunc hominis vultum esse, sed angeli, mortali carne induti. Tam arctè DEO conjunctus erat, tam longè à rerum creatarum amore disjunctus, ut illi Majestas divina versari semper ob oculos, rerum verò infimarum inanitas nè apparere quidem, videretur. *Illum intuens*, ait Comes de la Mothe, *arbitrabar ipsum non jam agi proprio spiritu, sed impulsu.*



*pulsu divino: & inesse vim quandam divinitus, ac minimè naturaliter inditam, qua ciceretur; Deoque, vel potius amore divino, ejus animam velut animari.* Lib. V.

Hac intimâ cum DEO conjunctione, tam sublime genus orationis adeptus erat, ut rebus vel minimis, quæ DEI memoriam ejus menti objiciebant, totus quodammodo raperetur extra se, usque sensuum destitueretur. Accidit aliquando, cum esset ruri, ut unus è nostris pium quoddam de amore DEI canticum modularetur. Regis illo sic est affectus, ut animum à sensibus alienatum Patres, qui aderant, facile intellexerint. A multis parochis sæpe deprehensus fuit in ipso precationis æstu, voce atque omni motu, per plures horas, captus. Cum iter faceret per urbem, consistebat interdum in medio vico sublati in cælum oculis, & in alta contemplatione sic demersus, ut quæ circa se gerebantur, non animadverteret. Nec rarò inter concionandum vox ipsum subito deficiebat: sed ardentes oculi, & suffusus igne multo vultus, eloquenti silentio loquebantur, mentesque audientium percellabant. Ab hoc æstu divino cum se collegerat, institutum de DEO repetebat sermonem, velut afflatu prophetico incitatus, tanto ardore atque impetu, nullus ut posset obniti, quin se totum quasi victori permitteret.

Nusquam verò lubentiùs, nusquam familiariùs cum DEO *Ejus pietas erga sacrosanctam Eucharistiâ.* versabatur, quàm ante aras provolutus. Jam inde ab adolescentia Christum Dominum singulari amore complexus erat. Cum adhuc pæne puer litteris operam in collegio Bliterensi dabat, cælesti pane reficiebatur singulis diebus Dominicis ac festis, & quidquid à studio vacabat temporis, jam tum in æde sacra, & dulcissimo Christi congressu transigebat. Sacerdotio initiatus diem illum prorsus insuavem, & nigro notandum calculo censuisset, quo divinâ non litâset hostiâ. In conficiendis autem itineribus dici non potest quàm diligenter provideret ac præcaveret, nè in eum diverteret locum, ubi non esset opportunitas sacrificandi postridie. Quòd si provisionem omnem casus aliquis fefellisset, cogereturque aliquibi pernoctare, ubi non esset vicini templi copia, postero die proficiscebatur ante lucem, nec dubitabat viam quantumvis difficilem conficere, ut ad pagum evaderet, in quo rem divinam posset facere. Senator & Medicus Aniciensis pro testimonio dixerunt, illum à se conspectum sæpius, dum sacrificanti ministrabant, abstractum à sensibus, & in augusti mysterii cogitatione penitus absorptum.

Pp

Cum

Lib. V. Cum expertus ipse cognovisset divinas opes, & auxilia gratia celestis è sacrosancta Eucharistia, tanquam ex uberrimo fonte, derivari, vixque aptius quidquam mortalibus datum ad excitandum magis magisque sacrum caritatis ignem, nihil vehementius in Missionibus inculcabat, quam frequentem Angelici panis usum; neque illis antè imponebat finem, quam instituisset Sodalitatem Sanctissimi Sacramenti; idque inter Missionis fructus præcipuos numerabat.

Asylum in Eucharistia suum, consolationem, delicias omnes habebat collocatas. Hinc necessariam ad Euangelicum opus lucem; hinc robur in periculis, & adversus improborum insectationes opem hauriebat: hinc agebat cum Christo de curandis & sanandis hominum vitiis: hinc illum, si quid dubitaret, si quid moliretur, consulebat: hinc sacrum divini amoris ignem toto concipiebat pectore, quem deinde in alios effunderet.

*Spes ejus  
in divina  
bonitate  
ac poten-  
tia.*

Jam verò quantam in DEO spem, ejusque bonitate ac potentia, reponeret, declarat ejus in exandandis laboribus ac periculis gravissimis magnanimitas & fortitudo. Quoties, in illo Missionum assiduo & difficili cursu, commisit se viæ per loca ipso situ horrida, cum hiberni vim sævam frigoris nemo sustinere posset? Quoties inaccessos montes & nivibus coopertos superavit? torrentes eluvione repentinâ, & agrorum strage tumidos, transnatavit? ejusmodi pericula denique laceffivit, quibus adeundis rentare DEUM, ac temeritatis notam vix effugere videbatur? Eorum aspectu solo & imagine, licet eminus objecta, exanimatus ejus socius cohorrescebat, quem Regis exemplo & voce confirmans, *Omitte metum*, inquebat, *mi frater: DEUM sequimur ducem; ejus providentia pro nobis excubat.* Hac numinis tutela fretus, Davidicas voces crebrò usurpabat: *Dominus illuminatio mea & salus mea, quem timebo? Dominus protector vite mea, à quo trepidabo?* De sicariis in omnem ejus perdendi occasionem imminentibus millies admonitus: *Dominus mihi adjutor*, respondebat, *non timebo quid faciat mihi homo.* Sæpe intentatum ejus jugulo telum fuit, sæpe gladii mucro pectori admotus: *Pergite*, agebat, *aperto ad excipiendam necem pectore, conficite; mori pro Christo paratus sum.*

DEUS vicissim non rarò edidit miracula, ut servum suum instantibus inimicis eriperet. Interdum ipsorum oculis eum subducebat, adeò ut præsens, & coram positus, lateret; aliàs immo-

biles

biles in eodem vestigio defigebat ; ne aspirare ad illum possent. Lib. V. Modò animos eorundem sic repente immutabat, ut furori veneratio succederet ; modò subito illos terrore ac vertigine ita percutiebat, ut uno viri sancti obtutu, aut verbo, perculsi & exarmati, obrigescerent.

Tam præsenti, tam perspicuâ DEI tutelâ erectus, nihil pertimescebat, nihil non audebat. Quidam scrupulum illi & religionem injiciebant, quòd labore immodiço valetudinem frangeret, ac potissimum quòd exhaustas vires levamento nullo reficeret. Quibus ille : *Sapenumero sum expertus, aiebat, valetudinem meam DEO singulariter curâ esse : cujus autem in sinu meam omnem de illa sollicitudinem tutius rectiusque possum deponere, quàm ejus, qui optimi & amantissimi parentis meritissimò nomen obtinet ?* Cum humana præsidia, & quæ vitæ necessitas postulat, deerant, divinæ providentiæ fiduciâ se sustentabat : neque illum unquam hæc fiducia fefellit. Sæpe ipsi nummos Comes *de la Motte* offerebat, ut iis, ad usus improvisos, si qui fortè intervenirent, uteretur. Nunquam adduci potuit ut quidquam acciperet ; divinâ benignitate unicè confusus ; cujus præsentem opem peculiari quadam ratione, ut modò referam, sensit. Longum ac molestum iter emensus totâ die, Chambonum sub vesperam attigit. Erat is pagus hæreticis refertus. Fratrem *Bensac* socium suum, languentem de via, & eâ die deterius solito valentem perduxit ad cauponam, ac cœnam imperavit. Enimvero mirari *Bensacus*, & *Fugit te, credo, mi Pater, nos à pecunia prorsus imparatos esse : hanc præsentem tamen & numeratam hæreticus caupo volet.* Cui Regis : *Rem DEO commendamus ; hic precantibus præstò erit.* Credis igitur, addidit *Bensacus*, *futurum ut huic cauponi Calvinistæ piâ precatatione solvas quod expensum in cœnam fuerit ? Curam hanc omitte*, subjecit Regis, *certissimum habemus in divina providentia perfugium ; hæc nunquam nobis defuit : statimque oraturus in genua procidit : nec irritæ fuerunt preces.*

Surgit, & interiore motus instinctu, subit in vicinum conclave, in quo Calviniani juvenes tempus ludo fallebant, dum cœna parabatur. Salutat perhumaniter, & ludentibus affidet, occasionem insinuandæ juvenibus pietatis captans. Illi aspectu Jesuitæ primò conturbari, deinde amaris aliquot jocos hominem velleicare ; postremò, ut molestum interpellatorem abigerent, conviciis illiberalibus palàm insectari. Audivit hæc DEI servus oris &

Lib. V. animi tranquillitate, quam in gravissimis opprobriis toties prætulera. Juvenes patientiam admirati paulum conticuerunt. Et Regis, datâ loquendi vicissim opportunitate, sermonem de necessaria salutis æternæ cura tam blandè intulit, ut continuò mutati ferocem animum exuerint, imò etiam conviciorum & contumeliæ petierint veniam, promiserintque se daturos operam, ut non frustrâ quæ dixerat audivisse viderentur.

Illos potissimum dicentis modestia, & vultus, sanctum quiddam ac divinum spirans, ita commovit, ut unus ad cauponem excurrere ei præceperit, nè sumptui parceret in accipiendis laudibus duobus illis Jesuitis, nè quidquam ab iisdem pro cœna exigeret; addens alterum illorum, quem modò dicentem audiverant, virum esse planè sanctum. Socius P. Joannis Francisci rem ita gestam sæpe commemorabat, ex qua nimirum intelligebatur & quanta esset in eo divinæ providentiæ spes ac fiducia, & quàm benignè DEUS famulo suo laboranti subveniret.

Hac opis divinæ fiduciâ nixus, ea sæpe moliebatur, quæ omnino ad exitum perducere non posse videbantur. Vix operis alicujus ejusmodi formâ delineaverat, cum varii undique obices, DEO probandæ fiduciæ scilicet locum dante, operi destinato moram opponebant. At Regis patrocinio cælesti fretus, nulli cedebat difficultati, & impedimento; accidebátque ut victis tandem obicibus, & superatis, quas nemo perrumpi posse judicabat, difficultatibus, omnia succederent è sententia, & ad optatos exitus, præter opinionem, veluti sponte ducerentur. Hunc in modum flagitiosos è barathro scelerum eduxit, quos ad bonam frugem aliquando revocandos omnes desperabant; neque quidquam unquam hujus generis, inter illa quæ fieri non possunt, numeravit; ejus scilicet misericordiæ ac viribus confidens, qui potest è lapidibus suscitare fi-

*Matth. 3. lios Abrahæ.*

Porro hæc divinæ opis heroica fiducia nusquam splendidius eluxit, quàm cum omnium Anicii pauperum inopiam sublevavit, in summa caritate annonæ; ut prædictum est: itémque cum domum poenitentibus mulierculis addictam, Refugium vulgò nuncupatam, posuit. Hujus fundamenta cum jaceret, negabant omnes futurum ut ædificio culmen imponeret, ei que vocem Evangelicam oggerent, *Cœpit edificare, & non potuit consummare.* \* Qui-  
*Luc. 14.* bus ille: *Prorsus ita se res haberet, uti dicitis, si humanis opibus*  
*con-*

*considerem : verum uno DEO sustentor, eumque tanto certius ad- Lib. V:  
futurum spero, quanto minus presidii in hominibus est.*

Hac divinæ tutelæ fiducia munitum esse oportebat qui tam <sup>Zelus ani-</sup>  
multa, tam difficilia, tam fortiter ac feliciter, animarum causâ, <sup>marum.</sup> mo-  
liretur, & perficeret. Id unum in omni vita propositum habuit,  
id studuit unum ut animas in gratiam cum DEO reduceret, aut in  
ea confirmaret. Totus in eo erat, ut probos inflammaret ad stu-  
dium virtutis, aut improbos à vitii turpitudine revocaret. Diu,  
noctûque in urbe, ruri, in templis, in foro, in custodiis publicis,  
& valetudinariis, in privatorum ædibus, id agebat unum; vale-  
tudinis, quietis, aut alterius oblectamenti cujuslibet, oblitus. U-  
nicum illi opus, una cogitationum curarumque meta, regnum  
Christi amplificare: hujus causâ nihil non audere, nihil non per-  
ferre ac pati; cetera nihili pendere. Si quia fortè ipsi elaberetur  
occasio cujuspiam animæ vulneribus medicam manum admoven-  
di, urebatur incredibili dolore, seque tanquam reum inculabat,  
licet omni vacaret culpâ. Evenit aliquando ut prodire domo non  
posset ad excipiendam confessionem peregrini, quem in diversorio  
morbus in ultimum discrimen adduxerat: *Quam longa mihi, di-*  
*xit alloquens amicum, quam acerba nox fluet! nullam capere*  
*quietis partem potero, donec resciam ecquid huic moribundo alla-*  
*tum sit auxilii.* Fateor, addidit, *insuavem & injuoundam mihi*  
*vitam fore, si mihi facultas nulla suppeteret mortales miseros pec-*  
*catorum servitute liberandi.*

Aliàs, cum nihil intentatum reliquisset, ut vesanam hominis  
improbi cupiditatem frenaret, suosque omnes conatus irritos &  
scelerati pertinaciâ victos cerneret: *Ab! queso, inquit profusis la-*  
*crymis, gladium quo accinctus es, in hoc pectus adige potius, quam*  
*divinam Majestatem tam injuriose tractes.* Adolescens nobi-  
lis, captus puellæ formâ, eam crebrius justo, nec sinè populi offen-  
sione, invisebat. Nihil cunctatus Regis commercium illud re-  
scindere decrevit. Ac primò quidem puellam adortus, docet  
quàm periculosâ facilitate juvenem admittat. Respondit illa sibi  
permolestam accidere juvenis assiduitatem: Nec per me stabit,  
inquit, quin ingratum saluatorem excutiam.

Hoc aditu ad negotium comparato, DEI servus ulteriùs pro-  
greditur, & adolescentem quàm blandissimè admonet frequentio-  
res ejus cum puella colloquutiones pejorem in partem accipi à civi-  
tate, ac sinistram in vulgus manare famam. Omnibus divinis ju-  
xta

Lib. V. xta & humanis rationibus pugnavit ut juvenilis cupiditatis æstum restingeret. Promisit adolescens omnia, nihil præstitit. Tunc enim vero vir sanctus extorquere per vim statuit, quod impetrare lenitas non potuerat. Itaque cum rescivisset juvenem ad puellam venisse, accurrit domum. Ibi, sanctâ quadam armatus iracundiâ, vocem imperii plenam atque auctoritatis attollit, quali zelus Apostolicus tonare ac fulminare solet, eâque adolescentem sic perterrefacit, conturbat, proruit, ut hiscere vix quidquam ausus, eiecerit se ex ædibus, neque posthac in eas pedem intulerit. Hoc amplius: Servi DEI verba illi tam altè infederunt in animo, ut aliam penitus, & meliorem vitæ viam instituerit. Si quid ejus generis incideret, vix sui compos erat vir sanctus, & potentiore vi abreptus, merus omnes humanos & respectus despiciens, quò DEI gloria, quò salus animarum vocabat, divino quodam impetu ferebatur. Quamvis hoc satis multa, quæ hæcenus narrata sunt exempla, doceant; unum tamen insigne præ ceteris nequeo præterire.

Erat Anicii famosa mima, pernicies juventutis. Ingemiscabant omnes tot animarum exitio; qui malo medicinam asferre auderet, nemo erat, quia mulier procerum multorum patrociniò nitebatur. Regis, semper impavidus cum agebatur salus animarum, pestem illam civitate depellere constituit. Quia verò summa rei conficiendæ potestas penès urbanos magistratus erat, judicem disciplinæ civili præpositum convenit, virum sanè probum, sed adversus rumores & famam haud satis firmum. Docet quanta civitati clades afferatur ab hac mima: serpere malum in dies latius; hanc verò litem sanari ab alio nec posse nec debere, quàm ab eo, cui commissâ sit legum & salutis publicæ custodia. Si cunctetur ac trepideret, in ipsum culpam & poenam scelerum, quorum ista femina caput esset, conjiciendam. Laudari sanè illius probitatem, ac eandem à DEO nequaquam probatum iri, nisi auctoritatem, quâ pollet; huic malo efficaciter curando adhibeat.

His rationibus permotus iudex, neque ausus est apertè quod petebatur denegare, neque remedium ingravescenti morbo admove-re properavit, humano retardatus metu. Rem in longum ducere, ac polliceri multa, contentus, respondit videri sibi quæcumque admoneret, rectè prudentérque dicta; constare de mali gravitate, & necessitate remedii: se ad omnia paratissimum esse; verùm voluntati etiam optimæ facultatem non semper respondere: multos è civibus primariis huic negotio esse admixtos; tractandum

dum cautè, pederentim, & citra strepitum; infestos hominum Lib. V.  
rumores vitandos; captandam temporis opportunitatem, & quâ  
viâ mollissimè confici possit, deliberandum: id sibi curæ & cordi  
fore.

Dari sibi verba servus DEI sensit: utque obliquos humanæ  
prudentiæ circuitus, & dolosa temperamenta, morâque, anima-  
rum saluti vulgò inimicas, oderat, urgere propositum non desti-  
tit, stimulosque tam acres magistratui subdidit, ut ejus denique tar-  
ditatem expugnaverit. *Quid? de mali magnitudine confiteris,*  
*inquit; & remedium, quod habes in promptu, procrastinare non*  
*dubitas? dum interim divinum Numen palàm indignis modis of-*  
*fenditur. Adeone tibi vilis & despecta Majestas Domini est, ut*  
*ejus opprobria pro nihilo ducas? Adeone rem levis momenti pecca-*  
*tum esse arbitraris, ut illud patiaris increbrescere, nè quid mali*  
*rumoris instrepat? Quaeso ut verum ex me citra offensionem au-*  
*dias; is denique vitandus rumor ac strepitus est, quem excitat*  
*tam propudiosa theatri licentia; non ille, qui è remedio à te affe-*  
*rendo forsân oriatur.*

Hæc, aliâque id genus, plurima, tam graviter, tam animo-  
sè differuit, ut assentiens dicenti magistratus continuò edixerit nè  
mima exitialis prodiret in publicum, aut in theatro posthac appa-  
reret. Gratias ingentes DEO Regis egit, ac deinde ipsi judici;  
cui denuntiavit sibi deliberatum fuisse, si repulsam fuisset passus,  
irumpere in mediam theatri caveam, armatum effigie Christi cru-  
cifixi, ut pestilentem mulierculam agigaret. Hæc Apostolici vi-  
ri ad procurandam animarum salutem fortitudo fuit: haud minor  
ejus caritas in miseriis corporum sublevandis eluxit: nec immeri-  
tò dici potest amorem pauperum propriam Beati viri dotem, &  
quasi characterem, illustrioribus impressum notis, extitisse. Pau-  
perum actor, & eorum negotiis præpositus, appellabatur, calami-  
tatorum defensor, miserorum omnium perfugium, pupillorum om-  
nium tutor, viduarum omnium patronus. Tam gloriosa nomina  
unus *Patris Pauperum* titulus, universa colligebat, quem & heroi-  
câ consecutus erat caritate, & donec vixit, omnium consensu re-  
tinuit. Ità mirabilem hanc servi DEI virtutem describit *Comes de*  
*Fay de la Tour Maubourg* in Actis Canonizationis. *Homines ille*  
*quidem omnes, ut imagines DEI diligebat; nihilominus pauperes*  
*singulari quodam ac tenero affectu complectebatur, & in sinu at-*  
*que oculis ferebat. Eorum intueri miscrias non poterat, quin inti-*

*Ejusdem*  
*in paupe-*  
*res cari-*  
*tas.*

Lib. V. *mis sensibus commoveretur. Illis diurnam & nocturnam navabat operam in ergastulis, in nosocomiis, & in eorum casis. Neque pudor infimi & tenebrosi carceris, nec periculosa contagionis metus, ejus absterrebant caritatem, aut retardabant. Tunc vivere, tunc regnare videbatur cum egrotos omni ope destitutos nanciscebatur, quibus opitulari posset. Quod horrebant ceteri ac refugiebant, eo alliciebatur & pascebatur: nusquam letior, ac sibi amicior, quam cum ulcera putrida & tabo manantia, perpurgaret. Non contentus miseros invisere, ad ministeria vel maxime abjecta, & vernilia, se demittebat ipsorum causâ; mediastinum diceres, aut servum, ad hæc præstanda, mercede conductum. His omnibus adjiciebat alia non pauca, quæ caritas ingeniosa comminisciebatur, & suggerebat.*

Huic testimonio adjungo alterum Patris Antonii de Mangeon rerum à DEI servo gestarum testis magnam partem oculati. Verba me deficiunt, ait, quibus explicem quousque procederet materna caritas, quâ P. Regis pauperes prosequiebatur, præsertim egros, eosque stomachum ac nauseam omnibus movere propter fetorem solitos. Fratres nostri, ejus Socii, aiebant necesse prorsus esse ut vel odorandi sensu omnino careret, vel esset præditus vi quadam peculiari ac propriâ, vires humanas superante, cujus beneficio perstaret horas integras, ut consueverat, certis affixus aegris, ad quos propius accedere nemo poterat; quin odoris gravitate oppressus, propemodum animo linqueretur. In has tamen edes tetras atque pestilentes, subire cernebatur vultu tam lato ac renidente, quam si halantem rosas & violis domum Principis introisset. Fratres nostri (pergit P. Mangeon) libenter illum comitabantur, ut caritatis mirificæ spectaculo fruerentur: sed cum vir sanctus æquè indulgens aliis, ac sibi durus esset, illos ad fores adium consistere jubebat, dum ipse celestes delicias cum caris pauperibus, in hoc teterrimo fetore, degustabat. Hæc illius oblectamenta & ferie post durissimas concionum & confessionum occupationes: sic à gravissimis laboribus relaxabat animum, & reficiebat. Quoties in urbe prætereuntem cives intuebantur, Pergit, inqueiebant, ad opem pauperi vel agroto ferendam; & raro illos conjectura fallēbat.

Maria Bonnot, Aniciensis matrona, probatissima femina, pro testimonio dixit persuasum vulgò fuisse Patrem Regis diuino lumine collustratum, cognovisse quâ quisque inopiâ, tametsi admodum



*dum occultâ, maxime premeretur : siquidem nihil in urbe suscipiebatur ad levandam civium calamitatem, cuius ipse magna pars non esset ; nullum genus miserie, cui non subveniret ; nullus egens, nullus ager, cui non succurreret : nullum infortunium, quod ejus vigilantiam & curas effugeret. Nihil audiebam pie utiliterque in civitate gestum, quin audirem continuo, id commodi & subsidii à P. Regis procuratum est ; huic adfuit moribundo, hanc litem composuit. Crederes unum eundemque multiplicari, ut omnibus adesset locis, in quibus ejus opera pauperes indigebant : atque haud scio an quisquam omnium mortalium illos magis tenerâ, liberali, & magnanimâ caritate fuerit complexus.* Lib. V.

Sic omnibus, ac præsertim egenis, amicus & suavis erat ; cum interim sibi asper uni & inimicus, esset. Imbutus Evangelicâ Christi voce, *Qui vult venire post me, abneget semetipsum :* <sup>Mortificatio & amor Crucis.</sup> nunquam cessavit, ut Apostoli verbis urar, *mortificationem JESU* <sup>Matt. 16.</sup> *in corpore suo circumferre.* <sup>2. Cor. 4.</sup> Acre cilicium, quo erat indutus, nunquam deponebat. Præterea catenam ferreis hirsutam acuminibus ita lumbis admovebat, ut eam varios in orbes & flexus circumplicaret, quò latius dolor funderetur. Singulis noctibus inimiti flagello se lacerabat : perenne jejunium : humus cubile, panis & aqua victum dabant, addito quandoque, cum opiparè vescebatur, modico lacte, aut oleribus, absque ullo condimento. Vini, carnis, ovorum, & piscium, usus nullus. In postremis Missionibus, nè suis hospitibus gravis foret, impositam humeris in sacculo gestabat farinam, quam aquâ diluebat. Sæpe triduum cibi expers traducebat. Cum verlaretur in collegiis, tres ad summum horas somno tribuebat necessario. Quantumvis debilitatus labore assiduo & exhaustus, nunquam tamen adduci potuit ut modico vino attritas vires reficeret. Nullum unquam oculis spectaculum, nullam auri- bus symphoniam, indulgit : ac nè illos quidem rumores audire sustinebat, quos in vulgus fama spargit, & quos rescire nemo suâ interesse non putat. Quid multa ? mortificationis, quem vocant, spiritus nusquam illum deserebat ; eoque animatus, & soli DEO vivere gestiens, omnibus commodis, oblectationibus, & aliis quibus vita gaudet, voluptatibus nuntium planè remiserat. Comes *de la Motte*, locuples testis rerum gestarum viri Apostolici, dicere solitus erat, DEUM quotidiano miraculo Patrem Regis saluum & incolumem præstare. Quæ ageret aut perferret ea virium humanarum modum excedere, atque adeò nisi divinâ virtute non

Rr

pos-

Lib. V. posse vitam illi & valetudinem constare. Ità planè se res habebat. Quippe servo DEI nihil in amore ac deliciis erat nisi fames, sitis, anni tempus asperum, frigidum, intolerabile. Tunc gaudio triumphabat cùm erraret per invios montes, largo perfusus imbre, demersus in nives, lassitudine ac labore confectus: idque aliquando socio suo confessus est. Cùm enim die quadam laboris & ærumnæ solito plus tolerasset, seque omnino fatiscere, ac viribus defici non negaret, adjecit se cælestibus circumfluere gaudiis, nec liquidiores unquam animo voluptates hausisse. Obstupefcenti socio, & orationis novitatem admiranti, dixit vitam sibi vitalem non fore nisi daretur locus aliquid Christi causâ patiendi; se hoc uno in terris solatio sustentari.

*Mortificatio interior.*

Corporis afflictatio ità laudari debet, si animo domando servit: virtus vera moderandis animi perturbationibus continetur; in eo præcipuè versatur & elaborat. Eas verò qui magis domitas, magis rationi & gratiæ obsequentes haberet, quàm B. Regis, haud facillè quemquam reperias. Nulla in eo vivere cupiditas videbatur præter unam divinæ gloriæ procurandæ & salutis animarum. Jam inde à prima ætate totus in eo fuit ut se vinceret in omnibus, idque vi multâ, & assiduâ contentione affecutus erat, ut nihil in ipso deprehenderes, quo primis illis motibus cupiditatum agitari sentiretur. Nemo illum iracundiâ inflammatum vidit, nisi cùm peccantium vesanos frangeret impetus, & pro Numinis honore depugnaret. Nemo tristitiâ dejectum, nisi cùm DEI majestatem peccato læsam audiret: nemo elatum gaudio, nisi cùm virtus & gratia triumpharet. Ceteris in rebus, secundis aut adversis; quæcumque temporum, locorum & negotiorum, facies foret, eundem oris habitum, serenum ac tranquillum, præferebat, qui summam quietæ mentis pacem indicaret. Si quid rei novæ ac difficilis præter expectationem subito accidisset, sui compos, imperturbatus, atque imperturbatus, consistebat, & in mediis opprobriis, gravissimisque contumeliis, expertem animum procellæ; frontem nè minimâ quidem obductam nubeculâ, conservabat. Eunti per urbem aliquando ad obeundum nescio quod caritatis officium, proterva juvenum turba occurrit, & sibilis conviciisque aliquandiu prosecuta est: quorum ludibria & vociferationes contemnens, cùm ire nihilo seciùs pergeret, irritati patientiâ, & illam tranquillitatem extorquere homini, ac movere stomachum gestientes, cæno vultum opplent ac turpiter deformant. Risit DEI servus, & sudario vul-

vultum leniter abstergens, iter institutum, tanquam nullâ violatus Lib. V. injuriâ, prosequitur. Tam insignis moderatio ludibria, jocôsque juvenum in admirationem vertit: & procacissimi quique coacti sunt fateri, qui sic sui potens esset, hunc homine majorem esse. Itâ motus animi habebat in potestate, ut nè ipsa quidem præsentis necis imago constantem ac sedatum pacatæ mentis habitum mutaret. Audierat puellam nobilem plus justo familiarem esse primario cuidam centurioni; & periculosam utriusque consuetudinem rumore malo flagrare. Puellam aggressus, virtutis amore itâ succendit, ut centurionem in perpetuum ædibus excluderet. Qui elatus iracundiâ, & ultionem meditans, cùm rescivisset Patri necessarium iter esse in proximum pagum, ubi erat concionem habiturus, insidias paravit in prato *le Breuil*, & inter virgulta delituit. Indè in transeuntem faciens impetum, strictumque gladium intentans, *Nunc inquit, nunc morere.* Cui Pater. *Præsto sum*, ait admirabili oris & animi tranquillitate; *sine modò ut breviter DEUM moriturus orem.* Percussus tantâ lenitate sicarius paulum constitit: precatus interim DEUM parumper vir sanctus, & ad furiosum conversus, *Jam nihil est in me moræ quin de me statuas tu arbitratu: nihil malim quàm Christi causâ mori.* Exarmavit centurionem tam blanda, tam tranquilla, in tanto discrimine, oratio: ex animo furor, gladius è manu excidit. Advolutus ad servi DEI pedes, veniam sceleris petiit, cujus memoriam & dolorem nunquam se depositurum promisit. P. Antonius *de Mangeon* in suo commentario affirmat observatum à se diligenter Patrem Regis, neque tamen ullum unquam in ejus aut sermone aut vultu animadversum cupiditatis parum domitæ vestigium. *Destitutus interdum*, inquit, *à viris probis, imò malè ab iis acceptus, à quibus defendi debuerat, nunquam tamen de beato mentis composita statu deturbatus fuit. Rectè an secus caderent negotia quæ susceperat, idem illi semper animus, idem vultus.* Erant qui ejus rationem agendi approbarent; nec deerant qui eandem improbarent, utroque eodem spectabat ore, eodem in numero habebat: nunquam visus affici mœrore, aut gaudio, desiderio vel metu; perinde quasi captus omni sensu, quod mortuis accidit, fuisset: adeò divinus amor quidquid in humanis cupiditatibus vitiosum est, tanquam terrene & impure masse scoriam, in ejus animo decoxerat.

Quibus satis est animi ad objiciendum neci caput, iisdem ad *Animi* ferendum contemptum satis animi semper non est. Hæc enim vero cæ- *submissio.*

Lib. V. Ictis gratiæ de P. Joanne Francisco triumphum agnoscere licet: Eâ docente, tam nihil ducebat, tam susque deque habebat quidquid hominum opinione, honor, fama, existimatio, vocatur, ut humilitas inter ceteras ejus virtutes eminere meritò censeatur. Diu deliberavit num rogaret superiores, ut nè sacris Ordinibus initiaretur, ac domesticis ministeriis in perpetuum addiceretur. Fatebantur omnes illum eximiâ dicendi facultate esse prædictum; hanc tamen exiguis & obscuris explicandæ populo, familiari ac pæne rudi sermone, doctrinæ Christianæ cancellis circumscripsit.

Laudatus non erubescibat solum, sed etiam ita perturbabatur, ut neque color, nec vultus, constaret. Virginem ægrotam à medicis depositam, jamque cum morte luctantem, precibus suis momento sanaverat. Eum omnis familia gratias actura circumstetit. Tanta illum incessit obruitque pudor, cum id prodigium sibi tribui vidit, ut in eas eruperit voces: *Heu! si quid hic inesset miraculi, profectò illud esset, quòd DEUS tam vile instrumentum ad miraculum patrandum adhibuisset.*

Parum erat viro humilitatis perstudioso honorem fugere, quidquid abjectum, ac despectum erat; contumelias, & opprobria, incredibili aviditate consectabatur. Illud vulgò dictitabat, si probè notus esset, ac pro merito tractaretur, se prætereuntium pedibus, ut mortalium omnium infimum, proculcatum iri. Hoc habebat persuasissimum, nullum esse infamiæ, nullum injuriæ genus, quod non promeruisset. Evenit non rarò ut alapis, colaphis, & verberibus, pessimè acciperetur; tunc omnino existimabat se cum multò indulgentiùs & clementiùs, quàm pro merito actum fuisse. Si quis illum per jocum irrideret, sic jocanti arridebat, ut facilè intelligeres quàm libenter aliis jocandi materiam præberet de suo. Quin etiam consultò sermonem extrahebat, ut qualicumque sui contemptu diutiùs frueretur. Eò denique progressus est, ut in vestibus, verbis, incessu, habituque, nescio quid abjectum, vile, ac proletarium, dedita operâ, usurparet, eâ spe fore ut apud eos, quibus ignotus esset, nullo numero ac loco haberetur: nec eum spes aliquando sua fefellit. Illius in ferendis opprobriis patientia visa est nonnunquam amicis ignavia; & humilitas, animi abjectio. Orbatum audiendi sensu credidisses, adeò gravissimis injuriis, maledictisque turpissimis, nullo pacto movebatur.

Non tantum ab improbis datus est servo DEI humilitatis exercendæ locus, verum etiam ab hominibus virtute, & auctoritate præ-

præditis. Rectore usus est, qui sinistrâ de ipso imbutus opinio- Lib. V.  
ne, illum privatim ac publicè objurgabat, quidquid ageret con-  
temptim accipiens, & pœnas, quæcumque sunt in coetu religioso  
ad incutiendum pudorem gravissimæ, imponens. Eas Regis obi-  
bat animi demissione summâ, nihil exoptulans, nihil excusans.  
Nonnemo è primariis Patribus cùm audivisset id solemne sermo  
DEI esse, ut reprehensus nullâ unquam uteretur excusatione, imò  
ut tum maximè placeret sibi, & gratularetur; experiri voluit an  
itâ se res haberet, ejusque humilitatem velut ad incitas redigere.  
Accipit illum in conclavi solum, & coràm enumerat singulatim  
quidquid ipsi malignitas obtrectatorum, aut malevolorum invidia  
unquam objecerat. *Multi, inquit, virtutem tuam assignant bo-  
nitati nature, non vera pietati; zelum hunc animosum & actuo-  
sum, indolis fervide temerarium impetum interpretantur. Hinc  
illa quotidiana de tua imprudentia querela; hinc illa turba, qua  
tantam tibi creant molestiam, & tam multos Societati adversarios  
parant. Itâ ferè sentiunt omnes te neque posse quiescere, nec pa-  
ti ut alii quiescant. Nesci quàm multos offendant perpetua illa  
concurstationes, quibus, dum salutî animarum consulere te profite-  
ris, id perfecisti ut legum religiosarum exsors, ac domesticæ disci-  
pline immunis & pane contemptor, esse videaris; itâ ut domi stare  
supplicii loco duceas. Quin illud scio, tetras quasdam contra mo-  
res tuos suspensiones certis hominibus injectas fuisse, cùm te tam cre-  
brò, tam cupide cum mulieribus non optimis versari vident. Men-  
tem sanè tuam esse optimam reor; quin tamen contra prudentiam  
& necessariam cautionem pecces, diffiteri nemo potest. Ego qui-  
dem superiorum moderationem admiror. Si mei arbitrii res esset,  
curarem profectò, ut aliam vivendi viam inires. Si me audis,  
non expectabis donec tibi hac necessitas imponatur. Fac amico be-  
ne monenti auscultes; & ab hac singulari & devîa pietate, ad  
communem, atque usitatam ceteris Patribus viam te refer. Ad  
hunc ferè modum per dimidiam horam locutus cum eo Pater, ne-  
scio quem objurgationis acerbitati saporem candoris, benevolen-  
tiæ, ac sinceritatis, aspergebat, nullus ut dubitandi locus esset quin  
ex animi sententia loqueretur.*

Dicentem humilis DEI servus, nè interjecto quidem ad inter-  
pellandum verbo, sinè ulla commoti animi significatione audivit;  
nec leve beneficium accepisse professus, gratias, tanquam amicè  
monenti, magnas egit. Oravit ut pergeret hoc pacto de se bene

Lib. V. mereri, neque contentus benignè admonere, acriter & liberè increparet: Sic, inquit, intolerabili meæ superbix fieri medicina poterit. Ad extremum promisit daturum se operam diligenter ut ea quæ tam amanter suggererat, emendaret. Pater, licet virtutem eximiam Regis antea perspectam haberet, nihilominus orationis tam parum ceteris hominibus cognitæ ac familiaris novitatem admiratus, capere non poterat quo fieri pacto potuisset, ut tam odiosæ narrationi serenam frontem, tranquillum animum, aures attentas, tandiu præberet: ejusque humilitatem longè majorem esse opinione prædicabat.

Regis non magis calumniâ, quàm objurgatione, movebatur. Sexcentis appetitus calumniis, nullam iis defensionem opposuit, licet purgare se, & objecta diluere crimina, quàm facile, tam necessarium videretur. Accusatus aliquando de culpa gravi cum obticesceret, defensorem se illi obtulit amicus, cui explorata falsitas accusationis erat. Rogavit ut sileret, nè, inquiebat, elabatur mihi tam præclara occasio tolerandæ, Christi causâ & exemplo, ignominix.

Vulgò ajebat spectandum instar thesauri à Christianis quidquid notam dedecoris aliquam posset inurere. Itaque majori nunquam voluptate perfundebatur, quàm cum publicè sibi quispiam ferociùs insultasset. Tunc sibi plaudebat, *quòd dignus esset habitus pro nomine JESU contumeliam pati.* Si quis doleret ejus vicem, hunc ajebat ignorare, quantum felicitatis & honoris lateat in opprobriis, Christi causâ toleratis. Indignè ferentibus nonnullis ac miserantibus quòd alapâ percussus publicè fuisset: *Tantine est, inquit, porrectâ feriri manu? Ecquis censeri discipulus Christi potest, quem non opprobria vel gravissima delectent?*

Paupertas  
Euangelica.

Cùm esset Regis insigniter humilis, paupertatem non amare non poterat. Eam verò, è præscripto sancti sui Fundatoris, diligebat ut matrem. Christus JESUS in stramine, & stabulo Bethleemitico jacens, argumentum vulgò meditandi, & exemplar propositum ad imitandum, illi erat. Omnia in ipso paupertatem redolebant: cubiculum in urbe, omnium, quæ domi forent, maxime incommodum; ruri plerumque rustici tugurium, aut ruinosa parietinæ; cibus, qualis agrestium egentissimorum, panis, aqua, lac, herbæ; supellex in itineribus, baculus, breviarium brachio subjectum, Christi crucifixi effigies pectori admota; vestis, tunica talaris vetus, & pallium detritum, quæ nunquam nisi lacera deponebat. Nescio quis illi tunicam recentem cum obtru-

fis.

fisset, adeò moleste rem tulit, ut ejus mœror antè allevari nequiverit, quàm alia subjiceretur senio decolor & interpolata. Ea verò quâ indutus obiit, quæque Lalovesci, tanquam ejus exuviarum pretiosa pars, asservatur, perrupta multis locis & pertusa erat. Primis Missiomum annis mendicato quotidie pane victitabat. Sed cum per occupationes cibum ostiatim non liceret corrogare, instituit postremis annis impositam humeris farinam, aut panem, quo vesceretur, portare. Non rarò, post conciones habitas in aliquo pago, & auditas confessiones, cum non haberet quò se reciperet, ad placandam utcumque frusto panis famem, coactus fuit rusticum, interposito DEI nomine, rogare ut se, tanquam pauperem, recto exciperet. Nullis sodalibus jucundius utebatur, quàm pauperibus: illorum duntaxat domos frequentabat, nec divitum terebat limina, nisi ut egenis aliquid subsidii conquireret. Denique in sinu paupertatis, ut ità dicam, supremum edidit spiritum, in aspero montis jugo, alienæ domi, & in lectulo sibi commodato: Deique nutu factum est ut ejus corpus remaneret in exiguo paucorum mapalium pago, nempe inter manus ac tuguria pauperum, tanquam perenne monumentum constantissimæ caritatis, quâ illos persecutus fuerat.

Cum Regis nuntium voluptatibus remisisset studio mortificationis; honoribus, humilitatis operâ; caducis bonis, colendâ insigniter paupertate; proclive illi fuit spoliare se propriâ voluntate, quod religiosæ obedientiæ munus est. Hujus virtutis eam omnem perfectionem est adeptus, quam sanctus Ignatius in suis Constitutionibus describit. Ità se in religioso instituto semper gessit, ut si, vitâ, motu, & proprio sensu planè orbatus fuisset: unica illi judicandi ac volendi lex & norma, judicium voluntasque præpositorum suorum; in quibus Christum duntaxat intuebatur, cujus nimirum vices & locum obtinebant. Hinc illa religiosa veneratio quâ illos observabat, eorumque jussa, tanquam à DEO ipso dictata, excipiebat. Nihil moliebatur iis inconsultis, paratus quidquid operis designasset, eorum arbitrio prosequi, vel omittere: quippe qui unam DEI spectaret voluntatem, cujus illos interpretes sibi datos intelligebat.

Ministros Euangelii plerumque reperire est, in iis quæ ad salutem animarum pertinent, strenuos & impigros, at pertinaces, eoque magis in sententia obfirmatos, quòd omnia sua consilia referri ad proximorum utilitatem arbitrantur. Ab iis P. Joannes

Lib. V. Franciscus, longè discrepabat. Quem constat ad minimum superiorum nutum destituisse opera sapienter instituta, & ad felicem exitum brevè perducenda. Obedientiam suam nullis definiebat limitibus; æqui, boni, quidquid injungeretur, faciens, & satis ad parendum causæ existimans quòd ità moderatoribus suis videretur.

Ut esset ejus obedientia purior ab omni labe, accidit non sine peculiari Numinis consilio ut superiorem nancisceretur, qui ejus patientiam miris, ut vidimus, ac duris modis exercuit, usque eò, ut illi functionibus apostolici zeli omnibus interdiceret. Tam grave interdictum non acerbissimè ferre DEI servus non potuit. Paruit tamen; neque ullam querimoniam vocem ab eo dolor expressit. Sanè, quo salvà obedientiâ, pristinas pergeret obire functiones, à Provinciali petiit ut aliud sibi assignaret collegium, ubi superiorem haberet magis obsecundantem suo proximos adjuvandi desiderio; & ratam ejus petitionem Provincialis habuerat. Verum extimuit Regis nè quid in hac petitione lateret vitii, seque in eodem collegio continuit, tutiorem ac præstabiliorem omnibus pietatis officiis obedientiam judicans. Itaque omni solitudine abjectâ, & in DEI voluntate penitus acquiescens, satius sibi duxit obediendo nihil agere, quàm multa præclare utiliterque gerere, indulgendo propriæ voluntati. Durum illi animabus servandis operam non dare: at durius multò fuisset à superioris voluntate vel transversum unguem discedere. Collegii Aniciensis. Rector, ut supra narratum est, illi præceperat ut parochio Marleni obtemperaret in iis, quæ spectarent ipsius valetudinem, laboriosas occupationes, & afflictationes corporis, in quibus DEI servus modum vix tenebat, & longius quàm par erat, efferri videbatur studio mortificationis. Obstupuit parochus, sanctam Beati viri simplicitatem suspiciens, quâ morem jubenti gerebat in omnibus. Lubet ipsum loquentem audire. A delectis iudicibus rite interrogatus, ità disseruit, ut perscriptum est in Actis Canonizationis. *Usum, inquit, auctoritate, quam in eum Rector mihi demandaverat. Modum & ordinem ejus occupationibus, cibo, somno, labori, excursionibus, prescripsi. In iis omnibus ità mihi audiens dicto fuit, nihil ut fieri posset religiosius, nihil accuratius. Si quando contingeret, ut parum memor temporis, ultra prescriptum, in eade sacra remaneret, satis habebam ostendere ipsi litteras, quibus mihi jus partisque superioris Rector tribuebat: subito vel sanctissimas occupationes abrumpebat.*

Præ-



Præcipua illius erga præpositos Ecclesiasticos veneratio & ob- Lib. V,  
servantia erat, in quibus scilicet auctoritatem DEI agnosceret. Id  
Petrus le Blanc, Episcopi Aniciensis Vicarius Generalis, publicè te-  
statur, *Nihil designabat, inquit, nihil aggrediebatur, nisi me con-*  
*scio & consulto, atque adeò probante & assentiente: banc enim si-*  
*bi dixerat legem, ut sua munia, nisi ex Episcoporum, quorum diæ-*  
*ceses excolebat, eorūque Vicariorum Generalium auctoritate,*  
*arbitrioque, non administraret.* In quo, addit idem Petrus le  
Blanc *Sancti Francisci Xaverii obedientiam est emulatus, cujus A-*  
*postolicum Zelum imitabatur.*

Tot virtutibus addidit cumulum eximia corporis animique *Cordis*  
mundities, quam omnes in servo DEI semper sunt admirati. E *munditi-*  
paucis, quæ illi exciderunt, vocibus satis intelligi potest, eum sin- *es & ca-*  
gulari DEI beneficio immunem extitisse intestini hujus belli, quo *simonia.*  
vexati sanctiores etiam viri sæpe ingemiscunt. Differebat aliquan-  
do liberius ac familiarius cum homine Societatis, ob virtutem sibi  
amicissimo. Hic illi candidè aperuit nonnulla, quæ peculiari su-  
perum favore consecutus erat, dona & munera; cui vicissim Re-  
gis eodem candore: *Ego, inquit, inter maxima, quæ DEI beni-*  
*gnitas in me contulit, beneficia numero, quod stimulas carnis nullos*  
*unquam norim, aut expertus sim.* Quin, illi DEUS tantum libi-  
dinis odium inseverat, ut ipsum impudicitiae nomen horreret. Hinc  
ille ardor, hinc illi conatus, ad mortales obscænis deditos volu-  
ptatibus ex illo cœno extrahendos.

Ità vulgò persuasum omnibus erat, ejus sermonibus, conspe-  
ctu, ipsâ demum præsentia, castimoniae amorem afflari. Unò  
sæpe colloquio summum impudicitiae odium turpissimis & conta-  
minatissimis aspirabat. Multi pravâ consuetudine irretiti, ex qua  
se nunquam expedire potuerant, testati sunt, post exposita illi in  
sacramento peccata, se prorsus mutatos, jugum imperiosæ tyran-  
nidis nullo negotio depulisse. Aniciensis Episcopi Vicarius Gene-  
ralis, arctissimâ cum DEI famulo junctus amicitia, dictitabat in-  
ditam illi divinitus vim admirabiliter efficacem non tantum ad  
persuadendum perditis mulieribus austerioris vitæ genus; sed etiam  
ad fovendum in iisdem & custodiendum pœnitentiæ spiritum; id-  
que affirmabat propterea, quod nullam vidisset, quæ hortanti resti-  
tisset, aut quæ ad flagitia semel detestata rediisset. Illi ipsi quo-  
rum erat projecta fama & pudicitia, & quorum vulgò par est au-  
dacia & malignitas in iis exagitandis, qui fœdis ipsorum volupta-

T t

abus

Lib. V. tibus injicere moram & frenum tentant, cùm viderent ejus castimoniam tam publicâ, tam illustri omnium approbatione defensam, licèt assiduè occupatus esset in profligatis istis mulierculis, aut ad bonam revocandis frugem, aut sublevandis; licèt calumniis opprobriisque famam ejus obterere conarentur, nunquam tamen sunt ausi moribus illius & integritati vel minimam labem aspergere. Hoc maximè argumento nitebatur Comes *du Fay de la Tour Maubourg* ad declarandam Beati viri probitatem. *Satis mihi signi est*, inquiebat, *eum omnis macula expertem fuisse, quòd nullum ipsi vitium objicere adversarii potuerint.* Hujus prudentissimi juxta & nobilissimi viri verba, quibus id fusiùs exponit, ut habentur in Actis Canonizationis descripta, huic libro, & virtutum servi DEI compendio, subtexam.

*Fieri non potest*, inquit, *ut religiosus vir, qui vitam duxerit in luce atque oculis hominum, qualem à Beato Regis traductam vidimus, peccaverit contra pietatem in DEUM, & caritatem in proximum; contra sui status perfectionem, & ministerii sui leges, idque nemo unus animadverterit. Si quo, etiam levi, laborasset vitio, latere procul dubio & fallere nequivisset. Simulet quis, ac dissimulet, quantum volet; indoles prava, impetus animi male compositi, levitas, arrogantia, seriùs ocyùs, inter frontis integumenta, simulationisque tenebras perlucet. Quantumvis attento & vigilantì aliquid elabetur, quo vitiosus amor sui se prodat; maxime si excubent collocati velut in speculis inimici, quorum interfit vel minimos observare hominis nevos; illis procul dubio fucum nunquam diu fecerit. Huc adde quòd populus, cujus in flagitia invebuntur ministri sacri, oculis attentissimis, ac pane lynceis, eorum omnia vestigia contemplatur, nec cupidius quidquam facit, quàm censuram quandam exercet de illis, qui se morum censes, & reformatores profitentur: in iisque si quid incompositum, ac minùs firmum, ut est imbecillitas humana, deprebenderit, quasi castigatores suos ulturus, illud castigat vicissim, ac promulgat. Regis inter homines, & in medio populo versatus semper fuit. Ut erat in vitiis coarguendis acer & invictus, sic totidem sibi hostes paraverat, quot erant in civitate improbi ac libidinosi, qui oculis in eum, quidquid publicè aut privatim ageret, semper conjectis, observabant, num quis daretur carpendi locus, ut redderent ipsi vicem, & reprebensorem suum ovantes gratulantesque reprehenderent. Profectò si quam observassent in illo cupiditatem parùm do-*  
*mi-*

mitam, si quam ambitionis, inanis gloria, aut cuiusvis alterius generis labem, sibi non temperassent quin eam illi objicerent. Atqui, post adhibitam omnem diligentiam ut examinarent num ejus facta essent dictis consentanea, num vita sermoni discolor discrepansque appareret, nihil in eo notaverunt, quod levioris culpa speciem præ se ferret. Equidem criminati sunt, quòd modum in colenda virtute non teneret, at veri criminis nihil unquam obiecerunt, coactique sunt fateri nihil in ejus actionibus ambiguum, nihil suspectum; omnemque vitam immunem reprebensionis, & adversus acerrima censura tela usquequaque munitam esse. Ex eodem argumento, minimè omnium obscuro ac dubio, existimare licet quàm recti, quàm integri mores Apostolici viri fuerint.

Neque id satis, (addit idem Comes) non solum in eo nihil vitii deprebensum est, verum etiam omnes testati palam sunt, summi & infimi, probi improbi que, seculares & religiosi, nihil in eodem non sanctum, piùmque animadversum fuisse; nihil quod non spiraret amorem DEI, & inspiraret. Id verò ita professi fuere non ignoti dubitave testes, alieno testimonio incerto, & infido, nixi; sed Vicarii Generales, quos operum piorum conscios & adjuutores adhibebat; parochi, ad quos in Missionibus divertebat; homines Societatis, inter quos in collegiis versabatur, populi quos erudiebat, ipsi nequam & dissoluti, quorum vitia objurgabat, qui debitam ejus eximie sanctitati, quamvis moleste sibi & invise, laudem denegare nequiverunt.

Hanc præclaram de servo DEI opinionem tantum abest ut extinxerit ejus obitus, ut potius majorem in modum confirmata, & longè latè que per omnes Galliarum provincias, innumeris miraculis ejus ope ac patrocinio editis, disseminata fuerit.



# V I T A B. JOANNIS FRANCISCI REGIS. Liber VI.

**T**Ot Christianis & religiosis virtutibus, quas in servo DEI collectas ostendimus, homines adducti, ad mortuum piè colendum certatim conspirarunt. Vix supremum ediderat spiritum, cum ejus vestes, instar sacrarum reliquiarum, divisæ fuerunt, & quidquid vivens tractatione suum atque usu fecerat. Tunicam ejus talem parochus Lalovesci retinuit: petasum clam à rustico sublatum, nobilis matrona magno mercata est: scipio & calcei cupidè conquesti; ad sacrum poenitentiae tribunal, ubi de peccatis jus Anicii dixerat, venerabundus populus concurrat.

*Ejus tumulus miraculis & concursu populi celebratur.*

In primis ejus tumulus jam tunc ac deinceps, ingenti miraculorum numero celebratus fuit. Sed antequam ea singillatim recensueamus, operæ pretium est cognoscere quid de iis censuerint Archiepiscopus Viennensis, Episcopi Aniciensis & Valentinus, in epistola communiter ab iis ad sacram Rituum. Congregationem scripta anno 1702.

*In P. Joannem Franciscum ea est in toto Gallie regno omnium populorum devotio, atque fiducia; is omnis ætatis, sexûs, & conditionis personarum concursus ex provinciis, etiam exteris, quamvis per accessus difficillimos ad ejus tumulum; tam longè demum latèque disseminata miraculorum ubique fama; ejusque apud altissimum gratie, optimatum perinde ac vulgarium, universalis opinio, ut à cultu DEI servo exhibendo prohibere diutius Christi fideles difficillimum sit.*

*Episcopo- rum de illius miraculis & simonia.*

Armandus de Bethune, Episcopus Aniciensis addidit, in sua seorsum ad eandem Sacram Congregationem epistola, data Kalendis Martii anni 1703. *incredibilem esse populi concursum ad colligendum prodigiosum ejus tumuli pulverem: videri sibi difficile cohibere publicam in eum fidem ac religionem, atque impedire nè in vetitum Sedis Apostolica decretis, cultum erumpat.*

Ar-

Armandus *de Monmorin*, Archiepiscopus Viennensis in suis Lib. VI ad summum Pontificem litteris Anno 1703. datis septimo Idus Octobr. confirmat ea, quæ ante sex menses antistes Aniciensis Sacræ Rituum Congregationi significaverat.

Quod istis præsulibus metum ac religionem injecerat, subinde accidit. Populus, beneficiorum à servo DEI acceptorum memor, contineri diutius non potuit; cùmque pietati suæ liberius ac prolixius indulgeret, Archiepiscopus Viennensis, cujus diocesi Lalovescus accensetur, tolli de templo jussit pictas tabulas, & alia monumenta præproperæ, & parùm consideratæ pietatis. Laudavit Roma præsulis vigilantiam sedulò caventis nè quid contra Sanctæ Sedis Decreta peccaretur. Cohibita, & intrâ cultûs legitimi terminos compressa, non extincta, nec imminuta populi pietas est; dùmque procedens dies illustrium DEI servorum, quibus ut sanctis honor habitus initio fuerat, memoriam paulatim obliteravit, nondum post octoginta ferme annos minui cœpit concursus peregrinorum ad sepulcrum P. Regis confluentium, DEO videlicet pergente servum suum novis ac majoribus in dies prodigiis illustrare. Sacerdos Societatis cùm ante aliquot annos per agri Velauni, prope Lalovescum, montes iter faceret, è rustico quæsitum num idem semper ad viri sancti tumulum concursus fieret: *Vides*, ait ille, *ista montium perpetua juga, quæ nubibus arduum inferunt caput? tam multis peregrinis teruntur, ut ea paulatim deprimenda putem, & agrum hunc omnem, sublati montibus, in latam & apertam planitiem convertendum.* Non aliâ commodius, quàm hac immodica, & oculis ipsis subjecta locutione, judicavit rusticus exprimi concursum posse hominum undique ad sacros servi DEI cineres catervatim festinantium.

Hoc ipsum fusiùs, & luculentiùs exponit Archiepiscopus Viennensis, ad Summum Pontificem scribens, quinto Idus Octobr. 1710. *Dum viveret habebatur*, inquit, *jam tum ut Sanctus, postquam autem è vivis excessit, continuo hæsit memoria ejus clara, & firma sanctitatis opinio, sepulcrum celebre, & gloriosum fuit, cœpit expeti passim pulvis tumuli, & ad omnem curationem morbis utiliter adhiberi, locus sepulture, precibus adeuntium, sacrificiis, donariis, frequentatus est.*

*Neque in viculo, aut vicinia duntaxat constitit religiosa, & privatim exhibita veneratio, latè se, promptissimèque fudit, per urbes, & provincias, per omne hominum genus propagata, trans*

Uu

etiam

**Lib. VI.** *etiam maria ad exteras nationes in novam Franciam, ad usque Indias pervenit.*

*Ad Ecclesiam, in qua condita sunt ejus reliquiae, crebra sunt, pietatis gratia, virorum, mulierum, ex omni ordine, Ecclesiasticorum, Religiosorum, Laicorum peregrinationes. Illuc adveniunt Comites, Barones, Marchiones, Gubernatores Provinciarum, Duces Militum, Tribuni, Praefecti Castrorum, antistites ipsique Cardinales: ac tanta nonnunquam est confluentium multitudo, ut peregrinorum vulgus cogatur in agris pernoctare, domiciliis omnibus pagi per viros principes occupatis. Parœcia finitima fere omnes alia post alias supplicantium ritu procedentes, item omnis generis homines laici, clerici, religiosi concurrunt tam multi, ut per octo menses Ecclesia quotidie ad multam diem referta sit, vix, que audiendis confessionibus, administranda Eucharistia sacerdotes multi sufficiant.*

*Neque minor numerus è longinquo eleemosynas pro sacris faciendis, donaria, munera in gratiarum actionem pro beneficiis acceptis mittentium. Subveniunt ab usque Parisiis, Aureliâ, Lugduno, Niverniâ, Gratianopoli, Viennâ, Tolosâ, Perpiniano, Massiliâ, ex Comitatus Venaissino, & Burgundia, ex Pedemontio. Excellentissima Domina Principissa Valdemontii, dum esset in Insurbria, ab ipsa civitate Mediolanensi expetiit pulverem petatum ex sepulchro, & largam eleemosynam pro sacris novem diebus continue faciendis summisit.*

*Ex hac populorum liberali devotione, & concursu factum est, ut qui locus tribus domunculis rusticis continebatur, jam pagus satis frequens evaserit, & templum ante incultum, & egenum, jam bellè ornatum vasis, vestibus sacris, aliisque aris apta suppellectili sit; quin etiam parochus loci de Veirines, cujus parochiae Lalovescus tenuis appendix annexebatur, antiquâ sede relicta, Lalovesco jam resideat, ut in longè potiori statione, ibique vicarios capellanos de proventibus templi sui commodè alat, & muneretur.*

*Devotionis populorum tam diffusa, adeo constantis, ardor, & penè impatiens studium, quod tametsi bona spe obtinendi brevè Venerabili Patri Beatorum honores hactenus sustentatum, tamen mandatis, minis, censurarum metu, egre contineri potuit, timeaturque erupturum in cultum publicum, quem neque impedire amplius possint Episcopi si velint, neque, ut velint impedire, facile adducantur, reveriti offensionem populorum, quibus videbuntur*

*Pro*

*Præfules non tam obsequi Ecclesie, honores sacros differenti, quam Lib. VII. oblectari divine voluntati tot signis Servi sui gloriam manifestanti.*

Ita de Beati Viri miraculis universè scripserunt complures Episcopi, & quàm admirabiles in hominum animis motus excitaverint, ut testes idonei, retulerunt. Eorum gravissimum testimonium firmant illustrantque suo viginti duo partim Archiepiscopi, partim Episcopi Occitanie, quorum extant litteræ ad Clementem XI. in generalibus provincie Comitibus, pridie Idus Januar. anni 1704. in hæc ipsa verba scriptæ. *Nobis inquiunt, gratulamur, quod senescente jam mundo, virum tulerit eâ sanctitate conspicuum. Exultabit solitudo, & florebit quasi lilium, agebat olim Prophetæ, \* quia aperientur oculi cæcorum, & aures surdorum patebunt; sicut sicut cervus claudus, & aperta erit lingua mutorum. Nam ea ipsa renovari miracula nos ipsi coram cernimus, Beatissime Pater, in asperrimis Laloveſci Montibus ad gloriosum Franciscitulum, ubi cecos videre, ambulare claudos, sardos audire, mutos loqui, rumor est ubique gentium. Quid non sperare audeat Occitania nostra sub auspiciis viri DEO tam gratiosi? An poterit patria non meminisse, iis præsertim temporibus, quibus extincta licet, ac penè emortua heresis, carissimam patriam inficit pestifera, quadam luc. Utinam Beatissime Pater, supremo Judicii Vestri calculo crescat in dies, ac multiplicetur Sanctorum gens!*

Satis superque argumenti esset in his tot præsulum litteris ac testimoniis, ad demonstrandam multitudinem miraculorum & gloriam, quâ DEUS servi sui sanctitatem eximiam declaravit: nihilominus Christiani populi pia curiositas videtur jure ac merito postulare, ut nonnulla singillatim distincteque proferantur.

Quemadmodum Apostolici viri caritas dum viveret præsertim erga ægrotos enituit; sic ad eos morbis, naturæ vires superantibus, liberandos beneficam potentis patrocinii vim sæpius adhibere, & eandem in domicilio felicitatis, ac Beatorum patria, teneræ caritatis indolem retinere visus est. Quædam insigniora duntaxat hujus generis miracula recensebo.

Magdalena *Arnauld*, earum virginum una, quæ S. Franciscum Salesium conditorem venerantur, annum agens quinquagesimum, hydrope gravissimo laboravit Anicii, anno 1656. Medendo ægrescebat malum, adeoque corpus intumuit, ut cum nequiret pedibus insistere, affixa lecto jacuerit. Ingravescente morbo, membra omnia paralyſis ita occupavit, ut nec moveri, nec jamque

**Lib. VI.** nisi ægre spiritum posset ducere. Sola, ceteris partibus corporis cum pro-constriictis, restabat lingua paulò liberior. Novissimis igitur mun-  
*xima lu-* nita Sacramentis, sacro inuncta oleo, & viribus planè destituta,  
*Etansem* supremum editura singulis momentis spiritum credebatur. Erant  
*morte, sa-* omnes cœnobii virgines Beato Regis peculiari studio deditæ. Sub  
*nat.* vesperam cum medici, post dimidiam horæ partem è vita migratû-  
 ram affirmarent, oblata sunt illi Beati Regis sacræ reliquiæ: quas  
 piè deosculata, *O Beate*, inquit, *unum in hac vita meum est vo-*  
*tum ut sanctissima DEI voluntas fiat.* Optanda valetudinis alia  
*mibi causa non est, quam ut novo pietatis ardore, superioris vita*  
*veternum, & noxas emendem.* Fac tuâ quæso deprecatione ut  
*anni spatium mibi divina benignitas impertiat, quo me ad obeun-*  
*dam sanctè mortem comparare possim, & voluntariis pœnis divina*  
*justitiæ satisficiam.* Hæc locuta, pectori sacras reliquias impo-  
 suit, ac morbum in ipso temporis articulo penitus depulit; cor-  
 pus quod horrendum in modum intumuerat, planè detumuit.  
 Somno benignè recreata, postridie manè, eâdem, quâ ceteræ vir-  
 gines horâ surgens, interfuit rei divinæ, ac deinceps omnia reli-  
 giosæ vitæ munia obiit, palàm testata nunquam se melius valuisse.  
 Quod verò miraculi auctarium & cumulus fuit, anno circumactò  
 cessit è vita, quemadmodum à DEO, interposito B. Regis nomi-  
 ne meritisque, postularât. Morbi & sanationis, itémque implora-  
 tæ opis servi DEI, quatuordecim oculati testes veritatem hujus  
 prodigii, adhibito rite jurejurando, testati sunt.

*Triplitem  
 berniam  
 civis Ani-  
 ciensis sa-  
 nat.*

Quantâ valeret idem B. Regis apud DEUM gratiâ non mi-  
 nùs intellectum est sanato mirum in modum Joanne Gasparè *Mon-*  
*tercymar*, cive Aniciensi non obscuro. De illius morbo tacerem,  
 nisi miraculi, quo depulsus est, magnitudo & novitas quandam di-  
 cendi necessitatem imponeret. Tenuis membrana (peritonœum  
 medici vocant) ilia sustinens, cum tribus locis rupta esset, intesti-  
 na triplicem hunc exitum naçta, deciderunt, & in eo loco, in  
 quem defluerant, collecta, excreverunt ad humani capitis magni-  
 tudinem, interjectisque annis compluribus, in ligni morem indu-  
 ruerunt. Chirurgi omnia nequicquam experti, ægrotum deni-  
 que, ut insanabilem, deposuerunt. Dolores, quibus antea gra-  
 vissimis conflictatus fuerat, cum patientiam extorquere tentarent,  
 auditus est tertio Kalendas Februarias anni 1674. in lamentabiles  
 gemitus erumpere, nec quisquam dubitavit quin brevi tot malis fi-  
 nem, (quod unum remedium restabat) mors imponeret. Jacen-  
 ti



ti sic & destituto filius narravit de puella paralytica repente sanata Lib. VI. Laloveschi, implorato B. Regis patrocinio. Montercymar, olim pollicitus se ad Beati viri tumulum profecturum, morbum suum, tanquam voti nondum exsoluti ac dilatae profectiois poenam interpretatus est, & suadente filio in genua procidens promissum & votum, de adeundo quàm primùm servi DEI sepulcro instauravit. Vix precari desierat, cum assurgens, agnovit se morbo penitus liberatum. Extemplo chirurgum arcessit, qui tumoris pristini ac duritiæ nullum vestigium deprehendens, ægrum stare, ingredi, sedere, membra vario componere situ jussit, periclitandi causâ; postremò sanum valentemque declaravit. Audito miraculo civitas accurrit, cumque infinitus propè numerus eorum esset qui & præteritum Montercymari morbum, & præsentem valetudinem norant, nullo negotio reperti sunt, qui rite interrogati miraculum jurejurando confirmarent. Inter quos primum jure locum obtinet Vicarius Generalis Episcopi Aniciensis, medici duo, totidem chirurgi, & alii plerique, tum è Præsidentiali curia, tum è Canonicorum cœtu, qui ad ornanda viri sancti apud DEUM merita, ceteris testibus libentissimè suffragati sunt.

Id quidem minimè videbatur necessarium Anicii, qua in ur- *Mulieres*  
be tam multa servi DEI præsidio patrata prodigia circumfereban- *duæ car-*  
tur. Jam inde ab anno 1654. Antonia *Sisval* oculis omnino ca- *itate:*  
pta, eos recuperaverat, admotis utrique Beati reliquiis. *terciam*  
Paucis *immedi-*  
post annis Antonia *Gravier* eodem beneficio donata est. *cabili car-*  
Per novem continenter dies B. Regis imaginem capiti cum imposuisset, *cinomate*  
additis insigni fiducia precibus, exacto dierum numero, restitutam *liberat.*  
subitò videndi facultatem habuit, cum admotam oculis faculam ante non videret. Hanc geminam visus restitutionem gemina dos commendavit, quòd & repentina & constans extiterit: tum iis testibus utraque nititur, quorum auctoritas, numerus, & gravitas, nullum dubitandi de testimonii ab iis dicti veritate locum relinquit. Blancam *Garnier*, civem pariter Aniciensem sævum apostema dire cruciabat. Mamilla sinistra livido & ferrugineo colore infecta, lapidis etiam indurata ritu, prodigiosa mole intumuerat. Chirurgus, adhibitis emplastris ac malagmatis, dolorem lenire, aut pus foràs trahere, diu conatus, nihil effecerat aliud, quàm ut malum augesceret. Aperire demum apostema, & latentem pestem educere constituit. Frustrà luctatus, emortuas tantum pelles avellit, ut verò suppuraret abscessus, evincere nulla vi, arte

**Lib. VI.** nulla potuit; & vomica pūctis in cancerum murata, sic torfit ægram, ut dies totos octodecim, somni expers, ac nē lecti quidem patiens, traduxerit. Jacebat semianimis, suiꝛue vix compos præ dolore, cūm nescio quis auctor ipsi fuit ut Beatum Regis invocans, pulverem ex ejus tumulo sumptum affectæ parti applicaret. Fluebat nona post meridiem hora cūm opem Beati profusis imploravit lacrymis, ac pulverem, ut monita fuerat, laboranti mammarū imposuit. Continuo lenis obrepfit somnus, ac tribus post horis expurgiscens mamillam sinistram persanata, ac dextræ simillimam reperit.

*Strumose  
juvenis  
sanatio.*

Haud minus admirationis habuit in eadem civitate reparata valetudo Guillelmi *Faure* anno 1651. Subjectæ mento strumæ ulceribus septem scatebant. Inspectum à duobus peritissimis chirurgis malum, visum erat nullum arti & medicinæ locum reliquisse, ac nē tentare quidem curationem ausi erant. Æger potentiozem imploravit medicum. Lalovescum se contulit, aspersæque foedis ulceribus arenâ felicitis tumuli, sic obducta derepente & glutinata sunt, ut nē cicatrices quidem exstarent. Inter testes miraculi tredecim, Vicarius Generalis, Senatorum Decanus, Canonici duo, alumnus religiosæ familiæ, & duo causidici, numerantur.

*Puella  
membris  
omnibus  
capta sa-  
natur La-  
lovesci.*

Miraculi plus quiddam est in variis morbis unius ejusdemque puellæ sanatis in templo Lalovesci. Hujus nomen Joanna Percia, ætas annorum quinque & viginti; patria Vanoscus, oppidulum agri Vivatiensis. Misera corpusculum agmen morborum invasit sexto Nonas Martii anno 1672. Sinistrum erus retrò replicatum, femori validè adhæsit: brachium dextrum contractum, & pectori velut affixum est: maxillæ duæ ita constrictæ cohæserunt, ut diduci ac discludi non potuerint; cūmque folido cibo ægra pasci nequirit, jusculis victitabat, quæ per tubum in fauces instillabantur, quæ vacuum dentes olim excussi spatium dabant. Renes dimidio pede depressi subsederant, stomacho ad quatuor digitorum altitudinem prominente: denique ad miseriæ cumulum, oculos amisit. Tot malis oppressa biennium in lecto, motus omnis expers, decubuit: tribus medicis ac tribus chirurgis artem suam & remedia vinci dolentibus. Puella humanam desperans opem, ad Beatum Regis confugit; cūmque crebris appellans precibus, in magnam recuperandæ valetudinis spem inducta est. Quia verò DEUS, ut Augustinus docet, peculiaris quædam beneficia certis addidit locis, quæ religiosa sanctorum suorum veneratione impensius

suis celebrantur, ut illis gratiæ, tanquam sequestris ac deprecato- Lib. VI.  
ribus, majores habeantur, Joannæ Pertiz constitutus, locus ubi  
sanaretur, Lalovescus erat, ad sacros viri sancti cineres. Inje-  
ctam sibi mentem divinitus, & summam adeundi loci cupiditatem,  
sensit, egitque cum parentibus enixè ut eò deportaretur. Non  
poterant adduci ut filiz facerent potestatem itineris suscipiendi lon-  
ginq̃ui & periculosi, cum aspera sæviret hiems, cum ipsa extremâ  
vitæ spe penderet. Cum tamen instare & urgere non cessaret,  
exoratis demum parentibus, viz se committit pridie nonas Janua-  
rii 1674. in lectica Comitum *de Cadenac*, membris omnibus capta,  
mortisq̃ue speciem tetram in pallido & deformi vultu præ se ferens.  
Proficiscentem populus commiseratione motus, lacrymis votisque  
secutus est, & chirurgus Calvinianus, piæ parentum credulitati in-  
sultans, non dubitavit palam profiteri, se à Calvinii partibus disces-  
surum si sanam & valentem aspiceret. Precibus per novem con-  
tinuos dies Lalovesci indictis; primo die, cum ægrota interesset  
rei divinæ, manus dextra motum suum ac naturalem situm rece-  
pit, & altero die sinistra: singulis diebus aliæ ex aliis partes cor-  
poris explicabantur; adeò ut, nondum peractis precibus & sacris  
novendialibus, sanitatem integram adeptâ sit. Vanoscum nihil  
eunctata rediit, non jam in lectica jacens, sed equo insidens in  
quem sine ullius adminiculo insiliit.

Vanoscum omnis, quæ proficisci paralyticam, semianimem,  
ac moribundam viderat, vix credibilem de illius sanitate nuntium  
admiratione & gaudio perculsa excepit. Ubi verò adventare co-  
gnitum est, populus obviam effusus, subeuntem triumphantis ritu,  
deduxit domum, gratias DEO immortales agens qui tam insigni  
prodigio servi sui nomen illustrasset. Peragravit provinciam fama,  
& ad pristinam Beati viri venerationem accessio non mediocris est  
facta.

Postulante Lalovesci paracho, actum est statim de co-  
gnoscenda & comprobanda miraculi veritate: & jubente Archi-  
episcopo Viennensi, judex Ecclesiastico foro præpositus rem ge-  
stam in tabulas publicas retulit. Idem, post aliquot annos ab E-  
piscopis Aniciensi & Valentino factum. Testes undeviginti gra-  
vissimi & probatissimi, è juris formula interrogati fuere; in iisque  
professi sunt duodecim nihil à se de morbo & sanatione affirma-  
tum esse quod suis ipsimet oculis compertum non haberent. Chi-  
rurgus hæreticus, qui promiserat, si sana reverteretur è Beati tu-  
mulo, se ad catholicam religionem rediturum, declaravit eam à se

**Lib. VI.** derelictam ideo fuisse, quòd ipsius morbum insanabilem judicaret. Admonitus promissi, & ad catholicam religionem amplectendam invitatus, non stetit ille quidem promissis, & ( quæ sunt arcana & terribilia DEI judicia ) in errore perseveravit ; facere tamen non potuit quin veritati miraculi testimonium daret, noménque suum in Actis subscripsit.

*Virginis*  
*DEO con-*  
*secrata*  
*varii*  
*morbi mi-*  
*ro modo*  
*depulsi.* Ad vicinas paulatim urbes progressa miraculorum fama pietatem populorum, pietas fiduciam excitavit : fiducia novis prodigiis locum dedit. Molinis, quæ Gallia civitas est præclara in agro Borbonio, visitur insigne cœnobium Virginum, quibus nomen à Visitatione Beatæ Virginis sanctus fundator imposuit. In eo degebat Joanna Maria Peret. Hanc morbi quadriennio toto, alii aliis velut succenturiati, sinè ulla intermissione oppugnaverant. Novissimè paralytis crura inyasit, iisque cum sensu motum omnem eripuit. Ambo sic exaruerunt, ut instar spoliari carne cadaveris, ossibus siccis, & inter se nexis, tantum cohærent, & ipsa, quâ tegebantur, pellis, frustatim decideret. Reliquum interim corpus gravissimi dolores discruciabant, adeoque exhausta viribus erat, ut moveri jam non posset, quin animus ipsam, ac pæne vita, deficeret. Biennium sic exegit, templo, precibus publicis, ac divinia re carens, etiam diebus vel maximè festis ac solemnibus. Tribus, antequam tot incommodis liberaretur, mensibus novum morbi genus patientiam ejus defatigavit. Adjuncta paralyti hydroypsis stomachum tetra atque immani tumore distendit. Spes fuerat ægram aquis Vichianis primùm, deinde Borboniis, relevandam. Utrisque, & aliis compluribus remediis, incassum adhibitis, languentem ardentissima febris, convulsionibus comitata, sic prostravit, ut medici negarent, nisi interposito miraculo, sanari, & ultra mensem posse vivere.

Hoc edicto damnata comparabat se ad mortem, cum vitam & res gestas B. Regis, quæ fortè legebantur, audiens, & attonita miraculis, à DEO, servi sui deprecatione, patrat, erecta est in spem certam fore ut ejus patrocinio sanaretur, ac preces novem diebus perpetuis solvendas inchoavit, permultis virginibus sacris ex eodem cœnobio suis precibus ægram adjuvantibus. Invalescebat nihilominus atrox morborum impetus, nec moribundæ tamen fiducia infringebatur. Ultimo novendialium precum die, qui sacram Virgini Beatæ, in templo filium offerenti, lucem proximè sequebatur, incessit illam vehemens cupido rogandi ut in chorum de-  
por-

portaretur, ad sumendum cælestem cibum. Hæsit aliquandiu su- Lib. VI.  
 spensa cœnobii moderatrix, quippe metuens, nè viribus planè de-  
 fectam in grave periculum conjiceret. Ad extremum ægrotæ  
 precibus victa, & ejus fiduciam, tanquam omen futuræ sanitatis  
 accipiens, petenti assensit. Igitur delata in chorum, panem Eu-  
 charisticum sumit, submissis genibus, & brachiis sociarum virgi-  
 num utrinque sustinentium nixa. Vix sacrosanctum Christi Do-  
 mini corpus acceperat, cum redire subito vires sensit, seque alieno  
 jam adminiculo non egere significavit. Stetit cum recitaretur E-  
 uangelium, mox, nullo adjuvante, genibus per totum sacrificium  
 incubuit, gaudio, propter singulare Numinis beneficium, lacry-  
 misque perfusa. Peraçto sacrificio assurgens & virium factura  
 periculum, ingredi per chorum cœpit. Virginum præposita de  
 prodigio certior facta cum appropèrasset, videretque cruribus re-  
 ctam insistere, dextram porrexit, velut adjuvandi causâ; verum  
 sua sponte, ac sine cujusquam ope ambulantem cernens, spectare  
 ac mirari satls habuit. Sacerdos, à sacrificio redux ad crates  
 choro præsentas accurrit, & compertum oculis ipsis miraculum  
 prædicans, auctor præpositæ fuit, ut hymnum *Te DEUM* ad gra-  
 tias DEO agendas decantari juberet. Joanna Pereta primas sa-  
 cri cantici voces præcinit, totumque magna & plena voce decan-  
 tavit, virginibus reliquis alterna vice accinentibus. Longum illo  
 ipso die valedixit valetudinario, in quo totis quatuor annis inclusa  
 jacuerat; prandit cum sociis virginibus in triclinio, & ad consue-  
 ta cœnobii munia se retulit.

Pervasit statim urbem prodigii fama. Concurfus ingens ad  
 monasterium factus; locus in cœnobio, qui externis adeuntibus  
 vulgò patet, confluentium multitudini angustus fuit. Vixque sa-  
 tisfacere invisentium & interrogantium piæ curiositati Pereta po-  
 tuit. S. Petri Parochus, monasterii superior, inter primos ingres-  
 sus, eò vehementiùs obstupuit, quòd eandem pridie in extremum  
 adductam discrimen ac depositam aspexerat. Medicus à Superio-  
 re accitus, eamque intuens, *Superi!* exclamavit, *quid isthuc mi-  
 raculi est!* ac testimonium de illo nihil moratus dedit, quod in  
 Canonizationis Acta relatum est. Ad miraculi magnitudinem ve-  
 lut cumulus accessit, quòd Pereta jam indè à suscepto religiosæ vitæ  
 instituto parùm firmis usâ viribus, eas deinceps robustas experta,  
 illis gaudere, ac valere pergit, superstes etiamnum, & testis locu-  
 ples cælestis beneficii, quod à DEI, servum suum honorantis, præ-

**Lib. VI.** potenti manu feliciter est consecuta. Hæc admirabilis sanatio incidit in decimum Kal. Decembres anni 1701.

Anno sequente Claromontanus Episcopus, jussu Romani Pontificis, in rem præsentem venit, cum duobus Sacerdotibus, Ecclesiastico munere atque auctoritate præditis, ut prodigii seriem & adjuncta rite perscriberet. Joannam Peretam, & virginum præpositam; deinde monasterii Superiorem, confessarium, & capellanum, icémque optimates civitatis, audivit. Duodecim in primis testes oculatos diligenter interrogavit de ratione tota contracti, aucti, & sanati morbi, ac propositis sacrosanctis Euangelis, jusjurandum apud se jussit dicere. In ea verò quam ad summum Pontificem scripsit, epistola, urbem totam, nullo contradicente, miraculi fuisse testem asseverat.

*In eadem  
urbe fe-  
minis  
duabus  
sanitas  
mirabili-  
ter resti-  
tuta.*

Idem Episcopus de altero miraculo quæstionem instituit, paucis post primum mensibus secuto, in persona Mariæ Ludovicæ *du Rye*, virginis ejusdem monasterii. Pollicem putris vomica vitia-  
verat, & acerbissimum toto corpore dolorem sparserat. Chirur-  
gus dum apostema pertundit, nervum, cujus ope pollex inflectitur,  
aut secuit aut læsit, adeò ut pollex aridus, alimenti, coloris, & na-  
tivi caloris expers, nec flecti, nec moveri potuerit. Anni sep-  
tem in vestigandis & adhibendis omnis generis remediis absumpti  
erant. Irrita ceciderant omnia. Cùm Soror Pereta Mariam *du*  
*Rye*, sociam virginem admonuit, ut in Beati Regis fidem cliente-  
læque se conferret. Mox ambæ in ædem sacram pergunt, &  
post brevem precationem, genibus adhuc nixæ applicant arido  
pollici sacras servi DEI reliquias. Momento pollex moveri, flecti,  
sentire, ali cœpit; dolorque pristinus in perpetuum abscessit.

Eodem anno res planè insolita Molinensem pariter civitatem  
admiratione complevit. Margarita *Briffon*, earum virginum una,  
quæ peculiari voto curandis ægris se devovent, ac vulgò nomi-  
nantur Hospitalariæ, cùm in cœnobio sancti Josephi degeret, ve-  
xata morbo fuit, cujus causam, atque adeò nomen, medici semper  
ignorarunt. Diebus singulis semel iterumque, per octo & duo-  
decim interdum horas, eo misere cruciabatur. Ad primos mali  
assultus erumpebat è stomacho lamentabilis gemitus, velut hominis  
desperantis; aliàs rauca vox, & intercisa imitabatur molossium  
graviter latrantem; & ad sexcentos indè passus ejusmodi latratus  
audiebatur. Post hæc murmura, & quædam pugnæ præludia, sæ-  
vis convulsionibus totum corpus, per plures nonnunquam horas,  
qua-

quatiebatur. Usuram vocis per octo menses aliquando ægrota Lib. VI. perdidit: aliàs audiendi sensum, aliàs oculis acutus dolor ingru-  
bat. Cum verò crudelis belli nulla fieret intermissio, & crucia-  
rus alii alios exciperent, impar tot malis virgo fatiscebat. Su-  
dabant consilii & artis inopes medici, quotquot erant in tota regio-  
ne peritissimi, & annis quatuor omnia conati, ubi nihil succedebat,  
morbùsque adversùs remedia pertinax majora in dies capiebat in-  
crementa, spem cum conatu abjecerunt; ac triennium jacuit mi-  
sera, omni auxilio solatioque destituta. Septem annis in hoc lu-  
ctuoso statu transactis, cum B. Regis nomen editis passim miracu-  
lis celebrari audiret, impelli se vehementer sensit ut ejus opem im-  
ploraret. Ad sacram mensam accedere per novem continenter  
dies, ac certas fundere preces instituit: addit votum de novem sa-  
crificiis, quæ Lalovesi curaret facienda, si convalesceret; singulis  
diebus in aquæ scypho pulveris, è Beati tumulo sumpti, particu-  
lam hauriebat. Nihil votis interim respondebat: & pridie ejus  
diei, qui finem precibus novendialibus erat impositurus, gravio-  
res impetus velut insultantis morbi sustinuit. Animum nihilomi-  
nus non despondit, & instauratis illo ipso die majori fiducia preci-  
bus, hostem denique obstinatum penitus expugnavit, ac valetudi-  
nem repente, omnibus incommodis solutam, adepta, nihil tam  
multiplicis, tam diuturni, & atrocis mali præter nomen & memo-  
riam dulci mixtam gaudio retinuit. Præter illustre testimonium  
unius è regis medicis, qui morbi gesserat curam; ipsa ægrota,  
ejus præses & oenobii præposita, virgines valetudinarii præfectæ,  
aliique septem testes, apud Episcopum Claromontanum rite jurati,  
de miraculi veritate consenserunt.

Non id ago ut hîc enumerem omnia beneficia & dona sin- *Parii*  
gulari DEI benignitate, ac viri sancti patrocínio, Vivariensibus *morbi in*  
impertita. Videtur enim DEUS servi sui gloriam præcipuè am- *agro Vi-*  
plificandam in hac provincia suscepisse, quam ille Zeli sui Aposto- *variensi*  
lici præcipuum theatrum habuerat. Circa annum 1650. Eliza- *curati.*  
betha Angela de Rossillon, uxor Ademari de Gayelles, domini de  
Suchet, dum filum è colu deducit, fufum altè in manum adegit.  
Gravi dolore statim corripì, animo interdum linqui; brachium  
usque ad alam, ad magnitudinem & molem femoris, turgescere,  
adeò ut omnino præcidendum chirurgi affererent. Elizabetha  
nullam in humanis remediis spem relictam videns, Beatum Regis,  
fufis lacrymis ac precibus, appellat, & ejus sepulcri pulverem bra-  
chio

Lib. VI. chio aspergens, dolorem, tumorem, ipsas denique cicatrices, absterfit.

Non caruit portento, etiam splendidiori, Fanum S. Feliciani, quod oppidum est ejusdem provinciae. Joannes Martin, tabellionis filius, manibus ac pedibus ita distortis natus erat, ut eorum usu penitus captus esset: ipsis quoque cruribus retrò replicatis, deforme inutilis ac debilitati corporis onus totis quinque annis ægre tulit. Susanna Caseneuve, ejus mater, certior facta de miraculis ad tumulum Beati patratis, filium ipsa Lalovescum duxit, paulò post obitum servi DEI. Cælesti resecta pane, pueri pedes & crura pulvere sepulcri defricanda curavit, qui statim exiliens cursitare per templum cœpit, omnibus, qui aderant, stupore defixis. Non immorabor diutius recensendis prodigiorum istorum testibus: non Acta, & publicas tabulas conficio, sed historiam ex ipsis Actis Canonizationis depromptam conscribo.

*Filius Comitum du Fay de la Tour Maubourg sa-  
natus.*

Regis, cælo receptus, non poterat non meminisse Comitum du Fay de la Tour Maubourg, cum quo conjunctissimè in terris vixerat. Acceptum ab amico beneficium sic pius æquè ac sapiens Comes narrat. Ante paucos annos, inquit, filium meum in oppidum agri Vroariensis, Annonæum, tribus leucis Lalovesco distans, misi cum duobus nota mihi probitatis sacerdotibus, qui curam pueri gererent. Hic annos octo vix ingressus in gravem incidit morbum quo vita in ultimum discrimen adducta est. Continua dierum duodecim febris in corpusculum ita descevit, ut dorsi spinam inverterit; unde gibbus & insignis pueri deformitas extitit. Hanc arte nulla emendari ac tolli posse, medici, quibus agroti curatio commissa, renuntiarunt. Sacerdotes, pueri moderatores, quibus propter indolem suavissimam, egregiasque dotes erat carissimus, ejus periculo, & ferali medicorum sententiâ, consternati, spem tamen curandi morbi non abjecerunt; imò votum in hac verba conceperunt, fore ut Lalovescum ad sacros P. Regis cineres iter pedibus conficerent, si sanesceret. Non incassum misse preces & vota. Gibbrosi dorsi tetra deformitas, nulla medicorum aut chirurgorum ope adhibita, nullis relictis vestigiis, subito evanuit: justamque modò & concinnam cum dignitate formam ac staturam obtinet. Cogito illum quam primum mittere Melitam, ubi inter equites S. Joannis Hierosolymitani cooptatus est. Nemo tota in provincia veritatem hujus miraculi vocavit in dubium; cujus Annonæum omne testis fuit, sed quamvis unius Comitum du Fay testimonio niteretur,



ea est viri probitas, sapientia, nobilitas, ut solus plurimis æquipa- Lib. VI.  
rari & antestare testibus possit.

Ludovica de *Romezin*, cujus toties mentionem fecimus, non minorem servi DEI tutelam & benignitatem est experta. Hujus filiam rabiosi canis morsus in eas redegerat angustias, ut insanâ æstuans rabie, cum portentosis juncta symptomatis, dirè torqueretur. Mater filiae vicem dolens, sancti sui moderatoris opem poposcit. Nondum precari desierat, cum deferbuit furoris æstus, & pristina filiae tranquillitas, cum integra valetudine, rediit.

Infinitus illorum est numerus, qui febribus pertinacissimis conflictati, promptum tutumque remedium in votis servo DEI nuncupatis habuerunt. Ejus reliquias cum alligasset collo filia Godefridi *Monteil*, lentam, intestinamque abegit febrim, quam medici letalem esse judicabant. Marcellinus *Beget*, præfectus Anicii perpetuus, à medicis derelictus, ad Beatum Regis supplex confugit, ejusque sacris exuviis lateri admotis, inhibuit pleuritidem & febrim, quæ certam illi mortem intentabant. P. Victor *du Fornel*, è Societate JESU pro testimonio juratus affirmavit, se in urbe Bliterensi continuâ pessimè affectum febrì, & à medicis destitutum, viri sancti apud DEUM merita interposuisse, ac repente in pristinam integramque valetudinem fuisse restitutum. Annam Pareliam è pago *Molas* oriundam, cum ab octo mensibus febris omnibus invicta remediis, ureret, Lalovescum subiit quo die accedere febris consueverat. Illa verò loci sanctitatem reverita, neque illo die, neque ullo in posterum alio accessit. Rediit Parelia suum in pagum eodem die quinque leucis Lalovesco remotum, viribus & valetudine, multò, quàm unquam antea, melioribus.

Aniciensis matrona rite apud Ecclesiasticum judicem testata est unum è suis liberis, post consumpta nullo fructu sexcenta remedia, cum animam proximè acturus esset, agerétve, sinè motu, sensu, pulsùque, commendatum à se fuisse servo DEI, ac momento post, puerum sanum ac valentem postulasse ut suis indueretur vestibus ad spectandum è fenestra, sodalium pœnitentium, qui fortè præteribant, agmen.

Virgo nobilis, itidem Aniciensis, post diuturnum & periculosum morbum, distorta manserat, inclinata in dextrum latus, & cruribus capta. Lalovescum à parentibus delata, statim atque subiit interiorè templi partem, ubi viri Sancti corpus compositum est, subalaria projecit fulcra, sinè quorum adminiculo pedem prius

**Lib. VI.** proferre non poterat ; Aniciumque se retulit tam recto corpore, tam solutis quàm ante morbum, cruribus. Armandus de Berhune de se ipse narrat, in suis ad summum Pontificem litteris, \* è morbo exitiali, ac pestilentiae simillimo, se recreatum fuisse, Beati meritis ac suffragio. Ejus vultum in tabella pictum habere semper prae oculis hic praesul voluit, omnemque operam navavit ut eum sanctorum numero adscribendum curaret. Vitalem Tombe in Fano Sancti Boniti natum, crebrae accessiones febris violentae ita emaciaverant, ut ossa & pellis totus esset. Extans in ore pallido, & exhausto, mortis lurida species eam non longè abesse significabat. Adire Beati tumulum cum statuisset, impositus est equo, duobus hinc atque inde famulis, vacillantem sustentantibus. Lalovesci sacram ingressus aedem, distendit se toto corpore supra locum, in quo beati cineres conditi, humumque crebris petens osculis, fletu multo conspergebat. Post paulò assurgens exclamavit prae gaudio, *sanus sum, P. Regis beneficio, sanus sum.* Tam prompta, tam integra, sanatio fuit, ut è vestigio reversus sit in patriam pedes, prodigii certam fidem omnibus vel solo conspectu factururus.

\*  
Prima die  
Martii  
1703.

Mulieris, in pago Lalovesci vicino, crura ulceribus putridis pridem scatentia, vermibus foedis circumfluebant. Malignus humor viiatis arrodens carnes, acerrimo dolore miseram laniabat. Remediorum vim inutilem exola, Lalovescum petit, ubi pulverem ex humo tumuli sumptum cruribus affricans, non modò excussit omnem doloris acerbitem, sed coeuntibus & obductis ulceribus, pristinum candorem cruribus purgatis recepit. Mansit duntaxat modica cicatrix miraculi perenne monumentum.

Guillelmus *le Maure*, vicarius Judicis de *Loufe* in tractu *Ve-launo*, & in oppidis agri *du Mas* Ballivius, ut vulgò vocant, oculis adeò imbecillis utebatur, ut nè proximè quidem admota discerneret. Conferre se Lalovescum, ibique peccatorum onus deponere statuerat. Templum ingressus ad sacrum poenitentiae tribunal accedere nullo pacto potuit; infinita populi multitudine omnem aditum intercludente. Aliquandiu praestolatus, ac tædio demum victus, discessit. Vix abierat, cum oculos omnino perdidit. Subiit hominem dolor, secum repurantem ibi se videndi sensum amisisse, ubi eundem tam multi recuperabant. Hanc impatientiae suae poenam ratus, rediit Lalovescum, perceptisque poenitentiae & Eucharistiae sacramentis, lumina sic recepit, ut perspicax oculorum acies

acies minima quæque distingueret. Peregrinorum turba, cæcitate Lib. VI  
tis, & in poenam imposita, & in honorem Beati, sanata, oculata  
testis, *DEUM in Sanctis suis laudavit.* Nec laudibus peregrinorum  
Guillelmus *le Maure*, & beneficii memor, oculos sibi restitutos la-  
crymis, quas gaudium ciebat, sæpe, rem gestam ubique prædi-  
cans, implevit.

Catharina *Bauvette* ob innatum cruri tetrum ulcus, acerbissi-  
mis jam à triennio afflictata doloribus; & Maria *Morisonne* usque  
pedum ab annis quinque & viginti orbata, cum ambæ cætas no-  
vem diebus perpetuis exsoluissent preces Lalovesci, gemino incom-  
modo ita sunt liberatae, quasi nunquam eo laborassent. Crede-  
res è servi DEI corpore manare vim salutarem, quæ morbos vel  
gravissimos & pertinacissimos debellaret.

Petrus *Royer*, Sacerdos ex oppido *Priaux*, cum iter faceret,  
brachium sinistrum contremiscere, convellique sensit. Diu mul-  
tùmque conatus hunc tremorem cohibere, nihil profecit; ac bra-  
chium vehementius in dies concuti atque agitari cepit. Vexatio-  
nis diuturnæ aliquando pertæsus, ac jacens in lecto, incubuit in  
brachium affectum, ut violenti motus impetum comprimeret. Ve-  
rùm humor sævus, tremoris causa, nec patiens quietis, ita effera-  
tus & irritatus est, ut convulsione repentina ægrotum lecto in pa-  
yimentum excusserit. Ad strepitum accurrens familia, ubi semia-  
nimem, & oppressum, malo vidit, deploratam ejus vitam ac salu-  
tem credidit. Oculos ille, cum voce, tollens, peregrinationem  
ad Beati viri tumulum voveret. Eò profectus, humum sepulcri piè  
osculatur; deinde Sacramentis rite procuratus, statim atque San-  
ctissimum Christi corpus sumpsit, quies in omne posterum tem-  
pus trementi brachio, & vigor pristinus membris restitutus planè  
fuit.

Adolescentulam phrenesi correptam infans furor indignis  
exercebat modis. Mater omnibus remediis frustra tentatis, filiam  
per quatuor menses ad varia loca circumduxit, quæ pietas publica  
celebrabat. Melius puellæ factum non est. Luctu & dolore per-  
dita, illam denique ad tumulum B. Regis sistit. Resedit ipso in  
vestigio dirus furor; furori mens bona ratioque successit.

Vel sola, quæ Lalovesci patrata sunt, prodigia materiam plu-  
rimis voluminibus copiosam præberent: itaque partem illorum  
hic omittere cogimur, partem in unum simul acervum congerere.

Anno 1654. Joannes *Montalit*, ejusque soror, pedum & cru-

**Lib. VI.** rum usu privati; Catharina *Montagnon* diœcesis Aniciensis, crucibus item capta; Jacobus *Proal*, ex eadem diœcesi, dextra corporis parte à triennio paralyticus, omnes ad servi DEI tumulum producti, negatam humanis remediis sanitatem sunt consecuti.

Haud scio tamen an ulla res majorem loco venerationem & famam conciliaverit, quàm exemplum quod sequitur. Joanna *Marcou*, uxor agricolæ pagi *Parablan*, post editam non improspere, ut apparebat, prolem, occupata gravi morbo, doloribus maximis & ferè continuis angebatur. Amisso membrorum omnium, præterquam manuum & linguæ, usu, septem annos in lecto decubuit, medicis artem omnem & industriam frustra periclitatis. Prodigiorum fama, quæ ad tumulum servi DEI quotidie narrabantur edita, mulieris fiduciam ità excitavit, ut ejus meritis se procul dubio sanandam confidens, voverit piam ad sepulcrum Beati peregrinationem. Illuc plaustro vecta, mensè Martio, statas novem dierum preces inchoavit. Primo ipso die satis virium adfuit ut genibus niteretur: secundo ambulavit: diebus ceteris, ad integram usque & stabilem sanitatem ità processit, ut postremus dies è novem, postremus quoque malorum omnium existerit.

Maria *de Ville*, è pago prope Fanum S. Desiderii, in Diœcesi Aniciensi, filiam cæcam Lalovescum duxit. Maternæ preces ab oculis filiæ caliginem & cæcitatem absterferunt, & voti compos utraque domum repetiit. Joanni *Liotier*, è pago, cui Sancti Mauricii nomen incolæ fecerunt, filius erat contractis & inversis pedibus. Eum deportandum curavit Lalovescum. Unde rediens usu pedum tam libero potitus est, quàm si nunquam eo caruisset. Solum sæpe votum invisendi tumuli, miraculis illustribus subito remuneratum fuit.

Jacoba *Blanchard* Aniciensis, infelici functa partu, miserabilem & horrendum in modum jactata morbo multiplici languebat. Convulsionum vis dura collum, brachia, crura distorserat; usumque sensuum, vocis, ac mentis ferè omnem eripuerat. Jam, in extremo vitæ brevè extinguendæ discrimine, ceruum benedictum tenebat manu, cùm maritus, edito Lalovesci adeundi voto, sanam uxorem repentè habuit.

Magdalenam *Ciriotier* ignota ægritudo duris constrictam vinculis ab annis quinque, ac partium ferme corporis omnium usurâ spoliata, tenebat. Nihil in humanis auxiliis relictum spei. Ergo ad Beatum Regis conversa, vovet se tumulum ejus adituram,

& re-

& repente voti damnata, vires ac membrorum omnium usuram Lib. VI. recuperavit. Virginem non humili loco natam, nomine *de Plinobal*, quartum jam mensem adeò pertinax & maligna urebat febris, ut accessiones violentæ producerentur quotidie ad horas octo. Promisit se Lalovescum ituram, & fugata continuo febris est. Hæc omnia perstringere leviter, & cursim delibare, cogor, quæ fusiùs, si liceret, exposita plus amœnitatis & admirabilitatis erant habitura.

Ludovicus *Pinot*, Regius procurator in Senescalli curia urbis Aniciensis, apud judicem Ecclesiasticum juratus affirmavit uxorem suam per tres menses in lecto jacuisse, quòd viribus planè exhausta nullam corporis partem movere posset: cum verò nuncupasset votum de illa beatum ad tumulum deportanda; pæne voto citiùs ægram perfectè convaluisset.

Jacobus *Lamit*, Aniciensis, authentico scripto testatum voluit Petrum *Lamit*, filium suum sæva pleuritide laborantem, & à medicis destitutum, cum peregrinationem ad sepulcrum servi DEI promississet, octavâ post conceptum votum horâ, cibum poposcisse, ac morbum penitus depulisse. Causidicus in senatu Tolosano, cui nomen *de Charenton*, similis voti reus, æstuosam, quâ torrebatur, febrim, & extrema omnia minitantem, restinxit. Laurentium *Petit*, è parœcia Marlensi, trimum puerum, trimestris febris depascebatur. Pueri pater pollicitus est daturum se operam ut æger ad sepulcrum Beati *vni* deferretur. Nec febris, hoc promisso admonita, recedere distulit. Sed cum pater promissum exsolvere differret, graviori morbo repente filius implicitus est, adeò ut certa puero perniciēs immineret, proruptis è corpore intestinis quæ suum in locum reponi nullo pacto poterant. Tunc patrem subiit memoria dolorque promissi nondum persoluti; veniam à DEO precatus, illud redintegrat, & pueri valetudo, redditis alvo intestinis, simul est redintegrata. Miraculo, quod sequitur, inest aliquid singulare. Joachimus *de Chambon*, infans, cum quartum aut quintum duntaxat mensem ageret, ad vitæ vixdum è carceribus emissæ, calcem, urgente morbo, venerat. Pater pueri, doloris impatiens, Lalovescum accelerat. Vix ducentos confecerat passus, cum properantem famulus anhelans assequitur, & narrat, infantem repentino risu lætam explicuisse frontem, ac prorsus valere. En aliud isti non absimile. Filia domini *de Champagnac*, nata tres annos cum dimidio, eò loci redacta erat, ut per duas horas dubitatum fuerit viveretne, an vixisset. Mœ-

Lib. VI. Stiffimus genitor supplici prece DEUM interpellat, promittitque, si laboranti filiae bonus adsit, curaturum ut ad tumulum B. Regis deducatur, seque votivo munere non contemnendo ædem sacram Lalovesci ornaturum. Illo ipso temporis puncto, ægra vivere, valere, & firmis uti viribus est visa: mox cum patre ac matre ad referendas auctori tanti beneficii gratias Lalovescum est profecta.

*Ægroti complures tumuli B. Regis pulvere sanati.*

In ipso sepulcri servi DEI pulvere mirum quantum ad morbos, præter naturæ modum ac vires, propulandos, opis ac præsidii comparatum erat. Auctor ejus vitæ, quæ prima omnium edita fuit, affirmat ævo suo, id est, circa annum 1650. huic pulveri omnium medicamentorum vim & efficaciam inditam fuisse, sibi-que probè notum esse civem non ignobilem, qui hoc adhibito remedio, perditam valetudinem ægris amplius triginta restituerit. Victor du Fornel, è Societate JESU, rite interrogatus, apud Vicarium Generalem Episcopi Aniciensis, dixit pro testimonio innumeros ægrotos ad vitam è media morte hujus pulveris beneficio à se fuisse revocatos. Addit, eundem à Domina de la Roche, sorore sua, laborantibus & moribundis propè infinitis admotum, salutem illis miro quodam & incredibili modo attulisse.

*Prodigia edita Lalovesci, cum divina res fieret ad Beati tumulum.*

Peculiari quoque gloria tumulū Beati viri DEUS ornatum voluit: idque præsertim perspectum est, quo tempore ad ejus sepulcrum divina res fiebat. Antistita virginum Sanctæ Claræ, in oppido Annonæo, cum in domestico cœnobii sui convictu puellam nobilem à medicis depositam doleret, rogavit sacerdotem Societatis ut oblato Lalovesci sacrificio, ægotam Domino commendaret. Ipso sacrificii tempore puella convaluit.

Joanna Rignol Annonæi quoque civis, contracti & aridi cruris usum, quo diu caruerat, celebrato ad Beati sepulcrum sacro recuperatum gaudens, eodem crure jam sano & robusto, iter ad agendas liberatori suo gratias Lalovescum intendit. Anno 1647. Bertrandus Bochet è Societate JESU post peractam hebdomadæ sanctioris diebus Missionem in oppido diœcesis Aniciensis (nomen oppido Tens) Lalovescum petebat feriâ quartâ post Pascha, ut B. Regis sepulcrum venerabundus viseret. Occurrit illi mœsta mater, cujus filius duodecim annorum, fulcris subalaribus malè nixus, gradum ægre moliebatur. Ab ea rogatus ut inter sacrificandum, filii sanitatem à DEO postularet, rem divinam fecit, eaque nondum absolutâ, puer nullo fultus adminiculo, solutis pedibus inambulavit; nec ità multò post subalaria bacula, testes accepti beneficii, Lalovescum ipse detulit. So-

Sola servi DEI sexcentis in morbis invocatio Levamentum Lib. VI. illis & finem dedit. Anno 1641. *Blancha Cbastaniere* filia libellio-<sup>Variorum</sup> nis oppidi Bocancii correpta febris fuit tam pertinaci, ut remediis <sup>sanatio</sup> irritata valesceret. Ejus pater Beatum Joannem Franciscum Regis <sup>morbore</sup> obsecravit ut carissimæ filiæ succurreret; eodémque momento fe-<sup>invocato</sup>bris victa fugit. <sup>DEI ser-vo.</sup>

Civis Palliarenfis, honesto loco natus, nomine *Cbaloye*, gladio vulneratus in inguine, ac malè curatus, in febrim ac certum vitæ periculum incidit. Desperatâ salute, cùm proximè moriturus crederetur, DEI famulum invocavit. Ille verò tam præsens ac propitius adfuit, ut abactâ continuò febris, nè vulneris quidem vestigia manserint.

Anno 1653. virgo religiosa cœnobii *de Gimont*, *Antonia de Maisonneuve*; & *Benedicta Tranchant*, è diœcesi Aniciensi, cùm nihil in medentium arte subsidii reperirent, in Beati nomine, quod religiosè appellarunt, promptum & facile suis incommodis remedium invenere.

Unus è filiis D. *Duprè de la Suchere*, viri propter nobilitatem æquè ac probitatem clarissimi, cùm sinè motu, ac venæ pulsū jaceret, neque signi quidquam, ex quo vivere intelligeretur, præter tenuem halitum, daret; Pater, ut ipse scripto testatum reliquit, servo DEI, pro filio supplicavit. Precantis vocem audivit Regis, & vitam fugientem puero, cum amissa valetudine redonavit. Idem Beatus anno 1654. *Catharinæ Narit*, quæ nec sedere nec incedere poterat, vires & incessum, piè invocatus, reddidit.

DEUS, in Sanctis suis admirabilis, arcanam sæpe virtutem <sup>Varia Mi-</sup>tribuit rebus vel minimis quas usu, contactuque suo, veluti consē-<sup>racula</sup>crarunt; ut illa Pauli Apostoli sudaria, in Apostolorum Actis ce-<sup>contactu</sup>lebrata, declarant. Ad hunc modum, nostrâ memoriâ, tot ægro-<sup>ejus vesti-</sup>ti contactu vestis, quam DEI servus induerat, è morbis difficili-<sup>um patra-</sup>bus emerferunt. Omnes enumerare infinitum esset; notiora quædam exempla persequar. *Claudius Nice* è Fano Sancti Juliani oriundus; & illustris femina, nomine *de Monregard*, cùm adventantem, qua dudum cruciabantur, febrim procul sensissent, pia fixerunt oscula sacre reliquiarum thecæ, in qua erat inclusa tunicæ servi DEI particula: & iis deinde febris molesta esse desiit.

Primaria mulier, *de Chanacy* dicta, ex parœcia *de Latte*, miseram filii, duodecim annos nati, sortem insolabiliter lugebat, quem mortis ex acri morbo imminentis metus ita conterruerat ac

**Lib. VI.** perturbaverat, ut sui vix compos omnem de DEO & salute sempiterna sermonem auribus animoque respueret. Mater furentis capiti frustum è talari Regis tunica imponens, jussit ut sanctissima JESU & MARIAE nomina pronuntiaret, quod ille præstitit summa quiete corporis, summa animi æquitate: penitusque ex infano metu & desperatione se colligens, dignam homine Christiano mortem obiit.

Patrem Philippum, Ordinis Præmonstratensis religiosum, angina, febris juncta, ad ultimam vitæ lineam perduxerat Anicii, sexto Idus Quintiles anni 1692. Sacro inunctum oleo Sacerdos novissimis precibus, quas Ecclesia morientibus accomodat, DEO commendaverat, cum Lalovesci Parochus, qui tunc Anicii versabatur, decerptam ex eadem veste laciniam ægrotanti admovit. Rediit illico vox, & mens; ac postridie lætus sanusque surrexit.

Quidquid manibus contrectaverat; ipsæ, quas scripserat, epistolæ; munuscula etiam, quæ inter explicandam populo doctrinam Christianam, dividebat, baculi, quibus iter conficiebat, & alia id genus omnia, mirificam vim ad prodigia patranda contraxerant. Vir nobilis moriens unum ex istis baculis, luculentæ hereditatis loco, liberis suis reliquit; & asservatur etiamnum in familia, tanquam venerabile ac religiosum munus, cujus salutaris, ut sacrarum reliquiarum, virtute, universa regio fruitur.

Sentio longius produci seriem tot miraculorum, ac vereor nè submolesta legentibus accidat: nihilominus in gloriam servi DEI peccare me arbitrarer, nisi obiter varias lustrarem provincias, ubi eandem Providentia Numinis illustravit.

*Edita in diversis Provinciis ab eo miracula.* In diocesi Viennensi Elizabetha *Seurie* è pago *de Plas*, cum laboraret cerebro, sanam illi mentem restituit maritus, indicto Lalovesci sacrificio, in honorem Beati.

*In diocesi Viennensi.* Antonia *de Loge* cum surgere aut stare præ crurum imbecillitate non valeret; sextum jam annum hærebat in lecto. Rem divinam per dies novem faciendam curavit, sanitatem per merita servi DEI orans, & nono die peracto, integram exoravit.

*Turnonii.* Franciscanus, ex iis, qui Conventuales appellantur, nomine *Des Fosses*, auditor theologiæ in collegio Turnonensi, aurium gravitatem, quâ diu laboraverat, injecto in auriculam tumuli Regis pulvere, levavit. Rem gestam idem religiosus, ejusque confessorius, scripto rite monumento confirmarunt.

*Avenione.* Joannes *Abbes*, filius mercatoris Avenionensis, octavum egres-



egressus annum, vocem subito perdidit. Ad aquas Borbonias Lib. VI. devectus, aliisque curatus medicamentis, relevatus non est. Ergo peragratis regni provinciis compluribus, peritissimos artis medicæ consuluit. Verborum illi multum, opis nihil dederunt. Tandem ad tumulum Beati aditurum se promisit: ac momento, stupentibus cunctis, amissam recuperavit vocem; quam ut impenderet agendis illi gratiis, cui beneficium hoc debebat, votumque rite solveret, Lalovesci, tertio Idus Julias anni 1688. adfuit. Lugduni.

Antonius *Blanche*, tabularius Lugdunensis, exaratâ suapte schedâ ita de se testificatus est. Cum carperetur febri continuâ,

& ad mortem haud dubiam raperetur, se, concepto profectiois ad Lalovescum voto, statim valuisse. Huic testificationi binas authenticas addo duorum hominum Societatis è Collegio Lugdunensi,

quorum alter Lalovescum profectus, alter profecturum se pollicitus, uterque optata sanitate potitus est. *DEUM testor*, inquit illorum alter,

*me per quinque sexve annos, dirum in modum plenioris intestini morbo, quem colicum vulgò vocamus, discruciatum fuisse. Tam intolerabilis erat dolor, ut animam acturus crederer, idque singulis ferè diebus, sine ulla intermissione. Biennium totum vestigandis & usurpandis remediis consumpsi; sanctorum complurium opem, non negligenter, ut mihi quidem videtur, imploravi. Nihil remediis, nihil precibus, impetratum. Denique Lugdunum missus à meis superioribus, ubi multus erat sermo de mirabilibus donis, quæ DEUS per servum suum P. Regis. ad ejus tumulum, mortalibus lagiebatur, sensi me singulari erga Beatum pietate ac fiduciâ recreatum, ac statui locum tot prodigiis, totque morborum clade nobilitatum adire. Illuc delatus, & divino refectus pane, confestim dolore me levatum sensi, & Lugdunum reversus, nihil pristini mali, præter nomen, relictum unquam deinde agnovi. Ità se rem habere testor, Joannes Passinges decimo tertio Kal. Septemb. 1659.*

Alter Jesuita, DEO pariter appellato, testatur se, ruptâ venâ, crebro sanguinis profluvio per triennium laborasse. Nihil subsidii repertum in medicamentis, per medicos Parisienses præscriptis, per Lugdunenses, Gratianopolitanos, Massilienses, & Avenionenses, qui ad extremum, nihil spei superesse denuntiarunt. Eò loci redactus, & humana desperans auxilia, divina respexit, ac DEUM, interpositis multorum, quos præcipuè colebat, Sanctorum meritis, enixè rogavit, ut adjutricem è cælo manum porrigeret. Cum precando, inquit, parùm promoverem, *rescivi nescio*

*quem*

Bbb.

Lib. VI. *quem simili malo ad sepulcrum B. Joannis Francisci fuisse liberatum. Excitatus hoc miraculo, vovi me profecturum Lalovescum, ibique rem divinam facturum. Juratus affirmo, sanguinem, qui ubertim antea fluebat, subito stetisse: meque post annos novem, quam hoc votum edidi, nullum hujus mali vestigium in me deprehendisse. In quorum fidem hoc testimonium subscripsi. Lugduni XIII. Kal. Septemb. 1654. Benedictus Bertod.*

In eadem diœcesi Lugdunensi Benedictus *Cyamperre*, è Pago S. Romani, ob contractos brachii dextri nervos, vehementi dolore conflictatus, promisit peregrinationem ad Sacros Beati cineres, & repentinam sanitatem præmium tulit promissi, quod circa Idus Octobres anni 1654. persolvit, relictâ Lalovesci schedâ, rem gestam testante.

Joanna *Louë*, ex eodem pago tres è suis liberis Lalovescum deportavit, unum annos quinque; alterum quatuor; tertium duodeviginti menses, natum. Eorum nulli ad eam diem incendi potestas fuerat; & minimus natu movere caput, vel tollere, præ imbecillitate non poterat; idemque in ipso itinere sic elanguit, ut Lalovescum usque perducì posse mater diffideret. Pervenit illuc tamen cum tribus liberis, & divinam rem faciendam curavit. Ea dum perageretur, minimus natu blandè subridens novum debilibus membris vigorem illapsum ostendit; ejus verò fratres solutis pedibus per templum ingredi, populo admirante, conspecti sunt.

Possem alia multa hujus generis referre, quæ in Lugdunensi diœcesi contigerunt: unum duntaxat addo, quod in ipsa urbe omnium sermone celebratum fuit. Bartholomæi *Satin* mense Junio anni 1692. pectus & stomachus majorem in modum intumuerant. Hebdomadis quinque transactis, crura primùm, deinde femora, in molem immensam excrevere. Pulveris collecti è tumulo servi DEI paululùm aliquid, suo filio datum ab homine Societatis, poculo infusum sumpsit; eodemque puncto temporis dolor, ac postridie, tumor omnis dilapsus est.

*In Alvernia.*

Anno 1654. in Alvernia & diœcesi Floriopolitana, Joannes *Benoît*, è pago *Carlate*, pertinaci viginti mensium dysenteria, & medicorum judicio letifera, vexatus ac paulatim extabescens; Antonia *Conternet*, itemque Julianus *Magne*, in eadem provincia deplorati à medicis, omnes propitium faustumque suis malis DEI famulum experti sunt, simul atque ad sacros ejus cineres votivam peregrinationem promissere.

Ve-

Vesuntione Maria Teresa de Mouchand documentum illustre Lib. VI. fuit, quantâ Beatus Regis apud DEUM gratiâ valeret. Intestinus <sup>Vesuntio-</sup> ignis pectus & stomachum depascebat, cujus ardorem temperare <sup>ne</sup> nulla medicorum potuerat industria. Animus æger, & vanis terroribus agitatus, corporis augebat ægritudinem. Cúmque, ob insanum mœrorem, sibi aliisque gravis esset, cœtus hominum congressûsque fugiebat. Sed diros conscientiæ impacatæ ac trepidantis angores irritabat solitudo, ac malè oppressus ignis vehementius inardescibat. In his angustiis quadriennium exegit. Tot ærumnas cumulavit obtusa, & extincta pœne vox. Repetitus non semel medicorum conatus ad irritum semper cecidit. Ægrotâ præsidiis humanis orbata, cœlestia quæsiuit: sacris peregrinationibus plurimis perfuncta est: cùm tamen nihil ad levationem tot malorum proficeret, miserrimum statum in quem adducta erat, Sacerdoti Societatis dolenter exposuit. Ille auctor fuit ut opem B. Joannis Francisci Regis imploraret. Imploravit. Ignis intestinus, quo exedebatur, extinctus est: discussa caligo turbidæ mentis; conscientiæ tranquillitas, voci claritas, restituta.

Futurum confido, ut lector non invitatus audiat consignatas literis testificationes duorum è curia Tolosana senatorum, qui vitam Beato Regis acceptam retulerunt. Amborum testimonia, quæ autographa præ manibus habeo, ad verbum referam. Tolosana

*Ego Henricus de Massuyer, qui nomen meum subscripsi, Vicecomes d' Ambrieres, Dominus de Courtenfour, Regius n Tolosano Senatu Consiliarius, testor me gravi morbo laborasse sub finem Augusti 1657. Morbi causa febris amphimerina, caput immani torquebat dolore, ac medicorum consultationes, medicamenta, curasque ridebat. Dominus de Vernhol, nomine de Cambolas, ejusdem curiæ senator, aliquantum pulveris, è gleba sepulcri B. Joannis Francisci Regis, mihi donavit, affirmans huic inesse pulveri compertam multis experimentis prodigiosam vim sanandi morbos gravissimos. Tunc DEUM summis precibus, non negligenter, ut mihi videtur, obsecravi ut me per servi sui merita sanum vellet. Ità precatus, pulverem in aquæ scypho bausi. Abiit dolor, quies somnûsque successit, quo depulso febrim quoque depulsam cognovi, quæ nunquam deinde accessit. Cùm sanitatem banc, momento mihi concessam, nullo adhibito remedio, naturali causa nulli assignare possim, miraculis eam annumero. Grati ac memoris animi officio*

Bbb a

im-

Lib. VI. *impulsus huic autentico testimonio nomen meum propria manu subscripsi, Tolosa; octavo Idus Septembr. 1657. Le Massuyer.*

*Ego Petrus d' Ambez, Senator in Curia Tolosana, qui chi-rographum & nomen meum huic scripto subjeci, profiteor ac denun-tio me in summum vite periculum febris acutissima fuisse adductum, ità judicantibus, & artem frustra expertis compluribus medicis, tum ob gravitatem mali, tum ob etatem meam annorum octogin-ta. Admonitus de tumuli P. Joannis Francisci Regis pulvere, cui dotem ajebant divinitus inditam ad sanandos morbos vel desperatissimos, cum ab amico meo, Societatis homine oblatum, sumpsi, certa cum fiducia me per Beati viri preces & merita sanandum, Res mira! vix sumpseram, cum decessit omnino febris, meque puncto ipso temporis sanum valentemque comperi. Tam perfecta, tam subita sanitas hac fuit, ut eam à nulla naturali causa profe-ctam arbitrer, cum remedii nihil præter hunc pulverem admove-rim. Ità testor hac schedà, cui nomen meum & chi-rographum ap-posui, Tolosa, pridie Idus Septemb. 1657. d' Ambez.*

*Albiga.*

Albigæ doctoris legum uxor, tentata variis morbis, ac præsertim acri capitis dolore, palpitatione cordis, pectoris oppressio-ne, spiritum intercludente; veterno ac stupore, per biennium in lecto decubuit. His accessit vocis jactura, febris lenta & conti-nua, ciborum triste fastidium. Sexto post mense, distenta est al-vus aquâ intercute; crura obriguerunt, eadem intumuerunt, & ad humeros usque tumor pertinuit. Cum lectum tolerare non posset, propter spiritûs ducendi difficultatem, in cathedra paulum quiescebat, sinistro incumbens lateri. Animo identidem linque-batur, idque per horam integram; eaque defectio tandiu aliquan-do perseveravit, ut è vita cessisse putaretur. Remediis nullus lo-cus, propter virium imbecillitatem. Itaque sacramentorum novis-simorum instructa præfidiis, ad supremum diem rite obeundum se comparabat, cum à sacerdote confessario suo monita fuit de voto, ab ipsa, Patrem Joannem Franciscum olim invocante, nuncupato, necdum exsoluto. Memini, ait, ac votum renovavit, promissis novem sacrificiis, in honorem Beati celebrandis. Primum incho-atum fuit tertio Nonas Januarii 1678. Antequam fluxissent novem præstituti dies, diffluit ac diffugit malorum, quibus opprimeba-tur, agmen, & robusta mulieri constansque valetudo stetit. Ob-stupuit universa civitas, quæ tot morbis circumfessam & immobi-lem, cathedræ per quadriennium diu & noctu coactam insidere,

vi-

viderat ; cum eandem cerneret , sibi & communi vitæ redditam , Lib. VI. deambulare , satagere , omnibus publicis ac privatis defungi officiis , perinde quasi morbi nomen omnino nescivisset.

Erat in Apamiensi diœcesi *Sabas* , vir inter suos populares *In diœcesi præcipuæ auctoritatis & famæ.* Hujus filium contracti nervi ita *Apamiensis.* excruciabant , ut in lecto moveri , nisi adhibita cautione singulari , & curâ , non posset , ac si quem videret accedentem , cohorresceret , edito clamore , metuens videlicet nè ab eo tangeretur. Sin verò quandoque opus esset illum movere , tunc totius corporis fremitu ac tremore quatiebatur. Medici alterutrum fore pronuntiaverant , ut vel morbo conficeretur ; vel , si esset superstes , vitam infelicem distortus ac plerisque captus membris traheret. Sacerdote , quem conscientix arbitrum habebat , hortante , Beatum Regis , factò voto , appellat. Omnis familia circa ægroti lectum procumbit humi. Nec distulit indulgens patronus audire pii clientis vota. Surrexit æger , nullo adjuvante , sanusque ac valens constitit.

Quod narraturus sum , nec minus admirationis habuit , nec *In agro levioribus ad faciendam fidem argumentis nititur.* Stephanus *Forensis.* *Guillermin* , pictor , in oppido Foresiæ , cui Fanum Sancti Stephani nomen est , ilium procidentia laborabat ab annis viginti. Hinc sævi dolores , maxime ab octo annis ; quippe obortus ad magnitudinem humani capitis tumor , tenaci callo induruerat. Visum medicis malum insanabile , ac periculi plenum ; ob eam causam quòd crebris alvi , & intestini plenioris , doloribus cruciabatur æger , quibus debilitatus vitæ metam proximè tangebatur. Profectus mense Januario anni 1710. ad Fanum S. Desiderii in Velaunis , distans à Fano S. Stephani leucis tribus , ut pictarum aliquot tabularum formam modumque delinearet ; inde repetens domum , votum ab annis quinque aut sex animo conceptum de pia peregrinatione ad Lalovelcum & Regis tumulum suscipienda , solvere constituit mense Majo , & imaginem beati in tabula sex pedes longa & quatuor cum dimidio lata , pingere. Statim se magna morbi parte liberatum sentiens , nocte insequenti placidissimum somnum cepit , ac postridie horâ post mediam noctem sextâ evigilans , intestina suo reddita loco , nec relictum quidem pristini tumoris , vel duritiæ , vestigium reperit. Hoc miraculum ipse pictor , aliique viginti testes oculati confirmarunt.

Obeundæ mihi singillatim essent omnes provinciæ , ac pro- *Lutetia.* pmodum urbes Galliæ , si omnia prodigia in iis , interposito Bea-

Lib. VI. ti viri nomine ac meritis impetrata, recensere vellem. Primaria Regni civitas cælestium ejusmodi donorum nequaquam exsors fuit. Claudius *de Uroncourt*, è Societate JESU, ab antiqua & illustri stirpe ortus in Lotharingia, Carolum IV. ejusdem Lotharingæ Ducem, cui erat à confessionibus, Parisios euntem anno 1652. Septembri mense secutus est. Ibi dum moratur, incidit in febrim continuam, magnis incrementis augeri solitam, cujus periculum atrocità symptomata declarabant. Nihil, quo levare posset morbus, omissum est. Medicorum scientissimi ex urbe & aula vocati, cùm naturæ deficientis debilitatem sustentari negarent posse, mortis edictum ferale pronuntiarunt. Ab eo tamen æger, licet sanctissimo jam viatico, & suprema munitus unctione, appellavit ad servum DEI, quem peculiari colebat veneratione. Appellanti-tem audivit medicus ille potentior, & febre periculóque liberavit. Cum eodem Patre *de Uroncourt*, fui Nanceii annis 1665. & 1666. Beneficium à P. Regis acceptum grato ac memori animo prosequabatur optimus senex, octogesimum tunc annum agens, ejusque sanctitatem eximiam magnis efferens laudibus, ægrotos omnes hortabatur ut eum patronum ac deprecatores adhiberent, à quo se valetudini restitutum, aut potius è media revocatum morte, prædicabat.

*Nanceii.* Nicolaus *Ponce*, domus Ducis Lotharingæ præfectus extabescebat, maceratus per menses decem lentâ febre, quæ in phthisim, & crebras sanguinis eruptiones, evaserat. Pater *Uroncourtius*, cujus modò mentionem feci, suavit per Quadragesimam anni 1653. ut ad patrocinium B. Regis confugeret; & ad fiduciam ægroti excitandam, narravit sibi redditam servi DEI beneficio incolumitatem. Promisit Poncius se ad sacramenta Pœnitentiæ & Eucharistiæ accessurum quotannis eo die, quo B. Regis migravit in cælum. Pater vicissim novem sacra promisit, & uxor ægroti certas pariter preces, novem diebus à se præstandas. His votis ita peractis, melius est factum ægrotanti, necdum absoluto novem dierum circulo, morbo periculóque solutus est.

*In Pedemontio.* Pervasit regiones etiam remotissimas fama sanctimonix servi DEI, ejusque apud DEUM gratiæ. In Pedemontio, *Andræ Gautier* olim militiam secuti in legione S. Mauri, crus coopertum erat ulcere immani, cujus longitudo, & par latitudo, mensuram pedis æquabat. Extracta jam fuerant ossa non pauca, & multum putridæ carnis. Vitiosus humor ulceris ægrescebat curando; ac depre-

deprehensâ , quæ jam serpebat , gangrænâ , & ossibus carie cor- Lib. VI.  
rumpi cœptis , crus omnino amputandum chirurgi censuerunt.  
Septimo Kal. Sextiles 1686. æger sævæ curationis apparatu conter-  
ritus , opem B. Regis poposcit. . Ulcus extemplo coaluit ; caro  
sana , mollis , candida , ut prius , apparuit.

Collegii Bruxellensis Rectorem mense Aprili anni 1653. con- *Bruxellis,*  
tinua febris nec opinantem perculit. Gliscebant mali vis , & ad ul- *in Belgio.*  
timum periculum spectabat. Jámque Sanctissimum Viaticum pa-  
rabatur , cum unus è nostris ægrum rogavit , num placeret votum  
fieri Sancto Geroldo Martyri. Imò , subjecit ægrotus , *P. Joanni*  
*Francisco Regis , cujus tot miracula celebrantur :* nihilque cuncta-  
tus eundem invocat , glebæ ex ejus tumulo grana pauca in portio-  
ne sumit ; ejusdem reliquias è collo suspendit , certas preces quo-  
tidie recitandas vover , quibus addidere proprias collegii Patres ;  
Rectoris sui morbo mœsti. Somnus ægrum lenis demulsit ; som-  
num postero die secuta est integra valetudo. . Paucis diebus in-  
terjectis Fratrem domesticis in eodem collegio ministeriis addi-  
ctum , lateris dolor vehemens oppressit. Deploratum , ultimisque  
Sacramentorum subsidiis expiatum , subiit memoria Rectoris , au-  
xilium P. Joannis Francisci Regis , morbo recens liberati ; Beati no-  
men spei plenus inclamat , imaginem illius osculis lacrymisque per-  
fundit , & optata sanitate fruitur. Hæc gemina sanatio quàm in-  
tegra , tam subita , exitit.

Hæc per Belgium audita multorum fiduciam provocarunt. *Trajecti*  
Eodem anno soror Canonici Trajecti Superioris , æstuans obstina- *ad Mosam.*  
ta febris , cujus curationem medici desperaverant , imaginem Beati  
admovit pectori , & febrim eodem temporis puncto amovit. Men-  
se Junio ejusdem anni mercator Dukercanus , cum negotii causâ  
Bruxellis versaretur , occupatus maligna febris fuit. Ingravescente  
malo , desperata valetudine , ventum est ad ultima , & sacra mo-  
rientium remedia. : Cum extremo pæne spiritu conflictaretur ,  
mortem vicinam opperiens , promisit sacrificium in honorem servi  
DEI faciendum , & convaluit.

Cum DEUS æternis consiliis decrevisset , ut servo suo religio- *Roma.*  
sus aliquando cultus in Ecclesia Catholica tribueretur : idem illius  
sanctitatem in urbium principe ac religionis magistra , variis te-  
stamentis esse miraculis voluit. Duo tantum proferam , quorum  
veritatem planè compertam & exploratam habeo. Frater Guillel-  
mus *Coolfaët* , Societatis JESU adhuc superstes , schedam exaravit ,

Lib. VI. eique nomen suum propria manu apposuit, quam ex Italico sermone conversam hinc disertè repræsentò.

*P. Joannes Andreas Serra* (inquit) *Procurator Generalis Societatis nostræ, & cujus tunc Socius eram, lapsus est in gravem morbum, anno 1684. annum ipse agens quartum & sexagesimum, domi nostræ Professorum, Romæ. Ardens & assidua febris certum laboranti parabat exitium. Arcessiti medici nihil omisere quod opportunum expugnando morbo judicarent. Remedia vicit malum, & medentium spem evertit. Quo die negaverant ægrum unquam emerfurum, Pater Requesens, librorum Revisor pro Assistentia Italiæ, venit è collegio domum Professorum, eumque hortatus est ut patrocinium Patris Lanuzæ imploraret, Jesuitæ Siculi, qui magna sanctitatis opinione, ante paucos annos moriens, floruerat, cujus reliquiarum partem ipsi luculentam obtulit. Æger non magno pere assentiri visus, conticuit. Interjecto unius horæ spatio subire medici, & sacrum Viaticum, ægroto porrigi jusserunt. Mox cubiculo ad deliberandum egressi, rursus denuntiarunt actum esse. Dum inter se consultabant, Pater Calvo, qui Assistentiæ Galliæ negotia procurabat, ægrotum invisens, sermonem intulit de Beato Regis, suasitque ut ad eum confugiens promitteret se ter sacrificaturum in honorem SS. Trinitatis, si consanesceret. Auctor eidem etiam fuit ut infusum aquæ pulverem, de Beati sepulcro sumptum, hauriret. Utrumque fecit æger, & addidit, *si convalesco, aliud quod mihi modò venit in mentem, exequar.* Interim *P. Saraga* Hispanus, *P. Serræ* familiaris, qui frequens eum visebat, cubiculum ingressus, colloquebatur mecum (pergit narrare Frater Coolsaët) cum ægrotus, horâ post dimidiâ, quàm Beatum Regis invocaverat, clara & magna voce dixit: *Huc aliquis præstò sit cum cibo; esurio.* Hac voce perculsi, ægrotum suæ mentis non esse, & aliena loqui, credidimus. At ille nos hallucinari statim ostendit. Quippe, *Iterum dico ait, cedo, cibum: de me statuant ac pronuntient medici, ut lubet; sanum & incolumem esse me certò scio.* Postridie medicus *Piacenti* summo manè ad ægrum accedens explorato micantis arteriæ pulsu, cum febrim decessisse cognovisset, quæsitum num sacro Viatico fuisset instructus. Negarunt qui aderant, quia melius ægro factum erat. Miranti quid rei novæ tam brevi tempore accidisset, addiderunt, editum ab ægroto fuisse votum Beato Regis. Et ille; *Ab! cum tales medici, exclamat, curandos suscipiunt merbos, nihil mirum est eos, uti modò contigit, subi-**



*Subito ac perfecte sanari.* Narrationi clausulam hanc subjiçit F. Lib. VII

Coolsaët : Testor quæcumque retuli veritati esse consentanea. In quorum fidem chartam hanc subscripsi, quarto Kal. Majas anni 1713. Guillelmus Coolsaët Societatis JESU. P. Serra hunc in modum morbo liberatus, ter ad aram divinâ fecit hostiâ, in honorem SS. Trinitatis, uti voverat. Præterea imaginem B. Regis pingendam curavit, quam adhuc videre est in Romana Professorum domo.

Post aliquot annos idem P. Joannes Andreas Serra laboravit hydropisi letiferâ, quâ cum opprimeretur, dies quadraginta totidémque noctes in cathedra insomnes, præter nonnulla quietis intervalla, duxit. Crura primùm pestis aquosa inflavit, deinde stomachum, postremò pectus inundavit, ubi firmata & corroborata medicos impunè sprexit, qui una voce asseruerunt spem salutis nullam affulgere. At ægrotus, beneficii, per merita Beati P. Regis olim impetrati, memor, speravit adfuturam nihilo seciùs patroni cælestis opem. Ergo delatas ad se sacras ejus reliquias sæpe deosculatus, pectori & capiti venerabundus imposuit, ac leni subinde somno sopitus est. Sub mediam noctem ingens intercutis aquæ copia erupit, & medicorum, qui defunctum periculo Patrem attoniti affirmarunt, sententiam integra sanitas postidie secuta confirmarunt. Romana Professorum domus tota duplicis hujus miraculi testis fuit, neutriusque veritatem in dubium ab ullo fuisse revocatam superstites adhuc è nostris nonnulli mihi testati sunt. P. Joannes Andreas Serra vultum Servi DEI altera in tabella pingendum curavit, eamque misit Aretium, qua in urbe collegium Societatis tunc aperièbatur.

Angusta erat Europa gloriæ servi DEI : Oceanum transgressa, novum ad Orbem permanavit. Quebeci, Angelica *Brugiere da.* cum liberis careret, operam unâ cum marito, navabat virginibus DEO consecratis, quas vulgò appellant Hospitalarias. Ea caput lapidi, qui camini spiraculo instar frontis prætenditur, tam validè impegit, ut è vulnere magna vis sanguinis gravi cum dolore prorumperet. Mox vitiatu cruor, è cerebro defluens in stomachum, & purulento vomitu effusus, vitam in præcipiti esse monstravit, & sexto Idus Decembris 1695. desperata planè salus ægrotantis fuit. Sacrarum virginum una, præcipuo erga servum DEI studio affecta, certas illi novem dierum preces obtulit, ut laboranti femina propitius esse vellet. Quintus, è novenis, dies jam fluxerat, & morbo ingravescente, sacro inuncta erat oleo, medicis

Ddd

postri-

Lib. VI. postridie superstitem fore negantibus. Non abiecit animum virgo pro ægrota deprecatrix : quin potius eò majorem in spem erecta, quò spei minus ostendebatur, imaginem servi DEI è mulieris collo suspendit, cum exiguo tumuli pulvere in reliquiaria theca incluso ; perseveravitque supplicare, quamvis ægra quatrimum totum luctans cum morte, loci nihil precibus relinquere videretur. Jam exibat nonus precum votivarum dies, & exhausta viribus, doloribusque confecta, ruere ad certissimum interitum, recrudescente malo, coepit. Ecce autem sub mediam noctem clamorem immensum tollit : simul toto corpore intremis, manat è membris omnibus sudor, diris convulsionibus agitur, corde miserum in modum palpitante. Visi sunt ultimi illi naturæ deficientis natus. Itaque inserta in manus benedicta face, instabant piæ virgines, ut morientem idoneis sermonibus adjutarent, cum subito, attonitis omnibus, *Tollite*, exclamat sereno vultu, *tollite funebrem hunc apparatus ; vivo, sana sum*. Rogata quid accidisset novi, *Cum doloribus omnium gravissimis premerer*, inquit, *adesse visus est P. Regis, quem dum intentis oculis contempler, Macte*, ait, *vivis DEI beneficio, & mea deprecatione. Tum crucem, quam man gerebat, capiti meo leniter incussit : hinc ille, quem edidi, clamor*. Tantum effata, & in somnum placide caput demisit : quem cum reliqua cepisset nocte, evigilavit omnino sana, & in templum ad sacram mensam accessit. Continuo in monasterium effundi civitas ; obstupescere omnes, cum stare ac valere cernerent, quam pridie oppressam morbo, & supremum ad iter comparatam, norant. Sacras urbis ædes diebus insequentibus lustravit, ut debitas Numini gratias, & liberatori suo persolveret.

Goa, in  
India.

Ex America in Asiam, è Quebeco Goam transeo. Illuc quoque fama servi DEI sanctitatisque pervenit : & hinc mihi narrandi tot miracula finis esto.

Puellam dudum graves & assidui consumeabant morbi, omni spe convalescendi ademptâ. S. Francisci Xaverii opem sæpe imploravit, sed frustra ; perinde quasi Apostolus miraculorum gloriam in ipsa India partiri voluisset cum uno è suis fratribus, quem Apostolicæ suæ vitæ perfectissimum imitorem habuerat. Ergo, post invocatum B. Regis patrocinium, ægrota dum interesset rei divinæ, revocatas vires, morbos ad unum pulsos, seque omnibus liberatam incommodis læta sensit.

Quis verò perpetuam tot miraculorum seriem, à servi DEI obitu

obitu ad nostra usque tempora, illius meritis ac precibus tam con- Lib. VI.  
stanter editorum, considerans, divinam bonitatem non admirabi-  
tur, quæ religiosi viri, non alio quàm simplicis Missionarii nomi-  
ne insigniti, memoriam tam illustribus in utroque Orbe monu-  
mentis consecrare gaudet?

Armandus *de Bethune* Aniciensis *Agitur de*  
Episcopus, multis à Beato Regis beneficiis affectum se judicans, & *illo in Al-*  
populi adversus eum pietatem ac venerationem tot prodigiis accen- *bum San-*  
sam, in dies magis increbrescere videns, rationem inire cœpit, *torū re-*  
ferendo.

quemadmodum in Sanctorum numero collocari posset. Utque  
res è legibus & præscripto Sanctæ Sedis conficeretur, edixit anno  
1676. ut quæstio de viri sancti virtutibus & miraculis, è juris Ec-  
clesiastici formulis institueretur. Accidit interim ut ipsi ab Occi-

tanæ comitiis imponeretur provincia deferendi ad Regem com-  
mentarium de statu negotiisque regionis. Itaque curam istius

quæstionis & cognitionis commisit Melchiori *de Chabanes*, suo Ge-  
nerali Vicario. Ille, cum Jacobo *le Breton*, doctore Sorbonico,

& Mauritio *le Blanc* Juris Canonici doctore, legitima excepit te-  
stimonia civium Aniciensium, duorum & viginti, genere ac pro-

bitate præstantium, qui cum usi fuissent familiariter Patre Regis  
per annos complures, de illius vita pronuntiare distinctius pote-

rant. Illi, dicto ad sanctorum Evangeliorum codicem sacramen-  
to, testimonium perhibuerunt, de heroicis virtutum facinoribus,

quæ in servo DEI conspexerant: prolata insuper in medium fue-  
re miracula permulta, idoneis auctoritatibus comprobata. Qui-

bus peractis, Vicarius Generalis, cum adjunctis ipsi doctoribus,  
rem gestam in Acta rite perscripta retulit, quæ anno sequenti ad

sacram Rituum Congregationem ab Episcopo sunt missa. Hic  
aditus in causam patefactus excitavit studia civitatum, quæ servo

DEI peculiaribus quibusdam beneficiis erant obligatæ. Labora-  
tum ab iis diligenter fuit ut cælitibus annumeraretur. Litteras ad

Innocentium XII. dedere, quibus suffragati sunt Rex Christianissi- *Rex, Epi-*  
mus, Cardinalis Bonzius, viginti duo partim Archiepiscopi, par- *scopi, ci-*  
tim Episcopi, legati quadraginta urbium, & universa nobilitas Oc- *vitates,*  
citanæ. Innocentius XII. ut ad sacram Rituum Congregationem *proceres*  
*Occita-*

referretur causa, permisit, ac Ponentem nominavit (itâ vocant qui *gent Ca-*  
ejusmodi causas delectis iudicibus proponit, easque regit & guber- *noniza-*  
nat) Eminentissimum Cardinalem *Imperiale*. Hæc nominatio *tionem a-*  
*pud sum-*

fortunatum omen extitit negotii bene gerendi, quod sapientissi- *mum Pon-*  
mus Cardinalis non minori studio, quàm prudentiâ industriæque, *tificem.*

feliciter administravit. Ddd 2 Post

Lib. VI. Post excessum Innocentii XII. Clemens XI. viri sancti virtutibus permotus, itémque populorum summis precibus, ac præsertim Regis Christianissimi urgentis atque instantis impulsu, negotium dedit anno 1702. Archiepiscopo Viennensi, & Episcopis Aniciensi ac Valentino, quorum in dioccesibus diutius versatus est DEI famulus, ut de illius virtutibus accuratè cognoscerent.

*Examen virtutum B. Joann. Franc. Regi.* Tres illi præsules Apostolicâ muniti auctoritate, in rem præsentem venerunt; lustratisque locis in quibus Missiones obierat, ac testibus gravissimis & integerrimis rite atque ordine interrogatis, nova de virtutibus & miraculis viri sancti Acta conscripserunt. Hæc, itidem ut alia prius confecta, cum ad exactissimam severioris examinis trutinam fuissent expensa, & à Sacra Congregatione Rituum approbata, Pontifex provinciam dedit viginti circiter Cardinalibus, totidemque Consultoribus, tum Prælati, tum religiosi, ut expositas in Actis virtutes accuratè inspicerent ac ponderarent; ipse miraculorum examen aliud in tempus rejecit. Ab istis Cardinalibus & Consultoribus per annos decem plurimæ congregationes ordinariæ, atque extraordinariæ, sunt habitæ, ad præparandam atque explorandam causam: ab iisdem toto isto tempore severum examen institutum fuit ac rigidissima censura de factis, quæ in binis Actis erant exposita. Præterea Comes de Lambertinis, Fidei Promotor, Prælatus insigni eruditione ac vigilantia, dum suo munere impigre fungitur, sexcentas, nunc super factis, nunc super ipsis probationibus, difficultates comminisci, atque objicere; omnia excutere, omnia oppugnare, non destitit. Obijicienti responsum est pari diligentia: scripta scriptis opposita; nodis, quos alios ex aliis suggerebat, intexebatque, solutiones adhibita.

*Declarat summus Pontifex virtutes P. Regis gradum heroicum assecutus.* Post examen tam laboriosum, tam diuturnum, Pontifex Idibus Martiis 1712. totius negotii rationem reddi sibi iussit in Congregatione coram se indicta: in qua omnes Cardinales & Consultores, uno consensu renuntiaverunt virtutes viri sancti, quæ exponebantur in duobus Actis, videri sibi planè probatas, & gradum heroicum assecutas. Pontifex non contentus illorum audivisse suffragia, rem per se se attentius consideravit & expendit: ac demum ope divina implorata, Sancto Paschatis die, sexto Kalendas Apriles anni 1712. post divina mysteria, quæ solet pietate, in Basilica Principis Apostolorum celebrata, declaravit edito solemnî Decreto Patrem Joannem Franciscum Regis tres virtutes Theologicas Fidem, Spem, & Caritatem, nec non quatuor Cardinales, Pruden-

dentiam, Justitiam, Fortitudinem, ac Temperantiam, in gradu Lib. VI. heroico exercuisse. Concepta Decreti verba subjicio.

# DECRETUM

De virtutibus B. Regis editum die 27.

Martii 1712.

*Festo Paschatis Resurrectionis Domini Nostri JESU CHRISTI.*

**S**ANCTISSIMUS DOMINUS NOSTER, absoluto sacrosanctissime à Sanctitate sua celebrato in Basilica Principis Apostolorum, statim ac ad suas solitas Mansiones Palatii Vaticani reversus fuit, advocavit ante prandium Dominum Advocatum Prosperum de Lambertinis, Fidei Promotorem, ac me infra scriptum Protonotarium Apostolicum, modò exercentem Vices R. P. D. Secretarii Congregationis Sacrorum Rituum, nobisque dixit, elapsis diebus, videlicet die XV. currentis Mensis propositam fuisse in Congregatione habita coram Sanctitate sua Causam Viennensem in Gallia Beatificationis, & Canonizationis Ven. servi DEI Joannis Francisci Regis Presbyteri Societatis JESU, discussioque in ea dubio: An constet de Virtutibus ejusdem servi DEI tam Theologalibus, scilicet Fide, Spe, & Charitate, quàm Cardinalibus, nimirum Prudentiâ, Justitiâ, Fortitudine, & Temperantiâ, earumque respectivè annexis, in gradu heroico, in casu, & ad effectum, de quo agitur: Sanctitatem suam distulisse resolutionem, ad effectum exposcendi prius in re tam ardua Divinum lumen. Cum autem id Sanctitas sua jam fecerit, ac potissimum hac die Resurgentem Dominum humiliter exoraverit, ut cælesti claritate mentem suam illustrare dignaretur: quacumque idcirco majori cunctatione postpositâ, suffragiis in eadem Congregatione latis inhære se velle declaravit, adeoque super præmisso dubio, promulgari mandavit responsum affirmativum: Constare de Virtutibus tam Theologalibus, quàm Cardinalibus, earumque annexis, in gradu heroico, in Casu &c. & ita, &c.

G. CARD. CARPINEUS.

Loco † Sigilli.

C. Collicola Protonotarius Apost. modò exercens vices

R. P. D. Secretarii Congr. Sac. Rituum.

Ecc

Hoc

**Lib. VI.** Hoc Decretum ad B. Joannis Francisci Regis gloriam eò præclarius est, quòd Apostolica Sedes ab annis ferè quinquaginta nullius servi DEI virtutes gradum heroicum adeptas pronuntiavit, licèt sacra Rituum Congregatio per tot annos multorum insignium virorum res gestas examinaverit, qui cum opinione sanctitatis decesserunt.

*Examen  
miraculo-  
rum.*

Hoc Decreto de virtutum B. Regis excellenti præstantia promulgato, jussit Pontifex, ut ad miracula examinanda procederetur. Quo loco temperare mihi non possum, quin de Protestantium Romanam Ecclesiam iniquissimè accusantium calumnia expostulem, cujus criminantur facilitatem & indulgentiam in Sanctorum horrore hominibus probis deferendo, & numero cælitum parùm cautè ac prudenter augendo. Ad calumniam hanc diluendam satis est docere, ab Alexandro III. qui circa medium seculum XII. in Sancti Petri solio sedebat, hoc est ab annis ferme sexcentis, vix numerari septuaginta fidei catholicæ cultores, quibus sacri honores decreti fuerint; cùm antea, & jam indè à primis Ecclesiæ temporibus, Episcopi cum populo magnum eorum numerum singulis seculis cælo assererent.

Huc adde quòd, cùm agitur de tribuendo cuiquam servo DEI sanctorum cultu, Sedes Apostolica tam severum instituit examen ad librandas suis ponderibus & dijudicandas ejus virtutes, ut quamvis esset peculiari Numinis auxilio destituta, falli tamèn & errare tunc, etiamsi ad humanæ tantùm prudentiæ amussim res perpendatur, nullo pacto posset. Quippe non contenta vulgari virtute in iis, quos cooptat in ordinem Sanctorum, heroicam requirit; & quamvis ad probandam hanc virtutis excellentiam adhibeat fidem, oculos, gravitatem, & jusjurandum integerrimorum testium, non satis id argumenti esse putat, nisi testimoniis humanis accedant divina; nisi vocibus hominum heroica facta testantium, ipsius DEI vox, loquentis per miracula, suffragetur.

*Quanta  
severitas  
adhibea-  
tur in isto  
examine.*

Neque tamen quisquam existimet omnia promiscuè miracula & sine delectu, recipi: nullum cautionis & industriæ genus præmittitur ut à falsis vera discernantur. E centum miraculis Congregationi sacræ ante aliquot annos oblati ad insignem virum numero sanctorum adscribendum, unum duntaxat approbatum fuit: neque ulterius progredi antè placuit, quàm DEO placuisset nova miracula, quibus judicium sanctæ Sedis firmaretur, operari. Non pigebit hic attexere quod accepi ab homine, qui propter dignita-

tem

tem & auctoritatem multorum instar testium esse potest. An- Lib. VI.  
 glus nobilis cum Romam venisset, quidam à Romanis Ecclesiæ pro-  
 ceribus, quos Prælatos vulgò vocant, veteri amicitia cum illo jun-  
 ctus, legenda ipsi præbuit Acta, in quibus complura miracula i-  
 doneis fulta probationibus, erant perscripta. Legit hæreticus at-  
 tentè, nec sinè voluptate: mox libellum amico reddens, *Egregiam*  
*sanè, inquit, ac planè certam probandi miracula rationem. Si*  
*omnium, que ab Ecclesia Romana prædicantur, veritas tam certis,*  
*tam authenticis, nixa fundamentis esset, nihil cause diceremus,*  
*quin iis omnino assentiremur; eoque pacto effugeretis ludibria &*  
*jocos, quibus vestra illa, que venditatis, miracula cavillamur. At-*  
*qui scito,* respondit Prælatus, *ex istis que tibi tam probè videntur*  
*fundata, miraculis, nullum à sacra Rituum Congregatione appro-*  
*batum fuisse, quoniam non satis probata sunt visa.* Calvinianus  
 inexpectato responso attonitus, fateri non dubitavit, neminem, ni-  
 si perversa & cæca præventum opinione, posse prudentiam & æ-  
 quitatem Romanæ Sedis, in sanctis cælitum numero adscribendis,  
 desiderare; nec sibi unquam venisse in mentem suspicari tantam  
 cautionem ac diligentiam ab ea, in examinandis ipsorum miracu-  
 lis, adhiberi potuisse.

Ut ad B. Joannis Francisci Regis miracula redeamus, illustris-  
 simus Fidei Promotor, omnem rigidissimæ censuræ ad ea obser-  
 vanda & enucleanda accurationem attulit. Viginti circiter Cardinales ac totidem consultores, quæ Prælati, quæ Religiosi toto tri-  
 ennio in iisdem singulari studio curaque ponderandis & excutien-  
 dis defudarunt: nec nisi post tot examina, tot annos, tot censu-  
 ras, summus Pontifex approbavit ex iis, quotquot erant ad Beatifi-  
 cationem Servi DEI necessaria.

## DECRETUM

### De Miraculis B. Regis.

**D**ie 28. Aprilis 1715. Dominicâ in Albis horâ circiter 16. *Decretum de miraculis B. Regis.*  
 Sanctissimus D. Noster Clemens Divinâ Providentiâ Pa-  
 pa XI. in Palatio Quirinali advocavit R. P. D. Prosperum  
 de Lambertinis Fidei Promotorem, & me infra scriptum Pro-Se-  
 cretarium Congregationis Sacrorum Rituum, nobisque dixit, ela-  
 psis

Lib. VI. plis diebus, videlicet die 2. labentis mensis, in Congrégatione habitâ coram Sanctitate sua propositam fuisse à Reverendissimo D. Cardinali Imperiali causam Viennen. in Gallia Beatificationis, & Canonizationis Ven. Servi DEI Joannis Francisci Regis Presbyteri Professi Societatis JESU, discussoque in ea dubio: *An constet de miraculis post obitum in casu, & ad effectum, de quo agitur.* Sanctitatem suam audivisse quidem omnium suffragia, sed distulisse resolutionem, ut prius de more in tam ardua deliberatione Divinam opem imploraret. Nunc verò cum id jam peregerit, ac præsertim præteritis diebus majoris hebdomadæ, ac successivè Paschalibus Festis, supremum luminum Patrem ferventiùs exoraverit ut cælesti claritate mentem suam illustrare dignaretur, declaravit, se nolle diutiùs differre publicationem suæ resolutionis, adeoque promulgari jussit Decretum, in quo pronunciavit: *Constare de duobus miraculis tertii generis, nempe de primo repentine liberationis Joanne Maria Peret, Monialis à diuturna inferiorum artuum ad motum impotentia, & hydrope tympanite; ac de quarto instantaneæ sanationis Joannis Gasparis Montercymar Amiciensis ab enormi bernia.* Et ita, &c.

Fr. Card. de Abdua Præfectus.

Loco † Sigilli

N. M. Tedeschi Episcopus Liparitanus S. Rituum Congregationis Pro-Secretarius.



## DECRETUM De Beatificatione Beati Joannis Francisci Regis.

Decretum  
de Beatificatione  
B. Joan.  
Francisci  
Regis.

**C**um postquam aliàs, nempe die XV. Martii 1712. in Congregatione Generali Sacrorum Rituum habitâ coram Sanctissimo Domino Nostro, Domino Clemente Divinâ Providen-



videntiâ Papâ XI. propositâ per Reverendissimum D. Cardinalem Lib. VI Imperialem Causâ Viennens. in Gallia, Beatificationis, & Canonizationis Venerabilis Servi DEI JOANNIS FRANCISCI REGIS Presbyteri Professi Societatis JESU, discussum fuisset dubium: *An constaret de Virtutibus ejusdem servi DEI tam Theologalibus, scilicet Fide, Spe, & Charitate; quàm Cardinalibus, nimirum Prudentiâ, Justitiâ, Fortitudine, & Temperantiâ, earumque respectivè annexis, in gradu heroico, in casu, & ad effectum &c.* Sanctitas sua die 27. ejusdem Mensis Martii Resurrectioni Dominicæ sacrâ, decreverit *Constare de virtutibus tam Theologalibus, quàm Cardinalibus in gradu heroico &c.* Ac subinde, postquam scilicet prius, nempe die secundâ Aprilis 1715. in ipsa Generali Congregatione habita coram Sanctitate sua propositum fuisset in prædicta Causa aliud dubium: *An constaret de Miraculis post obitum ipsius Servi DEI in casu, & ad effectum &c.* eadem Sanctitas sua die 28. prædicti Mensis Aprilis pronunciaverit: *Constare de duobus Miraculis tertii generis, nempe de Primo repentina liberationis Joannæ Mariæ Peret Monialis à diuturna inferiorum artuum ad motum impotentiâ, & hydrôpe tympanite; ac de Quarto, instantaneæ sanationis Joannis Gasparis Montercymar Aniciensis ab enormi bernia.* Demum verò iterum habitâ Congregatione Generali præfarâ coram eodem Sanctissimo Domino Nostro die tertiâ Martii currentis anni, in eâque per prædictum D. Cardinalem Imperialem proposito dubio: *An stante approbatione Virtutum, & duorum Miraculorum tuto præcedi posset ad ipsius Servi DEI Beatificationem.* Dicta Congregatio unanimi omnium consensu *affirmativè* respondendum esse censuerit; verum dictus Sanctissimus Dominus Noster resolutionem de more distulerit, ut in re tam gravi, & maxima cum maturitate pertractandâ, antequam quidquam decerneret, tam suis, quàm aliorum precibus Divini luminis opem imploraret.

His jam abunde impletis, Sanctitas sua, accitis infrâ scriptâ die coram se R. P. D. Prospero de Lambertinis Fidei Promotore, ac me prædictæ Congregationis Secretario, ut memoratus Servus DEI JOANNES FRANCISCUS REGIS piè ac palàm à Christi Fidelibus coli possit, ac Societas JESU, quæ illum protulit, de Ecclesia Catholica cæteroquin optimè merita, præclaro hoc addito lumine, in dies magis illustretur, præsens Decretum Beatificationis ejusdem JOANNIS FRANCISCI per litteras Apostolicas in

Fff

for-

Lib. VI. formâ Brevis cum consuetis Indultis quodcumque faciendæ, expediti, & publicari mandavit. Hac die VII. Maji 1716.

F. Cardinalis de Abdua Præfectus.

Loco † Sigilli.

N. M. Tedeschi Episcopus Liparitanus  
Sac. Rit. Congr. Secr.



*SANCTISSIMI DOMINI NOSTRI*  
**CLEMENTIS**  
Divinâ providentiâ  
**PAPÆ XI.**

Beatificatio servi DEI JOANNIS FRANCISCI Regis Sacerdotis professi Societatis JESU,  
ejusque Missæ, & Officii certis in locis  
concessio.

**CLEMENS**  
**PAPA XI.**

*Ad perpetuam rei memoriam.*

*Beatificatio B. Jo-  
an. Franc.  
Regis.*

**V**IROS gloriosos, qui divites in virtute, adepti sunt gloriam in conversatione gentis, hoc est; sanctos, & electos Domini, quos clarioribus multiformis suæ gratiæ charismatibus exornavit Divina dignatio, laudandos esse monet Spiritus Sanctus. Decet siquidem eis, quos æternus Judex immarcescibilis gloriæ coronâ donat in cælis, & quorum Sanctitatem sequentibus signis testatam facit in terris, debitæ venerationis cultum etiam à fidelibus exhiberi, ut sapientiam ipsorum narrent popu-

populi, & laudem eorum nuntiet Ecclesia. Hos inter, cùm lon- **Lib. VI.**  
 gè, latèque refulserit DEI servus Joannes Franciscus Regis Sacer-  
 dos Professus Societatis JESU, qui nimirum virtute indutus ex al-  
 to, portansque jugum ab adolescentia sua, pœnitentiæ austerita-  
 tem cum innocentia candore usquequaque conjunxit: ac jugiter  
 dilatante cor ejus Spiritu Sancto, in omnibus exhibuit seipsum si-  
 cut DEI Ministrum, in multa patientia, in tribulationibus, in ne-  
 cessitatibus, in angustiis, in plagis, in laboribus, in vigiliis, in je-  
 juniis, in scientia, in suavitate: præcipuè verò in charitate non fi-  
 cta, quâ in DEUM, & proximos mirabiliter æstuavit; Apostoli-  
 ci muneris, quod Nos, viribus licèt, & meritis longè impares, ge-  
 nere voluit Altissimus, ratio exigit, ut illius honorem ac veneratio-  
 nem, ad Omnipotentis DEI gloriam, Catholicæ Ecclesiæ decus,  
 Christianique populi spiritualem ædificationem, quantum Nobis ex  
 alto conceditur, promovere studeamus. Cùm itaque maturè, di-  
 ligentèrque discussis, atque perpensis per Congregationem Vene-  
 rabilium Fratrum nostrorum S. R. E. Cardinalium Sacris Riibus  
 præpositorum processibus rite, ac rectè confectis super vitæ San-  
 ctitate, & Virtutibus heroicis, quibus idem Servus DEI Joannes  
 Franciscus multipliciter claruisse, nec non miraculis, quæ ad ejus  
 intercessionem, & ad manifestandam hominibus illius sanctitatem  
 à DEO patrata fuisse asseriebantur, eadem Congregatio coram no-  
 bis constituta, auditis etiam Consultorum suffragiis, uno spiri-  
 tu, unaque voce censuerit posse, quandocumque Nobis videretur,  
 prædictum servum DEI BEATUM declarari, cum consueris indul-  
 tiis. Hinc est, quòd nos piis, atque enixis quamplurium Vene-  
 rabilium Fratrum Archiepiscoporum, & Episcoporum Regni Gal-  
 liarum, ac potissimum Provinciæ Occitanæ, nec non dilectorum  
 filiorum Magistratum, Procerum, & Populorum Provinciæ hu-  
 jusmodi, ac totius insuper Societatis JESU supradictæ, supplicatio-  
 nibus (quas dudum etiam claræ memoriæ Ludovicus XIV. dum  
 viveret, Francorum Rex Christianissimus, devotarum suarum pre-  
 cum accessione roboraverat) Nobis super hoc humiliter porrectis  
 paternâ benignitate annuentes, de memoratorum Cardinalium  
 consilio pariter, & assensu, auctoritate Apostolicâ, tenore præ-  
 sentium indulgemus, ut idem DEI Servus JOANNES FRANCI-  
 SCUS Regis in posterum BEATI nomine nuncupetur, ejusque  
 corpus, & Reliquiæ venerationi fidelium (non tamen in processio-  
 nibus circumferenda) exponantur; imagines quoque radiis, seu

**Lib. VI.** splendoribus exornentur, ac de eo recitetur Officium, & Missa celebretur de Confessore non Pontifice singulis annis, juxta Rubricas Breviarii, & Missalis Romani, die XXIV. Maji, cum dies XXXI. Decembris, quâ ipse Servus DEI spiritum Creatori reddidit, & aliæ plures illam subsequentes, ut notum est, impeditæ reperiuntur. Porro recitationem Officii, & Missæ celebrationem hujusmodi fieri concedimus in locis duntaxat infra scriptis, videlicet; in Oppido de *Foncouverte* Narbonensis Diocesis, in quo dictus Servus DEI natus est, in Pago *Laloveſci*, Viennensis Diocesis, in Delphinatu, unde ad cælos evolavit, & ubi venerabile ejus corpus requiescit, ac in Civitate Aniciensî, in qua plurium annorum spatio, & penè usque ad suum obitum habitare consuevit, ab omnibus utriusque sexûs Christi fidelibus tam Sæcularibus, quàm Regularibus, qui ad horas Canonicas tenentur, nec non in universa Societate præfata, & quantum ad Missam attinet, etiam à Sacerdotibus ad Ecclesias ejusdem Societatis confluentibus. Præterea primo duntaxat anno à datis hisce literis, & quoad Indias à die, quo eadem literæ illuc pervenerint, inchoando, in Ecclesiis Oppidi, Pagi, Civitatis, & Societatis hujusmodi respectivè solemnia Beatificationis ejusdem Servi DEI cum Officio, & Missâ sub Ritu Duplici majori, die ab Ordinariis respectivè constitutâ, & intra sex menses promulgandâ, postquam tamen in Basilica Principis Apostolorum de Urbe celebrata fuerint eadem solemnia: pro quare, supradictam diem XXIV. currentis Mensis Maji assignamus, pariter celebrandi facimus potestatem. Non obstantibus constitutionibus, & ordinationibus Apostolicis, ac decretis de non cultu editis cæterisque contrariis quibuscumque. Volumus autem, ut earundem præsentium literarum transumptis, seu exemplis etiam impressis, manu Secretarii prædictæ Congregationis Cardinalium subscriptis, & sigillo Præfecti ejusdem Congregationis munitis, eadem prorsus fides ab omnibus; & ubique tam in judicio, quàm extra illud habeatur, quæ ipsis præsentibus haberetur, si forent exhibitæ, vel ostensæ. Datum Romæ apud Sanctam MARIAM Majorem, sub Annulo Piscatoris, die octavâ Maji MDCCXVI. Pontificatûs Nostri Anno XVI.

Fr. Card. Oliverius.

IN-

# INDEX.

## LIBER I.

- B.** *Joannis Francisci Regis ortus, patria, parentes.* pag. 2  
*Ejus incolumitas Superis est cura.* p. 3  
*Mater sancte puerum educat.* ibid.  
*Prima litterarum studia.* ibid.  
*Morum ejus integritas.* p. 4  
*Ejus precipua pietas erga Beatam Virginem.* p. 5  
*Gravi periculo liberatur.* ibid.  
*Ejus sollicitudo ad instillandam discipulis pietatem.* ibid.  
*In morbum incidit.* p. 6  
*Vocatur ad Societatem JESU.* ibid.  
*Tirocinium vita religiosa ponit Tolosa, anno 1616.* 7  
*Vota Religiosa nuncupat. Studet Philosophia.* p. 9  
*Studii asperitatem, precationis suavitate temperat.* p. 10  
*Sedula religiosarum legum observandarum cura.* ibid.  
*In pagis concionatur insigni cum fructu.* p. 11  
*Litteras humaniores docet Anicii anno 1625.* p. 12  
*Singulari cura discipulos ad litteras & pietatem instituit.* ibid.  
*Eosdem agrotos, pauperesque omni ope subleuat.* p. 13  
*Unum e suis discipulis gravi morbo liberat.* ibid.  
*Discipulis exemplo vita pralucet.* ibid.  
*Illum discipuli ut Sanctum venerantur.* p. 14  
*Diebus Dominicis ac festis ruri concionatur, ac docet.* p. 15  
*Theologia cursum auspicatur, Tolosa an. 1628.* ibid.  
*Sacris Ordinibus initiatur, anno 1630.* p. 16  
*Obsequio laborantium peste se devovet.* p. 17  
*Tertium Tirocinii annum obit. 1631.* p. 18  
*Missionem in patria instituit magno cum fructu.* ibid.  
*Ejus in pauperes caritas.* ibid.  
*Littera P. Provincialis ad Praepositum Generalem, Patri Regis perhonorifica.* p. 20

*Ad sacras Missiones totus in perpetuum applicatur.* p. 21

## LIBER II.

- Missiones inchoat à Montepessulano. 1631.* p. 22  
*Ejus ratio concionandi.* p. 23  
*Pauperum & agrotorum cura.* ibid.  
*Mulierem haeticam Ecclesia restituit.* p. 25  
*Feminas complures profligata vita ac fama revocat ad bonam frugem.* ibid.  
*Domum feminis respicientibus parat.* p. 26  
*Missio Sumeriis; ac per totam Lavagniam, exeunte anno 1631.* 27  
*Quem in Missionibus obeundis ordinem servaret.* ibid.  
*Ejus concionum Euangelica simplicitas reprehenditur.* p. 28  
*Perspecta sanctitas omnium animos illi conciliat. Mira patiendi suis.* p. 29  
*Fructus aberrimos e Missionibus colligit Sumeriis.* p. 30  
*Aedem sacram à vastitate defendit insigni fortitudine.* ibid.  
*Gravem contumeliam latius accipit.* p. 31  
*Haeticus centurio ejus humilitatem laudat.* p. 32  
*Deplorandus Vivariensis diocesis status, cum eam excolere P. Regis est aggreffus.* p. 33  
*Diocesim Vivariensem cum Episcopolostrat, Anno 1633.* p. 35  
*Comitem de la Morthe perfectioris vita studio accendit.* p. 37  
*Alterum nobilem ad perfecta virtutis culmen erigit.* p. 38  
*In mores parochorum emendandos incumbit.* p. 40  
*Ejus solertia in reducendis ad frugem parochis deterioribus.* ibid.  
*Collecti ab eo fructus in Diocesi Vivariensi.* p. 41  
*Primaria femina catholica religioni restituta.* p. 42  
*Nonnulli Episcopum Vivariensem ab eo alienare tentant.* p. 43  
*Adduci non potest ut impositas sibi calumnias refellat.* p. 44  
 Epi-

Episcopus ejus humilitate mirum in modum delectatur. *ibid.*  
 A plerisque viris probis defenditur, ac praesertim ab Episcopi Vicario. p. 45  
 Publicè laudatur ab Episcopo. p. 46  
 Canadensem Missionem à Praeposito Generali postulat anno 1634. p. 47  
 Oppida Comitit de la Mothe variis Missionibus excolit. p. 48  
 Urbem Cbeylardum à vitiis & erroribus purgat, anno 1635. incunte. p. 49  
 Obstructis nivium copiâ itineribus, cogitur tres totas hebdomadas in loco deserto consistere. p. 50  
 Missio Lachai & in finitimis locis. *ibid.*  
 Quid sentiret Comes de la Mothe de illius virtute, ac Missionibus. p. 51  
 Rogatus ab Episcopo Valentino, Missionem ad Fanum S. Agripiani suscipit. p. 54  
 Missionem Canadensem, alteris litteris ad Praepositum Generalem datis, flagitat. *ibid.*  
 Ad Fanum S. Agripiani profectus itinere difficillimo, inde zizania vitiorum evellit 1636. p. 55  
 Heroica patientia. *ibid.*  
 Missio in oppido Sancti Andrea de Fargas, & finitima regione. p. 56  
 In sacrorum ministeriorum pio tumultu, praesente DEO & arctissime conjuncto semper fruitur. p. 57  
 Missio in pago Marlbes, exeunte anno 1635. p. 58  
 Incommoda & pericula in itinere exhausta. *ibid.*  
 Aegroti duo admotis ejus pallii frustis persanantur. p. 59  
 Elogium servo DEI à parochio Marlben-si tributum. *ibid.*  
 Negatam sibi Missionem Canadensem mactus audit. p. 61

### LIBER III.

B. Joannis Franc Regis fructuosi labores in urbe Aniciensi. Quis tunc urbis status, qui mores. p. 62  
 Illius conciones Anicii, & earum successus. p. 63  
 Oratori praclaro non placet concionantis Regis Evangelica simplicitas. p. 64

Provinciae Praepositus laudat ejus sanctam & simplicem facundiam. *ibid.*  
 Sanctitate vita sanctitatem ministerii sui tuetur, & illustrat. p. 65  
 Benedictinus Apostolicam ejus vitam praedicat. p. 66  
 Egregia illius in pauperes caritas. *ibid.*  
 Piarum sodalitatem matronarum instituit, sublevandis pauperibus. p. 67  
 Totius urbis indigentiam levat. p. 68  
 Praecipua ejus erga illos pauperes caritas, quos paupertatis pudor premebat. *ibid.*  
 Primarias mulieres plerasque unum in coetum, ad vinctos sublevandos, colligit. p. 69  
 Pauperes omnes alendos suscipit in summa difficultate annonae. *ibid.*  
 DEUS semel, iterum, ac tertio, frumentum ab eo collectum multiplicat. p. 70  
 Ejus in aegrotis ac morientibus adjuvandis sollicitudo. p. 72  
 Puellam Nobilem de salute animae periclitantem, ad sanctè moriendum comparat. *ibid.*  
 Ejusdem studium in sublevandis aegrotis maxime destitutis. p. 73  
 Rarum exemplum heroicae caritatis. *ibid.*  
 Plures aegrotos morbis liberat. p. 75  
 Solertia in curandis animarum morbis. p. 78  
 Improbum, publica laborantem infamia, expugnat. p. 79  
 Ejus caritas in reum multorum scelorum, ac poenitentem. *ibid.*  
 Multos ad bonam frugem lenitatis illucio adducit. p. 80  
 Multos improbos prudenti severitate debellat. p. 82  
 Contumeliosam in DEUM verborum impietatem acerrimè insectatur. p. 83  
 Debitam sacris adibus venerationem contra impios tuetur. p. 84  
 Rarum exemplum patientiae. *ibid.*  
 Assiduum, & acre, cum impudicitia bellum gerit. p. 85  
 Morti se objicit ut puella pudorem in tuto collocet. p. 87  
 Perditas mulieres innumeras in viam salutis revocat. p. 88

Do-

*Domum feminis penitentibus recipiendis comparat.* p. 89  
*Reſtor collegii ut iſta domus, Refugium vulgò dicta, ponatur agre annuit.* p. 90  
*Refugium oppugnatur.* p. 91  
*Regis juffus Refugii curam deponere, obſequitur.* p. 92  
*Ejus patientiâ exercet Reſtor, & illuſtrat.* ibid.  
*Refugii curam reſumit, eique ultimam imponit manum.* p. 94  
*Refugium tutari, etiam propoſito periculo vita, parat.* p. 95  
*Dum peccantes à vitio revocat, gravia improborum odia, & opprobria, ſuſtinet. Ejus heroica fortitudo.* p. 96  
*Malè multatur. Inſidia ſtruuntur ejus vitæ.* ibid.  
*Alapà percutitur.* p. 97  
*Peſſimè verbis & verberibus accipitur.* p. 98  
*Contumeliis & injuriis atrociter obruitur.* ib.  
*Quid egerint improbi, ut eū Aniciopellerent.* 99  
*Quàm forti animo procellam hanc tulerit.* 101  
*Ejus patrociniū collegii, Reſtor ſuſcipit; præſertim apud Præpoſitū Generalē.* 102  
*Provincia Præpoſitus Romam ſcribit de P. Regi, ſumma cum laude.* p. 103  
*Res ad fructum animarum bene ac feliciter Anicii geſta. Eum civitas ut ſanctum veneratur.* 104  
*Sæpe in mentis exceſſum rapitur. Animum ſenſus arcanos introſpicit.* 105  
*Prophetia dono futura proſpicit ac prædicit.* ib.  
*Quanti fieret ab Anicienſi Epifcopo, & ejus Vicario Generali.* 109

## LIBER IV.

*Oppidum Fay, & vicina loca, Miſſionibus excolit, 1636.* 110  
*Duobus cæcis videndi ſenſum reſtituit.* 111  
*Concuſſus ingens ad ejus conciones. Earum fructus.* ibid.  
*Civem publico flagitio infamem revocare conatur à ſcelere.* 112  
*Pertinacis improbi pœna præſens.* 113  
*Marlenſem Miſſionem inchoat exeunte anno 1637.* 115  
*Teſtimonium Marlenſis parochi de vita ejus Apoſtolica.* 116  
*Parochus fruſtrà, conatur efficere ut modum labori, & corporis afflictationibus, imponat.* ibid.

*Jubetur obedire parochi.* 117  
*Studium orationis; mentis exceſſus.* ibid.  
*Energumenum liberat.* ibid.  
*Multa alia prodigia patrat in Marlenſi pago.* 118  
*Varios pagos & oppidula luſtrat eruditque.* 119  
*Ejus laborem immodicum parochus Fourcii reprehendit.* 120  
*Miſſio in pago Montereguardo per biennem anni 1638.* ibid.  
*Dominam de Romezin Eccleſiæ Catholica reſtituit.* 121  
*Teſtimonium Ludovica de Romezin de ſanctitate B. Regis.* 126  
*Miſſianes circa Montemregardum exeunte anno 1639.* 128  
*Miſſio in Montefalconis initio anni 1640.* ibid.  
*Devovet ſe obſequio peſte laborantium.* 129  
*In mortis diſcrimen promiſcûe ſe conjicit.* ib.  
*Jubetur à Parochi curam laborantium deponere.* 130  
*Oppidum maſſiſſimus deſerit.* 131  
*Suis precibus urbem peſtilentiâ liberat.* ibid.  
*Peſte laborantibus operam navat in Montereguardo.* ibid.  
*Montefalconis repetit, intermiſſamque Miſſionem inſtaurat.* 132  
*Miſſianem Montisfalconis ruſſum abrumperè cogitur.* ibid.  
*Obtinet à Præpoſito Generali Societatis facultatē ſex meſes collocandi quotannis in ruſticanis Miſſionibus.* ibid.  
*Cætum Miſſionariorum & ſodalitatem conſtare meditat.* 133  
*Inſtaurat Miſſionem Montisfalconis, autumno anni 1640.* 135  
*A Montefalconis tranſit Rocullas, & Veirinum.* 136  
*Divino lumine colluſtratus imminentem ſibi mortem cognoviſcit.* 137  
*Ad mortem ſe comparaturus, in ſacram dierum aliquot ſolitudinem ſecedit.* 138  
*Laloveſcum petit itinere difficillimo.* 139  
*Pernoctat in tugurio ſemiruto, ac lateris dolore gravi corripitur. Miſſionem tamen inchoat Laloveſci.* 140  
*Noviſſimi ejus & immenſi labores: illum anima ſapius deficit.* ibid.  
*Totius vitæ noxas ſacra confeſſione purgat. Singularis ejus innocentia.* 141

Novissimis Sacramentis rite munitur.	ibid.
JESUS, & MARIA se videndos mori-	
enti præbent.	142
Moritur: magno sui desiderio apud om-	
nes relicto.	ibid.
Publica ejus, post obitum, veneratio.	143
Urbis Aniciensis luctus de morte servi Dei.	144
Patrum listera ad Præpositum Generalem	
de ejus morte, ac virtutum fama.	145

## LIBER V.

Ejus caritas erga DEUM.	146
Ejus intima cum DEO conjunctio.	148
Ejus pietas erga sacrosanctam Eucharistiā.	149
Spes ejus in divina bonitate ac potentia.	150
Zelus animarum.	153
Ejusdem in pauperes caritas.	155
Mortificatio, & amor crucis.	157
Mortificatio interior.	158
Ejusdem animi submissio.	159
Paupertas Evangelica.	162
Obedientia studium.	163
Cordis mundities & castimonia.	165

## LIBER VI.

Ejus tumulus miraculis & concursu po-	
puli celebratur.	168
Episcoporum de illius miraculis testimo-	
nia.	ibid.
Religiosam virginem hydrope ac paratyfi	
laborantem, jamque cum proxima	
luctantem morte, sanat.	171. & 172
Triplicem berniam civis Aniciensis sanat.	172
Mulieres duas, cecitate: tertiam imme-	
dicabili carcinomate, liberat.	173
Strumosi juvenis sanatio.	174
Puella membris omnibus capta sanatur	
Lalovesci.	ibid.
Virginis DEO consecrata varii morbi mi-	
ro modo depulsi.	176
In eadem urbe feminis duabus sanitas	
mirabiliter restituta.	178
Varii morbi in Agro Vivariensi curati.	179
Filius Comitis du Fay de la Tour Mau-	
bourg sanatus.	180

Ægroti complures tumuli B. Regis puber-	
re sanati.	186
Prodigia edita Lalovesci, cum divina res	
feret ad Beati tumulum.	ibid.
Variorum sanatio morborum, invocato	
DEI servo.	187
Varia Miracula contactu ejus vestium	
patrata.	187
Miracula in diversis Provinciis edita.	188
In diocesi Viennensi.	ibid.
Turnonii.	ibid.
Avenione.	ibid.
Lugduni.	189
In Alvernia.	190
Vesuntione.	191
Albiga.	192
In diocesi Apamienfi.	193
In agro Forensi.	ibid.
Lutetia.	ibid.
Nanceii.	194
In Pedemontio.	ibid.
Bruxellis, in Belgio.	195
Trajecti ad Mosam.	ibid.
Roma.	ibid.
In Canada.	197
Goa, in India.	198
Agitur de illo in Album Sanctorum refe-	
rendo.	199
Rex, Episcopi, civitates, proceres Occita-	
nie, urgent Canonizationem apud	
summum Pontificem.	ibid.
Examen virtutum B. Joan. Franc. Regis.	200
Declarat summus Pontifex virtutes P. Re-	
gis gradum heroicum affectus.	ibid.
Decretum de virtutibus B. Regis.	201
Examen miraculorum.	202
Quanta severitas adhibeatur in isto exa-	
mine.	ibid.
Decretum de miraculis B. Regis.	203
Decretum de Beatificatione P. Joan-	
nis Franc. Regis.	204
Beatificatio P. Joan. Franc. Regis.	206

ENCLOSURE (O) ENCLOSURE

F I N I S.